


詞 綜




1206



朱彝尊纂

詞

世界書局印行



自有詩而長短句卽寓焉。南風之操。五子之歌是已。周之頌三十一篇。長短句居十八。漢郊祀歌十九篇。長短句居其五。至短簫鐃歌十八篇。篇皆長短句。謂非詞之源乎。迄于六代。江南採蓮諸曲。去倚聲不遠。其不卽變爲詞者。四聲猶未諧暢也。自古詩變爲近體。而五七言絕句傳于伶官樂部。長短句無所依。則不得不更爲詞。當開元盛日。王之渙。高適。王昌齡詩句。流播旗亭。而李白菩薩蠻等詞。亦被之歌曲。古詩之於樂府。近體之於詞。分鑣並騁。非有先後。謂詩降爲詞。以詞爲詩之餘。殆非通論矣。西蜀南唐而後。作者日盛。宣和君臣。轉相矜尙。曲調愈多。流派因之亦別。短長互見。言情者或失之俚。使事者或失之伉。鄱陽姜夔出。句琢字鍊。歸於醇雅。於是史達祖。高觀國羽翼之。張輯。吳文英師之於前。趙以夫。蔣捷。周密。陳允衡。王沂孫。張炎。張翥效之於後。譬之於樂。舞筩至於九變。而詞之能事畢矣。世之論詞者。惟草堂是規。白石。梅溪諸家。或未闕其集。輒高自矜詡。予嘗病焉。顧未有以奪之也。友人朱子錫鬯。輯有唐以來迄於元人所爲詞。凡一十八卷。目曰詞綜。訪予梧桐鄉。予覽而有契於心。請雕刻以行。朱子曰。未也。宋元詞集。傳於今者。計不下二百家。吾之所見。僅及其半而已。子其博搜以輔吾不足。然後可。予曰。唯唯。錫鬯仍北遊京師。南至於白下。逾三年歸。廣爲二十六卷。予亦往來茗雪間。從故藏書家抄白諸集。相對

參論。復益以四卷。凡三十卷。計覽觀宋元詞集一百七十家。傳記小說地志共三百餘家。歷歲入稔。然後成書。庶幾可一洗草堂之陋。而倚聲者知所宗矣。若其論世而敘次詞人爵里。勘讐同異而辨其譌。則柯子寓匏。周子青士力也。

昔康熙戊午嘉平之朔休陽汪森書于裘杼樓



發凡

朱彝尊纂

唐宋以來作者。長短句每別爲一編。不入集中。以是散佚最易。常熟吳氏訥。彙有宋元百家詞。抄傳絕少。未見全書。近日毛氏晉刻有汲古閣六十家宋詞。頗有裨于學者。是編所錄。半屬抄本。白門則借之周上舍雪客。黃徵士俞邵。京師則借之宋員外牧仲。成進士容若。吳下則借之徐太史健庵。里門則借之曹侍郎秋岳。餘則汪子晉賢購諸吳興藏書家。互爲參定。其已經選輯者。南唐二主詞集一卷。馮延巳陽春錄一卷。潘閔逍遙詞一卷。林逋和靖先生集詞。晏殊珠玉詞一卷。歐陽修六一居士詞三卷。王安石半山老人詞一卷。晏幾道小山詞二卷。張先子野詞一卷。柳永樂章集九卷。蘇軾東坡居士詞二卷。黃庭堅琴趣外篇二卷。秦觀淮海詞三卷。晁補之詞一卷。陳師道後山長短句二卷。李之儀姑溪集詞二卷。賀鑄東山寓聲樂府三卷。毛滂東堂詞二卷。杜安世詞一卷。黃裳演山集詞二卷。葛勝仲丹陽詞一卷。周紫芝竹坡居士樂府三卷。謝逸溪堂詞一卷。謝薺竹友詞一卷。葛郊信齋詞一卷。廖行之省齋詩餘。周邦彥清真集三卷。晁端禮閑齋琴趣外篇一卷。徐伸青山樂府一卷。呂渭老詞一卷。徐積節孝集附詞。陳瓘了齋詞一卷。王安中初寮集詞一卷。向子諲酒邊集四卷。蔡伸友古詞一卷。王庭珪盧溪詞二卷。葉夢得石林詞一卷。王之道相山居士詞二卷。向鎬樂齋詞二卷。沈瀛竹齋詞一卷。劉弁雲龍集詞一卷。汪藻

苑

浮溪文粹附詞。趙師俠坦菴長短句一卷。陳與義無住詞一卷。劉一止茗溪詞一卷。趙長卿惜香樂府十卷。王灼頤堂詞一卷。張綱華陽老人長短句。岳飛金陀粹編家集附詞。張元幹蘆川詞一卷。鄧肅柝欄集詞一卷。劉子翬屏山集附詞。張掄蓮社詞一卷。朱敦儒樵歌三卷。會觀海野詞一卷。楊無咎逃禪詞三卷。侯寘嬾窟詞一卷。曾惇詞一卷。朱雍梅詞一卷。辛棄疾稼軒樂府十二卷。苑成大石湖詞一卷。黃公度知稼翁詞一卷。葛立方歸愚詞一卷。張孝祥于湖詞一卷。程垓書舟雅詞二卷。韓元吉焦尾集詞一卷。周必大近體樂府一卷。倪偁綺川詞一卷。姚述堯簫臺公餘詞一卷。京鏗松坡居士樂府一卷。朱熹晦庵詞一卷。洪适盤洲集詞二卷。吳儆竹洲詞一卷。楊萬里誠齋樂府一卷。李處全晦庵詞一卷。丘密文定公詞一卷。羅願鄂州小集附詞。劉克莊後村別調一卷。趙彥端介庵詞四卷。管鑑養拙堂詞一卷。張鉉玉照堂詞一卷。劉擬招山集樂章。程泌銘水集詞一卷。王千秋審齋詞一卷。姜夔白石詞一卷。陸游渭南集詞二卷。陳亮龍川集詞二卷。劉過龍洲詞一卷。楊炎西樵語業一卷。張輯東澤綺語債一卷。謝懋靜寄居士樂章二卷。黃機竹齋詩餘一卷。劉鎮隨如百詠。吳禮之順受老人詞五卷。許棐梅屋詩餘一卷。戴復古石屏詞一卷。毛幵樵隱詞一卷。洪咨夔平齋詞一卷。郭應祥笑笑詞一卷。盧祖臯浦江詞一卷。高觀國竹屋癡語一卷。史達祖梅溪詞二卷。汪莘方壺存稿詞二卷。吳潛履齋詩餘三卷。李昂英文溪詞一卷。趙以夫虛齋樂府二卷。陳經國龜峯詞一卷。

方岳秋厓先生小稿詞四卷。張榘芸窗詞一卷。洪璚空同詞一卷。方千里和清真詞一卷。楊澤民續和清真詞一卷。盧炳哄堂詞一卷。沈端節克齋詞一卷。黃昇散花庵詞一卷。嚴羽滄浪集附詞。王以寧詞一卷。吳文英夢隲甲乙丙丁稿四卷。蔣捷竹山詞一卷。陳允平日湖漁唱二卷。周密草窗詞二卷。王沂孫碧山樂府二卷。張炎玉田詞二卷。石孝友金谷遺音一卷。林正大風雅遺音四卷。張矩梅淵詞。陳德武白雪遺音一卷。文天祥文山集詞一卷。王鼎翁遺集附詞。何夢桂潛齋詞一卷。惠洪石門文字禪附詞。葛長庚海壖詞二卷。李清照漱玉集一卷。朱淑真斷腸集一卷。韓玉東浦詞一卷。段克己遯齋樂府一卷。段成己菊軒樂府一卷。元好問遺山樂府二卷。許衡魯齋集附詞。程鉅夫雪樓集詞一卷。王恽秋澗集詞四卷。趙孟頫松雪詞一卷。劉因樵庵詞一卷。汪宗臣紫岩集附詞。吳澄草廬詞一卷。虞集道園學古錄詞一卷。宋褰燕石集詞一卷。劉詵桂隱集附詞。曹伯啓漢泉漫稿詞一卷。許有壬圭塘小藁詞一卷。薩都刺雁門集詞一卷。張翥蛻岩詞二卷。袁易靜春詞一卷。沈禧竹窗詞一卷。洪希文續軒渠集詞一卷。張可久小山樂府二卷。喬吉惺惺老人樂府一卷。張楚古山樂府一卷。倪瓚清閬閣詞一卷。顧瑛玉山璞附詞。陶宗儀南村集附詞。邵亨貞蛾術詞選四卷。凌雲翰柘溪集詞一卷。王行半軒集詞一卷。張雨貞居詞一卷。凡百六十餘家。雖已覽觀未入選者。楊杰無爲集。徐經孫文惠集。徐鹿卿清正集。魏了翁鶴山詞。王義山稼軒類稿。又順齋樂府。虛靖清真君詞。洞玄

珠玉集。凡八家。

藏書家編目錄。詞集多不見收。惟莆田陳氏書錄解題。論其大略。鄱陽馬氏采入通考志中。所載晁冲之具茨集。王觀冠柳集。趙令時聊復集。蘇庠後湖集。万俟雅言大聲集。陳克赤城詞。康與之順菴樂府。趙鼎得全居士集。劉光祖鶴林詞。左譽筠菴長短句。姚寬西溪居士樂府。蘇泂泠然閣集。嚴仁清江欵乃詞。孫惟信花翁詞。魏子敬詞。王武子詞。李洪兄弟花萼集。吳激東山集。蔡松年蕭閑公集。舊本散失。未經寓目。或詩集雖在而詞則闕如。僅於選本中錄其一二。至于汪元量水雲詞。蔡桡浩歌集。黃人傑可軒曲林。黃定鳳城詞。曹冠燕喜集。馬寧祖退圃詞。吳鎰敬齋詞。袁去華詞。侯延慶退齋詞。黃談澗壑詞。林淳定齋詩餘。鄧元漫堂集。王大受近情集。張孝忠野適堂詞。劉德秀默軒詞。鍾將之岫雲詞。徐得之西園鼓吹。李叔猷東老詞。方信儒好菴遊戲。陳從古洮湖詞。韓子耕蕭閒詞。隻字未見。此外軼者尙多。海內收藏之家。或有存本。倘許借觀。願仿會氏雅詞之例。別爲拾遺。附于卷末。

世人言詞。必稱北宋。然詞至南宋始極其工。至宋季而始極其變。姜堯章氏最爲傑出。惜乎白石樂府五卷。今僅存二十餘闋也。東澤綺語。傳亦寥寥。至施乘之。孫季蕃。盛以詞鳴。沈伯時樂府指迷。亦爲矜譽。今求其集。不可復覩。周公謹。陳君衡。王聖與集。雖抄傳。公謹賦西湖十景。當日屬和者甚衆。而今集無之。花草粹編載有君衡一二詞。陸輔之詞。旨載有聖與霜

天曉角等調中語。均今集所無。至張叔夏詞。集晉賢所購。合之牧仲員外。雪客上舍所抄。暨常熟吳氏百家詞本。校對無異。以爲完書。頃吳門錢進士宮聲相遇都亭。謂家有藏本。乃陶南村手書。多至二三百閱。則予所見猶未及半。漏萬之譏。殆不免矣。

古詞選本。若家宴集。謫仙集。蘭畹集。復雅歌辭類分樂章。羣公詩餘後編。五十大曲。萬曲類編。及草牕周氏選。皆軼不傳。獨草堂詩餘所收。最下最傳。二百年來學者守爲兔園冊。無惑乎詞之不振也。是集兼采趙弘基花間集。黃昇花庵絕妙詞。中興以來絕妙詞。陳景沂全芳備祖樂府。元好問中州樂府。彭致中鳴鶴餘音。鳳林書院元詞樂府補題。許有孚圭塘欵乃集。顧梧芳尊前集。楊慎詞林萬選。陳耀文花草粹編。沈際飛草堂詩餘廣集。茅映詞的。卓人月詞統諸書。務去陳言。歸于正始。至如會慥樂府雅詞。天機餘錦。采入花草粹編。趙粹夫陽春白雪集。見李開先小山樂府後序。則諸書嘉隆間猶未散軼。而天機碎錦。片玉珠璣二集。聞江都藏書家有之。又如百一選曲。太平樂府。詩酒餘音。仙音妙選。樂府新聲。樂府羣珠。樂府羣玉。曲海之內。定有詞章可采。惜俱未之見也。

向客太原。見晉祠石刻。多北宋人唱和詞。而平遙縣治西古寺廡下。有金人所作小令。勒石嵌壁。令工人搨回。經十餘年。簡之故簾。則已爲鼠嚙盡。是集成未克採入。深以爲恨。計海內名山苔龕石壁。宋元人留題長短句尚多。好事君子。惠我片楮。無異雙金也。

詞有當時盛傳。久而翻逸者。遺珠片玉。往往見于稗官載紀。是編自百川學海。古今小說。唐宋叢書。會氏類說。吳氏能改齋漫錄。阮氏詩話總龜。胡氏茗溪漁隱叢話。陶氏說郛。商氏稗海。陸氏說海。陳氏祕笈外。繙閱小說。又不下數十家。片詞足采。輒事筆疏。故多他選未見之作。庶幾一開生面。佐予討論編纂者。汪子而外。則安丘曹舍人升六。無錫嚴徵士蓀友。江都汪舍人季冉。宜興陳徵士其年。華亭錢舍人葆勳。吳江俞處士無殊。休寧汪上舍周士季青。錢塘龔主事天石。同郡俞處士右吉。沈上舍融谷。繆處士天白。沈布衣覃九。葉舍人元禮。李徵士武。會布衣分虎。沈秀才山子。柯孝廉翰周。浦布衣傳功。暨門人周儻岳也。鏤版未竟。而錢葉二君相繼奄逝。可爲泫然。

詞人姓氏爵重。選家書法不一。先系爵後書名者。花間集中。州樂府體也。書字於官爵下者。絕妙詞選體也。書名者。全芳備祖體也。書字者。草堂體也。冠別字於姓名之前者。鳳林書院體也。至楊氏詞林萬選。陳氏花草粹編。或書名。或書字。或書別字。或書官。或書集。覽者茫然。莫究其世次。甚有別本以朱三十五樵歌爲秋娘作者。良可大噓。是集考之正史。參以地志。傳紀。小說。以集歸人。以字歸名。得十之八九。論世之功。柯子寓匏有焉。

周布衣青士。隱於廛市。於書無所不闕。辨證古今字句音韻之譌。輒極精當。是集藉其校讎。如史梅溪綺羅香後闕。還被春潮晚急。原係六字爲句。草堂坊本脫去晚字。諸本因之。周晴川十六字令。眠。月影穿窗白玉錢。

原係眠字爲句。選本譌作明字。遂以明月影爲句。歐陽永叔越溪春結語。沉麝不燒金鴨。玲瓏月照梨花。並係六字句。坊本譌玲爲冷。瓏爲籠。遂以七字五字爲句。德祐太學生祝英臺近。那人何處。怎知道愁來不去。譌不爲又。一字之乖。全旨皆失。今悉爲改正。他如蘇子瞻念奴嬌。則從容齋隨筆。汪彥章點降唇。則從能改齋漫錄。王晉卿燭影搖紅。則從漫錄去其前闕。李后主臨江仙。則從耆舊續聞補其結語。其餘糾定。難更僕數。坊間雖有圖譜倚聲者。宜攷質焉。

四聲二十八調。各有其倫。柳屯田樂章集。有同一曲名。字數長短不齊。分入各調者。姜石帚湘月詞注云。此念奴嬌之鬲指聲也。則曲同字數同。而湘月念奴嬌調實不同。合之爲一非矣。詞固有一曲而各異其名者。是選悉依集本。不敢更易。審音者度無勿知。似不必比而同之也。

張子野弔林君復詩。烟雨詞亡草更青。蔡君謨寄李良定詩。多麗新詞到海邊。一篇之工。見之吟咏。山抹微雲。秦學士。露華倒影。柳屯田。曉風殘月。柳三變。滴粉搓酥。左與言。一句之工。形諸口號。當日風尚。所存甄藻。自爾不爽。故是集多綴宋元人評語。有明用脩。元美諸家品。驚容有未當。或置不錄焉。

宣政而後。士大夫爭爲獻壽之詞。聯篇累牘。殊無意味。至魏華父則非此不作矣。是集于千百之中。止存一二。雖華甫亦置不錄也。

元人小曲。如乾荷葉。天淨沙。凭欄人。平湖樂。一名下桃紅。等調。平上去三

聲並用。往往編入詞集。然按之宋詞。如戚氏、西江月、換巢鸞鳳、少年心、惜分釵、漁家傲。杜安世集中體諸闕。已爲曲韻濫觴矣。是集開有采錄。蓋做楊氏詞林萬選之例。覽者幸勿以詞曲混一爲訕。

言情之作。易流於穢。此宋人選詞多以雅爲目。法秀道人語涪翁曰。作艷詞當墮犁舌地獄。正指涪翁一等體製而言耳。填詞最雅。無過石帚。草堂詩餘不登其隻字。見胡浩立春吉席之作。蜜殊咏桂之章。亟收卷中。可謂無日者也。甚而易靜兵要寓聲于望江南。張用成悟真篇按調爲西江月。詞至此亦不幸極矣。是集於黃九之作。去取特嚴。不敢曲徇後山之說。宋人編集歌詞。長者曰慢。短者曰令。初無中調長調之目。自顧從敬編草堂詞。以臆見分之。後遂相沿。殊屬牽率。歲在癸丑。舍館京師宣武門右。與葆飭舍人戶庭相望。予輯是書。葆飭輯詞。嘔。辨晰體製。以字數多寡爲先後。最爲精密。計一千調。編爲三十卷。比年聞更增益。予所見鳴鶴餘音。洞玄金玉集。及他抄本。曲調異同。詞嘔未經采入者約又百餘。惜未遑郵寄。今葆飭逝矣。遺書在笥。雕刻無期。誠倚聲家之闕事也。

花間體製。調卽是題。如女冠子則詠女道士。河瀆神則爲送迎神曲。虞美人則詠虞姬是也。宋人詞集。大約無題。自花庵草堂增入閨情。閨思。四時景等題。深爲可憎。今俱準集本刪去。

明初作手。若楊孟載、高季迪、劉伯溫輩。皆溫雅芊麗。咀宮含商。李昌祺、王達善、瞿宗吉之流。亦能接武。至錢唐馬浩瀾以詞名東南。陳言穢語。俗

氣薰入骨髓。殆不可醫。周白川、夏公謹諸老。間有硬語。楊用修、王元美則強作解事。均與樂章未諧。然三百年中。豈無合作。當遍搜文集。發其幽光。編爲二集。繼是編之後。

古今詞話一書。博訪未得。詞人瑣事。散見各家詩話及傳記小說中。摭拾需時。是集未能附綴。將仿孟縻本事詩。計敏夫唐詩紀事。別爲一集。以資談柄。近吳江徐徵士電發著詞苑叢譚一書。可云先獲我心。當讓其單行矣。



目錄

卷一 唐詞六十

八首

昭宗皇帝……………一
 李白……………一
 張志和……………二
 韋應物……………二
 戴叔倫……………三
 王建……………三
 韓翃……………三
 白居易……………三
 劉禹錫……………四
 溫庭筠……………四
 皇甫松……………九
 鄭符……………一〇
 段成式……………一〇
 司空圖……………一〇
 韓偓……………一一

張曙……………一一

呂崑……………一一

柳氏……………一一

王麗真……………一一

無名氏……………一一

卷二 五代十國

詞七十一首

後唐莊宗……………一二
 蜀主王衍……………一二
 蜀主孟昶……………一二
 南唐中宗李景……………一三
 後主李煜……………一三
 和凝……………一五
 韋莊……………一六
 薛昭蘊……………一九
 牛嶠……………二〇
 毛文錫……………二一

牛希濟……………二二

歐陽炯……………二三

卷三 五代十國

詞七十六首

顧夔……………二四
 鹿虔扆……………二六
 閻選……………二六
 魏承班……………二七
 尹鶚……………二七
 毛熙震……………二八
 李珣……………二八
 孫光憲……………三一
 張泌……………三三
 馮延巳……………三四
 成幼文……………三八
 耿玉真女郎……………三八

卷四 宋詞六十

七首

徽宗皇帝	三九
高宗皇帝	三九
徐昌圖	三九
潘閔	三九
夏竦	四〇
寇準	四〇
王禹偁	四一
錢惟演	四一
晏殊	四一
賈昌朝	四三
王琪	四三
林逋	四四
李遵勳	四四
葉清臣	四四
聶冠卿	四五
李師中	四五
韓琦	四五
范仲淹	四六

宋祁.....四七

鄭獬.....四七

韓縝.....四七

張昇.....四八

謝絳.....四八

歐陽脩.....四八

梅堯臣.....五三

石延年.....五三

司馬光.....五三

王安石.....五三

范純仁.....五四

卷五 宋詞七十

首

晏幾道.....五四

張先.....五九

柳永.....六五

卷六 宋詞六十

四首

蘇軾.....七一

黃庭堅.....七五

秦觀.....七六

晁補之.....八〇

張耒.....八四

陳師道.....八五

李廌.....八五

李之儀.....八五

卷七 宋詞六十

二首

賀鑄.....八六

毛滂.....八九

王仲.....九三

杜安世.....九三

李元膺.....九四

孫洙.....九五

朱服.....九五

章棗.....九五

舒亶.....九六

李清臣.....九六

王詵	九六
趙令時	九七
王安禮	九七
王安國	九八
曾肇	九八
晁冲之	九八
秦觀	九九
王觀	一〇〇
卷八 宋詞六十首	
孔平仲	一〇一
米芾	一〇一
滕宗諒	一〇二
鄭僅	一〇二
黃裳	一〇二
張景修	一〇三
孫臏	一〇三
程過	一〇三
解昉	一〇四

陳亞	一〇四
張舜民	一〇四
王雱	一〇五
蔡挺	一〇五
汪輔之	一〇五
趙鼎臣	一〇五
蘇庠	一〇六
劉涇	一〇六
潘元質	一〇七
蘇過	一〇七
秦湛	一〇七
許庭	一〇八
葛勝仲	一〇八
李冠	一〇八
張表臣	一〇九
查荃	一〇九
周紫芝	一〇九
謝逸	一一二
謝薏	一一四

葛鄰	一一四
廖行之	一一五
卷九 宋詞五十首	
六首	
周邦彥	一一五
晁端禮	一二四
田不伐	一二五
曹組	一二六
万俟雅言	一二七
徐伸	一二九
卷十 宋詞六十首	
一首	
陳克	一二九
李祁	一三〇
呂渭老	一三一
趙企	一三五
李持正	一三五
王采	一三五
韓駒	一三六

徐積……………一三六

何籀……………一三六

蔣子雲……………一三六

宋齊愈……………一三七

李甲……………一三七

夏倪……………一三八

沈會宗……………一三八

廖世美……………一三九

林少瞻……………一三九

何大圭……………一三九

沈公述……………一四〇

魯逸仲……………一四〇

何臬……………一四〇

陳瓘……………一四一

王安中……………一四一

楊廷……………一四二

方喬……………一四二

李玉……………一四二

波子山……………一四三

謝克家……………一四三

卷十一 宋詞六

十四首

向子諲……………一四三

蔡伸……………一四五

王庭珪……………一四八

葉夢得……………一四八

王之道……………一四九

向鎬……………一四九

沈瀛……………一五〇

李邴……………一五〇

劉夙……………一五一

汪藻……………一五二

會紆……………一五二

徐俯……………一五二

趙師俠……………一五三

陳與義……………一五三

劉一止……………一五四

趙長卿……………一五五

王灼……………一五七

張綱……………一五七

王十朋……………一五七

卷十二 宋詞六

十二首

趙鼎……………一五八

岳飛……………一五九

李彌遜……………一五九

朱翌……………一五九

張元幹……………一六〇

洪皓……………一六一

呂本中……………一六二

鄧肅……………一六二

劉子翬……………一六三

張掄……………一六三

朱敦儒……………一六三

康與之……………一六六

吳億……………一六七

曾覲……………一六七

閻蒼舒	一六八
左譽	一六八
陸凝之	一六九
楊无咎	一六九
阮閱	一七〇
侯寘	一七〇
曾慥	一七一
曾惇	一七一
朱雍	一七一
姚進道	一七一
劉之翰	一七二
江緯	一七二
卷十三 宋詞六	
十八首	
辛棄疾	一七二
范成大	一八一
黃公度	一八二
葛立方	一八三
張孝祥	一八三

姚寬	一八四
程垓	一八五
卷十四 宋詞六	
十八首	
韓元吉	一八八
周必大	一九〇
京鏗	一九〇
尤袤	一九〇
仲弁	一九一
朱熹	一九一
真德秀	一九二
趙汝愚	一九二
洪适	一九二
吳儆	一九三
楊萬里	一九四
李處全	一九四
張震	一九五
羅願	一九五
崔與之	一九五

劉克莊	一九六
樓鑄	一九八
吳琚	一九八
趙彥端	一九八
管鑑	二〇〇
魏子敬	二〇〇
甄龍友	二〇〇
俞國寶	二〇一
衛元卿	二〇一
李石	二〇一
張鉉	二〇一
杜旟	二〇二
劉儼	二〇三
岳珂	二〇四
程秘	二〇五
王千秋	二〇五
程先	二〇五
蘇洞	二〇六
劉圻父	二〇六

卷十五 宋詞六

十六首

姜夔 ······二〇六

陸游 ······二二二

陳亮 ······二二六

劉過 ······二二七

楊炎 ······二二九

張輯 ······二三〇

卷十六 宋詞六

十一首

謝懋 ······二二三

黃機 ······二二四

劉鎮 ······二二六

危稹 ······二二七

吳禮之 ······二二八

劉光祖 ······二二八

閻邱次杲 ······二二九

馬莊父 ······二二九

李洪 ······二三〇

李泳 ······二三〇

李漳 ······二三一

李浙 ······二三一

鄭域 ······三三一

戴復古 ······三三一

黃銖 ······三三一

嚴仁 ······三三一

易祓 ······三三三

趙善扛 ······三三四

毛玘 ······三三五

王壘 ······三三五

曹豳 ······三三六

洪咨夔 ······三三六

趙汝迕 ······三三六

章穎 ······三三七

郭應祥 ······三三七

陸淞 ······三三七

卷十七 宋詞六

十首

盧祖皋 ······二三八

高觀國 ······二四一

史達祖 ······二四五

卷十八 宋詞六

十一首

汪莘 ······二五二

吳潛 ······二五四

李昂英 ······二五五

史鶴之 ······二五六

章謙亨 ······二五六

趙以夫 ······二五六

陳經國 ······二五八

方岳 ······二五九

張榘 ······二六〇

洪璚 ······二六一

方千里 ······二六二

汪暉 ······二六三

尹煥 ······二六三

馮取洽 ······二六三

陳以莊……………二六四

盧炳……………二六四

沈端節……………二六五

潘枋……………二六五

馮艾子……………二六六

黃昇……………二六六

文及翁……………二六七

李芸子……………二六八

巖羽……………二六八

李廷忠……………二六八

王以寧……………二六八

卷十九 宋詞六

十六首

吳文英……………二六九

蔣捷……………二八〇

卷二十 宋詞七

十六首

陳允平……………二八六

周密……………二九一

卷二十一 宋詞

七十首

王沂孫……………二〇四

張炎……………三二二

卷二十一 宋詞

五十一首

石孝友……………三三二

孫惟信……………三三四

劉褒……………三三五

張槃……………三三五

潘希白……………三三五

湯恢……………三三六

張矩……………三三六

趙耆孫……………三三六

毛翊……………三三七

翁元龍……………三三七

李肩吾……………三三七

康仲伯……………三三八

覃懷高……………三三八

趙旭……………三三八

樓扶……………三三八

楊彥齡……………三三九

李珣……………三三九

方有聞……………三三九

陳德武……………三三九

汪存……………三三九

周格非……………三三〇

陳襲善……………三三〇

丁羲叟……………三三〇

呂直夫……………三三一

王武子……………三三一

趙君舉……………三三一

王文甫……………三三一

施芸隱……………三三二

鄭覺齋……………三三二

王月山……………三三二

房舜卿……………三三三

林正大……………三三三

薛夢桂·····三三三

曾揆·····三三四

黃孝邁·····三三四

江開·····三三四

卷二十三 宋詞

五十一首

文天祥·····三三五

鄧剡·····三三五

王鼎翁·····三三六

何夢桂·····三三六

李南金·····三三七

莫崱·····三三七

徐一初·····三三八

劉辰翁·····三三八

黃公紹·····三三九

李萊老·····三三九

李彭老·····三三九

王易簡·····三四一

馮應瑞·····三四二

唐藝孫·····三四三

呂同老·····三四四

練恕可·····三四四

趙汝鈞·····三四五

唐珣·····三四六

李居仁·····三四七

王夢應·····三四七

譚宣子·····三四八

陳逢辰·····三四八

樓采·····三四八

奚臧·····三四九

趙聞禮·····三四九

卷二十四 宋詞

七十首

寇寺丞·····三五〇

陳參政·····三五〇

杜郎中·····三五〇

德祐太學生·····三五〇

無名氏·····三五〇

裴湘·····三六〇

僧揮·····三六一

僧祖可·····三六一

釋惠洪·····三六一

上清蔡真人·····三六一

于真人·····三六一

葛長庚·····三六二

虬仙·····三六五

卷二十五 宋詞

五十首

盧氏·····三六五

舒氏·····三六六

魏夫人·····三六六

延安夫人·····三六七

李清照·····三六七

阮逸女·····三六九

幼卿·····三七〇

吳淑姬·····三七〇

朱淑真·····三七〇

蔣興祖女……………三七一

鄭意娘……………三七一

慕容崑卿妻……………三七二

孫道絢……………三七二

鄭文妻孫氏……………三七二

陸游妾……………三七三

美奴……………三七三

王清惠……………三七四

徐君寶妻……………三七四

金德淑……………三七四

琴操……………三七四

盼盼……………三七五

聶勝瓊……………三七五

蜀中妓……………三七五

玉英……………三七五

吳城小龍女……………三七六

赤城韓夫人……………三七六

衛方華……………三七六

紫姑……………三七七

卷二十六 金詞

六十一首

完顏璫……………三七七

蔡松年……………三七七

吳激……………三七八

劉仲尹……………三七九

高士談……………三七九

王庭筠……………三七九

趙可……………三七九

劉迎……………三七九

王特起……………三八一

韓玉……………三八二

趙秉文……………三八三

高憲……………三八三

党懷英……………三八三

王渥……………三八四

景覃……………三八四

王礪……………三八五

趙擴……………三八五

折元禮……………三八五

劉著……………三八六

李獻能……………三八六

李晏……………三八六

高永……………三八六

段克己……………三八七

段成己……………三八七

元好問……………三八八

王予可……………三九二

鄧千江……………三九二

卷二十七 元詞

五十二首

許衡……………三九三

張弘範……………三九三

劉秉忠……………三九四

燕公楠……………三九四

程鉅夫……………三九四

盧摯……………三九五

劉敏中……………三九六

楊果……………三九六

仇遠……………三九六

李冶……………三九七

王暉……………三九八

趙孟頫……………三九九

劉因……………四〇一

梁會……………四〇一

陳孚……………四〇一

汪宗臣……………四〇二

姚雲文……………四〇二

詹正……………四〇三

吳澄……………四〇四

彭元遜……………四〇五

羅志仁……………四〇六

韋居安……………四〇七

卷二十八 元詞

五十四首

李琳……………四〇七

趙文……………四〇八

宋遠……………四〇九

周景……………四〇九

劉將孫……………四〇九

蕭列……………四一〇

司馬昂父……………四一〇

應法孫……………四一〇

王學文……………四一〇

彭芳遠……………四一一

危復之……………四一二

顏子俞……………四一二

劉景翔……………四一二

吳元可……………四一二

劉鉉……………四一三

蕭允之……………四一三

黃子行……………四一四

彭履道……………四一五

李裕翁……………四一六

段弘章……………四一六

劉天迪……………四一六

周伯陽……………四一七

尹公遠……………四一七

會允元……………四一八

李天驥……………四一九

劉應幾……………四一九

周孚先……………四二〇

尹濟翁……………四二〇

王從叔……………四二〇

蕭漢傑……………四二一

彭泰翁……………四二一

趙功可……………四二一

戴山隱……………四二一

姜个翁……………四二二

卷二十九 元詞

五十二首

虞集……………四二二

鮮于樞……………四二三

宋褰……………四二三

劉詵……………四二四

曹伯啓	四二四
許有壬	四二四
許有孚	四二五
馬熙	四二六
許楨	四二六
薩都刺	四二七
張翥	四二八
袁易	四三五
沈禧	四三六
洪希文	四三六
楊立齋	四三六
卷三十一 元詞五	
十八首	
張埜	四三六
吳鎮	四三八
倪瓚	四三八
顧德輝	四三九
陶宗儀	四三九
汪斌	四四〇

邵亭貞	四四〇
沈景高	四四三
羅慶	四四四
唐桂芳	四四四
凌雲翰	四四四
王行	四四五
楊樵雲	四四五
周晴川	四四六
張半湖	四四六
蕭東父	四四七
黃水邨	四四七
傅按察	四四七
無名氏	四四八
張雨	四四八
滕賓	四五〇
劉燕哥	四五〇
陳鳳儀	四五〇
卷三十一 補人 宋	
詞六十九首	

蘇舜欽	四五一
韓維	四五一
韋驥	四五一
劉燾	四五一
歐陽澈	四五一
胡舜陟	四五二
胡仔	四五二
倪偁	四五四
王十朋	四五四
洪邁	四五四
姚述堯	四五四
湯思退	四五五
魏杞	四五五
牟巖	四五五
王自中	四五六
邱密	四五六
姜特立	四五八
蔡榘	四五八
張履信	四五八

王嶠……………四五九

韓嘒……………四五九

姚鑄……………四五九

羅椅……………四六〇

楊伯崑……………四六〇

周晉……………四六〇

楊纘……………四六〇

翁子孟寅……………四六一

趙汝茫……………四六二

馮去非……………四六三

許斐……………四六三

陸獻……………四六四

蕭泰來……………四六四

趙希邁……………四六五

趙崇璠……………四六五

趙希彭……………四六五

王藻……………四六六

趙與鏞……………四六六

樓槃……………四六六

鍾過……………四六六

黃蘭……………四六七

陳策……………四六七

李振祖……………四六七

卷三十一一補人 宋

詞六十八首

汪元量……………四六七

施岳……………四七〇

張樞……………四七一

李演……………四七二

丁宥……………四七三

史介翁……………四七四

周端臣……………四七四

何光大……………四七四

趙潛……………四七四

劉瀾……………四七五

張龍榮……………四七五

王億之……………四七五

余桂英……………四七六

胡仲弓……………四七六

尚希尹……………四七六

柴望……………四七六

朱藻……………四七七

黃鑄……………四七七

王同祖……………四七七

王茂孫……………四七七

張桂……………四七八

張林……………四七八

朱屏孫……………四七八

吳大有……………四七九

趙崇霄……………四七九

范晞文……………四七九

鄭斗煥……………四七九

曹良史……………四八〇

趙與仁……………四八〇

王弈……………四八二

湯彌昌……………四八二

趙必豫……………四八二

陳紀……………四八三

楊澤民……………四八三

陳先……………四八三

東從周……………四八三

李震……………四八四

李銓……………四八四

陳從古……………四八四

鄭子玉……………四八五

章麗真……………四八五

袁正真……………四八五

卷三十三補人 金

元詞六十七首

耶律楚材……………四八五

李俊民……………四八六

馮子振……………四八七

白無咎……………四八八

許謙……………四八八

張可久……………四八八

喬吉……………四八九

何繼高……………四八九

陳深……………四八九

趙雍……………四九〇

王璉……………四九一

歐陽玄……………四九二

孟昉……………四九三

舒頔……………四九三

舒遜……………四九三

劉忠之……………四九四

何可視……………四九四

袁華……………四九四

于立……………四九五

陸仁……………四九五

張遜……………四九五

石民瞻……………四九五

鄭韶……………四九六

柯九思……………四九六

王逢……………四九六

何景福……………四九六

錢抱素……………四九七

吳瓘……………四九七

錢應庚……………四九八

王蒙……………四九九

陸祖先……………四九九

王燧……………四九九

張翥……………四九九

金網……………五〇〇

王容溪……………五〇〇

夢庵……………五〇〇

無名氏……………五〇〇

管道昇……………五〇一

卷三十四補詞 宋

詞五十七首

謝絳……………五〇一

晏幾道……………五〇一

張先……………五〇二

晁補之……………五〇二

賀鑄……………五〇三

舒亶……………五〇六

王詵……………五〇六

周紫芝……………五〇六

晁端禮……………五〇六

万俟雅言……………五〇七

呂渭老……………五〇七

道鼎……………五〇八

李彌遜……………五〇八

朱翌……………五〇九

張元幹……………五〇九

劉子翬……………五一〇

張掄……………五一〇

朱敦儒……………五一〇

侯寘……………五一一

辛棄疾……………五一一

卷三十五補詞 宋

詞五十五首

程垓……………五一一

韓元吉……………五一一

京鏗……………五一四

劉克莊……………五一四

吳琚……………五一五

趙彥端……………五一五

管鑑……………五一六

劉儼……………五一七

姜夔……………五一七

陸游……………五一七

劉過……………五一八

張輯……………五一八

謝懋……………五一八

黃機……………五一八

馬莊父……………五一九

李泳……………五一九

戴復古……………五一九

盧祖皋……………五一九

吳潛……………五二〇

汪莘……………五二〇

李昂英……………五二一

趙以夫……………五二一

黃昇……………五二一

吳文英……………五二二

陳允平……………五二五

周密……………五二五

王沂孫……………五二六

卷三十六補詞 宋

金元詞五十四首

首

張炎……………五二七

張槃……………五三〇

湯恢……………五三〇

翁元龍……………五三一

樓扶……………五三二

莫崱……………五三二

李萊老……………五三三

李彭老……………五三四

王易簡……………五三四

葛長庚……………五三五

完顏壽·····五三五

段克己·····五三五

段成己·····五三六

元好問·····五三七

劉因·····五三七

仇遠·····五三八

虞集·····五三八

宋褰·····五三八

薩都刺·····五三九

倪瓚·····五三九

顧瑛·····五四〇

陶宗儀·····五四〇

唐桂芳·····五四〇

張雨·····五四一

卷三十七續補人

詞六十二首

吳則禮·····五四一

李呂·····五四二

李光·····五四三

潘良貴·····五四三

胡銓·····五四三

程大昌·····五四四

楊冠卿·····五四五

曹冠·····五四七

韓澆·····五四九

魏了翁·····五五一

王邁·····五五三

劉學箕·····五五三

衛宗武·····五五五

趙磻老·····五五五

陳著·····五五五

卷三十八續補人

詞五十四首

袁去華·····五五六

黎廷瑞·····五六〇

李好古·····五六一

張真人·····五六二

松菊道人·····五六二

張伯淳·····五六二

朱晞顏·····五六三

姚燧·····五六四

王結·····五六五

陳櫟·····五六五

陸文圭·····五六六

吳存·····五六七

張仲仁·····五六八



詞綜

卷一 唐詞六十八首

昭宗皇帝

巫山一段雲題寶雞驛壁

蝶舞梨園雪。鶯啼柳帶烟。小池殘日豔陽天。苧蘿山又山。青鳥不來愁絕。忍看鴛鴦雙結。春風一等少年心。閑情恨不禁。

菩薩蠻 登華州城樓

登樓遙望秦宮殿。茫茫只見雙飛燕。渭水一條流。千山與萬丘。遠烟籠碧樹。陌上行人去。安得有英雄。迎歸大內中。
唐詩紀事作何處是英雄。迎儂歸故宮。

按尉遲偓中朝故事云。乾寧二年。李茂貞犯關。帝次華州。韓建迎歸郡中。帝鬱鬱不樂。每登城西齊雲樓遠望。明年秋製此詞云。

李 白 字太白。蜀人。一云山東人。供奉翰林。

菩薩蠻

平林漠漠烟如織。寒山一帶傷心碧。暝色入高樓。有人樓上愁。玉階一作闌干。空佇立。宿鳥歸飛急。何處是歸程。長亭更一作連短亭。湘山野錄云。此詞不知何人寫在鼎州滄水驛樓。復不知何人所撰。魏道輔奏見而愛之。後至長沙。得古風集於會子宣內翰家。乃知李白所撰。

憶秦娥

簫聲咽。秦娥夢斷秦樓月。秦樓月。年年柳色。灞陵傷別。樂游原上清秋節。咸陽古道音塵絕。音塵絕。西風殘照。漢家陵闕。

清平樂令

禁闌秋夜。月探金窗罅。玉帳鴛鴦噴蘭麝。時落銀燈香燭。女伴莫話孤眠。六宮羅綺三千。一笑皆生百媚。宸遊教在誰邊。

桂殿秋

仙女下。董雙成。漢殿夜涼吹玉笙。曲終却從仙官去。萬戶千門惟月明。

又

河漢女。玉鍊顏。雲軒往往在人間。九霄有路去無跡。裊裊香風生珮環。
吳虎臣云。此太白詞也。有得于石刻而無其腔。劉無言倚其聲歌之。音極清雅。

張志和 字子同。金華人。擢明經。肅宗命待詔翰林。坐貶不復仕。自稱烟波釣徒。

漁歌子

西塞山前白鷺飛。桃花流水鱖魚肥。青蘋笠。綠蓑衣。斜風細雨不須歸。
黃魯直云。有遠韻。

又

松江蟹舍主人歡。菰飯蓴羹亦共餐。楓葉落。荻花乾。醉宿漁舟不覺寒。

韋應物 京兆人。官左司郎中。歷蘇州刺史。

調笑

河漢河漢。曉挂秋城漫漫。愁人起望相思。塞北江南別離。離別離別。河漢雖同路絕。

戴叔倫字幼公。金壇人。官撫州刺史。封譙縣男。遷容管經略使。

轉應詞

邊草邊草。邊草盡來兵老。山南山北雪晴。千里萬里月明。明月明月。口笳一聲愁絕。

王建字仲初。潁州人。大曆十年進士。大和中為陝州司馬。

調笑

團扇團扇。美人竝來遮面。玉顏憔悴二年。誰復商量管絃。絃管絃管。春草昭陽路斷。

又

蝴蝶蝴蝶。飛上金枝玉葉。君前對舞春風。百葉桃花樹紅。紅樹紅樹。燕語鶯啼日暮。

韓翃字君平。南陽人。天寶十二載進士。以駕部郎中知制誥。終中書舍人。

章臺柳 寄柳氏

章臺柳。章臺柳。往日依依一作青青。今在否。縱使長條似舊垂。也應攀折他人手。

白居易字樂天。其先太原人。徙下邳。貞元十四年進士。歷官中書舍人。出知杭州。以刑部尚書致仕。卒。

贈僕射。謚文。有長慶集。

花非花

花非花。霧非霧。夜半來。天明去。來如春夢不多時。去似朝雲無覓處。

憶江南

江南好。風景舊曾諳。日出江花紅勝火。春來江水綠如藍。能不憶江南。

又

江南憶。最憶是杭州。山寺月中尋桂子。郡亭枕上看潮頭。何日更重遊。

又

江南憶。其次憶吳宮。吳酒一杯春竹葉。吳娃雙舞醉芙蓉。早晚得相逢。

長相思

深畫眉。淺畫眉。蟬鬢鬢鬢鬢。雲滿衣。陽臺行雨迴。巫山高。巫山低。暮雨瀟

瀟郎不歸。空房獨守時。

劉禹錫字夢得。中山人。貞元中進士。仕為太子賓客。會昌中檢校禮部尚書。

春去也

春去也。多謝洛城人。弱柳從風疑舉袂。叢蘭裊露似沾巾。獨坐亦含嚬。

瀟湘神

斑竹枝。斑竹枝。淚痕點點寄相思。楚客欲聽瑤瑟怨。瀟湘深夜月明時。

溫庭筠本名岐。字飛卿。太原人。官方山尉。有握蘭金荃等集。

黃叔暘云。飛卿詞極流麗。宜為花間集之冠。

菩薩蠻

小山重疊金明滅。鬢雲欲度香頰雪。懶起畫蛾眉。弄妝梳洗遲。
照花前
後鏡。花面交相映。新帖繡羅襦。雙雙金鷓鴣。

又

水精簾裏頗黎枕。暖香惹夢鴛鴦錦。江上柳如烟。鴈飛殘月天。
藕絲秋
色淺。人勝參差剪。雙鬢隔香紅。玉釵頭上風。

又

玉樓明月長相憶。柳絲裊娜春無力。門外草萋萋。送君聞馬嘶。
畫羅金
翡翠。香燭銷成淚。花落子規啼。綠窗殘夢迷。

又

牡丹花謝鶯聲歇。綠楊滿院中庭月。相憶夢難成。背窗燈半明。
翠鈿金
壓臉。寂寞香閨掩。人遠淚闌干。燕飛春又殘。

又

滿宮明月梨花白。故人萬里關山隔。金鴈一雙飛。淚痕沾繡衣。
小園芳
草綠。家住越溪曲。楊柳色依依。燕歸君不歸。

又

寶函鈿雀金鸂鶒。沉香閣上吳山碧。楊柳又如絲。驛橋春雨時。
畫樓音
信斷。芳草江南岸。鸞鏡與花枝。此情誰得知。

又

竹風輕動庭除冷。珠簾月上玲瓏影。山枕隱濃妝。綠檀金鳳凰。
兩蛾愁

黛淺。故國吳宮遠。春恨正關情。畫樓殘點聲。

更漏子

柳絲長。春雨細。花外漏聲迢遞。驚塞鴈。起城烏。畫屏金鷓鴣。香霧薄。透簾幕。惆悵謝家池閣。紅燭背。繡簾垂。夢長君不知。

又

星斗稀。鐘鼓歇。簾外曉鶯殘月。蘭露重。柳風斜。滿庭堆落花。虛閣上。倚闌望。還似去年惆悵。春欲暮。思無窮。舊歡如夢中。

又

玉爐香。紅蠟淚。偏照畫堂秋思。眉翠薄。鬢雲殘。夜長衾枕寒。梧桐樹。三更雨。不道離情正苦。一葉葉。一聲聲。空階滴到明。胡元任云。庭筠工於造語。極為奇麗。此詞尤佳。

歸國遙

香玉。翠鳳寶釵垂翠。鈿筐交勝金粟。越羅春水綠。畫堂照簾殘燭。夢餘更漏促。謝娘無限心曲。曉屏山斷續。

又

雙臉。小鳳戰篋金鈿。舞衣無力風斂。藕絲秋色染。錦帳繡幃斜掩。露珠清曉簾。粉心黃蘂花壓。黛眉山雨點。

酒泉子

楚女不歸。樓枕小河春水。月孤明。風又起。杏花稀。玉釵斜篸雲鬢重。裙

上鏤金雙鳳。入行書。千里夢。鴈南飛。

南歌子

手裏金鸚鵡。胸前繡鳳凰。偷眼暗形相。不如從嫁與。作鴛鴦。

又

似帶如絲柳。團酥握雪花。簾卷玉鈎斜。九衢塵欲暮。逐香車。

又

倭墮低梳髻。連娟細掃眉。終日兩相思。爲君憔悴盡。百花時。

又

轉盼如波眼。娉婷似柳腰。花裏暗相招。憶君腸欲斷。恨春宵。

又

懶拂鴛鴦枕。休縫翡翠裙。羅帳罷爐薰。近來心更切。爲思君。

河瀆神

河上望叢祠。廟前春雨來時。楚山無限鳥飛遲。蘭棹空傷別離。

鶻啼不歇。豔紅開盡如血。蟬鬢美人愁絕。百花芳草佳節。

又

孤廟對寒潮。西陵風雨蕭蕭。謝娘惆悵倚蘭橈。淚流玉筍千條。

聽思歸樂。早梅香滿山郭。回首兩情蕭索。離魂何處飄泊。

女冠子

含嬌含笑。宿翠殘紅窈窕。鬢如蟬。寒玉簪秋水。輕紗卷碧烟。

雪胸鸞鏡

裏。琪樹鳳樓前。寄語青娥伴。早求仙。

玉蝴蝶

秋風淒切傷離。行客未歸時。塞外草先衰。江南鴈到遲。
芙蓉凋嫩臉。楊柳墮新眉。搖落使人悲。斷腸誰得知。

清平樂

洛陽愁絕。楊柳花飄雪。終日行人爭攀折。橋下水流嗚咽。
上馬爭勸離觴。南浦鶯聲斷腸。愁殺平原年少。回首揮淚千行。

還方怨

憑繡檻。解羅幃。未得君書。腸斷瀟湘春鴈飛。不知征馬幾時歸。
海棠花謝也。雨霏霏。

訴衷情

鶯語。花舞。春晝午。雨霏微。金帶枕。宮錦。鳳凰帷。柳弱燕交飛。
依依。遼陽音信稀。夢中歸。

思帝鄉

花花。滿枝紅似霞。羅袖畫簾腸斷。卓香車。迴面共人閑語。
戰篋金鳳斜。惟有阮郎春盡。不歸家。

夢江南

梳洗罷。獨倚望江樓。過盡千帆皆不是。斜暉脈脈水悠悠。
腸斷白蘋洲。

河傳

江畔相喚。曉妝鮮。仙景箇女采蓮。請君莫向那岸邊。少年好花新滿船。紅袖搖曳逐風軟。垂玉腕。腸向柳絲斷。浦南歸。浦北歸。莫知晚來人已稀。

又

湖上。閑望。雨蕭蕭。烟浦花橋路遙。謝娘翠蛾愁不銷。終朝夢魂迷晚潮。蕩子天涯歸棹遠。春已晚。鶯語空腸斷。若耶溪。溪水西。柳堤。不聞郎馬嘶。

蕃女怨

萬枝香雪開已遍。細雨雙燕。鈿蟬箏。金雀扇。畫梁相見。鴈門消息不歸來。又飛迴。

又

磧南沙。上驚鴈起。飛雪千里。玉連環。金鏃箭。年年征戰。畫樓離恨錦屏空。杏花紅。

荷葉杯

鏡水夜來秋月。如雪。采蓮時。小娘紅粉對寒浪。惆悵。正思惟。一作相思。

又

楚女欲歸南浦。朝雨。濕愁紅。小船搖漾入花裏。波起。隔西風。

皇甫松字子奇。湜之子。

天仙子

晴野鷺鷥飛一隻。水蒹花發秋江碧。劉郎此日別天仙。登綺席。淚珠滴。十二晚峯青。一作高歷歷。

又

躑躅花開紅照水。鷓鴣飛繞青山背。行人經歲始歸來。千萬里。錯相倚。懊惱天仙應有以。

摘得新

酌一卮。須教玉笛吹。錦筵紅蠟燭。莫來遲。繁紅一夜經風雨。是空枝。

夢江南

蘭燼落。屏上暗紅蕉。閑夢江南梅熟日。夜船吹笛雨瀟瀟。人語驛邊橋。

又

樓上寢。殘月下簾旌。夢見秣陵惆悵事。桃花柳絮滿江城。雙鬢坐吹笙。

鄭符 字夢復。官祕書監。

閑中好 題永壽寺

閑中好。盡日松為侶。此趣人不知。輕風度僧語。

段成式 字柯古。文昌子。會昌中官太常少卿。

閑中好

閑中好。塵務不縈心。坐對當窗木。看移二面陰。

司空圖 字表聖。泗州人。咸通中進士。官禮部員外郎。黃巢之亂。避地中條山。昭宗反正。以戶部侍郎召

至京。復歸。再以兵部侍郎召。不赴。有一鳴集。

酒泉子

買得杏花。十載歸來方始拆。假山西畔藥欄東。滿枝紅。旋開旋落旋成

空。白髮多情。人更惜。黃昏把酒祝東風。且從容。

韓倜字致堯。一作光。萬年人。龍紀中進士。累官兵部侍郎。朱全忠惡之。貶濮州司馬。有香奩集。

生查子

侍女動妝奩。故故驚人睡。那知本未眠。背面偷垂淚。
鴛鴦被。時復見殘燈。和煙墜金穗。懶卸鳳凰釵。羞入

張曙小字阿灰。侍郎。禕子。

浣溪沙

枕障薰爐隔繡帷。二年終日兩相思。杏花明月始應知。
天上人間何處去。舊歡新夢覺來時。黃昏微雨畫簾垂。

呂崑字洞賓。關右人。咸通中舉進士不第。攜家隱終南。

梧桐影

景德寺僧房
落日斜。秋風冷。今夜故人來不來。教人立盡梧桐影。
按別本首句。皆作落月斜。非是。今從竹坡詩話更正。又景德寺蛾眉院壁所題。今夜故人作幽人。今夜。

柳氏

韓翃寵姬。
楊柳枝答韓員外

楊柳枝。芳菲節。可恨年年贈離別。一葉隨風忽報秋。縱使君來豈堪折。

王麗真女郎見才鬼錄。

字字雙

牀頭錦衾斑復斑。架上朱衣殷復殷。空庭明月閑復閑。夜長路遠山復山。

無名氏

後庭宴

千里故鄉。十年華屋。亂魂飛過屏山簇。眼重眉褪不勝春。菱花知我銷香玉。雙雙燕子歸來。應解笑人幽獨。斷歌零舞。遺恨清江曲。萬樹綠低迷。一庭紅撲蔌。

卷二一 五代十國詞七十一一首

後唐莊宗皇帝

一葉落

一葉落。寒朱箔。此時景物正蕭索。畫樓月影寒。西風吹羅幕。吹羅幕。往事思量著。

憶仙姿

會宴桃源深洞。一曲舞鸞一作清歌歌鳳。長記別伊時。和淚出門相送。如夢如夢。殘月落花烟重。

蜀主王衍

醉妝詞

者邊走。那邊走。只是尋花柳。那邊走。者邊走。莫厭金杯酒。北夢瑣言云。蜀主衍嘗裹小巾。其尖如錐。宮女多衣道服。簪蓮花冠。施臙脂夾臉。號醉妝。作此詞。

蜀主王衍

玉樓春夜起避暑摩訶池上作

冰肌玉骨清無汗。水殿風來暗香滿。繡簾一點月窺人。欹枕釵橫雲鬢亂。
起來瓊戶啓無聲。時見疎星渡河漢。屈指西風幾時來。只恐流年暗中
換。按蘇子瞻洞仙歌本闕括此詞。然未免反有點金之憾。

南唐中宗李景

山花子

菡萏香銷翠葉殘。西風愁起綠波間。還與韶光共憔悴。不堪看。
細雨夢
回雞塞遠。小樓吹徹玉笙寒。多少淚珠何限恨。倚闌干。

又

手卷真珠上玉鈎。依前春恨鎖重樓。風裏落花誰是主。思悠悠。
青鳥不
傳雲外信。丁香空結雨中愁。回首綠波三峽暮。接天流。

後主李煜

相見歡

林花謝了春紅。太匆匆。無奈朝來寒雨晚來風。
胭脂淚。相留醉。幾時重。
自是人生長恨水長東。

又

無言獨上西樓。月如鈎。寂寞梧桐深院鎖清秋。
翦不斷。理還亂。是離愁。
別是一般滋味在心頭。黃叔暘云。此詞最悽惋。所謂亡國之音哀以思。

清平樂

別來春半。觸目愁腸斷。砌下落梅如雪亂。拂了一身還滿。鴈來音信無憑。路遙歸夢難成。離恨恰如春草。更行更遠還生。

浪淘沙

簾外雨潺潺。春意闌珊。羅衾不暖五更寒。夢裏不知身是客。一晌貪歡。獨自暮凭欄。無限江山。別時容易見時難。流水落花歸去也。天上人間。

條二云。含思懷惋。

又

往事只堪哀。對景難排。秋風庭院藓侵階。一桁珠簾閑不卷。終日誰來。金劍已沉埋。壯氣蒿萊。晚涼天靜月華開。想得玉樓瑤殿影。空照秦淮。

玉樓春

晚妝初了明肌雪。春殿嬪娥魚貫列。鳳簫聲斷水雲閑。重按霓裳歌遍徹。臨風誰更飄香屑。醉拍闌干情未切。歸時休放燭花紅。待踏馬蹄清夜月。

子夜

花明月暗籠一作飛輕霧。今宵好向郎邊去。剗一作衩襪步香階。一作苔手提金縷鞋。畫堂南畔見。一晌偎人顫。好一作奴爲出一作去來難。教君恣意憐。

又

人生愁恨何能免。消魂獨我情何限。故國夢重歸。覺來雙淚垂。高樓誰與上。長記秋晴望。往事已成空。還如一夢中。

虞美人

風迴小院庭蕪綠。柳眼春相續。凭欄半日獨無言。依舊竹聲新月似當年。
笙歌未散樽罍在。池面冰初解。燭明香暗畫樓深。滿鬢清霜殘雪思難
禁。

又

春花秋月何時了。往事知多少。小樓昨夜又東風。故國不堪回首月明中。
雕欄玉砌應猶在。只是朱顏改。問君能有幾多愁。恰似一江春水向東
流。

臨江仙

櫻桃落盡春歸去。蝶翻輕粉雙飛。子規啼月小樓西。玉鈎羅幕。惆悵暮烟
垂。別巷寂寥人散後。望殘烟草低迷。爐香閑裊鳳凰兒。空持羅帶。回首
恨依依。蘇子由云。淒涼怨慕。真亡國之聲也。按是詞。相傳後主在圍城中賦。未就而城破。闕後三句。劉延
仲補之云。何時重聽玉驪嘶。撲簾柳絮。依約夢回時。而耆舊續聞所載。故是全作。當從之。

和

凝

字成績。鄆州人。舉進士。仕後唐。知制誥翰林學士。晉天福中。拜中書侍郎同中書門下平章事。
歸後漢。拜太子太傅。封魯國公。有紅葉稿。

春光好

蘋葉軟。杏花明。畫船輕。雙浴鴛鴦出綠汀。棹歌聲。
春水無風無浪。春天
半雨半晴。紅粉相隨南浦晚。幾含情。

采桑子

蝨蟻領上訶梨子。繡帶雙垂。椒戶閑時。競學擣菹賭荔枝。叢頭鞋子紅編細。裙窄金絲。無事頻眉。春思翻教阿母疑。

河滿子

寫得魚牋無限。其如花鎖春輝。目斷巫山雲雨。空教殘夢依依。却愛薰香小鴨。羨他長在屏幃。

漁父

白芷汀寒立鷺鷥。蘋風輕翦浪花時。烟冪冪。日遲遲。香引芙蓉惹釣絲。

韋

莊

字端己。杜陵人。乾寧元年進士。入蜀。王建辟掌書記。尋召為起居舍人。建表留之。後為蜀散騎常侍。判中書門下事。有浣花集。

菩薩蠻

紅樓別夜堪惆悵。香燈半捲流蘇帳。殘月出門時。美人和淚辭。琵琶金翠羽。絃上黃鶯語。勸我早歸家。綠窗人似花。

又

人人盡說江南好。遊人只合江南老。春水碧於天。畫船聽雨眠。鑪邊人似月。皓腕凝霜雪。未老莫還鄉。還鄉須斷腸。

又

如今却憶江南樂。當時年少春衫薄。騎馬倚斜橋。滿樓紅袖招。翠屏金屈曲。醉入花叢宿。此度見花枝。白頭誓不歸。

又

洛陽城裏春光好。洛陽才子他鄉老。柳暗魏王堤。此時心轉迷。桃花春水綠。水上鴛鴦浴。凝恨對斜暉。憶君君不知。

歸國遙

金翡翠。爲我南飛傳我意。罨畫橋邊春水。幾年花下醉。別後只知相愧。淚珠難遠寄。羅幙繡幃鴛被。舊歡如夢裏。

應天長

綠槐陰裏黃鸝語。深院無人春晝午。畫簾垂。金鳳舞。寂寞繡屏香一炷。碧天雲。無定處。空有夢魂來去。夜夜綠窗風雨。斷腸君信否。

又

別來半歲音書絕。一寸離腸千萬結。難相見。易相別。又是玉樓花似雪。暗相思。無處說。惆悵夜來烟月。想得此時情切。淚沾紅袖黠。

荷葉杯

絕代佳人難得。傾國花下見無期。一雙愁黛遠山眉。不忍更思惟。閑掩

翠屏金鳳。殘夢羅幕畫堂空。碧天無路信難通。惆悵舊房櫳。古今詞話云。韋莊

以才名寓蜀。王建割據。遂羈留之。莊有寵人。姿質豔麗。兼善詞翰。建聞之。託以教內人爲詞。強莊奪去。莊追念惻怛。作小重山及此詞。情意悽怨。人相傳播。盛行於時。姬後傳聞之。遂不食而卒。

又

記得那年花下。深夜初識謝娘時。水堂西面畫簾垂。攜手暗相期。惆悵曉鶯殘月。相別從此隔音塵。如今俱是異鄉人。相見更無因。

清平樂

野花芳草。寂寞關山道。柳吐金絲鶯語早。惆悵香閨暗老。羅帶悔結同心。獨凭朱欄思深。夢覺半牀斜月。小窗風觸鳴琴。

又

鶯啼殘月。繡閣香燈滅。門外馬嘶郎欲別。正是落花時節。妝成不畫蛾眉。含愁獨倚金屏。去路香塵莫掃。掃即郎去歸遲。

河傳

何處。烟雨。隋堤春暮。柳色葱蘢。畫橈金縷。翠旗高颭香風。水光融。青娥殿脚春妝媚。輕雲裏。綽約司花妓。江都宮闕。清淮月映迷樓。古今愁。

又

春晚。風暖。錦城花滿。狂殺遊人。玉鞭金勒。尋勝馳驟輕塵。惜良晨。翠蛾爭勸臨邛酒。纖纖手。拂面垂絲柳。歸時烟裏。鐘鼓正是黃昏。暗銷魂。

又

錦浦。春女。繡衣金縷。霧薄雲輕。花深柳暗。時節正是清明。雨初晴。玉鞭魂斷烟霞路。鶯鶯語。一望巫山雨。香塵隱映。遙望翠檻紅樓。黛眉愁。

訴衷情

燭燼香殘簾半卷。夢初驚。花欲謝。深夜。月籠明。何處按歌聲。輕輕。舞衣塵暗生。負春情。

又

碧沼紅芳烟雨淨。倚蘭橈。垂玉珮。交帶。裊纖腰。鴛夢隔星橋。迢迢。越羅香
暗銷。墜花翹。

上行盃

芳草灞陵春岸。柳烟深。滿樓絃管。一曲離聲腸寸斷。今日送君千萬。紅
縷玉盤金縷盞。須勸。珍重意。莫辭滿。

女冠子

四月十七。正是去年今日。別君時。忍淚佯低面。含羞半斂眉。不知魂已
斷。空有夢相隨。除却天邊月。沒人知。

更漏子

鐘鼓寒。樓閣暝。月照古桐金井。深院閉。小庭空。落花香露紅。烟柳重。春
霧薄。燈背水窗高閣。閑倚戶。暗沾衣。待郎郎不歸。

薛昭蘊仕至侍郎。

浣溪沙

粉上依稀有淚痕。郡庭花落欲黃昏。遠情深恨與誰論。記得去年寒食
日。延秋門外卓金輪。日斜人散暗銷魂。

相見歡

羅襦繡袂香紅。畫堂中。細草平沙蕃馬。小屏風。卷羅幕。凭妝閣。思無窮。
暮雨輕烟魂斷。隔簾櫳。

女冠子

求仙去也。奉鈿金篦盡捨。入巖巒。霧卷黃羅帳。雲彫白玉冠。野烟溪洞冷。林月石橋寒。靜夜松風下。禮天壇。

謁金門

春滿院。疊損羅衣金線。睡覺水精簾未卷。簾前雙語燕。斜掩金鋪一扇。滿地落花千片。早是相思腸欲斷。忍教頻夢見。

牛

嶠

字松卿。一字延峯。隴西人。乾符五年進士。歷官拾遺。補尚書郎。王建鎮蜀。辟判官。後仕蜀為給事中。

女冠子

錦江烟水。卓女燒春濃美。小檀霞。繡帶芙蓉帳。金釵芍藥花。額黃侵膩髮。臂釧透紅紗。柳暗鶯啼處。認郎家。

感恩多

兩條紅粉淚。多少香閨意。強攀桃李枝。斂愁眉。陌上鶯啼蝶舞。柳花飛。柳花飛。願得郎心。憶家還早歸。

望江怨

東風急。惜別花時手頻執。羅幃愁復入。馬嘶殘雨春蕪濕。倚馬立。寄語薄情郎。粉香和淚泣。

菩薩蠻

舞裙香暖金泥鳳。畫梁語燕驚殘夢。門外柳花飛。玉郎猶未歸。愁勻紅粉淚。眉翦春山翠。何處是遼陽。錦屏春晝長。

又
綠雲鬢上飛金雀。愁眉斂翠。春烟薄。香閣掩芙蓉。畫屏山幾重。窗寒天
欲曙。猶結同心苣。啼粉浣羅衣。問郎何日歸。

西溪子

捍撥雙盤金鳳。蟬鬢玉釵搖動。畫堂前。人不語。絃解語。彈到昭君怨處。翠
蛾愁。不擡頭。

江城子

鷓鴣飛起郡城東。碧江空。半灘風。越王宮殿。蘋葉藕花中。簾捲水樓魚浪
起。千片雪。雨濛濛。

毛文錫

字平珪。唐進士。事蜀爲翰林學士。遷內樞密使。歷文思殿大學士。司徒。

虞美人

鴛鴦對浴銀塘暖。水面蒲稍短。垂楊低拂麴塵波。蛛絲結網露珠多。滴圓
荷。遙思桃葉吳江碧。便是天涯隔。錦鱗紅鬣影沉沉。相思空有夢相尋。
意難任。

又

寶檀金縷鴛鴦枕。綬帶盤宮錦。夕陽低映小窗明。南園綠樹語鶯鶯。夢難
成。玉爐香暖頻添炷。滿地飄輕絮。珠簾不捲度沉烟。庭前閑立畫鞦韆。
豔陽天。

更漏子

春夜闌。春恨切。花外子規啼月。人不見。夢難憑。紅紗一點燈。偏怨別。是芳節。庭下丁香千結。宵霧散。曉霞輝。梁間雙燕飛。

紗窗恨

新春燕子還來至。一雙飛。壘巢泥溼。時時墜。宛人衣。後園裏看百花發。香風拂繡戶。金扉。月照紗窗。恨依依。

又

雙雙蛺蝶翅。塗鉛粉。啞花心。綺窗繡戶。飛來穩。畫堂陰。一三二月。愛隨飄絮。伴落花來拂衣襟。更翦輕羅片。傳黃金。

醉花間

休相問。怕相問。相問還添恨。春水滿塘生。鷓鴣還相趁。昨夜雨霏霏。臨明寒一陣。偏憶戍樓人。久絕邊庭信。

又

深相憶。莫相憶。相憶情難極。銀漢是紅牆。一帶遙相隔。金盤珠露滴。兩岸榆花白。風搖玉珮清。今夕爲何夕。

巫山一段雲

雨霽巫山上。雲輕映碧天。遠風吹散又相連。十二晚峯前。暗濕啼猿樹。高籠過客船。朝朝暮暮楚江邊。幾度降神仙。

牛希濟

嶠兄子。仕蜀爲御史中丞。降於後唐。

生查子

春山烟欲收。天澹稀星少。殘月臉邊明。別淚臨清曉。
情未了。回首猶重道。記得綠羅裙。處處憐芳草。
語已一本無已字多

又

新月曲如眉。未有團圓意。紅豆不堪看。滿眼相思淚。
心兒裏。兩朵隔牆花。早晚成連理。終日劈桃穰。人在

歐陽炯

事後蜀爲中書舍人。宣和畫譜貫休傳云大學士。

三字令

春欲盡。日遲遲。牡丹時。羅幌卷。翠簾垂。彩箋書。紅粉淚。兩心知。人不在。
燕空歸。負佳期。香燼落。枕函欹。月分明。花淡薄。惹相思。

南鄉子

嫩草如烟。石榴花發海南天。日暮江亭春影綠。鴛鴦浴。水遠山長看不足。

又

畫舸停橈。槿花籬外竹橫橋。水上遊人沙上女。迴顧。笑指芭蕉林裏住。

又

岸遠沙平。日斜歸路晚霞明。孔雀自憐金翠尾。臨水。認得行人驚不起。

又

洞口誰家。木蘭船繫木蘭花。紅袖女郎相引去。南浦。笑倚春風相對語。

又

路入南中。桄榔葉暗蓼花紅。兩岸人家微雨後。收紅豆。樹底纖纖擡素手。

又

袖斂鮫綃。采香深洞笑相邀。藤杖枝頭蘆酒滴。鋪葵席。豆蔻花間趁晚日。
憶昔花間初識面。紅袖半遮妝臉。輕轉石榴裙帶。故將纖纖玉指。偷撚雙
鳳金線。碧梧桐鎖深深院。誰料得兩情。何日教繾綣。羨春來雙燕。飛到
玉樓。朝暮相見。

賀聖朝

江城子

曉日金陵岸草平。落霞明。水無情。六代繁華。暗逐逝波聲。空有姑蘇臺上
月。如西子鏡照江城。

鳳樓春

鳳髻綠雲叢。深掩房櫳。錦書通。夢中相見覺來慵。勻面淚。臉珠融。因想玉
郎何處去。對淑景誰同。小樓中。春思無窮。倚闌凝望。閨牽愁緒。柳花飛
趁東風。斜日照簾櫳。羅幌香冷粉屏空。海棠零落。鶯語殘紅。

清平樂

春來街砌。春雨如絲細。春徑滿飄紅杏蒂。春燕舞隨風勢。春幡細縷春
縵。春閨一點春燈。自是春心撩亂。非關春夢無憑。

卷二 五代十國詞七十六首

顧 夔 仕蜀爲大尉。

燕颺晴景。小窗屏暖。鴛鴦交頸。菱花掩却翠鬟。慵整海棠簾外影。繡
幃香斷金鸂鶒。無消息。心事空相憶。倚東風。春正濃。愁紅淚痕衣上重。

又

棹舉舟去。波光渺渺。不知何處。岸花汀草共依依。雨微鷓鴣相逐飛。天
涯離恨江聲咽。啼猿切。此意向誰說。倚蘭橈。獨無悽。魂銷小鑪香欲焦。

醉公子

漠漠秋雲澹。紅藕香侵檻。枕倚小山屏。金鋪向晚扃。睡起橫波慢。獨望
情何限。衰柳數聲蟬。魂銷似去年。

又

岸柳垂金線。雨晴鶯百轉。家住綠楊邊。往來多少年。馬嘶芳草遠。高樓
簾半捲。斂袖翠蛾攢。相逢爾許難。

玉樓春

月照玉樓春漏促。颯颯風搖庭砌竹。夢驚鴛鴦被覺來時。何處管絃聲斷續。
惆悵少年游冶去。枕上兩蛾攢細綠。曉鶯簾外語花枝。背帳猶殘紅蠟
燭。

訴衷情

香滅簾垂春漏永。整鴛鴦衾。羅帶重。雙鳳縷黃金。窗外月光臨。沉沉斷腸無
處尋。負春心。

又

永夜拋人何處去。絕來音。香閣掩。眉斂月將沉。爭忍不相尋。怨孤衾。換我心爲你心。始知相憶深。

臨江仙

碧染長空池似鏡。倚樓閑望凝情。滿衣紅藕細香清。象牀珍簟。山障掩。玉琴橫。暗想昔年歡笑事。如今贏得愁生。博山爐暖澹烟輕。蟬吟人靜。殘日傍。小窗明。

楊柳枝

秋夜香閨思寂寥。漏迢迢。鴛幃羅幌麝烟銷。燭光搖。正憶玉郎遊蕩去。無尋處。更聞簾外雨瀟瀟。滴芭蕉。

鹿虔扈 事蜀爲永泰軍節度使。加大保。

臨江仙

金鎖重門荒苑靜。綺窗愁對秋空。翠華一去寂無蹤。玉樓歌吹。聲斷已隨風。烟月不知人事改。夜闌還照深宮。藕花相向野塘中。暗傷亡國。清露泣香紅。

閻選 後蜀處士。事後主。

浣溪沙

寂寞流蘇冷繡茵。倚屏山枕惹香塵。小庭花露泣濃春。劉阮信非仙洞客。嫦娥終是月中人。此生無路訪東隣。

河傳

秋雨秋雨。無晝無夜。滴滴霏霏。暗燈涼簟。怨分離。妖姬不勝悲。西風稍
急。喧窗竹。停又續。膩臉懸雙玉。幾回邀約。鴈來時。違期。鴈歸人不歸。

魏承班 仕至太尉。

玉樓春

寂寂畫堂梁上燕。高卷翠簾橫數扇。一庭春色惱人來。滿地落花紅幾片。
愁倚錦屏低雪面。淚滴繡羅金縷線。好天涼月盡傷心。爲是玉郎長不
見。

生查子

烟雨晚晴天。零落花無語。難話此時心。梁燕雙來去。琴韻對薰風。有恨
和情撫。腸斷斷。絃頻。淚滴黃金縷。

尹 鶚 官參卿。

臨江仙

深秋寒夜銀河靜。月明深院中庭。西窗幽夢等閑成。逡巡覺後。特地恨難
平。紅燭半條殘焰短。依稀暗背銀屏。枕前何事最傷情。梧桐葉上。點點
露珠零。

菩薩蠻

隴雲暗合秋天白。俯窗獨坐窺烟陌。樓際角重吹。黃昏方醉歸。荒唐難
共語。明日還應去。上馬出門時。金鞭莫與伊。

毛熙震蜀人。官祕書監。

臨江仙

幽閨欲曙聞鶯囀。紅窗月影微明。好風頻謝落花聲。隔幃殘燭。猶照綺屏
箏。繡被錦茵眠玉暖。炷香斜裊烟輕。淡蛾羞斂不勝情。暗思閑夢。何處
逐雲行。

清平樂

春光欲暮。寂寞閑庭戶。粉蝶雙雙穿檻舞。簾卷晚天疎雨。含愁獨倚閨
幃。玉爐烟斷香微。正是銷魂時節。東風滿樹花飛。

南歌子

遠山愁黛碧。橫波慢臉明。膩香紅玉茜羅輕。深院晚堂人靜。理銀箏。鬢
動行雲影。裙遮點屐聲。嬌羞愛問曲中名。楊柳杏花時節。幾多情。

後庭花

越羅小袖新香積。薄籠金釧。倚闌無語。搖輕扇。半遮勻面。春殘日煖鶯
嬌嬾。滿庭花片。一作縱爭不教人長相見。畫堂深院。

河滿子

寂寞芳菲暗度。歲華如箭堪驚。緬想舊歡多少事。轉添春思難平。曲檻絲
垂金柳。小窗絃斷銀箏。深院空聞燕語。滿園閑落落花輕。一片相思休不
得。忍教長日愁生。誰見夕陽孤夢。覺來無限傷情。

李珣 梓州人。蜀秀才。有瓊瑤集。黃休復茅亭客話。其先波斯人。有詩名預寶貢。

巫山一段雲

古廟依青嶂。行宮枕碧流。水聲山色鎖妝樓。往事悠悠。雲雨朝還暮。
烟花春復秋。啼猿何必近孤舟。行客自多愁。黃叔暘云。唐詞多緣題所賦。臨江仙則言
仙事。女冠子則述道情。河瀆神則咏祠廟。大概不失本題之意。爾後漸變。失題遠矣。如珣此作。實唐人本來詞
體如此。

南鄉子

烟漠漠。雨淒淒。岸花零落鷓鴣啼。遠客扁舟臨野渡。思鄉處。潮退水平春
色暮。

又

蘭橈舉。水紋開。競攜藤籠采蓮來。迴塘深處遙相見。邀同宴。綠酒一卮紅
上面。

又

歸路近。扣舷歌。采真珠處水風多。曲岸小橋山月過。烟深鎖。荳蔻花垂千
萬朵。

又

乘綵舫。過蓮塘。棹歌驚起睡鴛鴦。帶香游女偎人笑。一作游女帶香偎人笑。爭窈
窕。競折團荷遮晚照。

又

傾綠蟻。泛紅螺。閑邀女伴簇笙歌。避暑信船輕浪裏。閑遊戲。夾岸荔枝支紅

蘸水。

又

漁市散。渡船稀。越南雲樹望中微。行客待潮天欲暮。迷春浦。愁聽猩猩啼瘴雨。

又

相見處。晚晴天。刺桐花下越臺前。暗裏迴眸深屬意。遺雙翠。騎象背人先過水。

又

攜籠去。采菱歸。碧波風起雨霏霏。趁岸小船齊棹急。羅衣濕。出向桃榔樹下立。

又

登畫舸。泛清波。采蓮時唱采蓮歌。攔棹聲齊羅袖斂。池光點。驚起沙鷗八九點。

又

雙髻墜。小眉彎。笑隨女伴下春山。玉纖遙指花深處。爭迴顧。孔雀雙雙迎日舞。

菩薩蠻

迴塘風起波紋細。刺桐花裏門斜閉。殘日照平蕪。雙雙飛鷓鴣。征帆何處客。相見還相隔。不語欲魂銷。望中烟水遙。

又

隔簾微雨雙飛燕。砌花零落紅深淺。捻得寶箏調。心隨征棹遙。楚天雲外路。動便經年去。香斷畫屏深。舊歡何處尋。

西溪子

金縷翠鈿浮動。妝罷小窗圓夢。日高時。春已老。人未到。滿地落花慵掃。無語倚屏風。泣殘紅。尊前集作離思正難緘。燕喃喃。

河傳

去去何處。迢迢巴楚。山水相連。朝雲暮雨。依舊十二峯前。猿聲到客船。愁腸豈異丁香結。因離別。故國音書絕。想佳人。花下對明月。春風恨應同。

孫光憲

字孟文。陵州人。游荆南。高從晦署為從事。仕南平。累官檢校祕書。兼御史大夫。勸高繼冲獻三州之地。宋太祖授以黃州刺史。將用為學士。未及而卒。有荆臺筆幄。橘齋鞏湖諸集。

河瀆神

汾水碧依依。黃雲落葉初飛。翠娥一去不言歸。廟門空掩斜暉。四壁陰森排古畫。依舊瓊輪羽駕。小殿沉沉清夜。銀燈飄落香燭。

又

江上草芊芊。春晚湘妃廟前。一方卵色楚南天。數行斜鴈聯翩。獨倚朱闌情不極。魂斷終朝相憶。兩槩不知消息。遠汀時起鷓鴣。

後庭花

石城依舊空江國。故宮春色。七尺青絲芳草碧。絕世難得。玉英落盡何

人識野棠如織。只是教人添怨憶。悵望無極。

清平樂

愁腸欲斷。正是青春半。連理分枝鸞失伴。又是一場離散。掩鏡無語眉低。思隨芳草萋萋。憑仗東風吹夢。與郎終日東西。

女冠子

淡花瘦玉。依約神仙妝束。佩瓊文。瑞露通宵貯。幽香盡日焚。碧紗籠絳節。黃藕冠濃雲。勿以吹簫伴。不同羣。

風流子

樓倚長堤欲暮。瞥見神仙伴侶。微傅粉。攏梳頭。隱映畫簾開處。無語。無緒。慢曳羅裙歸去。

又

金絡玉銜嘶馬。繫向綠楊陰下。朱戶掩。繡簾垂。曲院水流花謝。歡罷歸也。猶在九衢深夜。

思帝鄉

如何。遣情情更多。永日水晶簾下。斂羞蛾。六幅羅裙窄地。微行曳碧波。看盡滿池疎雨。打團荷。

上行盃

離棹逡巡欲動。臨極浦。故人相送。去住心情知不共。金船滿捧。綺羅愁。絲管咽。迴別。帆影滅。江浪如雪。

浣溪沙

蓼岸風多橘柚香。江邊一望楚天長。片帆烟際閃孤光。日送征鴻飛杳杳。思隨流水去茫茫。蘭紅波碧憶瀟湘。

謁金門

留不得。留得也應無益。白紵春衫如雪色。揚州初去日。輕別離。甘拋擲。江上滿帆風疾。却羨綵鴛三十六。孤鸞還一隻。

思越人

古臺平。芳草遠。館娃宮外春深。翠黛空留千載恨。教人何處相尋。綺羅無復當時事。露花點滴香淚。惆悵遙天橫綠水。鴛鴦對對飛起。

又

渚蓮枯。宮樹老。長洲廢苑蕭條。想像玉人空一作何處所。月明獨上溪橋。經春初敗秋風起。紅蘭綠蕙愁死。一片風流傷心地。魂銷日斷西子。

張

泌

字子澄。江南人。仕南唐為內史舍人。

酒泉子

紫陌青門。三十六宮春色。御溝輦路暗相通。杏園風。咸陽沽酒寶釵空。笑指未央歸去。插花走馬落殘紅。月明中。

南歌子

柳色遮樓。暗桐花落砌香。畫堂開處遠風涼。高卷水精簾額襯斜陽。

江城子

碧闌干外小中庭。雨初晴。曉鶯聲。飛絮落花時節近清明。睡起卷簾無一事。勻面了。沒心情。

又

浣花溪上見卿卿。臉波明。黛眉輕。高綰綠雲金簇小蜻蜓。好是問他來得麼。和笑道。莫多情。

浣溪沙

鈿轂香車過柳堤。樺烟分處馬頻嘶。為他沉醉不成泥。花滿驛亭香露細。杜鵑聲斷玉蟾低。含情無語倚樓西。

馮延巳

字正中。其先彭城人。唐末徙家新安。事南唐為左僕射同平章事。有陽春錄一卷。

陳世脩序云。馮公全外舍祖樂府。思深詞麗。韻逸調新。

羅敷豔歌

馬嘶人語春風岸。芳草綿綿。楊柳橋邊。落日高樓酒旆懸。舊愁新恨知多少。目斷遙天。獨立花前。更聽笙歌滿畫船。

又

小堂深靜無人到。滿院春風。惆悵牆東。一樹櫻桃帶雨紅。愁心似醉兼如病。欲語還慵。日暮疎鐘。雙燕歸來畫閣中。

清平樂

雨晴烟晚。綠水新池滿。雙燕飛來垂柳院。小閣畫簾高捲。黃昏獨倚朱欄。西南初月眉彎。砌下落花風起。羅衣特地春寒。

又
春愁南陌。故國音書隔。細雨霏霏梨花白。燕拂畫簾金額。盡日相望王孫。塵滿羅衣淚痕。誰向橋邊吹笛。駐馬西望銷魂。

芳草渡

梧桐落。蓼花秋。烟初冷。雨纔收。蕭條風物正堪愁。人去後。多少恨。在心頭。燕鴻遠。羌笛怨。渺渺澄波一片。山如黛。月如鉤。笙歌散。魂夢斷。倚高樓。

歸國謠

江水碧。江上何人吹玉笛。扁舟遠送瀟湘客。蘆花千里霜月白。傷行色。明朝便是關山隔。

蝶戀花

六曲闌干偎碧樹。楊柳風輕。展盡黃金縷。誰把鈿箏移玉柱。穿簾燕子雙飛去。滿眼游絲兼落絮。紅杏開時。一霎清明雨。濃睡覺來鶯亂語。驚殘好夢無尋處。

又

誰道閑情拋棄久。每到春來。惆悵還依舊。日日花前常病酒。不辭鏡裏朱顏瘦。河畔青蕪堤上柳。爲問新愁。何事年年有。獨立小橋風滿袖。平林新月人歸後。

又

幾日行雲何處去。忘却歸來。不道春將暮。百草千花寒食路。香車繫在誰

家樹。淚眼倚樓頻獨語。雙燕來時。陌上相逢否。掩亂春愁如柳絮。依依
夢裏無尋處。

又

庭院深深深深幾許。楊柳堆烟。簾幙無重數。玉勒雕鞍遊冶處。樓高不見章
臺路。雨橫風狂三月暮。門掩黃昏。無計留春住。淚眼問花花不語。亂紅
飛過秋千去。

南鄉子

細雨溼秋風。金鳳花殘滿地紅。閑蹙黛眉慵不語。月緒。寂寞相思知幾許。
玉枕擁孤衾。抱恨還同歲情深。簾卷曲房誰共醉。憔悴。惆悵秦樓彈粉
淚。

喜遷鶯

宿鶯啼。鄉夢斷。春樹曉朦朧。殘燈和燼閉朱櫺。人語隔屏風。香已寒。燈
已絕。忽憶去年離別。石城花雨倚江樓。波上木蘭舟。

虞美人

玉鈎鸞柱調鸚鵡。宛轉留春語。雲屏冷落畫堂空。薄晚春寒無奈落花風。
奉籬燕子低燕去。拂鏡塵鸞舞。不知今夜月眉彎。誰佩同心雙結倚闌
干。

拋毬樂

梅落新春入後庭。眼前風物可無情。曲池波晚冰還合。芳草迎船綠未成。

且上高樓望。相共憑欄看月生。

又

霜積秋山萬樹紅。倚巖樓上挂朱櫳。白雲天遠重重恨。黃葉烟深淅淅風。髣髴梁州曲。吹在誰家玉笛中。

菩薩蠻

欹鬟墮髻搖雙漿。采蓮晚出清江上。顧影約流萍。楚歌嬌未成。相逢顰翠黛。笑把珠璫解。家住柳陰中。畫橋東復東。

三臺令

春色春色。依舊青山紫陌。日斜柳暗花蔫。醉臥春風少年。少年少年。行樂直須及早。

又

南浦南浦。翠鬟離人何處。當時攜手高樓。依舊樓前水流。流水流水。中有傷心雙淚。

浣溪沙

馬上凝情憶舊遊。照花淹竹小溪流。鈿箏羅幕玉搔頭。早是出門長帶月。可堪分袂又經秋。晚風斜日不勝愁。

應天長

一鉤初月臨妝鏡。蟬鬢鳳釵慵不整。重簾靜。層樓迴。惆悵落花風不定。綠烟低柳逕。何處轉轡金井。昨夜更闌酒醒。春愁過却病。

成幼文江南人仕南唐官大理卿。

謁金門

風乍起。吹皺一池春水。閑引鴛鴦香徑裏。手揆紅杏蕊。鬪鴨闌干遍倚。碧玉搔頭斜墜。終日望君君不至。舉頭聞鶻喜。陳質齋云。世言風乍起為馮延巳作。或云成幼文也。今陽春集無有。當是幼文作。

耿玉真女郎

南唐書云。盧絳病瘧且死。夜夢白衣婦人。歌此詞勸酒。歌數闕。因謂絳曰。子之疾。食蔗即愈。如言果差。迨數夕。又夢前婦人曰。妾乃玉真也。他日富貴。相見于固子坡。後入金陵。累官柱國。唐亡歸宋。以龔慎儀事坐誅。臨刑。有白衣婦人同斬。姿貌宛如所夢。問其姓名。曰耿玉真。問受刑之地。即固子坡也。

菩薩蠻

玉京人去秋蕭索。畫簷鵲起梧桐落。欹枕悄無言。月和清夢圓。背燈惟暗泣。何處砧聲急。眉黛遠山攢。芭蕉生暮寒。

卷四 宋詞六十七首

徽宗皇帝

探春令

簾旌微動。悄寒天氣。龍池冰泮。杏花笑吐香猶淺。又還是春將半。清歌妙舞從頭按。等芳時開宴。記去年對著。東風會許。不負鶯花願。

燕山亭見杏花作

裁剪冰綃。輕疊數重。冷淡臙脂勻注。新樣靚妝。艷溢香融。羞殺蕊珠宮女。易得凋零。更多少無情風雨。愁苦。問院落淒涼。幾番春暮。憑寄離恨重。重。這雙燕何會。會人言語。天遙地遠。萬水千山。知他故宮何處。怎不思量。除夢裏有時會去。無據。和夢也有時。一作新來不做。

高宗皇帝

漁父詞

水涵微雨湛虛明。小笠輕蓑未要晴。明鏡裏。縠紋生。白鷺飛來空外聲。

瑩中江行雜錄云。漁父詞清新簡遠。雖古之騷人詞客。老於江湖。擅名一時者。不能企及。

徐昌圖

莆陽人。太祖時守國子博士。累遷殿中丞。

臨江仙

飲散離亭西去。浮生長恨飄蓬。回頭烟柳漸重重。淡雲孤鴈遠。寒日暮天紅。今夜畫船何處。潮平淮月朦朧。酒醒人靜奈愁濃。殘燈孤枕夢。輕浪五更風。

潘 閔

字道遙。大名人。太宗朝賜進士第。坐事遁中條山。後收繫得釋。以為滁州參軍。有詞一卷。

酒泉子

長憶孤山。山在湖心如黛簇。僧房四面向湖開。輕棹去還來。芰荷香細。連雲閣閣上清聲簷下鐸。別來塵土汚人衣。空役夢魂飛。山陰陸子蠲云。句法清古。語帶烟霞。近時罕及。

又

長憶西湖。靈隱寺前天竺後。冷泉亭上幾曾遊。三伏似清秋。白猿時見攀高樹。長嘯一聲何處去。別來幾向畫圖看。終是欠峯巒。

又

長憶西湖湖水上。盡日憑欄樓上望。三三兩兩釣魚舟。島嶼正清秋。笛聲依約蘆花裏。白鳥成行忽驚起。別來閑想整綸竿。思入水雲寒。古今詞話云。石曼卿見此詞。使畫工繪之作圖。又湘山云。錢希白愛之。自書玉堂屏風。

夏

竦

字子喬。德安人。舉賢良方正。慶曆中。同中書門下平章事。判大名府。召入為宰相。改樞密使。封英國公。進鄭國公。卒贈大師中書令。謚文正。劉敞言竦姦邪。謚為正不可。改謚文莊。有集。

喜遷鶯令宮詞

霞散綺。月垂鉤。簾卷未央樓。夜涼銀漢截天流。宮闕鎖清秋。瑤臺樹。金莖露。鳳髓香盤烟霧。三千珠翠擁宸遊。水殿按涼州。

寇

準

字平仲。下邳人。太平興國中進士。累官尚書右僕射。集賢殿大學士。景德中。同中書門下平章事。封萊國公。為丁謂所構。乾興初。貶雷州司戶參軍。卒贈中書令。謚忠愍。有巴東集。

點絳脣

小陌輕寒。社公雨足東風慢。定巢新燕。溼雨穿花轉。象尺薰爐。拂曉停針線。愁蛾淺。飛紅零亂。側臥珠簾捲。

江南春

波渺渺。柳依依。孤村芳草遠。斜日杏花飛。江南春盡離腸斷。蘋滿汀洲人未歸。

塞草烟光闊。渭水波聲咽。春朝雨霽。輕塵斂。征鞍發。指青青楊柳。又是輕
攀折。動黯然。知有後會甚時節。更盡一杯酒。歌一闋。歎人生裏。難歡聚。
易離別。且莫辭沉醉。聽取陽關徹。念故人。千里自此共明月。

王禹偁

字元之。鉅野人。太平興國八年進士第。累知制誥。入翰林為學士。咸平初。出守黃州。徙蘄州卒。有小畜集。

點絳脣

雨恨雲愁。江南依舊稱佳麗。水村漁市。一縷孤烟細。天際征鴻。遙認行
如綴。平生事。此時凝睇。誰會憑欄意。

錢惟演

字希聖。吳越王俶之子。少補牙門將。歸宋為右屯衛將軍。累遷樞密使。罷為鎮國軍節度觀察
留後。改保大軍節度使。知河陽。入朝加同中書門下平章事。坐擅議宗廟。且與后家通婚。落平
章事。為崇信軍節度使歸鎮。卒諡曰思。改諡文僖。有擁旄集。

玉樓春

城上風光鶯語亂。城下烟波春拍岸。綠楊芳草幾時休。淚眼愁腸先已斷。
情懷漸變成衰晚。鸞鏡朱顏驚暗換。昔年多病厭芳樽。今日芳樽惟恐
淺。黃叔暘云。此暮年作。詞極悽惋。

晏殊

字同叔。臨川人。景祐二年同進士出身。康定間。拜集賢殿學士。同中書門下平章事。兼樞密使。
卒贈司空。兼侍中。諡元獻。有珠玉詞一卷。

晁无咎云。元獻不蹈襲人語。而風調閑雅。如舞低楊柳樓心月。歌盡桃花扇底風。知此人不仕

三家村也。劉貢父云。元獻尤喜馮延巳歌詞。其所自作。亦不減延巳。

破陣子

燕子來時新社。梨花落後清明。池上碧苔三四點。葉底黃鸝一兩聲。日長飛絮輕。巧笑東鄰女伴。采桑徑裏逢迎。疑怪昨宵春夢好。元是今朝鬪草贏。笑從雙臉生。

清平樂

金風細細。葉葉梧桐墜。綠酒初嘗人易醉。一枕小窗濃睡。紫薇朱槿初殘。斜陽却照闌干。雙燕欲歸時節。銀屏昨夜微寒。

又

紅牋小字。說盡平生意。鴻雁在雲魚在水。惆悵此情難寄。斜陽獨倚西樓。遙山恰對簾鉤。人面不知何處。綠波依舊東流。

踏莎行

碧海無波。瑤臺有路。思量便合雙飛去。當時輕別意中人。山長水遠知何處。綺席凝塵。香閨掩霧。紅箋小字憑誰附。高樓日盡欲黃昏。梧桐葉上蕭蕭雨。

又

小徑紅稀。芳郊綠遍。高臺樹色陰陰見。春風不解禁楊花。濛濛亂撲行人面。翠葉藏鶯。珠簾隔燕。爐香靜逐遊絲轉。一場愁夢酒醒時。斜陽却照深深院。

蝶戀花

檻菊愁烟蘭泣露。羅幙輕寒。燕子雙飛去。明月不諳離別苦。斜光到曉穿朱戶。
昨夜西風凋碧樹。獨上高樓。望盡天涯路。欲寄彩鸞無尺素。山長水闊知何處。

清商怨

關河愁思望處滿。漸素秋向晚。鴈過南雲。行人回淚眼。雙鸞衾裯悔展。夜又永。枕孤人遠。夢未成歸。梅花聞塞管。

相思兒令

昨日探春消息。湖上綠波平。無奈繞堤芳草。還向舊痕生。有酒且醉瑤觥。更何妨檀板新聲。誰教楊柳千絲。就中牽繫人情。

賈昌朝

字子明。獲鹿人。天禧中進士。累拜同中書門下平章事。兼侍中。封許國公。進魏國公。卒。諡文元。有集。

木蘭花令

都城水綠嬉遊處。仙棹往來人笑語。紅隨遠浪泛桃花。雪散平堤飛柳絮。東君欲共春歸去。一陣狂風和驟雨。碧油紅旆錦障泥。斜日畫橋芳草路。
黃叔暘云。文元公平生。惟賦此一詞。極有風味。

王琪

字君玉。華陽人。舉進士。歷官知制誥。加樞密直學士。以禮部侍郎致仕。陳輔之云。君玉有望江南十首。自謂謫仙。荆公酷愛其紅綃香潤入梅天之句。

望江南

江南雨。風送滿長川。碧瓦烟昏沉柳岸。紅綃香潤入梅天。飄灑正瀟然。朝與暮。長在楚峯前。寒夜愁歎金帶枕。春江深閉木蘭船。烟渚遠相連。

又

江南岸。雲樹半晴陰。帆去帆來天亦老。潮生潮落日空沉。南北別離心。與廢事。千古一沾襟。山下孤烟漁市遠。柳邊疎雨酒家深。行客莫登臨。

林

逋

字君復。錢塘人。結廬孤山。二十年足不及城市。真宗賜以粟帛。詔長吏歲時勞問。既卒。仁宗賜諡和靖先生。有集。

霜天曉角梅

冰清霜潔。昨夜梅花發。甚處玉龍三弄。聲搖動。枝頭月。夢絕金獸熱。曉寒蘭燼滅。要捲珠簾清賞。且莫掃。堦前雪。

點絳脣草

金谷年年。亂生春色誰為主。餘花落處。滿地和煙雨。又是離歌一闋長亭暮。王孫去。萋萋無數。南北東西路。

李遵勗

字公武。崇矩孫。第進士。尙荆國大長公主。授左龍武軍駙馬都尉。累遷寧國軍節度使。徙鎮國軍。知許州。卒贈中書令。諡和文。有閑宴集。

滴滴金

帝城五夜宴遊歇。殘燈外看殘月。都來猶在醉鄉中。聽更漏初徹。行樂已成閑話說。如春夢覺時節。大家同約探春行。問甚花先發。

葉清臣

字道卿。長洲人。天聖初進士。歷官翰林學士。權三司使。罷知河陽。卒贈左諫議大夫。有集。

賀聖朝

滿斟綠醕留君住。莫匆匆歸去。三分春色二分愁。更一分風雨。花開花謝。都來幾許。且高歌休訴。不知來歲牡丹時。再相逢何處。

聶冠卿

字長孺。新安人。舉進士。慶曆中。入翰林為學士。判昭文館。兼侍讀學士。有蘄春集。

多麗李良定席上賦

想人生。美景良辰堪惜。向其間。賞心樂事。古來難是并得。况東城。鳳臺公苑。泛晴波。淺照金碧。露洗華桐。烟霏絲柳。綠陰搖曳。蕩春一色。畫堂迴。玉簪瓊佩。高會盡詞客。清歡久。重燃絳蠟。別就瑤席。有飄若驚鴻體態。暮為行雨標格。逞朱脣。緩歌妖麗。似聽流鶯亂花隔。慢舞縈回。嬌鬟低。腰肢纖細。困無力。忍分散。彩雲歸後。何處更尋覓。休辭醉。明月好花。莫謾輕擲。黃叔暘云。冠卿詞不多見。如此篇亦可謂才情富麗矣。其露洗華桐四句。又所謂玉中之珠。璧珠中之夜光。每一觀之。撫玩無斁。胡元任云。露洗華桐一語。此是仲春天氣。下乃云綠陰搖曳蕩春一色。其時未有綠陰。亦語病也。

李師中

字誠之。楚丘人。中進士科。仁宗朝。權主管經略司文字。提點廣西刑獄。歷天章閣待制。河東都轉運使。貶和州團練副使安置。遷右司郎中。

菩薩蠻

子規啼破城樓月。畫船曉載笙歌發。兩岸荔枝紅。萬家烟雨中。佳人相對泣。淚下羅衣溼。從此信音稀。嶺南無鴈飛。

韓琦

字稚圭。安陽人。天聖中進士。嘉祐初。同中書門下平章事。集賢殿大學士。遷昭文館大學士。封

儀國公。進封衛國公。再進魏國公。拜右僕射。卒贈尚書令。諡忠獻。徽宗追論定策勳。贈魏郡王。有安陽集。

吳虎臣云。魏公皇祐初鎮揚州。撰維揚好四章。所謂二十四橋千步柳。春風十里上珠簾者是也。其後罷相出鎮安陽。復作安陽好詞十章。

點絳脣

病起慊慊。庭前花影添憔悴。亂紅飄砌。滴盡真珠淚。惆悵前春。誰向花前醉。愁無際。武陵凝睇。人遠波空翠。

范仲淹

字希文。吳縣人。大中祥符八年進士。仕至樞密副使。參知政事。卒贈兵部尚書。楚國公。諡文正。有集。

蘇幕遮

碧雲天。紅葉地。秋色連波。波上寒烟翠。山映斜陽天接水。芳草無情。更在斜陽外。黯鄉魂。追旅意。夜夜除非好夢留人睡。明月樓高休獨倚。酒入愁腸。化作相思淚。

御街行

紛紛墜葉飄香砌。夜寂靜。寒聲碎。真珠簾捲玉樓空。天澹銀河垂地。年年今夜。月華如練。長是人千里。愁腸已斷無由醉。酒未到。先成淚。殘燈明滅枕頭欹。諳盡孤眠滋味。都來此事。眉間心上。無計相迴避。

漁家傲

塞下秋來風景異。衡陽鴈去無留意。四面邊聲連角起。千嶂裏。長烟落日

孤城閉。濁酒一杯家萬里。燕然未勒歸無計。羌管悠悠霜滿地。人不寐。將軍白髮征夫淚。

宋 祁 字子京。安州安陸人。徙開封之雍丘。天聖中進士。累官翰林學士承旨。卒贈尚書。謚景文。有出

磨小集。西洲猥稿。李端叔云。宋景文歐陽永叔以餘力遊戲。而風流閑雅。超出意表。

好事近

睡起玉屏風。吹去亂紅猶落。天氣驟生輕暖。襯沉香帷箔。珠簾約住海棠風。愁拖兩眉角。昨夜一庭明月。冷秋千紅索。

浪淘沙別劉原父

少年不管。流光如箭。因循不覺韶華換。到如今。始惜月滿。花滿。酒滿。扁舟欲解垂楊岸。尚同歡宴。日斜歌闋將分散。倚蘭橈。望水遠。天遠。人遠。

鄭 獬 字毅夫。安陸人。皇祐五年舉進士第。累官翰林學士。坐不肯用按問新法。王安石惡之。出為侍

讀學士。知杭州。徙青州。有鄭溪集。

好事近

江上探春回。正值早梅時節。兩行小槽雙鳳。按涼州初徹。謝娘扶下繡鞍來。紅靴踏殘雪。歸去不須銀燭。有山頭明月。

韓 縝 字玉汝。雍丘人。第進士。累官太中大夫。知樞密院事。拜尚書右僕射。兼中書侍郎。以太子太保

致仕。贈司空。崇國公。謚莊敏。

芳草即鳳簫吟

鎖離愁。連綿無際。來時陌上初熏。繡幃人念遠。暗垂珠露。泣送征輪。長行長在眼。更重重。遠水孤雲。但望極樓高。盡日日斷王孫。銷魂池塘別後。會行處。綠妒輕裙。恁時攜素手。亂花飛絮裏。緩步香茵。朱顏空自改。向年年芳意長新。遍綠野。嬉遊醉眼。莫負青春。

張昇

字杲卿。韓城人。第進士。累官參知政事。以彰信軍節度使同中書門下平章事。判許州。改鎮河陽。以太子太師致仕。贈司徒。兼侍中。謚康節。

離亭燕

一帶江山如畫。風物向秋瀟灑。水浸碧天何處斷。霽色冷光相射。蓼嶼荻花洲。掩映竹籬茅舍。雲際客帆高挂。烟外酒旗低亞。多少六朝興廢事。盡入漁樵閑話。悵望倚層樓。寒日無言西下。

謝絳

字希深。富陽人。舉進士。歷官兵部員外郎。擢知制誥。判吏部。流內銓。太常禮院。出知鄧州。有集。

夜行船

昨夜佳期初共。鬢雲低。翠翹金鳳。尊前和笑不成歌。意偷傳。眼波微送。草草不容成。楚夢漸寒深。翠簾霜重。相看送到斷腸時。月西斜。畫樓鐘動。

歐陽修

字永叔。廬陵人。第進士。歷官禮部侍郎。兼翰林侍讀學士。拜樞密副使。參知政事。以太子少師致仕。卒。贈太子太師。謚文忠。有六一居士詞三卷。

陳質齋云。歐陽公詞。多有與花間陽春相混。亦有鄙褻之語。廁其中。當是仇人無名子所為也。

羅長源云。公嘗致意於詩。為之本義。溫柔寬厚。所得深矣。今詞之淺近者。前輩多謂是劉焯偽作。又云。元豐中。崔公度跋馮延巳陽春錄。謂其間有誤入六一詞者。今柳三變詞亦有雜之。

平山集中。則其浮豔者。殆亦非皆公少作也。

摸魚兒

卷繡簾梧桐院落。一霎雨添新綠。小池閑立殘妝淺。向晚水紋如縠。凝遠目。恨人去寂寥。鳳枕孤難宿。倚欄不足。看燕拂風簷。蝶翻露草。兩兩鎮相逐。雙眉蹙。可惜年華婉婉。西風初弄庭菊。况伊家年少。多情未已難拘束。那堪更趁涼景。追尋甚處。垂楊曲。佳期過盡。但不說歸來。多應忘了。雲屏去時祝。按後半闕較他集未協。疑有誤。

采桑子

輕舟短棹西湖好。綠水逶迤。芳草長堤。隱隱笙歌處處隨。無風水面琉璃滑。不覺船移。微動漣漪。驚起沙禽掠岸飛。

又

羣芳過後西湖好。狼籍殘紅。飛絮濛濛。垂柳闌干盡日風。笙歌散盡遊人去。始覺春空。垂下簾櫳。雙燕歸來細雨中。

踏莎行

候館梅殘。溪橋柳細。草熏風暖搖征轡。離愁漸遠漸無窮。迢迢不斷如春水。寸寸柔腸。盈盈粉淚。樓高莫近危欄倚。平蕪盡處是春山。行人更在春山外。

蝶戀花

越女採蓮秋水畔。窄袖輕羅。暗露雙金釧。照影摘花花似面。芳心只共絲爭亂。鷓鴣灘頭風浪晚。霧重烟輕。不見來時伴。隱隱歌聲歸棹遠。離愁

引著江南岸。

又

小院深深門掩乍。一作亞寂寞珠簾。畫閣重重下。欲近禁烟微雨罷。綠楊深處秋千挂。傳粉狂遊猶未捨。不念芳時。眉黛無人畫。薄倖未歸春去也。杏花零落紅香謝。

玉樓春

春山斂黛低歌扇。暫解吳鉤登祖宴。畫樓鐘動已魂銷。何況馬嘶芳草岸。青門柳色隨人遠。望未斷時腸已斷。洛陽春色待君來。莫到落花飛似霰。

又

湖邊柳外樓高處。望斷雲山多少路。闌干倚遍使人愁。又是天涯初日暮。輕無管繫狂無數。水畔飛花風裏絮。算伊渾似薄情郎。去便不來來便去。

又

西湖南北烟波闊。風裏絲簧聲韻咽。舞餘一作徐裙帶綠雙垂。酒入香腮紅一抹。杯深不覺琉璃滑。貪看六么花十八。明朝車馬各東西。惆悵畫橋風與月。

虞美人影

鶯愁燕苦春歸去。寂寂花飄紅雨。碧草綠楊歧路。況是長亭暮。少年作

客情難訴。泣對東風無語。目斷雨三烟樹。翠隔江淹浦。

浪淘沙

把酒祝東風。且共從容。垂楊紫陌洛城東。總是當時攜手處。遊遍芳叢。聚散苦匆匆。此恨無窮。今年花勝去年紅。可惜一作料得明年花更好。知與誰同。

又

今日北池遊。漾漾輕舟。波光瀲灩柳條柔。如此春來春又去。白了人頭。好妓好歌喉。不醉難休。勸君滿滿酌金甌。總使花時常病酒。也是風流。

浣溪沙

堤上游人逐畫船。拍堤春水四垂天。綠楊樓外一作梢出秋千。白髮戴花君莫笑。六幺催拍盞頻傳。人生何處似尊前。晁無咎云。只一出字。自是後人道不到。

又

紅粉佳人白玉盃。木蘭船穩棹歌催。綠荷風裏笑聲來。細雨輕烟籠草樹。斜橋曲水繞樓臺。夕陽高處畫屏開。

越溪春

三月十三寒食日。春色遍天涯。越溪閬苑繁華地。傍禁垣。珠翠烟霞。紅粉牆頭。秋千影裏。臨水人家。歸來晚駐香車。銀箭透窗紗。有時三點雨。雨霽。朱門柳細風斜。沉麝不燒金鴨。玲瓏月照梨花。

夜行船

滿眼東風飛絮。催行色短亭春暮。落花流水草連雲。看看是斷腸南浦。檀板未終人去。一作又去。扁舟在綠楊深處。手把金樽難為別。更那聽亂鶯疎雨。

少年遊草

闌干十二獨凭春。晴碧遠連雲。千里萬里。二月三月。行色苦愁人。謝家池上。江淹浦畔。吟魄與離魂。那堪疎雨滴黃昏。更特地憶王孫。吳虎臣云。不

惟君復聖俞二詞不及。雖求諸唐人溫李集中。殆與之為一矣。

南歌子

鳳髻金泥帶。龍紋玉掌梳。去來窗下笑相扶。愛道畫眉深淺入時無。弄筆俚人久。描花試手初。等閑妨了繡工夫。笑問雙鴛鴦字怎生書。

臨江仙

柳外輕雷池上雨。雨聲滴碎荷聲。小樓西角斷虹明。闌干倚處。待得月華生。燕子飛來窺畫棟。玉鉤垂下簾旌。涼波不動簟紋平。水精雙枕。傍有墮釵橫。

又

記得金鑿同唱第。春風上國繁華。如今薄宦老天涯。十年歧路。空負曲江花。聞說闔山通閩苑。樓高不見君家。孤城寒日等閑斜。離愁難盡。紅樹遠連霞。

青玉案

一年春事都來幾。早過了三之二。綠暗紅嬌渾可事。垂楊庭院。暖風簾幙。有箇人憔悴。買花載酒長安市。又爭似家山見桃李。不住東風吹客淚。相思難表。夢魂無據。惟有歸來是。

梅堯臣

字聖俞。宣城人。初以蔭爲河南主簿。歷鎮安判官。仁宗召試。賜進士出身。爲國子監直講。遷都官員外郎。有宛陵集。

蘇幕遮草

露隄平。烟野杳。亂碧萋萋。雨後江天曉。獨有庾郎年最少。窄地春袍。嫩色宜相照。接長亭。迷遠道。堪怨王孫。不記歸期早。落盡梨花春又了。滿地殘陽。翠色和烟老。

石延年

字曼卿。宋州人。補三班奉職。累遷大理寺丞。通判海州。終校理。

燕歸梁

芳草年年惹恨。幽想前事悠悠。傷春傷別幾時休。算從古。爲風流。春山總把深勻翠黛。千疊在眉頭。不知供得幾多愁。更斜日。凭危樓。

司馬光

字君實。夏縣人。寶元初中進士甲科。累官資政殿學士。尚書左僕射。兼門下侍郎。贈太師。溫國公。諡文正。

阮郎歸

漁舟容易入深山。仙家日日閑。綺窗紗幌映朱顏。相逢醉夢間。松露冷。海霞殷。匆匆整棹還。落花寂寂水潺潺。重尋此路難。

王安石

字介甫。臨川人。舉進士。熙寧初。同中書門下平章事。封舒國公。加司空。卒。贈太傅。諡曰文。崇寧

中。追封舒王。有臨川集詞一卷。

桂枝香 金陵懷古

登臨送目。正故國晚秋。天氣初肅。千里澄江似練。翠峯如簇。征帆去棹殘陽裏。背西風、酒旗斜矗。綵舟雲淡。星河鷺起。圖畫難足。念自昔、豪華競逐。歎門外樓頭。悲恨相續。千古憑高。對此謾嗟榮辱。六朝舊事隨流水。但寒烟衰草凝綠。至今商女。時時猶唱。後庭遺曲。

傷春怨 夢中作

雨打江南樹。一夜花開無數。綠葉漸成陰。下有遊人歸路。與君相逢處。不道春將暮。把酒祝東風。且莫恁匆匆去。

范純仁 字堯夫。仲淹子。第進士。累官尚書右僕射。兼中書侍郎。贈開府儀同三司。謚忠宣。

鷓鴣天 和韓持國

臘後春前暖律催。日和風暖欲開梅。公方結客尋佳景。我亦忘形趁酒杯。添管籥。續尊罍。更闌秉燭未能回。清歡莫待相期約。乘興來時便可來。

卷五 宋詞七十首

晏幾道 字叔原。殊幼子。監穎昌許田鎮。有小山詞一卷。

黃魯直云。叔原樂府。寓以詩人句法。精壯頓挫。能動搖人心。合者高唐洛神之流。下者不減桃

葉團扇。陳質齋云。叔原詞在諸名勝中。獨可追逼花間。高處或過之。程叔微云。伊川聞誦

晏叔原夢魂慣得無拘檢。又踏楊花過謝橋。笑曰。鬼語也。意亦賞之。

臨江仙

夢後樓臺高鎖。酒醒簾幕低垂。去年春恨却來時。落花人獨立。微雨燕雙飛。記得小蘋初見。兩重心字羅衣。琵琶絃上說相思。當時明月在。曾照綵雲歸。

清商怨

庭花香信尚淺。最玉樓先暖。夢覺香衾。江南依舊遠。迴文錦字暗剪。謾寄與也。應歸晚。要問相思。天涯猶自短。

點絳脣

明日征鞭。又將南陌垂楊折。自憐輕別。拚得音塵絕。杏子枝邊。倚徧闌干月。依前缺。去年時節。舊事無人說。

又

妝席相逢。旋勻紅淚歌金縷。意中會許。欲共吹花去。長愛荷香。柳色殷橋路。留人住。淡烟微雨。好箇雙棲處。

虞美人

閑敲玉鐙隋堤路。一笑開朱戶。素雲凝澹月嬋娟。門外鴨頭春水木蘭船。吹花拾蕊嬉遊慣。天與相逢晚。一聲長笛倚樓時。應恨不題紅葉寄相思。

生查子

金鞍美少年。去躍青驄馬。紫綵玉樓人。繡被春寒夜。消息未歸來。寒食

梨花謝。無處說相思。背面秋千下。

探桑子

秋千散後朦朧月。滿院人間。幾處雕欄。一夜風吹杏粉殘。昭陽殿裏春衣就。金縷初乾。莫信朝寒。明日花前試舞看。

六么令

綠陰春盡。飛絮繞香閣。晚來翠眉宮樣。巧把遠山學。一寸狂心未說。已向橫波覺。畫簾遮匝。新翻曲妙。暗許閑人帶偷招。前度書多隱語。意淺愁難答。昨夜詩有回文。韻險還慵押。都待笙歌散了。記取留時霎。不消紅蠟。閑雲歸後。月在庭花舊欄角。

又

雪殘風信。悠颺春消息。天涯倚樓新恨。楊柳幾絲碧。還是南雲雁少。錦字無端的。寶釵瑤席。彩絃聲裏。拚作尊前未歸客。遙想疎梅此際。月底香英坼。別後誰繞前溪。手揀繁枝摘。莫道傷高恨遠。付與臨風笛。儘堪愁寂。花時往事。更有多情箇人憶。

清平樂

留人不住。醉解蘭舟去。一棹碧濤春水路。過盡曉鶯啼處。渡頭楊柳青。枝枝葉葉離情。此後錦書休寄。畫樓雲雨無憑。

又

春雲綠處。又見歸鴻去。側帽風前花滿路。冶葉倡條情緒。紅樓桂酒初

開。會攜翠袖同來。醉弄影蛾池水。短簫吹落殘梅。

又

波紋碧皺。曲水清明後。折得疎梅香滿袖。暗喜春紅依舊。歸來紫陌東頭。金釵換酒銷愁。柳影深深細路。花梢小小層樓。

又

么絃寫意。意密絃聲碎。書得鳳箋無限事。猶恨春心難寄。臥聽疎雨梧桐。雨餘淡月朦朧。一夜夢魂何處。那回楊葉樓中。

玉樓春

秋千院落重簾暮。彩筆閑來題繡戶。牆頭丹杏雨餘花。門外綠楊風後絮。朝雲信斷知何處。應作襄王春夢去。紫騮認得舊遊蹤。嘶過畫樓東畔路。

又

採蓮時候慵歌舞。永日閑從花裏度。暗隨蘋末曉風來。直待柳梢斜月去。停撓共說江頭路。臨水樓臺蘇小住。細思巫峽夢回時。不減秦源腸斷處。

浪淘沙

小綠間長紅。露蕊烟叢。花開花落昔年同。惟恨花前攜手處。往事成空。山遠水重重。一笑難逢。已擽長在別離中。霜鬢知他從此去。幾度春風。

碧牡丹

翠袖疎紈扇。涼葉催歸燕。一夜西風。幾處傷高懷遠。細菊枝頭。開嫩香還
徧。月痕依舊庭院。事何限。悵望秋意晚。離人鬢華將換。靜憶天涯。路比
此情還短。試約鸞箋。傳素期良願。南雲應有新鴈。

蝶戀花

碧玉高樓臨水住。紅杏開時。花底曾相遇。一曲陽春春已暮。曉鶯聲斷朝
雲去。遠水來從樓下度。過盡流波。未得魚中素。月細風尖垂柳渡。夢魂
長在分襟處。

又

喜鵲橋成催鳳駕。天爲歡時。乞與初涼夜。乞巧雙蛾加意畫。玉鉤斜傍西
南挂。分鈿擘釵涼葉下。香袖凭肩。誰記當時話。路隔銀河猶可借。世間
離恨何年罷。

又

醉別西樓醒不記。春夢秋雲。聚散真容易。斜月半窗還少睡。畫屏閒展吳
山翠。衣上酒痕詩裏字。點點行行。總是淒涼意。紅燭自憐無好計。夜寒
空替人垂淚。

又

庭院碧苔紅葉遍。金菊開時。已近登高宴。日日露荷凋綠扇。粉塘烟水澄
如練。試倚涼風醒酒面。鴈字來時。恰向層樓見。幾點護霜雲影轉。誰家
蘆管吹秋怨。

破陣子

柳下笙歌庭院。花間姊妹秋千。記得青樓當日事。寫向紅窗夜月前。憑伊寄小蓮。絳蠟等閑陪淚。吳蠶到了纏綿。綠鬢能供多少恨。未肯無情比斷絃。今年老去年。

張先 字子野。吳興人。為都官郎中。有安陸集詞一卷。

李端叔云。子野詞。才不足而情有餘。晁无咎云。子野與耆卿齊名。而時以子野不及耆卿。然子野韻高。是耆卿所乏處。古今詩話云。有客謂子野曰。人皆謂公張三中。即心中事。眼中淚。意中人也。公曰。何不目之。為張三影。客不曉。公曰。雲破月來花弄影。嬌柔懶起簾壓捲。花影。柳徑無人墮飛絮。無影。此余平生所得意也。天聖間。一時有兩張先。皆字子野。俱第進士。其能詩壽考悉同。一博州人。號張三影者是也。一吳興人。見齊東野語。胡應麟筆叢所載如此。

清平樂

屏山斜展。帳卷紅綃半。泥淺曲池飛海燕。風度楊花滿院。雲愁雨恨空深。覺來一枕春陰。隴上梅花落盡。江南消息沉沉。

卜算子慢

溪山別意。烟樹去程。日落采蘋春晚。欲上征鞍。更掩翠簾回面。相盼。惜彎彎。淺黛長長眼。奈畫閣歡遊。也學狂花亂絮輕散。水影橫池館。對靜夜無人。月高雲遠。一晌凝思。兩眼淚痕還滿。難遣。恨私書。又逐東風斷。縱夢澤。層樓萬尺。望湖城那見。

木蘭花

西湖楊柳風流絕。滿縷青春看贈別。牆頭簌簌暗飛花。山外陰陰初落月。秦姬穠麗雲梳髮。持酒聽歌留晚發。驪駒應亦解人情。欲出重城嘶不歇。

又邠州作

青銅貼水萍無數。臨曉西湖春漲雨。泥新輕燕面前飛。風慢落花衣上住。紅裙空解烟蛾聚。雲月却能隨馬去。明朝何處上高臺。回認玉峯山下路。

又 去春自湖歸杭憶南園花已開有當時猶有藥如梅之句今歲還鄉南園正盛復爲此詞以寄意

去年春入芳菲國。青蘂如梅終忍摘。欄邊徒欲說相思。綠臘密緘朱粉飾。歸來故苑重尋覓。花滿舊枝心更惜。鴛鴦從小自相雙。若不多情頭不白。

又乙卯吳興寒食

龍頭舴艋吳兒競。筍柱鞦韆遊女並。芳洲拾翠暮忘歸。秀野踏青來不定。行雲去後遙山暝。已放笙歌池院靜。中庭月色正清明。無數楊花過無影。

憶秦娥

參差竹。吹斷相思曲。情不足。西北有樓窮遠目。憶苕溪。寒影透清玉。秋鴈南飛速。菰草綠。應下溪頭沙上宿。

慶春澤

飛閣危橋相倚。人獨立東風。滿衣輕絮。還記憶江南。如今天氣。正白蘋花。繞堤漲流水。寒梅落盡誰寄。方春意無窮。青空千里。愁草樹依依。關城初閉。對月黃昏。角聲傍烟起。

山亭宴有美堂贈彥獻主人

宴堂永晝喧簫鼓。倚青空。畫欄紅柱。玉瑩紫微人。藹和氣。春融日煦。故宮池館更樓臺。約風月。今宵何處。湖水動鮮衣。競拾翠。湖邊路。落花蕩漾。怨空樹。曉山靜。數聲杜宇。天意送芳菲。正黯淡。疎烟短雨。新歡寧似舊歡長。此會散。幾時還聚。試爲挹飛雲。問解相思否。

剪牡丹舟中聞雙琵琶

野綠連空。天青垂水。素色溶漾都淨。柔柳搖搖。墜輕絮無影。汀洲日落人歸。脩巾薄袂。擷香拾翠相競。如解凌波。泊渚烟春暝。綵綰朱索新整。宿繡屏。畫船風定。金鳳響雙槽。彈出今古幽思誰省。玉盤大小亂珠迸。酒上妝面花豔媚相並。重聽。盡漢妃一曲。江空月靜。

好事近和毅夫內翰梅花

月色透橫枝。短葉小葩無力。北客一聲長笛。怨江南先得。誰教強半臘前開。多情爲春憶。留取大家須醉。幸雨休風息。

畫堂春

外湖蓮子長參差。霽山青處鷗飛。水天溶漾畫桡遲。人影鑑中移。桃葉淺聲雙唱。杏紅深色輕衣。小荷障面避斜暉。分得翠陰歸。

踏莎行

衾鳳猶溫。籠鸚尙睡。宿妝稀淡眉成字。映花避月上迴廊。珠裙摺摺輕垂地。翠幙成波。新荷貼水。紛紛烟絮低還起。重牆繞院更重門。春風無路通深意。

于飛樂

寶奩開。菱鑑淨。一掬清蟾。新妝臉。旋學花添。蜀紅衫。雙繡蝶。裙縷鶉鷄。尋思前事。小屏風。仍畫江南。怎空教。草解宜男。柔柔暗。又過春蠶。正陰晴。天氣更。暝色相兼。幽期消息。曲房西。碎月篩簾。

惜瓊花

汀蘋白。苔水碧。每逢花駐樂。隨處歡席。別時攜手看春色。螢火而今。飛破秋夕。河流如帶窄。任輕似葉。何計歸得。斷雲孤鶩。青山極。樓上徘徊。無盡相憶。

河滿子陪杭守泛湖夜歸

溪女送花隨處。沙鷗避樂分行。遊舸已如圖障裏。小屏猶畫瀟湘。人面新生酒豔。日痕更欲春長。衣上交枝鬪色。釵頭比翼相雙。片段落霞明水底。風紋時動妝光。賓從夜歸無月。千燈萬火湖塘。

醉垂鞭錢塘送祖擇之

酒面灑金魚。吳娃唱。吳潮上。玉殿白麻書。待君歸後除。勾留風月好。平湖曉。翠峯孤。此景出關無。西州空畫圖。

又

雙蝶繡羅裙。東池宴。初相見。朱粉不深勻。閑花淡淡春。細看諸處好。人
人道。柳腰身。昨日亂山昏。來時衣上雲。

謝池春慢玉仙觀道中逢謝媚卿

繚牆重院。間有流鶯到。繡被掩餘寒。畫閣明新曉。朱檻連空闊。飛絮無多
少。徑莎平。池水渺。日長風靜。花影閑相照。塵香拂馬。逢謝女城南道。秀
豔過施粉。多媚生輕笑。鬪色鮮衣薄。碾玉雙蟬小。歡難偶。春過了。琵琶流
怨。都入相思調。

減字木蘭花贈伎

垂螺近額。走上紅裯初趁拍。只恐驚飛。擬倩游絲惹住伊。文鴛繡履。去
似風流塵不起。舞徹梁州。頭上宮花顫未休。

醉落魄美人吹笛

雲輕柳弱。內家髻子新梳掠。生香真色人難學。橫管孤吹。月淡天垂暮。
朱脣淺破櫻桃萼。倚樓人在闌干角。夜寒指冷羅衣薄。聲入霜林。簌簌驚
梅落。

師師令贈美人

香鈿寶珥。拂菱花如水。學妝皆道稱時宜。粉色有天然春意。蜀綵衣長勝
未起。縱亂霞垂地。都城池苑誇桃李。問東風何似。不須回扇障清歌。脣
一點。小於朱蘂。正值殘英和月墜。寄此情千里。

繫裙腰

濃霜澹照夜雲天。朦朧影。畫勾闌。人情縱似長情月。算一年年。又能得幾番圓。欲寄西江題葉字。流不到。五亭前。東池始有荷新綠。尙小如錢。問何日藕。幾時蓮。

漁家傲

巴子城頭青草暮。巴山重疊相逢處。燕子占巢花脫樹。杯且舉。瞿塘水闊舟難渡。天外吳門清霽路。君家正在吳門住。贈我柳枝情幾許。春滿縷。爲君將入江南去。

碧牡丹

步障搖紅綺。曉月墮。沉烟砌。緩板香檀。唱徹伊家新製。怨入眉頭。斂黛峯橫翠。芭蕉寒雨聲碎。鏡華翳。閑照孤鸞戲。思量去時容易。鈿合瑤釵。至今冷落輕棄。望極藍橋。但暮雲千里。幾重山。幾重水。道山清話云。晏文獻爲京兆。辟張先爲通判。新納侍兒。公甚屬意。先能爲詩詞。公雅重之。每張來。令侍兒出侑觴。往往歌子野所爲之詞。其後王夫人寢不容。公卽出之。一日。子野至。公與之飲。子野作此詞。令營妓歌之。至末句。公聞之。撫然曰。人生行樂耳。何自苦如此。亟命于宅庫支錢若干。復取前所出侍兒。既來。夫人亦不復誰何也。

青門引

乍煖還輕冷。風雨晚來方定。庭軒寂寞近清明。殘花中酒。又是去年病。樓頭畫角風吹醒。入夜重門靜。那堪更被明月。隔牆送過秋千影。

生查子 彈箏

含羞整翠鬟。得意頻相顧。雁柱十三絃。一一春鶯語。嬌雲容易飛。夢斷知何處。深院鎖黃昏。陣陣芭蕉雨。

柳

永

初名二變。字耆卿。樂安人。景祐元年進士。官至屯田員外郎。有樂章集九卷。

晁無咎云。世言柳耆卿曲俗。非也。如漸霜風淒緊。關河冷落。殘照當樓。此真不減唐人語。李端

叔云。耆卿詞鋪敘展衍。備足無餘。較之花間所集。韻終不勝。孫敦立云。耆卿詞雖極工。然多

雜以鄙語。葉少蘊云。嘗見一西夏歸朝官云。凡有井水飲處。即能歌柳詞。吳虎臣云。仁宗

留意儒雅。深斥浮豔虛華之文。三變好爲淫冶之曲。傳播四方。嘗有鶴冲天詞云。忍把浮名。換

了淺斟低唱。及臨軒放榜時。人語之曰。且去淺斟低唱。何要浮名。劉潛夫云。耆卿有教坊丁

大使意。黃叔暘云。耆卿長于纖豔之詞。然多近俚俗。陳質齋云。柳詞格不高而音律諧婉。

詞意妥帖。承平氣象。形容曲盡。尤工于羈旅行役。

鬪百花

照色韶光明媚。輕靄低籠芳樹。池塘淺蘸烟蕪。簾幙閑垂風絮。春困厭厭。拋擲鬪草工夫。冷落踏青心緒。終日扃朱戶。遠恨綿綿。淑景遲遲難度。年少傅粉。依前醉眠何處。深院無人。黃昏乍拆鞦韆。空鎖滿庭花雨。

女冠子

斷烟殘雨。灑微涼。生軒戶動。清籟蕭蕭庭樹。銀河濃淡。華星明滅。輕雲時度。莎階寂靜無覩。幽蛩切切秋吟苦。疎篁一徑。流螢幾點。飛來又去。對月臨風。空恁無眠耿耿。暗想舊日牽情處。綺羅叢裏。有人人那回飲散。略略會諧鴛侶。因循忍便睽阻。相思不得長相聚。好天良夜。無端惹起。千愁

萬緒。

雨霖鈴

寒蟬淒切。對長亭晚。驟雨初歇。都門帳飲無緒。方留戀處。蘭舟催發。執手相看淚眼。竟無語凝咽。念去去千里烟波。暮靄沉沉楚天闊。多情自古傷離別。更那堪冷落清秋節。今宵酒醒何處。楊柳岸。曉風殘月。此去經年。應是良辰好景虛設。便總有千種風情。更與何人說。

傾盃樂

木落霜洲。鴈橫烟渚。分明畫出秋色。暮雨乍歇。小楫夜泊。宿葦村山驛。何人月下臨風處。起一聲羌笛。離緒萬端。聞岸草切切蛩吟如織。爲憶芳容別後。水遙山遠。何計憑鱗翼。想繡閣深沉。爭知憔悴。損天涯行客。楚峽雲歸。高陽人散。寂寞狂蹤跡。望京國。空目斷。遠峯凝碧。

卜算子慢

江楓漸老。汀蕙半凋。滿目敗紅衰翠。楚客登臨。正是暮秋天氣。引疎蕙斷續。殘陽裏對晚景傷懷念遠。新愁舊恨相繼。脈脈人千里。念兩處風情。萬重烟水。雨歇天高。望斷翠峯十二。儘無言。誰會憑高意。縱寫得。離腸萬種。奈歸鴻誰寄。

少年遊

參差烟樹霸陵橋。風物盡前朝。衰楊古柳。幾經攀折。憔悴楚宮腰。夕陽閑淡秋光老。離思滿蘅臯。一曲陽關。斷腸聲盡。獨自上蘭橈。

夜半樂

凍雲黯淡天氣。扁舟一葉。乘興離江渚。渡萬壑千巖。越溪深處。怒濤漸息。樵風乍起。更聞商旅相呼。片帆高舉。泛畫鷁。翩翩過南浦。望中酒旆閃閃。一簇烟村。數行霜樹。殘日下。漁人鳴榔歸去。敗荷零落。衰楊掩映。岸邊雨。雨雨三三。浣紗遊女。避行客。含羞相笑語。到此因念。繡閣輕拋。浪萍難駐。歎後約。丁寧竟何據。慘離懷。空恨歲晚歸期阻。凝淚眼。杳杳神京路。斷鴻聲遠。長天暮。

玉蝴蝶

望處雨收雲斷。凭欄悄悄。日送秋光。晚景蕭疎。堪動宋玉悲涼。水風輕。蘋花漸老。月露冷。梧葉飄黃。遣情傷。故人何在。烟水茫茫。難忘。文期酒會。幾辜風月。屢變星霜。海闊天遙。未知何處是瀟湘。念雙燕。難憑遠信。指暮天。空識歸航。黯相望。斷鴻聲裏。立盡斜陽。

望遠行

長空降瑞。寒風剪。淅淅瑤華初下。亂飄僧舍。密灑歌樓。迤邐漸迷。鴛瓦。好是漁人。披得一蓑歸去。江上晚來堪畫。滿長安高却。旗亭酒價。幽雅乘興最宜訪戴。泛小棹。越溪瀟灑。皓鶴奪鮮。白鷗失素。千里廣鋪寒野。須信幽蘭歌斷。同雲收盡。別有瓊臺瑤榭。放一輪明月。交光清夜。

八聲甘州

對蕭蕭暮雨灑江天。一番洗清秋。漸霜風淒緊。關河冷落。殘照當樓。是處

紅衰綠減。萋萋物華休。惟有長江水。無語東流。不忍登高臨遠。望故鄉、渺邈歸思難收。歎年來蹤跡。何事苦淹留。想佳人、妝樓長望。誤幾回、天際識歸舟。爭知我、倚闌干處。正恁凝愁。

安公子

遠岸收殘雨。雨殘稍覺江天暮。拾翠汀洲。人寂靜。立雙雙鷗鷺。望幾點漁燈掩映。蒹葭浦。停畫橈。兩兩舟人語。道去程今夜。遙指前村烟樹。遊宦成羈旅。短檣吟倚。閑凝竚。萬水千山。迷遠近。想鄉關何處。自別後。風亭月榭。孤歡聚。剛斷腸。惹得離情苦。聽杜宇聲聲。勸人不如歸去。

雪梅香

景蕭索。危樓獨立一作倚面晴空。動悲秋情緒。當時宋玉應同。漁市孤烟裊寒碧。水村殘葉舞愁紅。楚天闊。浪浸斜陽。千里溶溶。臨風想佳麗。別後愁顏。鎖斂眉峯。可惜當年。頓乖雨跡雲蹤。雅態妍姿。正歡洽。落花流水。忽西東。無慘恨。相思意盡。分付征鴻。

婆羅門令

昨宵裏。恁和衣睡。今宵裏。又恁和衣睡。小飲歸來。初更過。醺醺醉。中夜後。何事還驚起。霜天冷。風細細。觸疎窗。閃閃燈搖曳。空牀展轉。重追想。雲雨夢。任欹枕難繼。寸心萬緒。咫尺千里。好景良天。彼此空有相憐意。未有相憐計。

西平樂

盡日憑高寓目。脈脈春情緒。嘉景清明漸近。時節輕寒乍暖。天氣才晴又雨。烟光澹蕩。裝點平蕪遠樹。黯凝竚。臺榭好。鶯燕語。正是和風麗日。幾許繁紅嫩綠。雅稱嬉遊去。奈阻隔。尋芳伴侶。秦樓鳳吹。楚臺雲約。空悵望。在何處。寂寞韶光暗度。可堪向晚。村落聲聲杜宇。

陽臺路

楚天晚。墜冷風敗葉。疎紅零亂。冒征塵。匹馬區區。愁見水遙山遠。追念年時。正恁鳳幃。倚香偎煖。嬉遊慣。又豈知。前歡雲雨分散。此際空勞回首。望帝里。難收淚眼。暮烟衰草。算暗鎖。路歧無限。今宵又。依前寄宿。甚處葦村山館。寒燈畔。夜厭厭。何憑消遣。

二郎神七夕

炎光初謝。過暮雨。芳塵輕灑。乍露冷。風清庭戶爽。天如水。玉鉤遙挂。應是星娥嗟久阻。敘舊約。鸞輪欲駕。極目處。微雲暗度。耿耿銀河高瀉。閑雅。須知此景。古今無價。運巧思。穿鍼樓上女。擡粉面。雲鬟相亞。鈿合金釵私語處。算誰在。回廊影下。願天上人間。占得歡娛。年年今夜。

訴衷情近

雨晴氣爽。竚立江樓望處。澄明遠水生光。重疊暮山聳翠。遙想斷橋幽徑。隱隱漁村。向晚孤烟起。殘陽裏。脈脈朱欄靜倚。黯然情緒。未飲先如醉。愁無際。暮雲過了。秋風老盡。故人千里。竟日空凝睇。

竹馬子

登孤壘荒涼。危亭曠望。靜臨烟渚。對雌霓挂雨。雄風拂檻。微收煩暑。漸覺一葉驚秋。殘蟬噪晚。素商時序。覽景想前歡。指神京。非霧非烟深處。向此成追感。新愁易積。故人難聚。憑高盡日凝眸。贏得銷魂無語。極目霽靄。霏微。斷鴉零亂。蕭索江城暮。南樓畫角。又逐殘陽去。

玉山枕

驟雨新霽。蕩原野。清如洗。斷霞散彩。殘陽倒影。天外雲峯。數朶相倚。露莎烟芰滿池塘。見次第。幾番紅翠。當是時。河朔飛觴。避炎蒸。想風流堪繼。晚來高樹清風起。動簾幙。生秋氣。畫樓晝寂。蘭堂夜靜。舞豔歌姝。漸任羅綺。訟閑時。泰足風情。便爭奈。雅歡都廢。省教成。幾闋新歌。盡新聲。好尊前重理。

河傳

淮岸漸晚。圓荷向背。芙蓉深淺。仙娥畫舸。露影紅芳交亂。難分花與面。采多乍覺輕舸滿。呼歸伴。急漿烟村遠。隱隱棹歌。漸被蒹葭遮斷。曲終人不見。

木蘭花慢清明

拆桐花爛熳。乍疎雨。洗清明。正豔杏燒林。細桃繡野。芳景如屏。傾城盡尋勝賞。驟雕鞍。紺幘出郊坰。風暖繁絃脆管。萬家競奏新聲。盈盈鬪草踏青人。艷冶遞逢迎。向路傍往往。遺簪墜珥。珠翠縱橫。歡情對住麗地。任金壘。罄竭玉山傾。揀却明朝永日。畫堂一枕春醒。

卷六 宋詞六十四首

蘇軾

字子瞻。眉山人。嘉祐初。試禮部第一。歷官翰林學士。紹聖初。安置惠州。徙昌化。元符初。北還。卒於常州。高宗即位。贈資政殿學士。復贈太師。謚文忠。有東坡居士詞二卷。

晁无咎云。居士詞。人謂多不諧音律。然橫放傑出。自是曲子內縛不住者。陳無己云。東坡以

詩為詞。如教坊雷大使之舞。雖極天下之工。要非本色。陸務觀云。世言東坡不能歌。故所作

樂府。詞多不協。晁以道謂。紹聖初。與東坡別于汴上。東坡酒酣自歌古陽關。則公非不能歌。但

豪放不喜裁剪。以就聲律耳。又云。東坡詞。歌之曲終。覺天風海雨逼人。周輝云。豈無去國流

離之思。殊覺哀而不傷。吹劍續錄云。東坡在玉堂日。有幕士善歌。因問我詞比柳耆卿何如。

對曰。柳郎中詞。只好十七八女孩兒。按執紅牙拍。歌楊柳岸曉風殘月。學士詞。須關西大漢。執

鐵綽板。唱大江東去。公為之絕倒。胡致堂云。詞曲至東坡。一洗綺羅香澤之態。擺脫綢繆宛

轉之度。使人登高望遠。舉首高歌。逸懷浩氣。超乎塵垢之外。於是花間為卑隸。而耆卿為輿臺

矣。張叔夏云。東坡詞清麗舒徐處。高出人表。周秦諸人所不能到。

醉翁操琴曲

琅然。清圓。誰彈。響空山。無言。惟翁醉中和其天。月明風露娟娟。人未眠。荷
蕢過山前。日有心也哉此賢。醉翁笑詠。聲和流泉。醉翁去後。空有朝吟
夜怨。山有時而童巔。水有時而回川。思翁無歲年。翁今為飛仙。此意在人
間。試聽徽外三兩絃。

行香子

攜手江村。梅雪飄裙。情何限。處處消魂。故人不見。舊曲重聞。向望湖樓。孤山寺。湧金門。尋常行處。題詩千首。繡羅衫。與拂輕塵。別來相憶。知有何人。有湖中月。江邊柳。隴頭雲。

哨遍

睡起畫堂。銀蒜押簾。珠幕雲垂地。初雨歇。洗出碧羅天。正溶溶。養花天氣。一霎晴風。迴芳草。榮光浮動。卷皺銀塘水。方杏靨勻酥。花鬚吐繡。園林翠紅排比。見乳燕梢。蝶過繁枝。忽一綫爐香惹遊絲。晝永人閑。獨立斜陽。晚來情味。便攜將佳麗。乘興深入芳菲裏。撥胡琴語。輕攏慢撚。總伶俐。看緊約羅裙。急趣檀板。霓裳入破。驚鴻起。顰月臨眉。醉霞橫臉。歌聲悠颺雲際。任滿頭紅雨。落花飛。漸鳩鵲樓西。玉蟾低。尙徘徊。未盡歡意。君看今古悠悠。浮幻人間世。這些百歲光陰。幾日。三萬六千而已。醉鄉路穩。不妨行。但人生要適情耳。

賀新涼

乳燕飛華屋。悄無人。槐陰轉午。晚涼新浴。手弄生綃白團扇。扇手一時似玉。漸困倚。孤眠清熟。簾外誰來推繡戶。枉教人夢斷。瑤臺曲。又却是。風敲竹。石榴半吐。吐紅巾。盛待浮花。浪蘂都盡。伴君幽獨。穠艷一枝細看取。芳意千重似束。又恐被秋風驚綠。若待得君來。向此花前對酒。不忍觸。共粉淚。雨簌簌。胡元任云。託意高遠。

水龍吟和章質夫楊花韻

似花還似非花。也無人惜。從教墜。拋家傍路。思量却似。無情有思。縈損柔腸。困酣嬌眼。欲開還閉。夢隨風萬里。尋郎去處。又還被鶯呼起。不恨此花飛盡。恨西園。落紅難綴。曉來雨過。遺踪何在。一池萍碎。春色三分。二分塵土。一分流水。細看來。不是楊花。點點。是離人淚。張叔夏云。後片愈出愈奇。真是壓倒今古。

又黃州夢過棲霞樓

小舟橫截春江。臥看翠壁紅樓起。雲間笑語。使君高會。佳人半醉。危柱哀絃。豔歌餘響。遏雲縈水。念故人老大。風流未減。獨回首。烟波裏。推枕惘然不見。但空江。月明千里。五湖聞道。扁舟歸去。仍攜西子。雲夢南州。武昌南岸。昔遊應記。料多情夢裏。端來見我也。參差是。

浣溪沙遊蘄水清泉寺

山下蘭芽短。浸溪。松間沙路淨無泥。瀟瀟暮雨子規啼。誰道人生難再少。君看流水尚能西。休將白髮唱黃雞。寺前水西流。

卜算子鴈

缺月挂疎桐。漏斷人初定。一作靜時見幽人獨往來。縹緲孤鴻影。驚起却回頭。有恨無人省。揀盡寒枝不肯栖。寂寞沙洲冷。黃魯直云。語意高妙。似非喫烟火

食人語。

江城子

天涯流落思無窮。既相逢。却匆匆。攜手佳人和淚折殘紅。爲問東風餘幾

許。春縱在。與誰同。隋堤三月水溶溶。背歸鴻。去吳中。回望彭城清泗與淮通。寄我相思千點淚。流不到。楚江東。

念奴嬌 赤壁懷古

大江東去。浪聲沉。千古風流人物。故壘西邊人道是。三國孫吳赤壁。亂石崩雲。驚濤掠岸。捲起千堆雪。江山如畫。一時多少豪傑。遙想公瑾當年。小喬初嫁了。雄姿英發。羽扇綸巾談笑間。檣櫓灰飛烟滅。故國神遊。多情應是笑我生華髮。人間如寄。一尊還酹江月。按他本浪聲沉作浪淘盡。與詞未協。孫吳作周郎。犯下公瑾字。崩雲作穿空。掠岸作拍岸。又多情應是笑我生華髮。作多情應笑我早生華髮。益非。今從容齋隨筆所載。黃魯直手書本更正。至于小喬初嫁。宜句絕。了字屬下句乃合。

蝶戀花

春事闌珊芳草歇。客裏風光。又過清明節。小院黃昏人憶別。落花處處聞啼鴉。咫尺江山分楚越。目斷魂消。應是音塵絕。破夢五更心欲折。角聲吹落梅花月。

如夢令 有寄

爲向東坡傳語。人在畫一作玉堂深處。別後有誰來。雪壓小橋無路。歸去歸去。江上一犁春雨。

昭君怨

誰作桓伊三弄。驚破綠窗幽夢。新月與愁烟。滿江天。欲去又還不去。明日落花飛絮。飛絮送行舟。水東流。

不用悲秋。今年身健還高宴。江村海甸。總作空花觀。尙想橫汾。蘭菊紛相半。樓船遠。白雲飛亂。空有年年鴈。

探桑子潤州多景樓與孫巨源遇

多情多感仍多病。多景樓中。樽酒相逢。樂事回頭一笑空。停杯且聽琵琶語。細撚輕攏。醉臉春融。斜照江天一抹紅。

黃庭堅

字魯直。分寧人。舉進士。元祐初。爲校書郎。遷集賢校理。擢起居舍人。追謚文節。有山谷詞二卷。

減字木蘭花

中秋無雨。醉送月銜西嶺去。笑口須開。幾度中秋見月來。前年江外。兒女傳杯兄弟會。此夜登樓。小謝清吟慰白頭。

醜奴兒令

櫻桃著子如紅豆。不管春歸。聞道開時。蜂惹香鬚蝶惹衣。樓臺燈火明珠翠。酒戀歌迷。醉玉東西。少箇人人暖被攜。

念奴嬌

斷虹霽雨。淨秋空山染。修眉新綠。桂影扶疎誰便道。今夕清輝不足。萬里清天。姮娥何處。駕此一輪玉。寒光零亂。爲誰偏照醴醖。年少從我追遊。晚城幽徑。繞張園森木。共倒金荷家萬里。難得樽前相屬。老子平生。江南江北。最愛臨風曲。孫郎微笑。坐來聲歎霜竹。

虞美人宜州見梅作

天涯也有江南信。梅破知春近。夜闌風細得香遲。不道曉來開遍向南枝。玉臺弄粉花應妒。飄到眉心住。平生箇裏願盃深。去國十年老盡少年心。

秦觀

字少游。高郵人。登第後。蘇軾薦於朝。除太學博士。遷正字。兼國史院編修官。坐黨籍徙。徽宗立。放還。至滕州卒。有淮海詞三卷。

晁无咎云。近來作者。皆不及少游。如斜陽外。寒鴉數點。流水繞孤村。雖不識字人。亦知是天生好言語。蔡伯世云。子瞻辭勝乎情。耆卿情勝乎辭。辭情相稱者。惟少游而已。張綖云。少游

多婉約。子瞻多豪放。當以婉約為主。釋覺範云。少游小詞奇麗。詠歌之。想見其神情在絳闕

道山之間。葉少蘊云。少游樂府。語工而入律。知樂者。謂之作家。子瞻戲云。山抹微雲秦學士。

露花倒影柳屯田。微以氣格為病也。

滿庭芳

山抹微雲。天黏衰草。畫角聲斷譙門。暫停征棹。聊共引離尊。多少蓬萊舊事。空回首。烟靄紛紛。斜陽外。寒鴉數點。流水繞孤村。消魂。當此際。香囊暗解。羅帶輕分。謾贏得青樓薄倖名存。此去何時見也。襟袖上空染啼痕。傷情處。高城望斷。燈火已黃昏。

又

晚色雲開。春隨人意。驟雨方過還晴。高臺芳樹。飛燕蹴紅英。舞困榆錢自落。秋千外。綠水橋平。東風裏。朱門映柳。低按小秦箏。多情。行樂處。珠鉿

翠蓋。玉轡紅纓。漸酒空金榼。花困蓬瀛。豆蔻梢頭舊恨。十年夢。屈指堪驚。凭欄久。疎烟淡日。寂寞下蕪城。

望海潮 洛陽懷古

梅英疎淡。冰漸溶洩。東風暗換年華。金谷俊遊。銅駝巷陌。新晴細履平沙。長記誤隨車。正絮翻蝶舞。芳思交加。柳下桃蹊。亂分春色到人家。西園夜飲鳴笳。有華燈礙月。飛蓋妨花。蘭苑未空。行人漸老。重來事事堪嗟。烟暝酒旗斜。但倚樓極目。時見棲鴉。無奈歸心。暗隨流水到天涯。

如夢令

遙夜月明如水。風緊驛亭深閉。夢破鼠窺燈。霜送曉寒侵被。無寐無寐。門外馬嘶人起。

生查子

眉黛遠山長。新柳開青眼。樓閣斷霞明。羅幙春寒淺。 盃嫌玉漏遲。燭厭金刀剪。月色忽飛來。花影和簾卷。

浣溪沙

漠漠輕寒上小樓。曉陰無賴似窮秋。淡烟流水畫屏幽。 自在飛花輕似夢。無邊絲雨細如愁。寶簾閑挂小銀鈎。

減字木蘭花

天涯舊恨。獨自淒涼人不問。欲見迴腸。斷續薰爐小篆香。 黛蛾長斂。任是東風吹不展。困倚危樓。過盡飛鴻字字愁。

憶秦娥

暮雲碧。佳人不見愁如織。愁如織。兩行征鴈。數聲羌笛。錦書難寄西飛翼。無言只是空相憶。空相憶。紗窗月淡。影雙人隻。

阮郎歸

滿天風雨破寒初。燈殘庭院虛。麗譙吹徹小單于。迢迢清夜徂。鄉夢斷。旅情孤。崢嶸歲又除。衡陽猶有鴈傳書。郴陽和鴈無。

好事近夢中作

春路雨添花。花動一山春色。行到小橋深處。有黃鸝千百。飛雲當面化龍蛇。天矯轉空碧。醉臥古藤陰下。了不知南北。

畫堂春

東風吹柳日初長。雨餘芳草斜陽。杏花零亂燕泥香。睡損紅妝。寶篆烟消龍鳳。畫屏雲鎖瀟湘。暮寒初透薄羅裳。無限思量。

鵲橋仙

纖雲弄巧。飛星傳恨。銀漢迢迢暗度。金風玉露一相逢。便勝却人間無數。柔情似水。佳期如夢。忍顧鵲橋歸路。兩情若是久長時。又豈在朝朝暮暮。

虞美人

高城望斷塵如霧。不見連驂處。夕陽村外小灣頭。只有柳花無數送歸舟。瓊枝玉樹頻相見。只恨離人遠。欲將幽恨寄青樓。爭奈無情江水不西流。

流。

踏莎行 郴州旅舍

霧失樓臺。月迷津渡。桃源望斷無尋處。可堪孤館閉春寒。杜鵑聲裏斜陽暮。驛寄梅花。魚傳尺素。砌成此恨無重數。郴江幸自遶郴山。為誰流下瀟湘去。釋天隱云。末二句從沅湘日夜東流去。不為愁人住。少時變化來。黃山谷云。此詞高絕。但斜陽暮

二字為重犯耳。又云。極似劉夢得楚蜀間語。

胡元任云。子瞻絕愛尾兩句。自書于扇。曰少游已矣。雖萬身何

贖。

江城子

西城楊柳弄春柔。動離憂。淚難收。猶記多情。曾為繫歸舟。碧野朱橋當日事。人不見。水空流。韶華不為少年留。恨悠悠。幾時休。飛絮落花時候。一登樓。便做春江都是淚。流不盡。許多愁。

八六子

倚危亭。恨如芳草。萋萋剗盡還生。念柳外青驄別後。水邊紅袂分時。愴然暗驚。無端天與娉婷。夜月一簾幽夢。春風十里柔情。怎奈何。一作向歡娛漸隨流水。素絃聲斷。翠綃香減。那堪片片飛花弄晚。濛濛殘雨籠晴。正銷凝。黃鸝又又啼數聲。

金明池

瓊苑金池。青門紫陌。似雪楊花滿路。雲日淡。天低晝永。過三點兩點細雨。好花枝。半出牆頭。似悵望。芳草王孫何處。更水繞人家。橋當門巷。燕燕鶯

鶯飛舞。怎得東君長爲主。把綠鬢朱顏。一時留住。佳人唱。金衣莫惜。才子倒。玉山休訴。况春來。倍覺傷心。念故國情多。新年愁苦。縱寶馬嘶風。紅塵拂面。也只一作則尋芳歸去。

水龍吟

小樓連苑橫空。下窺繡轂雕鞍驟。疎簾半捲。單衣初試。清明時候。破暖輕風。弄晴微雨。欲無還有。賣花聲過盡。垂楊院落。紅成陣。飛鴛鴦。玉珮丁東。別後。悵佳期。參差難又。名韁利鎖。天還知道。和天也瘦。花下重門。柳邊深巷。不堪回首。念多情。但有。當時皓月。照人依舊。

南柯子贈陶心兒

玉漏迢迢盡。銀潢淡淡橫。夢回宿酒未全醒。已被鄰雞催起。怕天明。臂上妝猶在。襟間淚尚盈。水邊燈火漸人行。天外一鉤殘月。照三星。高齋詩話云。少游在蔡州。與官奴婁婉字東玉者甚密。贈之詞云。小樓連苑橫空。又云玉珮丁東。別後者是也。又贈陶心兒詞云。天外一鉤橫月帶三星。謂心字也。

晁補之

字无咎。鉅野人。舉進士。元祐初。除祕書省正字。遷校書郎。以祕閣校理通判揚州。召還。爲著作郎。坐黨籍徙。大觀末。知泗州卒。有雞肋集詞一卷。

陳質齋云。无咎嘗云。今代詞手。惟秦七黃九。然兩公之詞。亦自有不同。若无咎佳者。固未多遜也。

滿江紅

東武城南。新堤固。漣漪初溢。隱隱遍。長陵高阜。臥紅堆碧。枝上殘花吹盡

也。與君試向江邊覓。問向前猶有幾多春。三之一。官裏事。何時畢。風雨外。無多日。相將泛曲水。滿城爭出。不見蘭亭修禊事。當時座上皆豪逸。到如今修竹滿山陰。空陳迹。

臨江仙 信州作

謫宦江城無屋買。殘僧野寺相依。松間藥臼竹間衣。水窮行到處。雲起坐看時。一箇幽禽緣底事。苦來醉耳邊啼。月斜西院愈聲悲。青山無限好。猶道不如歸。

又

綠暗汀洲二月暮。落花風靜帆收。垂楊低映木蘭舟。半篙春水滑。一段夕陽愁。灞水橋東回首處。美人新上簾鉤。青鸞無計入紅樓。行雲歸楚峽。飛夢到揚州。

永遇樂 東臯寓居

松菊堂深。芰荷池小。長夏清暑。燕引雛還。鳩呼婦往。人靜郊原趣。麥天已過。薄衣輕扇。試起繞園徐步。聽衡宇。欣欣童稚。共說夜來初雨。蒼苔徑裏。紫葳枝上。數點幽花垂露。東里催鋤。西鄰助餉。相戒清晨去。斜川歸興。脩然滿目。回首帝鄉何處。只愁恐。輕鞍犯夜。灞陵舊路。

摸魚兒

買陂塘。旋栽楊柳。依稀淮岸湘浦。東臯雨足。輕痕漲。沙觜鷺來鷗聚。堪愛處。最好是。一川夜月光流渚。無人自舞。任翠幕張天。柔茵藉地。酒盡未能

去。青綾被。休憶金閨故步。儒冠會把身誤。弓刀千騎成何事。荒了邵平瓜圃。君試觀。滿青鏡。星星鬢影今如許。功名浪語。便做得班超。封侯萬里。歸計恐遲暮。

憶少年

無窮官柳。無情畫舸。無根行客。南山尚相送。只高城人隔。罨畫園林溪紺碧。算重來。盡成陳迹。劉郎鬢如此。况桃花顏色。

下水船

上客驪駒繫。驚喚銀舩睡起。困倚妝臺。盈盈正解羅髻。鳳釵墜。繚繞金盤玉指。巫山一段雲委。半窺鏡。向我橫秋水。斜領花枝交鏡裏。淡拂鉛華。匆匆自整羅綺。斂眉翠。雖有悒悒密意。空作江邊解珮。能改齋漫錄。廖明略與无咎同登科。明略所游。田氏麗姝也。一日。明略邀无咎晨過田氏。田遽起對鑑理髮。且盼且語。草草妝掠。以與客對。无咎以明略故有意而莫傳也。因賦下水船一闋。

滿庭芳 赴信日舟中別次膺十二叔

鷗起蘋中。魚驚荷底。畫船天上來時。翠灣紅渚。宛似武陵迷。更晚青山更好。孤雲帶。遠雨絲垂。清歌裏。金尊未掩。誰使動分攜。竹林高晉阮。阿咸瀟散。猶愧風期。便棄官終隱。釣叟苔磯。縱是冥鴻雲外。應念我。垂翼低飛。新詞好。他年認取。天際片帆歸。

迷神引 貶玉溪對江山作

黯黯青山紅日暮。浩浩大江東注。餘霞散綺。回向烟波路。使人愁。長安遠。

在何處。幾點漁燈小。迷近塢。一片客帆低。傍前浦。暗想平生。自悔儒冠
誤。覺阮途窮。歸心阻。斷魂縈目。一千里。傷平楚。怪竹枝歌。聲聲怨。爲誰苦。
猿鳥一時啼。驚島嶼。燭暗不成眠。聽津鼓。

古陽關寄無斁八弟宰寶應

衰草蛩吟咽。暗柳螢飛滅。空庭雨過。西風緊。飄黃葉。卷書帷寂靜。對此傷
離別。重感歎。中秋數日。又圓月。沙觜檣竿上。淮水闊。有飛鳧客。詞珠玉。
氣冰雪。且莫教皓月。照影驚華髮。問幾時。清樽夜景共佳節。

好事近南都寄歷下人

絲管鬧南湖。湖上醉遊時晚。獨看山橋官柳。淚無言偷滿。坐中誰唱解
愁詞。紅妝勸金盞。物是奈人非是。負東風心眼。

水龍吟始去齊路逢次膺叔感別敘舊

去年暑雨鈞盤。夜闌睡起。同征轡。今年芳草。齊河古岸。扁舟同艤。萍梗孤
蹤。夢魂浮世。別離常是。念當時綠鬢。狂歌痛飲。今憔悴。東風裏。此去濟
南爲說。道愁腸不醒猶醉。多情北渚。兩行烟柳。一湖春水。還唱新聲。後人
重到。應悲桃李。待歸時攬取。庭前皓月。也應堪寄。

惜奴嬌

歌闋瓊筵。暗失金貂侶。說衷腸。丁寧囑付。棹舉帆開。黯行色。秋將暮。欲去。
時却回。高城已暮。漁火烟村。但觸目。傷離緒。此情向。阿誰分訴。那裏思
量。爭知我。思量苦。最苦。睡不著。西風夜雨。

鬪百花

小小盈盈珠翠。憶得眉長眼細。曾共映花低語。已解傷春情意。重向溪堂。臨風看舞梁州。依舊照人秋水。轉更添姿媚。與問階上。簸錢時節。記微笑。但把纖腰。向人嬌倚。不見還休。誰教見了厭厭。還是向來情味。

調笑西子

腸斷。越江岸。越女江頭紗自浣。天然玉貌鉛紅淺。自弄芙蓉日晚。紫駟嘶去猶回眄。笑入荷花不見。

張

耒

字文潛。淮陰人。第進士。歷官起居舍人。以直龍圖閣知潤州。坐黨籍謫官。晚監南嶽廟。主管崇福宮。建炎初。贈集英殿修撰。有宛丘集。

風流子

亭臯木葉下。重陽近。又是搗衣秋。奈愁入庾腸。老侵潘鬢。謾簪黃菊。花也應羞。楚天晚。白蘋烟盡處。紅蓼水邊頭。芳草有情。夕陽無語。鴈橫南浦。人倚西樓。玉容知安否。香箋共錦字。兩處悠悠。空恨碧雲離合。青鳥沉浮。向風前懊惱。芳心一點。寸眉兩葉。禁甚閑愁。情到不堪言處。分付東流。

少年遊

含羞倚醉不成歌。纖手掩香羅。偎花映燭。偷傳深意。酒思入橫波。看朱成碧心迷亂。翻脈脈。斂雙蛾。相見時稀。隔別多。又春盡。奈愁何。

秋蘼香

簾幙疎疎風透。一線香飄金獸。朱欄倚遍黃昏後。廊上月華如畫。別離

滋味濃如酒。著人瘦。此情不及牆東柳。春色年年依舊。

陳師道

字履常。一字無己。彭城人。元祐初。以蘇軾等薦。為徐州教授。遷太學博士。終秘書省正字。有後山集長短句二卷。

胡元任云。後山自謂。他文未能及人。獨於詞不減秦七黃九。其自矜如此。

菩薩蠻

哀箏一弄湘江曲。聲聲寫盡湘波綠。纖指十三絃。細將幽恨傳。當筵秋水慢。玉柱斜飛鴈。彈到斷腸時。春山眉黛低。

減字木蘭花。晁無咎出小鬟佐飲。

娉娉嫋嫋。芍藥枝頭紅樣小。舞袖低迴。一作遲遲。心到郎邊客已知。

金尊玉一作當筵舉酒。勸我花前千萬壽。莫莫休休。白髮簪花我自羞。

李廌 字方叔。華山人。鄉舉試禮部不遇。絕意進取。定居長社。有月巖集。

清平樂

落梅嗚咽。黯澹城頭月。吹滿江天驚夢蝶。喚起畫樓傷別。簾風輕觸銀鈎。梧桐玉露新秋。底事瑣窗深夜。素娥長伴人愁。

虞美人

玉闌干外清江浦。渺渺天涯雨。好風如扇雨如簾。時見岸花汀草漲痕添。青林枕上關山路。臥想乘鸞處。碧蕪千里思悠悠。惟有霎時涼夢到南州。

李之儀 字端叔。無棣人。歷樞密院編修官。通判原州。徽宗初。提舉河東常平。坐為范純仁遺表作行狀。

編管太平。遂居姑孰。久之。徙唐州。終朝請大夫。有姑溪詞二卷。

卜算子

我住長江頭。君住長江尾。日日思君不見君。共飲長江水。此水幾時休。此恨何時已。只願君心似我心。定不負相思意。

如夢令

回首蕪城舊苑。還是翠深紅淺。春意已無多。斜日滿簾飛燕。不見不見。門掩落花庭院。

清平樂

蕭蕭風葉。似與更聲接。欲寄明璫非爲怯。夢斷蘭舟桂楫。學書但寫鴛鴦。却應無那愁腸。安得一雙飛去。春風芳草池塘。

好事近

春到雨初晴。正在小樓時節。柳眼向人微笑。傍闌干堪折。暮山濃淡鎖烟霏。梅杏半明滅。玉斝莫辭沉醉。判歸時斜月。

卷七 宋詞六十一一首

賀

鑄

字方回。衢州人。孝惠皇后族孫。元祐中通判泗州。又倅太平州。退居吳下。自號慶湖遺老。有東

山寓聲樂府三卷。

張文潛云。方回樂府。妙絕一世。威麗如遊金張之堂。妖冶如攬嬪施之袿。幽索如屈宋。悲壯如

蘇李。周少隱云。方回有梅子黃時雨之句。人謂之賀梅子。方回寡髮。郭功父指其髻謂曰。此真賀梅子也。陸務觀云。方回狀貌奇醜。俗謂之賀鬼頭。其詩文皆高。不獨工長短句也。

薄倖

淡妝多態。更滴滴。頻迴盼。便認得。琴心先許。欲縮合歡雙帶。記畫堂。風月逢迎。輕顰淺笑。嬌無奈。待翡翠屏開。芙蓉帳掩。羞把香羅暗解。自過了燒燈。都不是。踏青挑菜。幾回憑雙燕。丁寧深意。往來却恨重簾礙。約何時再。正春濃。酒困人閑。晝永無聊賴。厭厭睡起。猶有花梢日在。

青玉案

凌波不過橫塘路。但目送芳塵去。錦瑟年華誰與度。月臺花樹。瑣窗朱戶。惟有春知處。碧雲冉冉蘅皋暮。綵筆新題斷腸句。試問閑愁都幾許。一川烟草。滿城風絮。梅子黃時雨。中吳紀聞云。鑄有小築。在姑蘇盤門之內十餘里。地名橫塘。方回往來其間。作此詞。後山谷有詩云。解道江南腸斷句。只今惟有賀方回。其為前輩推重如此。潘子真云。寇萊公詩。杜鵑啼處血成花。梅子黃時雨如霧。世推方回所作梅子黃時雨為絕唱。蓋用萊公語也。

柳色黃

薄雨催寒。斜照弄晴。春意空闊。長亭柳色纔黃。遠客一枝先折。烟橫水際。映帶幾點歸鴉。東風消盡龍沙雪。還記出門時。一作關來恰而今時節。將發。畫樓芳酒。紅淚清歌。頓一作便成輕別。已是經年。杳杳音塵都絕。欲知方寸。共有幾許清愁。芭蕉不展丁香結。枉望斷天涯。兩厭厭風月。能改齋漫錄。方回嘗一姝。別久。姝寄詩云。獨倚危欄淚滿襟。小園春色懶追尋。深恩縱似丁香結。難展芭蕉一寸心。賀因所寄

詩。遂成此調。

清平樂

小桃初謝。雙燕還來也。記得年時寒食下。紫陌青門遊冶。楚城滿日春華。可堪游子思家。惟有夜來歸夢。不知身在天涯。

望湘人

厭鶯聲到枕。花氣動簾。醉魂愁夢相半。被惜餘熏。帶驚剩眼。幾許傷春春晚。淚竹痕鮮。佩蘭香老。湘天濃暖。記小江。風月佳時。屢約非烟游伴。須信鸞絃易斷。奈雲和再鼓。曲終人遠。認羅襪無蹤。舊處弄波清淺。青翰棹。白蘋洲畔。儘日臨臯飛觀。不解寄。一字相思。幸有歸來雙燕。

踏莎行

急雨收春。斜風約水。浮紅漲綠魚文起。年年遊子惜餘春。春歸不解招遊子。留恨城隅。關情紙尾。闌干長對西曠倚。鴛鴦俱是白頭時。江南渭北三千里。

憶秦娥

曉朦朧。前溪百鳥啼匆匆。啼匆匆。凌波人去。拜月樓空。舊年今日東門東。鮮妝輝映桃花紅。桃花紅。吹開吹落。一任東風。

又 桑

著春衫。玉鞭鞭馬南城南。南城南。柔桑細草。留住金銜。粉蛾采葉供親蠶。蠶。蠶。蠶。略許攜纖纖。攜纖纖。漸裙淇上。更待初三。

感皇恩

蘭芷滿汀洲。游絲橫路。羅襪塵生步。迴顧。整鬟顰黛。脈脈多情難訴。細風吹柳絮。人南渡。回首舊游。山無重數。花底深朱戶。何處。半黃梅子。向晚一簾疎雨。斷魂分付與。春歸去。

毛

滂

字澤民。江山人。為杭州法曹。以樂府受知蘇軾得名。嘗知武康縣。又知秀州。有東堂詞二卷。

浣溪沙泛舟還餘英館

烟柳風蒲冉冉斜。小窗不用著簾遮。載將山影轉灣沙。略約斷時分岸色。蜻蜓立處過汀花。此情此水共天涯。

又寒食初晴東堂對酒

小雨初收蝶做團。和風輕拂燕泥乾。秋千院落落花寒。莫對清尊追往事。更催新火續餘歡。一春心緒倚闌干。

又汎舟

銀字笙簫小小童。梁州吹過柳橋風。阿誰勸我玉杯空。小醉徑須眠錦瑟。夜歸不用照紗籠。畫船簾卷月明中。

惜分飛

淚溼闌干花著露。愁到眉峯碧聚。此恨平分取。更無言語空相覷。斷雨殘雲無意緒。寂寞朝朝暮暮。今夜山深處。斷魂分付潮回去。陳質齋云。澤民他

辭雖工。未有能及此者。周輝云。語盡而意不盡。意盡而情不盡。

踏莎行早秋即事

堦影紅遲。柳苞黃遍。纖雲弄日陰晴半。重簾不卷篆香橫。小花初破春叢淺。鳳繡猶重。鴨爐長暖。屏山翠入江南遠。醉輕夢短枕閑欹。綠窗窈窕風光轉。

蝶戀花 寒食

紅杏梢頭寒食雨。燕子泥香。不住飛來去。行傍柳陰聞好語。鶯兒穿過黃金縷。桑落酒寒杯懶舉。總被多情。做得無情緒。春過二分能幾許。銀臺新火重簾暮。

驀山溪 楊花

雪堂氈徑。撲撲憐飛絮。柔弱不勝春。任東風吹來吹去。牆陰花外。一半落誰家。葉依依。烟鬱鬱。依舊如張緒。那人拈得。吹向釵頭住。不定却飛揚。滿眼前。攬人情懷。蜂兒蝶子。教得越輕狂。隔斜陽。點芳草。斷送青春暮。

燭影搖紅 松窗午夢初覺

一畝清陰。半天小雨松窗午。牀頭秋色小屏山。碧帳垂烟縷。枕畔風搖綠戶。喚人醒。不教夢去。可憐恰到。瘦石寒泉。冷雲生處。

粉蝶兒

雪徧梅花。素光都共奇絕。到窗前。認君時節。下重幃。香篆冷。蘭膏明滅。夢悠揚。空繞斷雲殘月。沈郎帶寬。同心放開重結。褪羅衣。楚腰一捻。正春風新著摸。花花葉葉。粉蝶兒。這回共花同活。

最高樓

微雨過。深院芰荷中。香冉冉。繡重重。玉人共倚闌干角。月華猶在小池東。入人懷。吹鬢影。可憐風。分散去。輕如雲與葉。剩下了。許多風與月。侵枕簟。冷簾櫳。剛能小睡還驚覺。略成輕醉早惺忪。仗行雲。將此恨。到眉峯。

玉樓春 盱眙作

長安回首空雲霧。春夢覺來無覓處。冷烟寒雨又黃昏。數盡一堤楊柳樹。楚山照眼青無數。淮口潮生催曉渡。西風吹面立蒼茫。欲寄此情無鴈去。

青玉案

芙蓉花上濛濛雨。又冷落池塘暮。何處風來搖碧戶。捲簾凝望。淡烟疎柳。翡翠穿花去。玉京人去無由駐。忍獨在凭欄處。試問綠窗秋到否。可人今夜。新涼一枕。無計相分付。

七娘子 舟中早秋

山屏霧帳玲瓏碧。更綺窗臨水新涼入。雨短烟長。柳橋蕭瑟。這番一日涼。一日。離多綠鬢年時白。這離情不似而今惜。雲外長安。斜暉脈脈。西風吹夢來無跡。

西江月

烟雨半藏楊柳。風光初著桃花。玉人細細酌流霞。醉裏將春留下。柳外鴛鴦作伴。花邊蝴蝶爲家。醉翁醉也且由他。月在柳橋花榭。

夜行船 餘英溪

弄水餘英溪畔。綺羅香日遲風慢。桃花春浸一篙深。畫橋東柳低烟遠。
漲綠流紅空滿眼。倚蘭橈舊愁無限。莫把鴛鴦驚飛去。要歌時少低檀板。

憶秦娥 春夜松軒

夜夜夜了花朝也。連忙指點銀瓶索酒嘗。明朝花落知多少。莫把殘紅
掃。愁人一片花飛減却春。

散餘霞

牆頭花口寒猶噤。放繡簾晝靜。簾外時有蜂兒。趁楊花不定。闌干又還
獨凭。念翠低眉暈。春夢枉惱人腸。更厭厭酒病。

調笑 盼盼

無力倚瑤瑟。罷舞霓裳今幾日。樓空雨小春寒逼。鈿暈羅衫烟色。簾前歸
燕看人立。却趁落花飛入。

又 鶯鶯

何處長安路。不記牆東花拂樹。瑤琴理罷霓裳譜。依舊月窗風戶。薄情年
少如飛絮。夢逐玉環西去。

又 若子

芳草恨春老。自是尋春來不早。落花風起紅多少。記得一枝春小。綠陰青
子空相惱。此恨平生懷抱。

感皇恩 鎮江待闌

綠水小河亭。朱欄碧甃。江月娟娟上高柳。畫樓縹緲。盡挂窗紗簾繡。月明

知我意。來相就。銀字吹笙。金貂取酒。小小微風弄襟袖。寶熏濃炷。人共博山烟瘦。露涼釵燕冷。更深後。

王仲 字與善。吳虎臣云。元祐間人。

燭影搖紅

烟雨江城。望中綠暗花枝少。惜春長待醉東風。却恨春歸早。縱有幽歡會。巧奈如今。風情漸老。鳳樓何處。畫欄愁倚。天涯芳草。

杜安世 字壽域。京兆人。有詞一卷。

折紅梅

喜輕澌初綻。微和漸入。郊原時節。春消息。夜來陡覺紅梅。數枝爭發。玉溪仙館。不似箇尋常標格。化工別與一種風情。似勻點胭脂。染成香雪。重吟細閱。比繁杏夭桃。品流終別。只愁共綵雲易散。冷落謝池風月。憑誰向說。三弄處。龍吟休咽。大家留取。時倚闌干。聞有花堪折。勸君須折。

鶴冲天

清明天氣。永日愁如醉。臺榭綠陰濃。薰風細。燕子巢方就。盆池小。新荷蔽。恰是逍遙際。單夾衣裳。半籠軟玉肌體。石榴美豔。一撮紅綃比。窗外數脩篁。寒相倚。有箇關心處。難相見。空凝睇。行坐深閨裏。賴更妝梳。自知新來憔悴。

卜算子

樽前一曲歌。歌裏千重意。纔欲歌時淚已流。恨更多於淚。試問緣何事。

不語渾如醉。我亦情多不忍聞。怕和我成憔悴。

李元膺 南京教官。

洞仙歌

雪雲散盡。放曉晴庭院。楊柳於人便青眼。更風流多處。一點梅心。相映遠。約略顰輕笑淺。一年春好處。不在濃芳。小豔疎香最嬌軟。到清明時候。百紫千紅。花正亂。已失春風一半。早占取。韶光共追游。但莫管春寒。醉紅自暖。

又雨

廉纖細雨。帶東風如困。縈斷千絲爲誰恨。向楚宮一夢。多少悲涼。無處問。愁到而今未盡。分明都是淚。泣柳沾花。長與騷人伴孤悶。記當年得意處。酒力方酣。怯輕寒。玉爐香潤。又豈識。情懷苦難禁。對點滴簷聲。夜寒燈暈。

茶瓶兒悼亡

去年相逢深院宇。海棠下。曾歌金縷。歌罷花如雨。翠羅衫上。點點紅無數。今歲重尋攜手處。空物是人非春暮。回首青門路。亂英飛絮。相逐東風去。

思佳客

冥冥秋千雨。畫旗日長。花影轉階遲。燕驚午夢。週遮語。蝶困春遊。落拓飛。思往事。入顰眉。柳梢陰重。又當時。薄情風絮。難拘束。吹過東牆。不肯歸。

孫洙 字巨源。廣陵人。舉進士。元豐中。官翰林學士。

菩薩蠻記恨

樓頭尙有二通鼓。何須抵死催人去。上馬苦匆匆。琵琶曲未終。回頭凝望處。那更廉纖雨。謾道玉爲堂。玉堂今夜長。
黃叔暘云。孫公於元豐間爲翰林。與李端愿太尉往來尤數。會一日鎖院。宣召者至其家。則出數十輩蹤跡。得之于李氏。時李新納妾。能琵琶。公飲不肯去。而迫于宣命。入院幾二鼓矣。遂草三制罷。復作此長短句以記別恨。遲明遣以示李。

朱服 字行中。烏程人。熙寧中進士甲科。累官國子司業。起居舍人。以直龍圖閣知潤州。徙泉。婺。甯。廬。

壽五州。紹聖初。召爲中書舍人。歷禮部侍郎。坐與蘇軾游。貶海州團練副使。蕪州安置。改興國軍卒。

漁家傲 東陽郡齋作

小雨纖纖風細細。萬家楊柳青烟裏。戀樹濕花飛不起。愁無際。和春付與東流水。九十光陰能有幾。金龜解盡留無計。寄語東陽沽酒市。拚一醉。而今樂事他年淚。

章棗 字質夫。浦城人。以蔭爲孟州司戶參軍。試禮部第一。以平夏州功。累擢樞密直學士。龍圖閣端

明殿學士。拜同知樞密院事。卒贈右銀青光祿大夫。謚莊簡。揮塵錄作莊敏。

水龍吟 柳花

燕忙鶯懶芳殘。正堤上柳花飄墜。輕飛亂舞。點畫青林。全無才思。閑趁游絲。靜臨深院。日長門閉。傍珠簾散漫。垂垂欲下。依前被風扶起。蘭帳玉人睡覺。怪春衣。雪沾瓊綴。繡牀漸滿。香球無數。才圓却碎。時見蜂兒。仰黏

輕粉。魚吞池水。望章臺路杳。金鞍游蕩。有盈盈淚。黃叔暘云。傍珠簾數語。形容盡矣。

舒

亶

字信道。慈谿人。試禮部第一。累官御史丞。以罪斥。終直龍圖閣待制。卒贈直學士。

菩薩蠻

畫船搗鼓催君去。高樓把酒留君住。去住若為情。江頭潮欲平。 江湖容

易得。却是人南北。今日此尊空。知君何日同。黃叔暘云。此詞極有味。

散天花

雲斷長空落葉秋。寒江烟浪盡。月隨舟。西風偏解送離愁。聲聲南去鴈。下

汀洲。無奈多情去復留。驪歌齊唱罷。淚爭流。悠悠別恨幾時休。不堪殘

酒醒。凭危樓。

李清臣

字邦直。魏人。舉進士。歷官知制誥。翰林學士。遷尚書左丞。罷為資政殿學士。尋拜中書侍郎。以大學士知河南府。徽宗初立。入為門下侍郎。出知大名府。卒贈金紫光祿大夫。

謁金門

楊花落。燕子橫穿朱閣。苦恨春醪如水薄。閑愁無處著。 綠野帶紅山落

角。桃杏參差殘萼。歷歷危檣沙外泊。東風晚來惡。

王 詵

字晉卿。太原人。徙開封。尚英宗女魏國大長公主。歷官定州觀察使。開國公。駙馬都尉。贈昭化軍節度使。謚榮安。

黃魯直云。晉卿樂府。清麗幽遠。工在江南諸賢季孟之間。

憶故人

燭影搖紅。向夜闌。乍酒醒。心情懶。尊前誰為唱陽關。離恨天涯遠。 無奈

雲沉雨散。凭闌干。東風淚眼。海棠開後。燕子來時。黃昏庭院。能改齋漫錄。都尉
憶故人作。徽宗喜其詞意。猶以不豐容宛轉爲憾。遂令大晟府別撰腔。周美成增益其詞。而以首句爲名。謂之
燭影搖紅云。按原詞甚佳。美成增益。真所謂續鳧爲鶴也。

撼庭竹

綽略青梅弄春色。真豔態堪惜。經年費盡東君力。有情先到探春客。無語
泣寒香。時暗度瑤席。月下風前空悵望。思攜手同摘。畫欄倚遍無消息。
佳辰樂事再難得。還是夕陽天。空暮雲凝碧。

趙令時

字德麟。燕懿王玄孫。元祐中。簽書穎州公事。歷右朝請大夫。改右監門衛大將軍。營州防禦使。
遷洪州觀察使。襲封安定郡王。尋遷寧遠軍承宣使。同知行在大宗正事。贈開府儀同三司。有
聊復集。

蝶戀花

欲減羅衣寒未去。不卷珠簾。人在深深處。殘杏枝頭花幾許。啼紅止恨清
明雨。盡日水沉香一縷。宿酒醒遲。惱破春情緒。飛燕又將歸信誤。小屏
風上西江路。

烏夜啼

樓上縈簾弱絮。牆頭礙月低花。年年春事關心事。腸斷欲棲鴉。
舞鏡鸞
衾翠減。啼珠鳳蠟紅斜。重門不鎖相思夢。依舊一作隨意繞天涯。

王安禮

字和甫。安石弟。累官尚書左丞。

點絳脣

秋氣微涼。夢迴明月穿羅幕。并梧蕭索。正繞南枝鵲。寶瑟塵生。金鴈空
零落。情無託。鬢雲慵掠。不似君恩薄。

王安國

字平甫。安石弟。舉進士。又舉茂才異等。熙寧初。除西京國子教授。終祕閣校理。有王校理集。

清平樂

留春不住。費盡鶯兒語。滿地殘紅宮錦污。昨夜南園風雨。小憐初上琵琶。曉來思繞天涯。不肯畫堂朱戶。春風自在楊花。

減字木蘭花

畫橋流水。雨溼落紅飛不起。月破黃昏。簾裏餘香馬上聞。徘徊不語。今夜夢魂何處去。不似垂楊。猶解飛花入洞房。

會肇

字子開。南豐人。舉進士。累官翰林學士。兼侍讀。以龍圖閣學士提舉中太一宮。崇寧中。安置汀州。歸潤而卒。紹興初。諡文昭。有曲阜集。

好事近 亳州秩滿歸江南別諸僚舊

歲晚鳳山陰。看盡楚天冰雪。不待牡丹時候。又使人輕別。如今歸去老江南。扁舟載風月。不似畫梁雙燕。有重來時節。

晁冲之

字叔用。一字川道。鉅野人。有具茨集詞一卷。

感皇恩

蝴蝶滿西園。啼鶯無數。水閣橋南路。凝眸雨行烟柳。吹落一池風絮。秋千斜挂起。人何處。把酒勸君。閑愁莫訴。留取笙歌住。休去。幾多春色。怎禁許多風雨。海棠花謝也。君知否。

又

寒食不多時。牡丹初賣。小院重簾燕飛礙。昨宵風雨。尙有一分春在。今朝猶自得。陰晴快。熟睡起來。宿醒微帶。不惜羅襟揜眉黛。日長梳洗。看看花影移改。笑拈雙杏子。連枝戴。

臨江仙

憶昔西池池上飲。年年多少歡娛。別來不寄一行書。尋常相見了。猶道不如初。安穩錦屏今夜夢。月明好渡江湖。相思休問定何如。情知春去後。管得落花無。

上林春慢上元

帽落宮花。衣惹御香。鳳輦晚來初過。鶴降詔飛。龍銜一作擊燭戲。端門萬枝燈火。滿城車馬。對明月。有誰閑坐。任狂游。更許傍禁街。不扃金鎖。玉樓人暗中擲果。珠簾下。笑著春衫裊娜。素蛾繞釵。輕蟬撲鬢。垂垂柳絲梅朵。夜闌飲散。但贏得。翠翹雙鞞。醉歸來。又重向。曉窗梳裹。

傳言玉女前題

一夜東風吹散柳梢殘雪。御樓烟煖。對鰲山綵結。簫鼓向晚。鳳輦初回宮闕。千門燈火。九衢風月。繡閣人人。乍嬉遊。困又歇。豔妝初試。把珠簾半揭。嬌波溜人。手撚玉梅低說。相逢長是上元時節。

秦

觀

字少章。觀弟。

黃金縷。足司馬才。仲夢中蘇小小詞。

妾本一作在錢塘江上住。花落花開。不管一作記流年度。燕子銜將春色去。紗窗幾陣黃梅雨。一作黃昏幾度瀟瀟雨
 斜插一作蟬鬢犀梳雲半一作欲吐檀板輕敲。一作新聲唱徹黃金縷。夢斷綵雲一作酒醒夢回無覓處。夜一作凄涼明月生南浦。

王 觀 字通叟。官翰林學士。賦應制詞。宣仁太后以其近褻謫之。自號逐客。一云。官大理寺丞。知江都縣事。有冠柳集一卷。

黃叔暘云。通叟詞名冠柳。至踏青一詞。風流楚楚。又不獨冠柳詞之上也。陳質齋云。逐客詞格不高。以冠柳自名。則可見矣。

清平樂 應制

黃金殿裏。燭影雙龍戲。勸得官家真箇醉。進酒猶呼萬歲。折旋舞徹伊

州。君恩與整搔頭。一夜御前宣住。六宮多少人愁。耆舊續聞作王仲甫。字明之。按

王介。字仲甫。衢州人。好為助語詩。

慶清朝 慢 踏青

調雨為酥。催冰做水。東君分付春還。何人便將輕煖。點破殘寒。結伴踏青去好。平頭鞋子小雙鸞。烟郊外。望中秀色。如有無間。晴則箇。陰則箇。餽得天氣。有許多般。須教撩花撥柳。爭要先看。不道吳綾繡襪。香泥斜沁幾行斑。東風巧。盡收翠綠。吹上眉山。

菩薩蠻

單于吹落山頭月。漫漫江上沙如雪。誰唱縷金衣。水寒船舫稀。蘆花楓葉浦。憶抱琵琶語。身未發長沙。夢魂先到家。

生查子

關山魂夢長。塞鴈音書少。兩鬢可憐青。一夜相思老。歸傍碧紗窗。說與
人人道。真箇別離難。不似相逢好。

臨江仙

別浦相逢何草草。扁舟兩岸垂楊。繡屏珠箔綺香囊。酒深歌拍緩。愁入翠
眉長。燕子歸來人去也。此時無奈昏黃。桃花應似我柔腸。不禁微雨。流
淚溼紅妝。

卷八 宋詞六十首

孔平仲

字毅父。新淦人。第進士。官祕書丞。集賢校理。諱知衡州。徙韶州。復責惠州別駕安置。召為戶部
金部郎中。出提舉永興路刑獄。帥鄜延環慶。有清江集。

千秋歲 次韻少游見贈

春風湖外。紅杏花初退。孤館靜。愁腸碎。淚餘痕在枕。別久香銷帶。新睡起。
小園戲蝶飛成對。惆悵人誰會。隨處聊傾蓋。情暫遣。心何在。錦書消息
斷。玉漏花陰改。遲日暮。仙山杳杳空雲海。

米芾

字元章。吳人。歷官太常博士。知無為軍。召為書畫學博士。擢禮部員外郎。出知淮陽軍。有襄陽
集。

滿庭芳 與周熱仁試賜茶甘露寺

雅燕飛觴。清談揮麈。使君高會羣賢。密雲雙鳳。初破縷金團。窗外爐烟自

動。開竅試。二品香泉。輕濤起。香生玉塵。雪濺紫甌圓。嬌鬟宜美盼。雙擎翠袖。穩步紅蓮。坐中客翻愁。酒醒歌闌。點上紗籠畫燭。花驄弄。月影當軒。頻相顧。餘歡未盡。欲去且留連。

滕宗諒

字子京。河南人。舉進士。歷官天章閣待制。徙慶州。再知魏州。復徙岳州。終知蘇州。

臨江仙

湖水連天天連水。秋來分外澄清。君山自是小蓬瀛。氣蒸雲夢澤。波撼岳陽城。帝子有靈能鼓瑟。淒然依舊傷情。微聞蘭芷動芳馨。曲終人不見。江上數峯青。

鄭

僅

字彥能。彭城人。第進士。累官吏部侍郎。知徐州。遷顯謨閣直學士。通議大夫。贈光祿大夫。謚脩敏。

調笑

武陵。洞裏春長。花爛熳。紅英滿地。溪流淺。漸聽雲中雞犬。劉郎迷路香風遠。誤到蓬萊仙館。

又蘇蘇

聲切。恨難說。千里潮平春浪闊。梅風不解相思結。忍送落花飛雪。多才一去芳音絕。更對珠簾新月。

黃

裳

字勉仲。延平人。歷官端明殿學士。贈少傅。有演山集詞二卷。

雨霖鈴

天南游客。甚而今却送君南國。西風萬里無限。吟蟬暗續。離情如織。秣馬

脂車去。即去。多少人惜。望百里。烟慘雲山。送兩城。愁作行色。飛帆過。浙西封域。到秋深。且熾荷。花澤。就船買得鱸鱖。新穀破。雪堆香粒。此與誰同。須記東秦。有客相憶。願聽了。一闋歌聲。醉倒拚今日。

張景脩

字敏叔。常州人。元豐末。爲饒州浮梁令。遷曹郎中。

選冠子詠柳

嫩水接藍。遙堤影翠。半雨半烟橋畔。鳴禽弄舌。夢草縈心。偏稱謝家池館。紅粉牆頭步搖。金縷纖柔。舞腰低軟。被和風搭在。闌干終日。畫簾高捲。春易老。細葉舒眉。輕花吐絮。漸覺綠陰成幔。章臺繫馬。灞水維舟。誰念鳳城人遠。惆悵故國陽關。盃酒飄零。惹人腸斷。恨青青客舍。江頭風笛。亂雲空晚。

孫

熾

字濟師。

菩薩蠻落梅

一聲羌管吹嗚咽。玉溪夜半梅翻雪。江月正茫茫。斷橋流水香。含章春欲暮。落日千山雨。一點著枝酸。吳姬先齒寒。

程

過

字觀過。

滿江紅梅

春欲來時。長是與。江梅有約。還又向。竹林疎處。一枝開却。對酒漸驚身老大。看花應念人離索。但十分。沉醉祝東君。長如昨。芳草渡。孤舟泊。山斂黛。天垂幙。黯銷魂無奈。暮雲殘角。便好折來和雪戴。莫教酒醒隨風落。待

殷勤留此寄相思。誰堪託。

詞金門

江上路。依約數家烟樹。一枕歸心村店暮。更亂山深處。夢過江南芳草。渡曉色又催人去。愁似游絲千萬縷。倩東風約住。

解 昉 字方叔。

永遇樂

風暖鶯嬌。露濃花重。天氣和煦。院落烟收。垂楊舞困。無奈堆金縷。誰家巧。縱青樓絃管。惹起夢雲情緒。憶當時。文衾絮枕。未嘗暫孤鴛侶。芳菲易老。故人難聚。到此翻成輕誤。閨苑仙遙。蠻箋縱寫。何計傳深訴。青山綠水。古今長在。惟有舊歡何處。空贏得。斜陽暮草。淡烟細雨。

陳 亞

字亞之。揚州人。嘗知潤州。仕至司封郎中。一云。太常少卿。有澄源集。吳處厚云。雖一時俳諧之詞。寄興亦有深意。

生查子

相思意已深。白紙書難足。字字苦參商。故要檀郎讀。分明記得約當歸。遠至櫻桃熟。何事菊花時。猶未回鄉曲。

張舜民

字芸叟。別號浮休居士。以薦為諫官。仕至吏部侍郎。有畫墁集。

賣花聲 題岳陽樓

木葉下君山。空水漫漫。十分斟酒斂芳顏。不是渭城西去客。休唱陽關。醉袖撫危欄。天淡雲閑。何人此路得生還。回首夕陽紅盡處。應是長安。

王 雱 字元澤。安石子。舉進士。累官天章閣待制。兼侍講。遷龍圖閣直學士。卒贈左諫議大夫。

眼兒媚

楊柳絲絲弄輕柔。烟縷織成愁。海棠未雨。梨花先雪。一半春休。而今往事難重省。歸夢繞秦樓。相思只在。丁香枝上。豆蔻梢頭。

蔡 挺

字子政。一作子正。宋城人。第進士。熙寧中。拜樞密副使。卒贈工部尚書。諡肅敏。子政在涓久。鬱鬱不自得。寓意詞中。有玉關人老之歎。中使至。令優伶歌之。遂達禁掖。有樞密之拜。

喜遷鶯

霜天秋曉。正紫塞故壘。黃雲衰草。漢馬嘶風。邊鴻叫月。隴上鐵衣寒早。劍歌騎曲悲壯。盡道君恩須報。塞垣樂。盡橐鞬錦領。山西年少。談笑刁斗。靜烽火一把。時送一作報平安耗。聖主憂邊。威懷遐遠。驕口尚寬天討。歲華向晚。愁思誰念。玉關人老。太平也。且歡娛莫惜。金樽頻倒。

汪輔之

字正夫。宣州人。熙寧中登第。為職方郎中。廣南轉運使。降知虔州卒。有集二十卷。

行香子

晚綠寒紅。芳意匆匆。惜年華今與誰同。碧雲零落。數字賓鴻。看渚蓮凋。宮扇舊。怨秋風。流波墜葉。佳期何在。想天教離恨無窮。試將前事。閑倚梧桐。有銷魂處。明月夜。錦屏空。

趙鼎臣

字承之。衛城人。元祐中進士。宣和中。以右文殿脩撰知鄧州。召為太府卿。卒贈待制。有竹隱時士集。

念奴嬌 送王長卿赴河間司錄

舊游何處。記金湯形勝。蓬瀛佳麗。綠水芙蓉元帥與。賓僚風流濟濟。萬柳亭邊。雅歌堂上。醉倒春風裏。十年一夢。覺來烟水千里。惆悵送子重游。南樓依舊否。朱欄誰倚。要識當時惟是有。明月曾陪珠履。量減杯中。雪添頭上。甚矣吾衰矣。酒徒相問。為言憔悴如此。

蘇

庠

字養直。丹陽人。紹聖中。同徐俯薦于朝。不起。自放江湖間。有後湖集一卷。

菩薩蠻 自宜興還西岡作

園林寂寂春歸去。濛濛柳下飄。一作飛香絮。野水接雲橫。綠烟啼曉鶯。江
南鷓鴣夢。山色朝來重。小艇小灣頭。蘋花蘋葉洲。

木蘭花令

江雲疊疊遮鴛浦。江水無情流薄暮。歸帆初張葦邊風。客夢不禁篷背雨。
渚花不解留人住。只作深愁無盡處。白沙烟樹有無中。鴈落滄洲何處
所。

臨江仙 荷花

獵獵風蒲初暑過。瀟然庭戶秋清。野航渡口帶烟橫。晚山千萬疊。別鶴兩
三聲。秋水芙蓉葉。聊蕩漿。一樽同破愁城。蓼花灘上白鷗明。暮雲連極浦。
急雨暗長汀。

劉

涇

字巨濟。簡州人。舉進士。元符末。官職方郎中。有前後集。

清平樂

深沉院宇。枕簟清無暑。睡起花陰初轉午。一霎飛雲過雨。雨餘隱隱殘

雷。夕陽却照庭槐。莫把珠簾垂下。妨他雙燕歸來。

潘元質 金華人。

倦尋芳

獸環半掩。鴛鴦無塵。庭院瀟灑。樹色沉沉。春盡燕嬌鶯妬。夢草池塘青漸滿。海棠軒檻紅相亞。聽簫聲。記秦樓夜約。彩鸞齊跨。漸迤邐。更催銀箭。何處貪歡。猶繫驄馬。旋剪燈花。兩點翠眉誰畫。香滅羞回空帳裏。月高猶在重簾下。恨疎狂。待歸來。碎揉花打。

醜奴兒慢

愁春未醒。還是清和天氣。對濃綠陰中。庭院燕語鶯啼。數點新荷。翠鈿輕泛。水平池。一簾風絮。才晴又雨。梅子黃時。忍記那回。玉人嬌困。初試單衣。共攜手。紅窗描繡。畫扇題詩。怎有而今。半牀明月兩天涯。章臺何處。多應爲我。蹙損雙眉。

蘇過

字叔黨。軾第二子。初監太原府稅。次知穎昌府。郎城縣。皆以法令罷。晚權通判中山府。留家穎昌營。自號斜川居士。時稱爲小坡。有斜川集。

點絳脣

高柳蟬嘶。采菱歌斷。秋風起。晚雲如髻。湖上山橫翠。簾卷西樓。過雨涼生。袂天如水。畫欄十二。少箇人同倚。

秦湛

字處度。觀子。官宣教郎。

謁金門

卷八 宋詞六十首

一〇七

鴛鴦浦。春漲一江花雨。隔岸數聲初過櫓。晚風生碧樹。舟子相呼相語。載取暮愁歸去。寒食江村芳草路。愁來無著處。

許庭 字伯揚。儋梁人。

臨江仙詠柳

不見灞陵原上柳。往來過盡蹄輪。朝離南楚暮西秦。不成名利。贏得鬢毛新。莫怪枝條憔悴損。一生惟苦征塵。雨三烟樹倚孤村。夕陽影裏。愁殺宦遊人。

葛勝仲 字魯卿。丹陽人。紹聖四年進士。歷官禮部員外郎。權國子司業。遷太常卿。兼諭德。除國子祭酒。

尋知汝州。改湖州。紹興元年卒。謚文康。有丹陽集詞一卷。

點絳脣縣齋愁坐

秋晚寒齋。藜牀香篆橫輕霧。閑愁幾許。夢逐芭蕉雨。雲外哀鴻。似替幽人語。歸不去。亂山無數。斜日荒城鼓。

鷓鴣天

玉瑄還飛換歲灰。定山新棹酒船回。年時梁燕雙雙在。肯爲人愁便不來。衰意緒。病情懷。玉山今夜爲誰頽。年時梅蕊垂垂破。肯爲人愁便不開。

李冠 字世英。山東人。

蝶戀花

遙夜亭臯閑信步。才過清明。漸覺傷春暮。數點雨聲風約住。朦朧淡月雲來去。桃杏依稀香暗度。誰在秋千。笑裏輕輕語。一寸相思千萬緒。人間

沒箇安排處。王介甫云。張子野雲。破月來花弄影。不如冠朦朧。淡月雲來去也。

張表臣 官承議郎。通判常州。著珊瑚鉤詩話。

驀山溪游甘露寺

樓橫北固。盡日慄慄雨。欵乃數聲歌。但渺漠。江山烟樹。寂寥風物。三五過元宵。尋柳眼。覓花鬚。春色知何處。落梅嗚咽。吹徹江城暮。脈脈數飛鴻。杳歸期。東風凝竚。長安不見。烽起夕陽間。魂欲斷。酒初醒。獨下危梯去。

查 荃

透碧霄

艤蘭舟。十分端是載離愁。練波送遠。屏山遮斷。此去難留。相從爭奈。心期久要。屢變霜秋。歎人生。杳似萍浮。又翻成輕別。都將深恨。付與東流。想斜陽影裏。寒烟明處。雙槳去悠悠。愛渚梅。幽香動。須采掇。倩纖柔。豔歌粲發。誰傳餘韻。來說仙遊。念故人。留此遐州。但春風老後。秋月圓時。獨倚江樓。

周紫芝 字少隱。宣城人。舉進士。為樞密編修。守興國。有竹坡詞二卷。

高郵孫兢序云。竹坡樂章。清麗婉曲。非苦心刻意爲之。

鷓鴣天

一點殘紅欲盡時。乍涼秋氣滿屏幃。梧桐葉上三更雨。葉葉聲聲是別離。調寶瑟。撥金猊。那時同唱鷓鴣詞。如今風雨西樓夜。不聽清歌也淚垂。

醉落魄

江天雲薄。江頭雪似楊花落。寒燈不管人離索。照得人來。真箇睡不著。歸期已負梅花約。又還春動空飄泊。曉寒誰看伊梳掠。雪滿西樓。人在闌干角。

生查子

金鞍欲別時。芳草溪邊渡。不忍上西樓。怕看來時路。簾幙卷東風。燕子雙雙語。薄倖不歸來。冷落春情緒。

又

春寒入翠帷。月淡雲來去。院落半晴天。風撼梨花樹。人醉掩金鋪。閑倚秋千柱。滿眼是相思。無說相思處。

又

青絲結曉鬟。臨鏡心情懶。知爲曉愁濃。畫得雙蛾淺。柳困玉樓空。花落紅窗暖。相對語春愁。只有春閨燕。

謁金門

春雨細。開盡一番桃李。柳暗曲欄花滿地。日高人睡起。綠浸小池春水。沙暖鴛鴦雙戲。薄倖更無書一紙。畫樓愁獨倚。

朝中措

雨餘庭院冷蕭蕭。簾幙度微颺。鳥語喚回殘夢。春寒勒住花梢。無聊睡起。新愁黯黯。歸路迢迢。又是夕陽時候。一鑪沉水烟銷。

又

黃昏樓閣亂栖鴉。天末淡微霞。風裏一池楊柳。月邊滿樹梨花。陽臺路遠。魚沉尺素。人在天涯。想得小窗遙夜。哀絃撥斷琵琶。

宴桃源

林外野塘烟膩。衣上落梅香細。瘦馬步凌兢。人在亂山叢裏。憔悴憔悴。回首望小樓千里。

品令九日上西庵絕頂

霜蓬零亂。笑綠鬢。光陰晚。紫萸時節。小樓長醉。一川平遠。休說龍山佳會。此情不淺。黃花香滿。記白苧。吳歌軟。如今却向。亂山叢裏。一枝重看。對著西風搔首。爲誰腸斷。

清平樂

烟鬟斂翠。柳下門初閉。門外一川風細細。沙上暝禽飛起。今宵水畔樓邊。風光宛似當年。月到舊時明處。共誰同倚闌干。

點絳脣西池桃花落盡賦此

燕子風高。小桃枝上花無數。亂溪深處。滿地飛紅雨。喚得春來。又送春歸去。渾無緒。劉郎前度。空記來時路。

一翦梅送楊師醺赴官

無限江山無限愁。兩岸斜陽。人上扁舟。闌干吹浪不多時。酒在離樽。情滿滄洲。早是霜華兩鬢秋。目送飛鴻。那更難留。問君尺素幾時來。莫道長江。不解西流。

江城子

夕陽低盡柳如烟。澹平川。斷腸天。今夜十分霜月更娟娟。怎得人如天上月。雖暫缺。有時圓。斷雲飛雨又經年。思凄然。淚涓涓。且做如今要見也無緣。因甚江頭來去雁。飛不到。小樓邊。

謝

逸

字無逸。臨川人。第進士。有溪堂詞一卷。

花心動

風裏楊花。輕薄性。銀燭高烧心熱。香餌懸鉤。魚不輕吞。辜負釣兒虛設。桑蠶到老絲長絆。鍼刺眼。淚流成血。思量起。黏枝花朵。果兒難結。海樣情深忍撇。似夢裏相逢。不勝歡悅。出水雙蓮。摘取一枝。可惜並頭分拆。猛期月滿會姮娥。誰知是。初生新月。折翼鳥。甚日于飛時節。沈天羽云。此詞句句比方。用小雅鷓鴣鳴篇體也。

蝶戀花

豆蔻梢頭春色淺。新試紗衣。拂袖東風軟。紅日三竿簾幙捲。畫樓影裏雙飛燕。攏鬢步搖青玉碾。缺樣花枝。葉葉蜂兒顫。獨倚闌干凝望遠。一川烟草平如翦。

如夢令

花落鶯啼春暮。陌上綠楊飛絮。金鴨晚香寒。人在洞房深處。無語無語。葉上數聲秋雨。

柳梢青

香肩輕拍。樽前忍聽。一聲將息。昨夜濃歡。今朝別酒。明日行客。後回來則須來。便去也。如何去得。無限離情。無窮江水。無邊山色。

燕歸梁

六曲闌干翠幙垂。香燼冷金猊。日高花外轉黃鸝。春睡覺。酒醒時。草青南浦。雲橫西塞。錦字杳無期。東風只送柳綿飛。全不管。寄相思。

南歌子

雨洗溪光淨。風掀柳帶斜。畫樓朱戶玉人家。簾外一眉新月。浸梨花。金鴨香凝袖。銅荷燭映紗。鳳盤宮錦小屏遮。夜靜寒生春筍。理琵琶。

江神子

一江秋水碧灣灣。繞青山。玉連環。簾幙低垂。人在畫圖間。閑抱琵琶尋舊曲。彈未了。意闌珊。飛鴻數點拂雲端。倚欄看。楚天寒。擬倩東風。吹夢到長安。恰似梨花春帶雨。愁滿眼。淚闌干。

青玉案

蘆花飄雪迷洲渚。送秋水連天去。一葉小舟橫別浦。數聲鴻雁。兩行鷗鷺。天淡瀟湘暮。蓬窗醉夢驚簫鼓。回首青樓在何處。柳岸風輕吹殘暑。菊開青蕊。葉飛紅樹。江上瀟瀟雨。

清平樂

花邊柳際。已漸知春意。歸信不知何日是。舊恨欲拚無計。故人零落西東。題詩待倩歸鴻。惟有多情芳草。年年處處相逢。

謝 蒔 字幼槃。逸從弟。布衣。有竹友詞一卷。

醉蓬萊中秋懷無逸兄

望晴峯染黛。暮靄澄空。碧天無漢。圓鏡高飛。又一年秋半。皓色誰同。歸心暗折。聽唳雲孤雁。問月停杯。錦袍何處。一樽無伴。好在南隣。詩盟酒社。刻燭爭成。引觴愁緩。今夕樓中。繼阿連清玩。飲劇狂歌。歌終起舞。醉冷光零亂。樂事難窮。疎星易曉。又成浩歎。

蝶戀花留董之南過七夕

一水盈盈牛女渡。目送經年。脈脈無由語。後夜鵲橋知暗度。持杯乞與閑情緒。君似庾郎愁幾許。萬斛愁生。更作征人去。留定征鞍君且住。人間豈有無愁處。

葛 郊 字謙問。丹陽人。有信齋詞一卷。

念奴嬌和人

馮夷微怒。披鮫人水府。織成綃縠。何處飛來雙白鷺。點破一溪寒玉。岸柳烟迷。海棠酒困。贏得春眠足。凭欄搔首。爲誰消遣愁日。遙想居士牀頭。竹渠新雨。溜瓷中春醪。不惜千鍾爲客壽。倒臥南山新綠。晚月催歸。春風留住。費盡紗籠燭。恍疑仙洞。夢遊天柱林屋。

洞仙歌 壬辰六月十二日納涼

瑤樓十二。無限神仙侶。紫紱丹麾彩鸞馭。步虛聲杳靄。碧落天高。微雲淡。點破瑤階白露。暗香來水閣。冰簟紗幮。一枕風輕自無暑。更上水晶簾。

斗挂闌干。銀河淺。天孫將渡。終不如。歸去在苕川。看千頃菰蒲。亂鳴秋雨。

廖行之 字天民。衡陽人。有省齋詩餘一卷。

青玉案重九憶羅舜舉
家山去此無多路。久沒个音書去。一別而今佳節度。黃花開未。白衣到否。籬落荒涼處。崢嶸歲月還秋暮。空腹便便無好句。菊意愆期。開未許。那堪惹恨。年來此日。長是蕭蕭雨。

點絳脣送人歸新城

音信西來。匆匆思作東歸計。別懷縈繫。為箇人留滯。樽酒團圓。莫惜通宵醉。還來未。滿期君至。只在初三是。

卷九 宋詞五十六首

周邦彥

字美成。錢唐人。歷官祕書監。進徽閣待制。提舉大晟府。出知順昌府。徙處州。卒贈宣奉大夫。有清真集二卷。後集一卷。

晉陽強煥序云。美成詞。樞寫物態。曲盡其妙。劉潛夫云。美成頗儉古句。陳質齋云。美成詞。多用唐人詩語。鑿括入律。混然天成。長調尤善鋪敘。富豔精工。詞人之甲乙也。張叔夏云。美成詞。渾厚和雅。善于融化詩句。沈伯時云。作詞當以清真為主。蓋清真最為知音。且下字用意。皆有法度。

瑞龍吟

章臺路。還是一作見褪粉梅梢。試華桃樹。悒悒坊陌。一作曲人家。定巢燕子。歸

來舊處。黯凝竚。因記箇人癡小。乍窺門戶。侵晨淺約宮黃。障風映袖。盈盈笑語。前度劉郎重到。訪鄰尋里。同時歌舞。唯有舊來秋娘。聲價如故。吟箋賦筆。猶記燕臺句。知誰伴。名園露飲。東城閑步。事與孤鴻去。探春盡。是傷離緒。官柳低金縷。歸騎晚。纖纖池塘飛雨。斷腸院落。一簾風絮。黃叔暘云。此詞自章臺路至歸來舊處是第一段。自黯凝竚至盈盈笑語是第二段。此之謂雙拽頭。屬正平調。自前度劉郎以下。即犯大石。係第二段。至歸騎晚以下四句。再歸正平。諸本皆以吟箋賦筆處分段。非也。

蘭陵王柳

柳陰直。烟裏絲絲弄碧。隋堤上。曾見幾番。拂水飄緜送行色。登臨望故國。誰識。京華倦客。長亭路。年去歲來。應折柔條過千尺。閑尋舊踪跡。又酒趁哀絃。燈照離席。梨花榆火催寒食。愁一箭。一箭。一作剪。風快。半篙波暖。回頭一。作首。迢遞便數驛。望人在天北。悽惻。恨堆積。漸別浦縈迴。津埃岑寂。斜陽冉冉春無極。念月榭攜手。露橋聞。一作吹。笛。沉思前事似夢裏。淚暗滴。

鎖窗寒 寒食

暗柳啼鴉。單衣竚立。小簾朱戶。桐花一作陰。半畝。靜鎖一庭愁雨。灑空堦。更闌未休。故人剪燭西窗語。似楚江暝宿。風燈零亂。少年羈旅。遲暮。嬉遊處。正店舍無烟。禁城百五。旗亭喚酒。付與高陽儔侶。想東園。桃李自春。小脣秀靨。今在否。到歸時。定有殘英。待客攜樽俎。

側犯

暮霞霽雨。小蓮出水紅妝靚。風定。看步韞江妃。照明鏡。飛螢度暗草。秉燭

遊花徑。人靜。攜豔質。追涼就槐影。金環皓腕。雪藕清泉瑩。誰省。滿身香。猶是舊荀令。見說胡姬。酒壚寂靜。烟鎖漠漠藻池苔井。

齊天樂

綠蕪彫盡臺城路。殊鄉又逢秋晚。暮雨生寒。鳴蛩勸織。深閣時聞裁剪。雲窗靜掩。歎重拂羅裯。頓疎花簾。尚有練囊。露螢清夜照書卷。荆江留滯最久。故人相望處。離思何限。渭水西風。長安亂葉。空憶詩情宛轉。凭高眺遠。正玉液新菊。蟹螯初薦。醉倒山翁。但愁斜照斂。

蘇幕遮

燎沉香。消溽暑。鳥雀呼晴。侵曉窺簷語。葉上初陽乾宿雨。水面清圓。一一風荷舉。故鄉遙。何日去。家住吳門。久作長安旅。五月漁郎相憶否。小楫輕舟。夢入芙蓉浦。

六醜薔薇謝後作

正單衣試酒。悵客裏。光陰虛擲。願春暫留。春歸如過翼。一去無迹。爲問家何在。夜來風雨。葬楚宮傾國。釵鈿墮處遺香澤。亂點桃蹊。輕翻柳陌。多情更誰追惜。但蜂媒蝶使。時叩窗楹。東園岑寂。漸蒙籠暗碧。靜繞珍叢底。成歎息。長條故惹行客。似牽衣待話。別情無極。殘英小。強簪巾幘。終不似。一朵釵頭顫裊。向人欹側。漂流處。莫趁潮沙。恐斷鴻。一作紅。尙有相思字。何由見得。

大酺

對宿烟收。春禽靜。飛雨時鳴高屋。牆頭青玉旆。洗鉛霜都盡。嫩梢相觸。潤逼琴絲。寒侵枕障。蟲網吹黏。簾竹。郵亭無人處。聽簷聲不斷。困眠初熟。奈愁極頻。一作頓驚。夢輕難記。自憐幽獨。行人歸意速。最先念。流潦妨車轂。怎奈向。一作何蘭成顛顛。衛玠清羸。等閑時。易傷心目。未怪平陽客。雙淚落。笛中哀曲。况蕭索。青蕪國。紅糝鋪地。門外荆桃如菽。夜遊共誰秉燭。

法曲獻仙音

蟬咽涼柯。燕飛塵幙。漏閣籤聲時度。倦脫綸巾。困便湘竹。桐陰半侵朱戶。向抱影凝情處。時聞打窗雨。耿無語。歎文園。近來多病。情緒懶。樽酒易成間阻。縹緲玉京人。想依然。京兆眉嫵。翠幙深中。對徽容。空在紈素。待花前月下。見了不教歸去。

滿庭芳 夏口溼水無想山作

風老鶯雛。雨肥梅子。午陰嘉樹清圓。地卑山近。衣潤費爐烟。人靜烏鳶自樂。小橋外。新綠濺濺。凭欄久。黃蘆苦竹。擬泛九江船。年年。如社燕。飄流瀚海。來寄脩椽。且莫思身外。長近樽前。憔悴江南倦客。不堪聽。急管繁絃。歌筵畔。先安枕簟。容我醉時眠。

應天長 慢寒食

條風布暖。霏霧弄晴。池臺徧滿春色。正是夜堂無月。沉沉暗寒食。梁間燕。前社客。似笑我。閉門愁寂。亂花過。隔苑芸香。滿地狼籍。長記那回時。邂逅相逢。郊外駐油壁。又見漢宮傳燭。飛烟五侯宅。青青草。迷路陌。強載酒。

細尋前迹。市橋遠。柳下人家。猶自相識。

玉樓春

桃溪不作從容住。秋藕絕來無續處。當時相候赤欄橋。今日獨尋黃葉路。
烟中列岫青無數。鴈背夕陽紅欲暮。人如風後入江雲。情似雨餘黏地絮。

少年遊

并刀如水。吳鹽勝雪。纖指破新橙。錦幄初溫。獸香不斷。相對坐調笙。低
聲問。向誰行。宿城上。已三更。馬滑霜濃。不如休去。直是少人行。

拜星月慢

夜色催更。清塵收露。小曲幽坊月暗。竹檻燈窗。識秋娘庭院。笑相遇。似覺
瓊枝玉樹。暖日明霞光爛。水盼蘭情。總平生稀見。畫圖中。舊識春風面。
誰知道。自到瑤臺畔。眷戀雨潤雲溫。苦驚風吹散。念荒寒。寄宿無人館。重
門閉。敗壁秋蟲歎。怎奈何。一作向一縷相思。隔溪山不斷。

尉遲盃

隋堤路。漸日晚。密靄生深樹。陰陰淡月籠沙。還宿河橋深處。無情畫舸。都
不管。烟波隔前一作南浦。等行人。醉擁重衾。載將離恨歸去。因思舊客京
華。長偃傍疏林。小檻歡聚。冶葉倡條俱相識。仍慣見。珠歌翠舞。如今向。漁
村水驛。夜如歲。焚香獨自語。有何人。念我無聊。夢魂凝想鴛侶。

西河金陵懷古

佳麗地。南朝盛事誰記。山圍故國繞清江。髻鬟對起。怒濤寂寞打孤城。風
檣遙度天際。斷崖樹。猶倒倚。莫愁艇子曾繫。空餘舊迹鬱蒼蒼。霧沉牛
壘。夜深月過女牆來。傷心東望淮水。酒旗戲鼓甚處市。想依稀。王謝鄰
里。燕子不知何世。入尋常。巷陌人家。相對如說興亡。斜陽裏。

點絳脣

遼鶴歸來。故鄉一作人多少。傷心地。一作事。短書不寄。魚浪空千里。憑仗桃
根說與相思意。愁無際。舊時衣袂。猶有東風淚。已堅支志云。美成在姑蘇。與營妓岳楚
雲相戀。後從京師過吳。則岳已從人久矣。因飲于太守蔡蠻子高坐上。見其妹。因作此詞寄之。楚雲讀之。感泣
者累日。

又

征騎初停。酒行莫放離歌舉。柳汀蓮浦。看盡江南路。苦恨斜陽冉冉催
人去。空回顧。淡烟橫素。不見揚鞭處。

一落索

杜宇催歸聲苦。和春催去。倚欄一霎酒旗風。任撲面。桃花雨。目斷隴雲
江樹。難逢尺素。落霞隱隱日平西。料想是。分攜處。

荔枝香近

照水殘紅零亂。風掀去。盡日惻惻輕寒。簾底吹香霧。黃昏客枕無聊。細響
當窗雨。看兩兩相依燕新乳。樓下水。漸綠遍。行舟浦。暮往朝來。心逐片
帆輕舉。何日迎門。小檻朱籠報鸚鵡。共剪西窗蜜炬。

又

向夜寒侵酒席。露微泫。鳥履初會。香澤方薰。無端暗雨催人。但怪燈偏。簾卷。回顧始覺。驚鴻去遠。大都世間最苦。惟聚散。到得春殘。看卽是。開離宴。細思別後。柳眼花鬚。更誰剪。此懷何處消遣。

霜葉飛

露迷衰草。疎星挂。涼蟾低下林表。素娥青女。鬪嬋娟。正倍添悽悄。漸颯颯。丹楓撼曉。橫天雲浪。魚鱗小。見皓月相看。又透入。清輝半晌。特地留照。迢遞望極。關山波穿千里。度日如歲。難到鳳樓。今夜聽西風。奈五更愁抱。想玉匣哀絃。閉了。無心重理。相思調。念故人。牽離恨。屏掩孤顰。淚流多少。

傷情怨

枝頭風信漸小。看暮鴉飛了。又是黃昏。閉門收返照。江南人去路杳。信未通。愁已先到。怕見孤燈。霜寒催睡早。

秋藥香

乳鴨池塘水暖。風緊柳花迎面。午妝粉指印窗眼。曲裏長眉翠淺。聞知社日。停鍼線。探新燕。寶釵落枕。夢魂遠。簾影參差滿院。

菩薩蠻

銀河宛轉三千曲。浴鳧飛鷺澄波綠。何處望歸舟。夕陽江上樓。天憎梅浪發。故下封枝雪。深院捲簾看。應憐江上寒。

南柯子 詠梳

桂魄分餘暈。檀槽破紫心。曉妝初試鬢雲侵。每被蘭膏香染。色深沉。指印纖纖粉。釵橫隱隱金。有時雲雨鳳幃深。長是枕前不見。殢人尋。

關河令

秋陰時作漸向暝。變一庭凄冷。佇聽寒聲。雲深無鴈影。更深夜人去寂靜。但照壁。孤燈相映。酒已都醒。如何消夜永。

過秦樓 一本作惜餘春慢

水浴清蟾。葉喧涼吹。巷陌馬聲初斷。閑依露井。笑撲流螢。惹破畫羅輕扇。人靜夜久。凭欄愁不歸眠。立殘更箭。歎年華一瞬。人今千里。夢沉書遠。空見說。鬢怯瓊梳。容銷金鏡。漸懶趁時勻染。梅風地溽。梧雨苔滋。一架舞紅都變。誰信無聊爲伊。才減江淹。情傷荀倩。但明河影下。還看稀星數點。

六么令 重陽

快風收雨。亭館清殘燠。池光靜橫秋影。岸柳如新沐。聞道宜城酒美。昨日新醅熟。輕鑣相逐。衝泥策馬。來折東籬半開菊。華堂花豔對列。一一驚郎目。歌韻巧共泉聲。間雜琮瑤玉。惆悵周郎已老。莫唱當時曲。幽歡難卜。明年誰健。更把茱萸再三囑。

氏州第一

波落寒汀。村渡向晚。遙看數點帆小。亂葉翻鴉。驚風破鴈。天角孤雲縹緲。官柳蕭疎。甚尙挂。微微殘照。景物關情。川途換日。頓來催老。漸解狂朋歡意少。奈猶被。思牽情繞。座上琴心。機中錦字。覺最縈懷抱。也知人。懸望

久。薔薇謝。歸來一笑。欲夢高唐。未成眠。霜空已曉。

瑞鶴仙

悄郊原帶郭。行路永。客去車塵漠漠。斜陽映山落。斂餘紅猶戀。孤城欄角。凌波步弱。過短亭。何用素約。有流鶯勸我。重解繡鞍。緩引春酌。不記歸時早暮。上馬誰扶。醒眠朱閣。驚鷗動幙。扶殘醉。繞紅藥。歎西園已是。花深無地。東風何事。又惡。任流光過却。猶喜洞天自樂。

望江南

歌席上。無賴是橫波。寶髻玲瓏欹玉燕。繡巾柔膩掩香羅。人好自宜多。無箇事。因甚斂雙蛾。淺淡梳妝疑見畫。惺忪言語勝聞歌。何況會婆娑。

花犯梅花

粉牆低。梅花照眼。依然舊風味。露痕輕綴。疑淨洗鉛華。無限清麗。去年勝賞會孤倚。冰盤共宴喜。更可惜。雪中高士。香篝薰素被。今年對花太匆。相逢似有恨。依依憔悴。凝望久。青苔上。旋看飛墜。相將見。脆圓薦酒。人正在。空江烟浪裏。但夢想。一枝瀟灑。黃昏斜照水。黃叔暘云。此只詠梅花。而紆徐反覆。道盡二年間事。圓美流轉如彈丸。

浪淘沙慢

曉一作晝陰重。霜凋岸草。霧隱城堞。南陌脂車待發。東門帳飲乍闋。正拂面。垂楊堪攬結。掩紅淚。玉手親折。念漢浦離鴻。去何許。經時信音絕。情切。望中地遠天闊。向露冷風清無人處。耿耿寒漏咽。嗟萬事難忘。唯是輕一

作離別。翠樽未竭。憑斷雲。留取西樓殘月。羅帶光銷。紋衾疊。連環解。舊香頓歇。怨歌永。瓊壺敲盡。缺恨春去。不與人期。弄夜色。空餘滿地梨花雪。

夜飛鵲

河橋送人處。良夜何其。斜月遠墮餘輝。銅盤燭淚已流盡。霏霏涼露沾衣。相將散離會處。探風前津鼓。樹杪參旗。花驄會意。縱揚鞭。亦自行遲。迢遞路迴清野。人語漸無聞。空帶愁歸。何意重經前地。遺鈿不見。斜徑都迷。免葵燕麥。向斜陽。影與人齊。但徘徊班草。欷歔酌酒。極望天西。

解語花 元宵

風銷焰蠟。露浥烘爐。花市光相射。桂花流瓦。纖雲散。耿耿素娥欲下。衣裳淡雅。看楚女。纖腰一把。簫鼓喧。人影參差。滿路飄香麝。因念帝城放夜。望千門如晝。嬉笑遊冶。鈿車羅帕。相逢處。自有暗塵隨馬。年光是也。惟只見。舊情衰謝。清漏移。飛蓋歸來。從舞休歌罷。

垂絲釣

縷金翠羽。妝成纔見眉嫵。倦倚繡簾。看舞風絮。愁幾許。寄鳳絲。鴈柱春將暮。向層城苑路。鈿車似水。時時花徑相遇。舊遊伴侶。還到會來處。門掩風和雨。梁間燕語。問那人在否。

晁端禮

字次膺。熙寧六年進士。兩爲縣令。晚以承事郎爲大晟府協律。有閑適集一卷。

能改齋漫錄。政和癸巳。大晟樂成。蔡元長以次膺薦詔乘驛赴闕。次膺至都會。禁中嘉蓮生。遂屬詞以進。名並蒂芙蓉。上覽之稱善。除大晟府協律郎。不克受而卒。

水龍吟

倦游京洛風塵。夜來病酒無人問。九衢雪少。千門月淡。元宵燈近。香散梅梢。凍消池面。一番春信。記南樓醉裏。西城宴闋。都不管。人春困。屈指流年未幾。早驚人。潘郎雙鬢。當時體態。而今情緒。多應瘦損。馬上牆頭。縱教瞥見。也難相認。恁闌干。但有盈盈淚眼。把羅襟搵。

又杏花

小桃零落春將半。雙燕却來池館。名園相倚。初開繁杏。一枝遙見。竹外斜穿。柳間深映。粉愁春怨。任紅欹宋玉。牆頭十里。曾牽惹。人腸斷。常記山城斜路。噴清香。日遲風暖。春陰挫後。馬前惆悵。滿枝妝淺。深院簾垂。雨愁人處。碎紅千片。料明年更發。多應更好。約鄰翁看。

宴桃源

又是青春將暮。望極桃溪歸路。洞戶悄無人。空鎖一庭紅雨。凝竚凝竚。人面不知何處。

滿庭芳

綠繞羣峯。紅搖千柄。夜來暑雨初收。共君乘興。輕舫信悠悠。且盡一樽別酒。荷香裏。滿酌輕謳。明朝去。征帆夜落。何處好汀洲。風流。吾小阮。朝辭東觀。夕向南州。况聖時爭教。賈傅淹留。若過潯陽亭上。琵琶淚。莫灑清秋。堤邊柳。從今愛惜。留待繫歸舟。

田不伐

南柯子

夢怕愁時斷。春從醉裏回。淒涼懷抱向誰開。些子清明時候。被鶯催。柳外都成絮。欄邊半是苔。多情簾燕獨徘徊。依舊滿身花雨。又歸來。

又

團玉梅梢重。香羅芰扇低。簾風不動蝶交飛。一樣綠陰庭院。鎖斜暉。對月懷歌扇。因風念舞衣。何須惆悵惜芳菲。拚却一年憔悴。待春歸。

曹

組

字元寵。穎昌人。宣和舉進士。有旨換武增。兼閣職。仍給事殿中。揮塵錄云。官止副使。有箕穎集。

青玉案

碧山錦樹明秋霽。路轉陡疑無地。忽有人家臨曲水。竹籬茅舍。酒旗沙岸。一簇漁樵市。淒涼只恐鄉心起。鳳樓遠回頭謾凝睇。何處今宵孤館裏。一聲征鴈。半窗斜月。總是離人淚。

驀山溪梅

護霜雲際。遠日明芳樹。竹外一枝斜。想佳人。天寒日暮。黃昏小院。無處著清香。風細細。雪垂垂。何況江頭路。月邊疎影。夢到銷魂處。結子欲黃時。又須作。廉纖細雨。孤芳一世。供斷有情愁。消瘦損。東陽也。試問花知否。

又

草薰風暖。樓閣籠輕霧。牆短出花梢。映誰家。綠楊朱戶。尋芳拾翠。綺陌自青春。江南遠。踏青時。誰念方羈旅。昔游如夢。空憶橫塘路。羅袖舞臺風。想桃花。依然舊樹。一懷離恨。滿眼欲歸心。山連水。水連雲。悵望人何處。

點絳脣

雲透斜陽。半樓紅影明窗戶。暮山無數。歸鴈愁邊去。十里平蕪。花遠重
重樹。空凝竚。故人何處。可惜春將暮。

好事近梅

茅舍竹籬邊。雀噪晚枝時節。一陣暗香飄處。已不勝愁絕。江南得地故
先開。不待有飛雪。腸斷幾回山路。恨無人攀折。

憶少年

年時酒伴。年時去處。年時春色。清明又近也。却天涯爲客。念過眼光陰
難再得。想前歡。盡成陳迹。登臨恨無語。把闌干暗拍。

婆羅門引望月

漲雲暮卷。漏聲不到小簾櫳。銀河淡掃澄空。皓月當軒高挂。秋入廣寒宮。
正金波不動。桂影朦朧。佳人未逢。歎此夕。與誰同。望遠傷懷對影。霜滿
秋紅。南樓何處。想人在。長笛一聲中。凝淚眼。立盡西風。

万俟雅言

自號詞隱。崇寧中。充大晟府製撰。有大聲集五卷。

黃叔暘云。雅言精于音律。自號詞隱。發妙旨于律呂之中。運巧思于斧鑿之外。平而工。和而雅。比諸刻琢句意而求精麗者遠矣。

春草碧草

又隨芳渚。坐一作生。看翠連霽空。愁遍征路。東風裏。誰望斷西塞。恨迷南浦。
天涯地角。意不盡。消沉萬古。曾是送別。長亭下。細綠暗烟雨。何處亂紅

鋪繡茵。有醉眠蕩子。拾翠遊女。王孫遠。柳外共殘照。斷雲無語。池塘夢生。謝公後。還能繼否。獨上畫樓。春山暝。鴈飛去。

三臺清明應制

見梨花初帶夜月。海棠半含朝雨。內苑春。不禁過青門。御溝漲。潛通南浦。東風靜。細柳垂金縷。望鳳闕。非烟非霧。好時代。朝朝多歡。徧九陌。太平簫鼓。乍鶯兒百轉。斷續。燕子飛來飛去。近綠水。臺榭映秋千。鬪草聚。雙雙遊女。錫香更。酒冷踏青路。會暗識。天桃朱戶。向晚驟。寶馬雕鞍。醉襟惹。亂花飛絮。正輕寒。輕煖漏永。半陰半晴。雲暮。禁火天。已是試新妝。歲華到。三分佳處。清明看。漢宮傳蠟炬。散翠烟。飛入槐府。斂兵衛。闐闐門開。住傳宣。又還休務。

卓牌兒春晚

東風綠楊天。如畫出。清明院宇。玉豔淡泊。梨花帶月。胭脂零落。海棠經雨。單衣怯黃昏。人正在。珠簾笑語。相並戲蹴秋千。共攜手。同倚闌干。暗香時度。翠窗繡戶。路繚繞。潛通幽處。斷魂凝竚。嗟不似飛絮。閑悶閑愁。難消遣。此日年年意緒。無據。奈酒醒春去。

憶秦娥

天如洗。金波冷浸冰壺裏。冰壺裏。一年得似。此宵能幾。等閑莫把闌干倚。馬蹄去便三千里。三千里。幾重雲岫。幾重烟水。

昭君怨

春到南樓雪盡。驚動燈期花信。小雨一番寒。倚闌干。莫把闌干頻倚。一
望幾重烟水。何處是京華。暮雲遮。

徐伸 字幹臣。三衢人。政和初。以知音律爲太常典樂。出知常州。有青山樂府一卷。

二郎神

悶來彈鵲。又攪碎。一簾花影。謾試著春衫。還思纖手。熏徹金猊燼冷。動是
愁端如何向。但怪得。新來多病。嗟舊日沈腰。而今潘鬢。怎一作不堪臨鏡。
重省。別時淚漬。羅襟猶凝。料爲我厭厭。日高慵起。長託春醒未醒。鴈足
一作翼不來。馬蹄難去。門掩一庭芳景。空佇立。盡日闌干倚遍。晝長人靜。
黃叔暘云。青山詞多雜調。惟二郎神一曲。天下稱之。

卷十 宋詞六十一首

陳克 字子高。臨海人。僑寓金陵。元豐間。以呂安老薦入幕府得官。有赤城詞一卷。

陳質齋云。子高詞格頗高厲。晏周之流亞也。

菩薩蠻

赤欄橋盡香街直。籠街細柳嬌無力。金碧上晴空。花晴簾影紅。黃衫飛
白馬。日日青樓下。醉眼不逢人。午香吹暗塵。

又

綠蕪牆繞青苔院。中庭日淡芭蕉卷。蝴蝶上階飛。風簾自在垂。玉鈎雙
語燕。寶玦楊花轉。幾處簸錢聲。綠窗春夢輕。

謁金門

愁脈脈。目斷江南江北。烟樹重重芳信隔。小樓山幾尺。細草孤雲斜日。一晌弄晴天色。簾外落花飛不得。東風無氣力。

又

花滿院。飛去飛來雙燕。紅雨入簾寒不卷。曉屏山六扇。翠袖玉笙悽斷。

脈脈兩蛾愁淺。消息不知郎近遠。一春長夢見。著舊續聞云。和凝詞。拂水雙飛來去燕。

曲檻小屏山六扇。

又

柳絲碧。柳下人家寒食。鶯語匆匆花寂寂。玉階春藓濕。閑凭薰籠無力。心事有誰知得。檀炷繞窗燈背壁。畫簷殘雨滴。

臨江仙

四海十年兵不解。口塵直到江城。歲華消盡客心驚。疎髯渾似雪。衰涕欲生冰。送老薤鹽何處是。我緣應在吳興。故人相望若為情。別愁深夜雨。孤影小窗燈。

李

祁

字蕭遠。官至尚書郎。宣和間。責監漢陽酒稅。

點絳脣

樓下清歌。水流歌斷春風暮。夢雲烟樹。依約江南路。碧水黃沙。夢到尋梅處。花無數。問花無語。明月隨人去。

朝中措

郎官湖上探春迴。初見照江梅。過盡竹溪流水。無人知道花開。佳人何處。江南夢遠。殊未歸來。喚取小叢教看。隔江烟雨樓臺。

風蝶令

嫋嫋秋風起。蕭蕭敗葉聲。岳陽樓上聽哀箏。樓下淒涼江月。爲誰明。霧雨沉雲夢。烟波渺洞庭。可憐無處問湘靈。只有無情江水。繞孤城。

呂渭老 一作濱老。字聖求。秀州人。宣和末朝士。有詞一卷。

趙師秀云。聖求詞婉媚深窈。視美成耆卿伯仲。

薄倖

青樓春晚。晝寂寂。梳勻又懶。乍聽得。鴉啼鶯弄。惹起新愁無限。記年時。偷擲春心。花間隔霧遙相見。便角枕題詩。寶釵貫酒。共醉青苔深院。怎忘得。迴廊下。攜手處。花明月滿。如今但暮雨。蜂愁蝶恨。小窗閑對芭蕉展。却誰拘管。儘無言。閑品秦箏。淚滿參差鴈。腰肢漸小。心與楊花共遠。

選冠子

雨溼花房。風斜燕子。池閣晝長春晚。檀盤戰象。寶局鋪碁。籌畫未分還懶。誰念少年。齒怯梅酸。病疎霞盞。正青錢遮路。綠絲明水。倦尋歌扇。空記得。小閣題名。紅箋青製。燈火夜深裁剪。明眸似水。妙語如絃。不覺曉霜雞喚。聞道近來。箏譜慵看。金鋪長掩。瘦一枝梅影。回首江南路遠。

念奴嬌贈希文寵姬

暮雲收盡。霽霞明。高擁一輪寒玉。簾影橫斜。房戶靜。小立啼紅簌簌。素鯉

頻傳蕉心微展。雙蕊明紅燭。開門疑是。故人敲撼窗竹。長記那裏西樓。小寒窗靜。盡掩風箏鳴屋。淚眼燈光情未盡。儘覺語長更促。短短霞杯。溫溫羅帕。妙語書裙幅。五湖何日。小舟同泛春綠。

情久長

冰梁跨水沉沉。霽色遮千里。怎向我。小舟孤棹。天外飄墜。夜寒侵短髮。睡不穩。窗外寒風漸起。歲華暮。蟾光射雪。碧瓦飄霜。塵不動。寒無際。雞咽荒郊。夢也無歸計。擁繡枕。斷魂殘魄。清吟無味。想伊睡起。又念遠。樓閣橫枝對倚。待歸去。西窗剪燭。小閣凝香。深翠幙。鏡春睡。

滿路花 同柳仲脩在趙屯

西風晴日短。小雨菊花寒。斷雲低古木。暗江天。星娥尺五。佳約悞當年。小語憑肩處。猶記西園。畫橋斜月闌干。鳥啼花落。春信遣誰傳。尙容清夜夢。小留連。青樓何處。寶鏡注嬋娟。應念紅箋事。微暈春山。背牕愁枕孤眠。

浣溪沙

烟柳濛濛鵲做巢。青青弱草帶斜橋。鶯聲多在杏花梢。逐伴不知春路遠。見人時著小詞招。阿誰有分伴吹簫。

南歌子

策杖穿花圃。登臨嘯晚風。無窮秋色蔽晴空。遙見夕陽江上。捲飛蓬。鴈過菰蒲遠。山遙夢寐通。一林楓葉墮愁紅。歸去暮烟深處。聽疎鐘。

祝英臺近

寶蟾明。朱閣靜。新燕近簾語。還記元宵。燈火小橋路。逢迎春筍柔微。凌波
纖穩。悄不顧。斗斜三鼓。甚無據。誰信一霎春愁。鶯聲留不住。柳色苔痕。
風雨暗花園。細看羅帶銀鈎。綃巾香淚。算不枉。那時分付。

江城子

曉參垂戶宿醒醒。坐南亭。對疎星。點點螢光。偏向竹梢明。望斷長空何處
是。雲葉亂。彩霞橫。西樓依舊抱重城。小銀屏。此時情。鴉陣翻叢。枯柳雨
二三聲。欹枕欲尋初夜夢。雞唱遠。曉蟾傾。

小重山 七夕病中

半夜燈殘鼠上檠。小窗風動竹。月微明。夢魂偏寄水西亭。琅玕碧。花影弄
蜻蜓。千里暮雲平。南樓催上燭。晚來晴。酒闌人散斗西傾。天如水。團扇
撲流螢。

減字木蘭花

雨簾高捲。芳樹陰陰連別館。涼氣侵樓。蕉葉荷枝各自秋。前溪夜舞。化
作驚鴻留不住。愁損腰肢。一桁香消舊舞衣。

江城子慢

新枝媚斜日。花徑霽。晚碧泛紅滴。近寒食。蜂蝶亂。點檢一城春色。倦游客。
門外昏鴉啼。夢破春心似。遊絲飛遠碧。燕子又語斜簷。行雲自沒消息。
當時烏絲夜語。約桃花時候。同醉瑤瑟。甚端的。看看是。榆角楊花飛擲。怎
忘得。斜倚紅樓回淚眼。天如水。沉沉連翠壁。想伊不整啼妝影。簾側。

百宜嬌

隙月垂篔。亂葢催織。秋晚嫩涼房戶。燕拂簾旌。鼠窺窗網。寂寂飛螢來去。金鋪鎖掩。謾記得。花時南浦。約重陽。萸糝菊英。小樓遙夜歌舞。銀燭暗。佳期細數。簾幙漸西風。半窗秋雨。葉底翻紅。水面皺碧。燈火裁縫砧杵。登堂望極。正霧鎖。官槐歸路。定須相將。寶馬鈿車。訪吹簫侶。

夢玉人引

上危梯。望畫閣迴。繡簾垂。曲水飄香。小園鶯喚春歸。舞袖弓彎。正滿城烟草淒迷。結伴踏青。趁蝴蝶雙飛。賞心歡計。從別後。無意到西池。自檢羅囊。要尋紅葉留詩。懶約無憑據。鶯花都不知。怕人問。強開懷。細酌荼蘼。

傾盃令

隔座藏鉤。分曹射覆。燭燄漸催三鼓。箏按教坊新譜。樓外月生春浦。徘徊。徊爭忍忙歸去。怕明朝無情風雨。珍花美酒團坐。且作樽前笑侶。

一落索

蟬帶殘聲移別樹。晚涼房戶。秋風有意染黃花。下幾點。淒涼雨。渺渺雙鴻飛去。亂雲深處。一山紅葉爲誰愁。供不盡。相思句。

西江月慢

春風淡淡。清晝永。落英千尺。桃杏散平郊。晴蜂來往。妙香飄擲。傍畫橋。煮酒青帘。綠楊風外。數聲長笛。記去年。紫陌朱門。花下舊相識。向寶帕。裁書憑燕翼。望翠閣。烟林似織。聞道春衣猶未整。過禁烟寒食。但記取。角枕

題情。東窗休悞。這些三端的。更莫待。青子綠陰春事寂。

趙 企 字循道。大觀中宰績溪。

感皇恩

騎馬踏紅塵。長安重到。人面依然似花好。舊歡纔展。又被新愁分了。未成雲雨夢。巫山曉。千里斷腸。關山古道。回首高城似天杳。滿懷離恨。付與落花啼鳥。故人何處也。青春老。

李持正 字季秉。政和五年進士。歷知德慶南劍潮陽二郡。終朝請大夫。

明月逐人來上元

星河明澹。春來深淺。紅蓮正滿。城開遍。禁街行樂。暗塵香拂面。皓月隨人近遠。天半鰲山。光動鳳樓西觀。東風靜。珠簾不捲。玉輦待歸。雲外聞絃管。認得宮花影轉。蘇子瞻云。好箇皓月隨人近遠。

王 采 字輔道。一云字道輔。韶子。宣和中官侍郎。

玉樓春

秋閨思入江南遠。簾幙低垂閑不捲。玉珂聲斷曉屏空。好夢驚回還起嬾。風輕只覺香烟短。陰重不知天色晚。隔窗人語退朝歸。旋整宿妝勻睡眼。

蝶戀花梨花

縷雪成花檀作蕊。愛伴秋千。搖曳東風裏。翠袖年年寒食淚。爲伊牽惹愁無際。幽豔偏宜春雨細。紅粉闌干。有箇人相似。鈿合金釵誰與寄。丹青

傳得淒涼意。

韓

駒

字子蒼。仙井監人。政和初進士。歷遷中書舍人。兼權直學士院。贈中奉大夫。有陵陽集。

昭君怨雪

昨日樵村漁浦。今日瓊川銀渚。山色捲簾看。老峯巒。錦帳美人貪睡。不覺天孫剪水。驚問是楊花。是蘆花。

徐

積

字仲車。楚州山陽人。中進士第。除揚州司戶參軍。楚州教授。改和州防禦推官。徽宗初立。改宣德郎。卒贈諡節孝處士。有集。

漁父樂

水曲山隈四五家。夕陽烟火隔蘆花。漁唱歇。醉眠斜。綸竿蓑笠是生涯。

何

籀

字子初。信安人。

宴清都

細草沿階軟。遲日薄。惠風輕。靄微暖。春工靳惜。桃英尚小。柳芽猶短。羅幃繡幙高捲。早已是。歌慵笑懶。凭畫樓。那更天遠。山遠水遠人遠。堪怨傳粉疎狂。竊香俊雅。無計拘管。青絲絆馬。紅巾寄羽。甚處迷戀。無言淚珠零亂。翠袖儘。重重漬遍。故要得。別後思量。歸時覩見。

蔣子雲

字元龍。

好事近

葉暗乳鴉啼。風定亂紅猶落。蝴蝶不隨春去。入薰風池閣。休歌金縷勸金卮。酒病煞如昨。簾捲日長人靜。任楊花飄泊。

宋齊愈 字退翁。宣和間爲太學官。按吳會能改齋漫錄稱諫議。

眼兒媚 梅詞應制

霏霏疎影。一作雨。轉征鴻。人語暗香中。小橋斜渡。曲屏深院。水月濛濛。人
間不是藏春處。一作所。玉笛曉霜空。江南處處。黃垂密雨。綠漲薰風。

李 甲 字景元。華亭人。

帝臺春

芳草碧色。萋萋遍南陌。暖絮亂紅。也知人。春愁無力。憶得盈盈拾翠侶。共
攜賞。鳳城寒食。到今來。海角逢春。天涯倦客。愁旋釋。還似織。淚暗拭。又
偷滴。漫倚遍危欄。儘黃昏。也只是暮雲凝碧。拚則而今已拚了。忘則怎生
便忘得。又還問鱗鴻。試重尋消息。

望雲涯引

秋容江上。岸花老。蘋洲白。露溼菡萏。浦嶼漸增寒色。閑漁唱晚。鷺鴈驚飛
處。映遠瀆。數點輕帆。送天際歸客。鳳臺人散。漫回首。沉消息。素鯉無憑。
樓上暮雲凝碧。時向西風下。認遠笛。宋玉悲懷。未信金樽消得。

八寶妝

門掩黃昏。畫堂人寂。暮雨乍收殘暑。簾卷疎星。庭戶悄。隱隱巖城鐘鼓。空
街烟暝半開。斜月朦朧。銀河澄淡。風淒楚。還是鳳樓人遠。桃源無路。惆
悵夜久星繁。碧雲望斷。玉簫聲在何處。念誰伴。茜裙翠袖。共攜手。瑤臺歸
去。對修竹。森森院宇。曲屏香暖。凝沉炷。問對酒當歌。情懷記得劉郎否。

過秦樓

賣酒壚邊。尋芳原上。亂花飛絮悠悠。已蝶稀鶯散。便擬把長繩繫日無由。
 謾道草忘憂也。徒將酒解閑愁。正江南春盡。行人千里。蘋滿汀洲。有翠
 紅徑裏盈盈侶。簇芳茵。禊飲時笑。時謔。當暖風遲景。任相將永日。爛熳狂
 遊。誰信盛狂中。有離情。忽到心頭。向尊前擬問。雙燕來時。曾過秦樓。

夏

倪

字均父。蘄州人。自府曹左官祁陽監酒。

減字木蘭花。宣和庚子登涪臺作。

江涵曉日。蕩漾波光。搖槳入。笑指涪溪。漫叟雄文銷翠微。休嗟不偶。歸
 到中州何處有。獨立風烟。湘水涪臺總接天。

沈會宗

字文伯。

小重山

花過園林清蔭濃。琅玕新脫箏。綠成叢。語一作用聲只在小樓一作他東。閑欹
 枕。敵一作直面芟荷風。長一作斜日蔽簾櫳。輕塵飛不到。畫堂空。一樽今夜
 與誰同。人如玉。相對月明中。

菩薩蠻

落花迤邐層陰少。青梅競弄枝頭小。江色雨和烟。行人江那邊。
 好花都過了。滿地空芳草。落日醉醒間。一春無此寒。

驀山溪

想伊不住。船在藍橋路。別語未甘聽。更忍問。而今是去。門前楊柳。幾日轉

西風將行色。欲留心。忽忽城頭鼓。一番幽會。只覺添愁緒。邂逅却相逢。又還有。此時歡否。臨歧把酒。莫惜十分斟。尊前月。月中人。明夜知何處。

清商怨

城上鴉啼斗轉。漸玉壺冰滿。月淡寒梅。清香來小院。誰遣鸞箋寫怨。翻錦字。疊疊和愁卷。夢破胡笳。江南烟樹遠。

廖世美

好事近

落日水鎔金。天淡暮烟凝碧。樓上誰家紅袖。倚闌干無力。鴛鴦相對浴紅衣。短棹弄長笛。驚起一雙飛去。聽波聲拍拍。

燭影搖紅 安陸浮雲樓

靄靄春空。畫樓森聳凌雲渚。紫薇登覽最關情。絕妙誇能賦。惆悵相思遲暮。記當日。朱欄共語。塞鴻難問。岸柳何窮。別愁紛絮。催促年光。舊來流水知何處。斷腸何必更殘陽。極目傷平楚。晚霽波聲帶雨。悄無人。舟橫野渡。數峯江上。芳草天涯。參差烟樹。

林少瞻

眼兒媚 曉行

霽霞散曉。月猶明。疎木挂殘星。山徑人稀。翠蘿深處。啼鳥兩三聲。霜華重逼雲裘冷。心共馬蹄輕。十里青山。一溪流水。都做許多情。

何大圭 字擢之。廣德軍人。進士。

小重山

綠樹鶯啼春正濃。釵頭清杏小。綠成叢。玉船風動酒鱗紅。歌聲咽。相見幾時重。車馬去匆匆。路隨芳草遠。恨無窮。相思只在夢魂中。今宵月。偏照小樓東。臨朐高取庵云。玉船句如雲錦月鉤。奪造化之巧。

沈公述

念奴嬌

杏花過雨。漸殘紅零落。胭脂顏色。流水飄香人漸遠。難記春心脈脈。恨別王孫。牆陰日斷。手把青梅摘。金鞍何處。綠楊依舊南陌。消散雲雨須臾。多情因甚。有輕離輕拆。燕子千般爭解說。些子伊家消息。厚約深盟。除非重見。見了方端的。而今無奈。寸腸千恨堆積。

魯逸仲

南浦

風悲畫角。聽單于。三弄落譙門。投宿駸駸征騎。飛雪滿孤村。酒市漸闌燈火。正敲窗。亂葉紛紛。送數聲驚鴈。乍離烟水。嘹唳度寒雲。好在半隴淡月。到如今。無處不銷魂。故國梅花歸夢。愁損綠羅裙。爲問暗香閑豔也。相思萬點付啼痕。算翠屏應是。兩眉餘恨倚黃昏。

何 卓

字子縝。一云字文縝。仙井人。政和丙申進士第一。歷官尚書右僕射。兼中書侍郎。死靖康之難。

贈觀文殿大學士。

分香怕子揉藍膩。欲去殷勤惠。重來約在牡丹時。只恐花枝相妒。故開遲。
別來看盡閑桃李。日日闌干倚。催花無計問東風。夢作一雙蝴蝶。繞芳叢。

陳

瓘

字瑩中。延平人。中甲科。建中靖國初。爲右司諫。嘗移書責會布。及言蔡京蔡卞之姦。章疏十上。除名。編隸合浦以死。靖康中。贈諫大夫。紹興中。追贈諡忠肅。有了齋集詞一卷。

滿庭芳

淮葉繽紛。江烟濃淡。別尊同倒寒暄。未逢春信。霜露惹征衣。往事元無是處。何須待。回一作白首。知非。春鶻語。從來勸我。長道不如歸。家山何處近。江樓簾棟。夕捲朝飛。問西江。筍蕨。何似鱸肥。且署一作置華胥舊夢。忘言處。千古同時。君知我。平生心事。相契古來希。

王安中

字履道。曲陽人。進士及第。宣和中。累官翰林學士承旨。尚書左丞。金人來歸燕。授慶遠軍節度使。河北河南燕山府路宣撫使。加少師。郭藥師將叛。求罷召還。靖康初。安置象州。紹興初。復左中大夫。有初寮集詞一卷。

玉樓春

秋鴻只向秦箏住。終寄青樓書不去。手因春夢有攜時。眼到花開無著處。泥金小字回文句。翠袖紅裙今在否。欲尋巫峽舊時雲。問取高唐臺畔路。

一落索

塞柳未傳春信。霜花侵鬢。送君西去。指秦關。看日近。長安近。玉帳同時

英俊。合離無定。路逢新鴈北飛來。寄一字。燕山問。

清平樂 和晁侔

花時微雨。未減春分數。占取簾疎花密處。把酒聽歌金縷。斜風輕度濃香。閑情正與春長。向晚紅燈入坐。嘗新青杏隨觴。

洞仙歌

深庭夜寂。但涼蟾如畫。鵲起高槐露華透。聽曲樓玉管吹徹伊州。金釧響。軋軋朱扉暗叩。迎人巧笑道。好箇今宵。怎不相尋暫攜手。見淡淨晚妝殘。對月偏宜。多情更越饒纖瘦。早促分飛。霎時休。便恰似陽臺夢雲歸後。

楊

适

字時可。隸州人。舉進士。為尚書比部員外郎。

南柯子 送淮漕向伯恭

怨草迷南浦。愁花傍短亭。有情歌酒莫催行。看取無情花草也關情。舊日臨歧曲。而今忍淚聽。淮山何在暮雲平。待倩春風吹夢過江城。

方

喬

樂至人。

生查子 贈紫竹

晨鶯不住啼。故喚愁人起。無力曉妝慵。閑弄荷錢水。欲呼女伴來。鬪草花陰裏。嬌極不成狂。更向屏山倚。

李

玉

賀新郎

篆縷消金鼎。醉沉沉。庭陰轉午。畫堂人靜。芳草王孫知何處。惟有楊花糝

徑。漸玉枕。騰騰春醒。簾外殘紅春已透。鎮無聊。殢酒厭厭病。雲鬢亂。未忺整。江南舊事休重省。遍天涯。尋消問息。斷鴻難倩。月滿西樓憑欄久。依舊歸期未定。又只恐。鉗沉金井。嘶騎不來銀燭暗。枉教人。立盡梧桐影。誰伴我。對鸞鏡。黃叔暘云。李君詞雖不多見。然風流蘊藉。盡此篇矣。

波子山 宿州獄掾。

剔銀燈。途次南京憶營妓張溫卿。

一夜隋河風勁。霜混水天如鏡。古柳隄長。寒烟不起。波上月無流影。那堪懶聽。疎星外。離鴻相應。須信情多是病。酒到愁腸還醒。數疊羅衾。餘香未減。甚時枕鴛重並。教伊須更。將蘭約。見時先定。

謝克家 字任伯。官參政。

憶君王。徽宗北行作此。

依依宮柳拂宮牆。樓殿無人春晝長。燕子歸來依舊忙。憶君王。月照黃昏人斷腸。避戎夜話云。淵聖幸口營不返。謝元及作此詞。鼠璞云。語意悲涼。讀之使人墮淚。真憂君憂國之語。

卷十一 宋詞六十四首

向子諲

字伯恭。臨江人。敏中玄孫。以欽聖憲肅皇后從姪。恩補假承奉郎。建炎初。遷直龍圖閣。江淮發運副使。為黃潛善所斥。尋起知潭州。累遷戶部侍郎。自號薊林居士。有酒邊集四卷。胡致堂云。薊林居士步趨蘇堂。而躋其轍者也。

如夢令

午夜涼生翠幔。簾外行雲撩亂。可恨白蘋風。欲雨又還吹散。腸斷腸斷。楚夢驚殘一半。

生查子

近似月當懷。遠似花藏霧。好是月明時。同醉花深處。看花不自持。對月空相顧。願學月頻圓。莫作花飛去。

又

娟娟月入眉。整整雲歸鬢。鏡裏弄妝遲。簾外風移影。斜窺秋水長。軟語春鶯近。無計奈情何。只有相思分。

鷓鴣天

說著分飛百種猜。泥人細數幾時回。風流可慣長孤冷。懷抱如何得好開。垂玉筍。下香階。並肩小語更兜鞵。再三莫遣歸期誤。第一頻教入夢來。

梅花引 戲代李師周作

花如頰。梅如葉。小時笑弄堦前月。最盈盈。最惺惺。閑愁未識。無計說深情。一年空省春風面。花落花開不相見。要相逢。得相逢。須信靈犀。中自有心通。同杯杓。同斟酌。千愁一醉都忘却。花陰邊。柳陰邊。幾回擬待。偷憐不成憐。傷春玉瘦慵梳掠。拋擲琵琶閑處著。莫猜疑。莫嫌遲。鴛鴦翡翠。終是一雙飛。

虞美人 宣和辛丑

去年雪滿長安樹。望斷揚州路。今年看雪在揚州。人在蓬萊深處若爲愁。

而今不恨伊相誤。自恨來何暮。平山堂下舊嬉游。只有舞春楊柳自風流。

帶人嬌席上贈侍人輕輕

白似雪花柔於柳絮。蝴蝶兒。鎮長一處。春風駘蕩。驀然吹去。爭得倩。游絲半空惹住。波上精神。掌中態度。分明是。彩雲團做。當年飛燕。從今不數。只恐是。高唐夢中神女。

南歌子

柳眼風前動。梅心雪後寒。年華渾似霧中看。報答風光無處。可爲歡。一曲聊收淚。三杯強自寬。新愁不耐上眉端。怕見長安歸路。懶凭欄。

又

碧落飛明鏡。晴烟羃遠山。扁舟夜下廣陵灘。照我白蘋紅蓼。一盃殘。初望同盟飲。如何兩處看。遙知香霧濕雲鬟。凭喚瓊樓十二。曲闌干。

蔡

伸

字伸道。莆田人。襄之孫。宣和中官彭城倅。歷左中大夫。有友古詞一卷。

水調歌頭用盧贊元韻別彭城

醉擊玉壺缺。恨寫綠琴哀。悠悠往事誰問。離思渺難裁。綠野堂前桃李。燕子樓中歌吹。那忍首重回。唯有舊時月。遠遠逐人來。小庭空。清夜永。獨徘徊。伴人幽怨。一枝瀟灑隴頭梅。心斷雲帆西去。目送烟波東注。千里接長淮。爲我將雙淚。好過楚王臺。

滿庭芳

烟鎖長堤。雲橫孤嶼。斷橋流水溶溶。凭欄凝望。遠目送征鴻。桃葉蹊邊舊事。如春夢。回首無踪。難忘處。薔薇花下。清夜一樽同。城東攜手地。尋芳選勝。賞徧珍叢。念紫簫聲闕。燕子樓空。好是盧郎未老。佳期在。端有相逢。重重恨。聊憑紅葉。和淚寄西風。

蘇武慢

鴈落平沙。烟籠寒水。古壘鳴笳聲斷。青山隱隱。敗葉蕭蕭。天際暝鴉零亂。樓上黃昏。片帆千里歸程。年華將晚。望碧雲空暮。佳人何處。夢魂俱遠。憶舊游。邃館朱扉。小園香徑。尙想桃花人面。書盈錦軸。恨滿金徽。難寫寸心幽怨。兩地離愁。一樽芳酒淒涼。危欄倚遍。儘遲留。憑仗西風。吹乾淚眼。

飛雪滿羣山

冰結金壺。寒生羅幙。夜闌霜月侵門。翠筠敲韻。疎梅弄影。數聲鴈過南雲。酒醒欹絮枕。愴然猶有。殘妝淚痕。繡被孤擁。餘香未減。猶是那時薰。長記得。扁舟尋舊約。聽小窗風雨。燈火黃昏。錦茵纔展。瓊籤報曙。寶釵又是輕分。黯然攜手處。倚朱箔。愁凝黛顰。夢回雲散。山遙水遠。空斷魂。

虞美人

瑤琴一弄清商怨。樓外桐陰轉。月華淡淡露華濃。寂寞小池烟水冷芙蓉。攀花擷翠當時事。綠葉同心字。有情還解憶人無。過盡寒沙新鴈甚無書。

南鄉子 宣和壬寅予與向伯恭俱爲大樽屬官向有詞云憑書續斷腸因爲此詞

木落鴈南翔。錦鯉殷勤爲渡江。淚墨銀鈎相憶字。成行。滴損雲箋小鳳凰。
陳事費思量。回首烟波卷夕陽。儘道憑書聊破恨。難忘。及至書來更斷腸。

洞仙歌

鶯鶯燕燕。本是于飛伴。風月佳時阻幽願。但人心堅固後。天也憐人。相逢處。依舊桃花人面。綠窗攜手乍。簾幙重重。燭影搖紅夜將半。對樽前如夢。欲語魂驚。語未竟。已覺衣襟淚滿。我只爲相思特特來。這度更休推。後回相見。

七娘子

天涯觸目傷離緒。登臨况值秋光暮。手撚黃花。憑誰分付。離離鴈落蒹葭浦。凭高目斷桃溪路。屏山樓外青無數。綠水紅橋。鎖窗朱戶。如今總是銷魂處。

侍香金童

寶馬行春。緩轡隨油壁。念一瞬韶光堪重惜。還是去年同醉日。客裏情懷。倍添淒惻。記南城錦徑名園會。遍歷更柳下。人家似織。此際凭欄愁脈脈。滿目江山。暮雲空碧。

蒼梧謠

天休使圓蟾照客眠。人何在。桂影自嬋娟。

點絳脣登歷陽連雲觀

水繞孤城。亂山深鎖。橫江路。帆歸別浦。冉冉蘭皋暮。人在天涯。鴈背南雲去。空凝竚。鳳樓何處。烟靄迷津渡。

又

人面桃花。去年今日津亭見。瑤琴錦薦。一弄清商怨。今日重來。不見如花面。空腸斷。亂紅千片。流水天涯遠。

王庭珪

字民瞻。廬陵人。政和八年進士。為國子監主簿。晚直敷文閣。有廬溪集詞二卷。

點絳脣

花外紅樓。當時青鬢顏如玉。淡烟殘燭。醉入花間宿。白髮相逢。猶唱當時曲。當時曲。斷絃難續。且盡杯中醪。

又上元鼓子詞

玉漏春遲。鐵關金鎖。星橋夜。暗塵隨馬。明月應無價。天半朱樓。銀漢星光射。更深也。翠蛾如畫。猶在涼蟾下。

感皇恩

一葉下西風。寒生南浦。椎鼓鳴撓送君去。長亭把酒。卻倩阿誰留住。樽前人似玉。能留否。醉中暫聽。離歌幾許。聽不能終淚如雨。無情江水。斷送扁舟何處。歸時烟浪捲。朱簾暮。

葉夢得

字少蘊。吳縣人。紹聖四年進士。累遷翰林學士。兼侍讀。除戶部尚書。以崇信軍節度使致仕。贈

檢校少保。有建康集。石林詞一卷。

關子東云。葉公妙齡詞甚婉麗。晚歲落其華而實之。能於簡淡時出雄傑。合處不減東坡。

賀新郎

睡起啼鶯語。掩蒼苔。房櫳向晚。亂紅無數。吹盡殘花無人見。惟有垂楊自舞。漸暝靄。初回輕暑。寶扇重尋明月影。暗塵侵。上有乘鸞女。驚舊恨。遽如許。江南夢斷橫江渚。浪黏天。葡萄漲綠。半空烟雨。無限樓前滄波意。誰採蘋花寄取。但悵望。蘭舟容與。萬里雲飄何時到。送孤鴻。目斷千山阻。誰爲我。唱金縷。

菩薩蠻 湖光亭晚景

平波不盡蒹葭遠。清霜半落沙痕淺。烟樹晚微茫。孤鴻下夕陽。梅花消息近。試向南枝問。記得水邊春。江南別後人。

水調歌頭 九月望日與客習射西園予病不能射

霜降碧天靜。秋事促西風。寒聲隱地初聽。中夜入梧桐。起瞰高城四顧。寥落關河千里。一醉與君同。疊鼓鬧清曉。飛騎引雕弓。歲將晚。客爭笑。問衰翁。平生豪氣安在。走馬爲誰雄。何似當筵虎士。揮手弦聲響處。雙鴈落遙空。老矣真堪惜。回首望雲中。

王之道

字彥猷。儒須人。宣和六年進士。歷朝奉大夫。有相山居士詞二卷。

如夢令 江上對雨

一晌凝情無語。手撚梅花何處。倚竹不勝愁。暗想江頭歸路。東去東去。短艇淡烟疎雨。

向 鎬

字豐之。河內人。有樂齋詞二卷。

南歌子

路盡湘江水。人行瘴霧間。昏昏西日度巖關。天外一簪初見嶺南山。北
鴈連書斷。新霜點鬢斑。此行休問幾時還。準擬桂林佳處過春殘。

如夢令 次韻邢子文

夢斷綠窗鶯語。消遣客愁無處。小檻俯青郊。恨滿楚江南路。歸去歸去。花
落一川烟雨。

又書弋陽樓

樓上千峯翠巘。樓下一灣清淺。寶簾酒醒時。枕上月華如練。留戀留戀。明
日水村烟岸。

沈瀛 字子壽。吳興人。有竹齋詞一卷。

葉水心云。子壽少入太學。仕四十餘年。繼于王官。再入郡。二佐帥幕。其平生業。嗜文字。若性命在身。非外物也。

念奴嬌

郊原浩蕩。正奪日花光。動人春色。白下長干佳麗最。寒食嬉游人物。露卷
香輪。風嘶寶騎。雲表歌聲遏。歸來燈火。不知斗柄西揭。六代當日繁華。
幕天席地。醉拍江流窄。游女人人爭唱道。緩緩踏青阡陌。樂事何窮。賞心
無限。可惜年光迫。須臾聚散。人生真信如客。

李邴 字漢老。任城人。崇寧五年進士第。紹興初。參知政事。授資政殿學士。卒。謚文敏。有雲龕草堂集。

洞仙歌柳花

一團熾軟。是將春採做。撩亂隨風到何處。自長亭人去後。烟草萋迷。歸未定。裝點離愁無數。飄揚無箇事。剛被縈牽。長是黃昏怕微雨。記那回深院。靜簾幕低垂。花陰下。霎時留住。又只恐伊家忒疎狂。更驀地和春帶將歸去。

漢宮春

瀟灑江梅。向竹梢疎處。橫兩三枝。東風也不愛惜。雪壓霜欺。無情燕子。怕春寒。輕失花期。惟是有。南來塞鴈。年年長見開時。清淺小溪如練。問玉堂何似。茅舍疎籬。傷心故人去後。冷落新詩。微雲淡月。對孤芳。分付他誰。空自倚。清香未減。風流不在人知。王仲言云。漢老少日作漢宮春詞。膾炙人口。所謂問玉堂何似茅舍疎籬是也。政和間。自王省丁憂歸山東。服終造朝。舉國無與談者。方偃偃無計。時王黼爲首相。忽遣人招至東閣開宴。出其家姬十數人。酒半。唱是詞侑觴。大醉而歸。數日。遂有館閣之命。

玉樓春美人書字

沉吟不語晴窗畔。小字銀鈎題欲遍。雲情散亂未成篇。花骨敲斜終帶軟。重重說盡情和怨。珍重提攜常在眼。暫時得近玉纖纖。翻羨鏤金紅象管。

劉 昇

字偉明。廬陵人。登元豐進士第。繼中博學宏詞科。有龍雲集。

惜雙雙令

風外橘花香暗度。飛絮綰。殘春歸去。醞造黃梅雨。冷煙曉占橫塘路。翠屏人在天低處。驚夢斷。行雲無據。此恨憑誰訴。恁時卻倩危絃語。

清平樂

東風依舊。著意隨堤柳。搓得鵝兒黃欲就。天氣清明時候。一作厥勾
 紫陌青門。今朝雨魄雲魂。斷送一生憔悴。能消一作知他幾箇黃昏。去年

汪

藻

字彥章。婺源人。進士第。歷官中書舍人。兼直學士院。擢給事中。遷兵部侍郎兼侍講。拜翰林學士。有浮溪集。

小重山

月下潮生紅蓼汀。殘霞都斂盡。四山青。柳梢風急。墮流螢。隨波去。點點亂
 寒星。別語寄丁寧。如今能間隔。幾長亭。夜來秋氣入銀屏。梧桐雨。還恨
 不同聽。

點絳脣

永夜厭厭。畫檐低月。山銜斗。起來搔首。梅影橫窗瘦。好箇霜天。閑卻傳
 杯手。君知否。曉鴉啼後。歸夢濃於酒。能改齋漫錄云。彥章在翰苑。屢致言者作此詞。或問曰。歸夢濃於酒。何以在曉鴉啼後。公曰。無奈這一隊畜生何。按曉鴉。草堂改作亂鴉。歸夢。改作歸興。便少意味。今從吳虎臣能改齋漫錄正之。

曾

紆

字公卷。南豐人。布之子。為司農少卿。直寶文閣。知衢州。有空青集。

菩薩蠻 月夜

山光冷浸清溪底。溪光直到柴門裏。臥對白蘋洲。敲眠數釣舟。
 溪山無限好。恨不相逢早。老病獨醒多。如斯良夜何。

徐

俯

字師川。分寧人。由通直郎歷進右諫議大夫。紹興初。賜進士出身。累擢端明殿學士。簽書樞密

院事。權參知政事。有東湖集。

卜算子

天生一作胸中百種愁。挂在斜陽樹。綠葉陰陰占得春。草滿鶯啼處。不見

凌波步。空憶如簧語。柳外重重疊疊山。遮不斷愁來路。

趙師俠

一作使。字介之。沐人。燕王德昭七世孫。舉進士。有坦菴長短句一卷。

尹先之云。坦菴先生詞章。摹寫風景。體狀物態。俱極精巧。初不知其得之之易。又云。先生為文。如泉出不擇地。

謁金門 驪崗送陸尉

沙畔路。記得舊時行處。藹藹疎煙迷遠樹。野航橫不渡。竹裏疎花梅吐。

照眼一川鷗鷺。家在清江江上住。水流愁不去。

陳與義

字去非。季常孫。本蜀人。後徙居河南葉縣。政和中。登上舍甲科。紹興中。拜翰林學士。知制誥。參

知政事。有簡齋集無住詞一卷。

黃叔暘云。去非詞雖不多。語意超絕。識者謂可摩坡仙之壘。

虞美人 祖席醉中

張帆欲去仍搔首。更醉君家酒。吟詩日日待春風。及至桃花開後却匆匆。

歌聲頻為行人咽。記著樽前雪。明朝酒醒大江流。滿載一船離恨向衡

州。

臨江仙

憶昔午橋橋上飲。坐中都是豪英。長溝流月去無聲。杏花疎影裏。吹笛到天明。

二十餘年成一夢。此身雖在堪驚。閑登小閣眺新晴。古今多少事。

漁唱起三更。張叔夏云。真是自然而然。胡仔云。情婉奇麗。簡齋詞惟此最優。

劉一止。字行簡。歸安人。宣和二年進士。紹興中官監察御史。累遷給事中。以直學士致仕。有茗溪詞一卷。

洞仙歌梅

細風輕霧。鎖山城清曉。冷蕊疎枝為誰好。對斜橋孤驛。流水濺濺。無限意。清影徘徊自照。何郎空立馬。惱亂餘香。綺思憑花更娟妙。腸斷處。天涯路遠音稀。行人怨。角聲吹老。歎客裏。經春又二三年。向月地雲堦。負伊多少。

夜行船

十頃疎梅開半就。折芳條。嫩香滿袖。今度何郎。樽前疑怪。花共人俱瘦。測測輕寒吹散酒。高城近。怕聽更漏。可惜溪橋。月明風露。長是人歸後。

清平樂

相望吳楚。遠信無憑據。欲倩春風吹淚去。化作愁雲恨雨。春應已到三吳。楚江日夜東徂。唯有泝流魚上。不知尺素來無。

青玉案

小山遮斷藍橋路。恨短夢難飛去。長記脩眉縈曲度。約花開檻。映風招袖。總是憐渠處。追歡我已傷遲暮。猶有多情舊時句。極目高樓千尺許。竹枝三唱。為君淒斷。東日西邊雨。

夢橫塘

浪痕經雨。鬢影吹寒。晚來無限蕭瑟。野色分橋。剪不斷。前溪風物。船繫朱

藤路迷烟寺。遠鷗浮沒。聽疎鐘斷鼓。似近還遙。驚心事。傷羈客。新醅旋
壓鵝黃。拚清愁在眼。酒病縈骨。繡閣嬌慵。爭解說。短封傳憶。念誰伴。塗妝
縮髻。嚼蕊吹花弄秋色。恨對南雲。此時淒斷。有何人知得。

喜遷鶯

曉光催角。聽宿鳥未驚。鄰雞先覺。迤邐烟村。馬嘶人起。殘月尚穿林薄。淚
痕帶霜微凝。酒力衝寒猶弱。歎倦客。悄不禁重染。風塵京洛。追念人別
後。心事萬重。難覓孤鴻託。翠幌嬌深。曲屏香暖。爭念歲寒飄泊。怨月恨花。
須不是。不會經著。這情味。望一成消滅。新來還惡。陳質齋云。行簡是詞。感傳京師。號

劉曉行。

趙長卿

自號仙源居士。南豐宗室。有惜香樂府十卷。

臨江仙

春事猶餘十日。吳蠶早已三眠。多情忍對落花前。酴醿飄暎雪。荷葉媚晴
天。香淡無心浸酒。綠浮可意邀船。時光堪恨也堪憐。單衣三月暮。歌扇
一番圓。

又

過盡征鴻來盡鴈。故園消息茫然。一春憔悴有誰憐。懷家寒食夜。中酒落花天。
見說江頭春浪渺。殷勤欲送歸船。別來此處最縈牽。短篷南浦雨。
疎柳斷橋烟。

更漏子

燭消紅窗送白。冷落一衾寒色。鴉喚起。馬馱行。月來衣上明。酒香脣。妝印臂。憶共箇人春睡。魂蝶亂。夢鸞孤。知他睡也無。

浪淘沙

綠樹嚙鳴禽。已是春深。楊花庭院日陰陰。簾外飛來雙語燕。不寄歸音。舊事嬾追尋。空惹芳心。天涯消息遠沉沉。記得年時中酒後。直至而今。

卜算子

春水滿江南。三月多芳草。幽鳥銜將遠恨來。一一都啼了。不學鴛鴦老。回首臨平道。人道長眉似遠山。山不似長眉好。

虞美人

雨聲破曉催行槳。拍拍谿流長。綠楊遶岸水痕斜。恰似畫橋西畔那人家。人家樓閣臨江渚。應是停歌舞。珠簾整日不開鈎。目斷征帆猶未識歸舟。

畫堂春 長新亭

小亭烟柳水溶溶。野花白白紅紅。惱人池上晚來風。吹損春容。又是清明時候。憔悴損、春風。那堪飄風递冷。故遣度幕穿窗。似欲教新燕。定教春雪，又見飛花。又是清

菩薩蠻

隔江一帶春山好。平林新綠春光老。休去倚闌干。飛紅不忍看。東流何處去。便是歸舟路。芳草外斜陽。行人更斷腸。

朝中措

亂山疊疊水泠泠。南北短長亭。客路如天杳杳。歸心特地寧寧。春光荏苒。花期冷落。酒伴飄零。柳一作鬢影黃邊漸綠。燒痕黑處重青。

王灼 字晦叔。遂寧人。有頤堂詞。

長相思

來匆匆。去匆匆。短夢無憑春又空。難隨郎馬蹤。山重重。水重重。飛絮流雲西復東。音書何處通。

清平樂

墜紅飄絮。收拾春歸去。長恨春歸無覓處。心事欲誰分付。盧家小苑回塘。于飛多少鴛鴦。縱使東牆隔斷。莫愁應念王昌。

張綱 字彥正。金壇人。政和四年。賜上舍及第。釋褐授承事郎。徽宗以綱二中首選。特除太學官。紹興

中參知政事。

好事近

梅柳約東風。迎臘暗傳消息。粉面翠眉偷笑。似欣逢佳客。晚來歌管破餘寒。沉烟裊輕碧。老去不禁卮酒。奈樽前春色。

王十朋 字龜齡。樂清人。由太學廷對擢第一。除著作郎。遷大宗正丞。累遷國子司業。陞侍講。歷四郡守。

除侍御史。以龍圖閣學士致仕。謚忠文。有梅溪集。

點絳脣

野態芳姿。枝頭占得春長久。怕鈎衣袖。不放攀花手。試問東風。花似當時否。還依舊。謫仙去後。風月今誰有。

陳濟翁

驀山溪

去年今日。從駕游西苑。彩仗壓金坡。看水戲。魚龍曼衍。寶津南殿。宴坐近天顏。金杯酒。君王勸。頭上宮花顫。六軍錦繡。萬騎穿楊箭。日暮翠華歸。擁鈞天。笙歌一片。如今關外。千里未歸人。前山雨。西樓晚。望斷思君眼。

卷十一 宋詞六十二首

趙鼎

字元鎮。聞喜人。崇寧初進士。累官尚書左僕射。同中書門下平章事。兼樞密使。卒贈太傅。諡忠簡。追封豐國公。有得全居士集詞一卷。

黃叔暘云。趙公中興名相。詞章婉媚。不減花間。

蝶戀花

盡日東風吹綠樹。向晚輕寒。數點催花雨。年少淒涼天付與。更堪春思繁離緒。臨水高樓攜酒處。會倚哀絃。歌斷黃金縷。樓下水流何處去。凭欄目送蒼烟暮。

點絳脣

香冷金爐。夢回鴛帳餘香嫩。更無人問。一枕江南恨。消瘦休文。頓覺春衫褪。倩明近。杏花吹盡。薄暮東風緊。

又

惜別傷離。此生此念無重數。故人何處。還送春歸去。美酒一杯。誰解歌

金縷無情緒。淡烟疎雨。花落空庭暮。

滿江紅丁未九日南渡泊舟儀真江口

慘結秋陰。西風送。絲絲雨濕。凝望眼。征鴻幾字。暈投沙磧。欲問鄉關何處是。水雲浩蕩連南北。但脩眉。一抹有無中。遙山色。江上路。天涯客。腸已斷。頭應白。空搔首與歎。暮年離隔。欲待忘憂除是酒。奈酒行有盡愁無極。便挽將。江水入尊壘。澆胸臆。

岳

飛

字鵬舉。湯陰人。累官少保。樞副密使。封國公。謚武穆。追贈鄂王。

小重山

昨夜寒蛩不住鳴。驚回千里夢。已三更。起來獨自繞階行。人悄悄。簾外月朧明。白首爲功名。舊山松竹老。阻歸程。欲將心事付瑤琴。知音少。絃斷有誰聽。

李彌遜

字似之。吳縣人。大觀初登第。遷起居郎。試中書舍人。再試戶部侍郎。以爭和議忤秦檜。乞歸田。隱連江西山。有筠溪集。

菩薩蠻

江城烽火連三月。不堪對酒長亭別。休作斷腸聲。老來無淚傾。風高帆影疾。日送舟痕碧。錦字幾時來。薰風無鴈回。

朱

翌

字新仲。龍舒人。政和中進士。歷官中書待制。有鸞山集。

點絳脣梅

流水泠泠。斷橋橫路梅枝亞。雪花飛下。渾似江南畫。白壁青錢。欲買春

無價。歸來也。風吹平野。一點香隨馬。

張元幹 字仲宗。長樂人。紹興中。坐送胡銓及寄李綱詞除名。有歸來集。蘆川詞一卷。

賀新郎 送胡邦衡待制赴新州

夢繞神州路。悵秋風。連營畫角。故宮離黍。底事崑崙傾砥柱。九地黃流亂注。聚萬落。千村狐兔。天意從來高難問。況人情。易老悲難訴。更南浦。送君去。涼生岸柳摧殘暑。耿斜河。疎星淡月。斷雲微度。萬里江山知何處。回首對牀夜語。鴈不到。書成誰與。日盡青天懷今古。肯兒曹。恩怨相爾汝。舉大白。聽金縷。

石州慢

寒水依痕。春意漸回。沙際烟闊。溪梅晴照。生香冷。蕊數枝爭發。天涯舊恨。試看幾許消魂。長亭門外。山重疊。不盡眼中青。是愁來時節。情切。畫樓深閉。想見東風。暗消肌雪。辜負枕前。雲雨樽前花月。心期切處。更有多少淒涼。殷勤留與。歸時說。到得再相逢。恰經年離別。

柳梢青

海山浮碧。細雨絲風。新愁如織。慵試春衫。不禁宿酒。天涯寒食。歸期莫數芳辰。誤幾度。回廊夜色。入戶飛花。隔簾雙燕。有誰知得。

點絳脣 秋社前一日溪光亭大雨作

山暗秋雲。暝鴉接翅啼榕樹。故人何處。一夜溪亭雨。夢入新涼。只道消殘暑。還知否。燕將雛去。又是流年度。

又

春曉輕雷。采蘋洲上。清明雨。亂雲遮樹。黯澹江村路。今夜歸舟。綠潤紅香處。遙山暮。畫樓何許。喚取潮回去。

又呈洛濱筠溪二老

清夜沉沉。暗蛩啼處。簷花落。乍涼簾幕。香繞屏山角。堪恨歸鳩。情似秋雲薄。書難託。儘教寂寞。忘了前時約。

怨王孫

霽雨天迥。平林烟暝。燈閃江沙。水生釣艇。樓外暗柳誰家。亂昏鴉。相思怪得今番甚。寒食近。小硯魚箋信。屏山半掩。微醉獨倚闌干。恨春寒。

清平樂

明珠翠羽。小綰同心縷。好去吳淞江上路。寄與雙魚尺素。蘭橈飛取歸來。愁眉待得伊開。相見嫣然一笑。眼波先入郎懷。

洪皓

字光弼。樂平人。第進士。建炎中。以徽猷閣待制假禮部尚書。為通問使。還除徽猷閣直學士。提舉萬壽觀。兼權直學士院。忤秦檜。責濠州團練副使。安置英州。後徙袁州。卒諡忠宣。

江梅引

天涯除館憶江梅。幾枝開。使南來。還帶餘杭春信到燕臺。準擬寒英聊慰遠。隔山水。應銷落。赴愬誰。空恁遐想笑摘蘂。斷回腸。思故里。謾彈綠綺。引三弄。不覺魂飛。更聽胡笳哀怨淚沾衣。亂插繁華須異日。待孤調。怕東風。一夜吹。

呂本中 字居仁。口口口公著曾孫。好問子。授承務郎。紹興六年賜進士。累遷中書舍人。兼權直學士院。

秦檜諷御史劾罷之。提舉太平觀。卒諡文靖。有東萊集。

南歌子

驛路侵斜月。溪橋度曉霜。短籬殘菊一枝黃。正是亂山深處。過重陽。旅
枕原無夢。寒更每自長。只言江左好風光。不道中原歸思。轉淒涼。

減字木蘭花

去年今夜。同醉月明花樹下。今夜江邊。月暗長隄柳暗船。故人何處。帶
我離愁江外去。來歲花前。還似今年憶去年。

清平樂柳花

柳塘新漲。艇子操雙槳。閑倚曲樓成悵望。是處春愁一樣。傍人幾點飛
花。夕陽又送栖鴉。試問畫樓西畔。暮雲恐近天涯。

鄧

肅

字志宏。延平人。高宗朝官左正言。所著有棋欄集詞一卷。

南歌子

雲繞風前鬢。春開鏡裏妝。鳳屏清晝裊龍香。淺畫蛾眉新樣。遠山長。比
翼會同夢。雙魚隔異鄉。玉樓依舊暗垂楊。樓下落花流水。自斜陽。

長相思

一重溪。兩重溪。溪轉山回路欲迷。朱欄出翠微。梅花飛。雪花飛。醉臥幽
亭不掩扉。冷香尋夢歸。

生查子

執手兩潸然。情極都無語。去馬更匆匆。一息迷回顧。孤館得村醪。一醉

空離緒。酒醒卻無人。簾外三更雨。

劉子翬 字彥沖。崇安人。以父幹任授承務郎。通判興化軍。辭歸武彞山。學者稱為屏山先生。有屏山集。

驀山溪 九日

浮烟冷雨。此日還重九。秋去又秋來。但黃花。年年依舊。平臺戲馬。無處問南徐。茅舍小。竹籬疎。兀坐空搔首。客來何有。草草三杯酒。一醉萬緣空。休貪他。金印如斗。病翁老矣。誰共賦歸歎。芟隴麥。網溪魚。未落他人後。

張

掄

字才甫。南渡故老。有蓮社詞一卷。

霜天曉角

曉風搖幕。敲枕聞殘角。霜月到窗寒影。金猊冷。翠衾薄。舊恨無處著。新愁還又作。夜夜單于聲裏。燈花共。珠淚落。

朱敦儒

字希真。一作希直。洛陽人。以薦起。賜進士出身。為祕書省正字。兼兵部郎官。遷兩浙東路提點

刑獄。上疏乞歸。居嘉禾。晚除鴻臚少卿。有樵歌三卷。

張正大云。希真賦月詞。插天翠柳。被何人推上一輪明月。自是豪放。賦梅引橫枝銷瘦。一如無。

但空裏疎花數點。語意奇絕。如不食烟火語。汪叔耕云。希真詞多塵外之想。雖雜以微塵。而

其情氣自不可沒。黃叔暘云。希真東都名士。詞章擅名。天資曠遠。有神仙風致。

念奴嬌

別離情緒。奈一番好景。一番悲戚。燕語鶯啼人乍遠。還是他鄉寒食。桃李無言。不堪攀折。總是風流客。東君也自。怪人冷淡踪跡。花豔草草春工。

酒隨花意薄。疎狂何益。除卻清風并皓月。脈脈此情誰識。料得文君重簾不卷。且等閑消息。不如歸去。受他真個憐惜。

朝中措

當年挾彈五陵間。行處萬人看。雪獵星飛羽箭。春遊花簇雕鞍。飄零到此。天涯倦客。海上蒼顏。多謝江南蘇小。尊前怪我青衫。

十二時

連雲衰草。連天晚照。連山紅葉。西風正搖落。更前溪嗚咽。燕去鴻歸音信絕。問黃花。又共誰折。征人最愁處。送寒衣時節。

好事近

春雨細如塵。樓外柳絲黃濕。風約繡簾斜去。透窗紗寒碧。美人慵剪上元燈。彈淚倚瑤瑟。卻卜紫姑香火。問遼東消息。

又漁父

搖首出紅塵。醒醉更無時節。生計綠簑青笠。慣披霜衝雪。晚來風定釣絲閑。上下是新月。千里水天一色。看孤鴻明滅。

又

漁父長身來。只共釣竿相識。隨意轉船回棹。似飛空無跡。蘆花開落任浮生。長醉是良策。昨夜一江風雨。都不曾聽得。

又

撥轉釣魚船。江海儘爲吾宅。恰向洞庭沽酒。卻錢塘橫笛。醉顏禁冷更

添紅。潮落下前磧。經過子陵灘畔。得梅花消息。

又

短棹釣船輕。江上晚烟籠碧。塞鴈海鷗分路。占江天秋色。錦鱗撥刺滿籃魚。取酒價相敵。風順片帆歸去。有何人留得。

又

失卻故山雲。索手指空爲客。蓴菜鱸魚留我。住鴛鴦湖側。偶然添酒舊葫蘆。小醉度朝夕。吹笛月波樓下。有何人相識。

點絳脣

客夢初回。臥聽吳語開帆索。護霜雲薄。淡淡芙蓉落。畫舫無情。人去天涯角。思量著。翠蟬金雀。別後新梳掠。

雙鷓鴣

拂破秋江烟碧。一對雙飛鷓鴣。應是遠來無力。稍下相偎沙磧。小管誰吹橫笛。驚起不知消息。悔不當時描得。如今何處尋覓。

相見歡

金陵城上西樓。倚清秋。萬里夕陽垂地。大江流。中原亂。簪纓散。幾時收。試倩悲風吹淚。過揚州。

柳枝

江南岸。柳枝。江北岸。柳枝。折送行人無盡時。恨分離。柳枝。酒一杯。柳枝。淚雙垂。柳枝。君到長安百事違。幾時歸。柳枝。

康與之

字伯可。渡江初。以詞受知高宗。官郎中。有順菴樂府五卷。

陳質齋云。伯可詞鄙褻之甚。

黃叔暘云。伯可以文詞待詔金馬門。凡中興粉飾治具。及慈寧

歸養。兩宮歡集。必假伯可之歌詠。故應制之詞爲多。

王性之云。伯可樂章。令晏叔原不得獨

擅。沈伯時云。康伯可柳耆卿音律甚協。但未免時有俗語。

洞仙歌令荷花

若耶溪路。別岸花無數。欲斂嬌紅向人語。與綠荷相倚。恨回首。西風波淼
淼。三十六陂烟雨。新妝明照水。汀渚生香。不嫁東風被誰誤。遣踟躕。騷
客意。千里緜緜。仙浪遠。何處凌波微步。想南浦。潮生畫橈歸。正月曉風清。
斷腸凝竚。

應天長

管絃繡陌。燈火畫橋。塵香舊時歸路。腸斷蕭娘舊日。風簾映朱戶。鶯能舞。
花解語。念後約。頓成輕負。緩雕轡。獨自歸來。凭欄情緒。楚岫在何處。香
夢悠悠。花月更誰主。惆悵後期空有。鱗鴻寄紉素。枕前淚。窗外雨。翠幕冷。
夜涼虛度。未應信。此度相思。寸腸千縷。

喜遷鶯秋夜聞鴈

秋寒初勁。看雲路鴈來。碧天如鏡。湘浦烟深。衡陽沙遠。風外幾行斜陣。回
首塞門何處。故國關河重省。漢使老。認上林欲下。徘徊清影。江南烟水
暝。聲過小樓。燭暗金猊冷。送日鳴琴。裁詩挑錦。此恨此情無盡。夢想洞庭
飛下。散入雲濤千頃。過盡也。奈杜陵人遠。玉關無信。

阿房廢址漢荒丘。狐兔又羣遊。豪華盡成春夢。留下古今愁。君莫上。古原頭。淚難收。夕陽西下。塞鴈南來。渭水東流。

玉樓春

青牋後約無憑據。誤我碧桃花下語。誰將消息問劉郎。悵望玉溪溪上路。春來無限傷情緒。擬欲題詩都付與。東風吹落一庭花。手把新愁無寫處。

吳

億

字大年。南渡時人。有溪園自怡集。

南鄉子

江上雪初消。暖日晴烟弄柳條。認得裙腰芳草綠。魂銷。會折梅花過斷橋。蟬鬢為誰凋。長恨含嬌那處嬌。遙想晚妝呵手罷。無聊。更傍朱唇暖玉簫。

會

覲

字純甫。汴人。紹興中。以寄班祇候。與龍大淵同為建王內知客。孝宗受禪。以鑾邸舊人。除權知

閣門事。淳熙初。除開府儀同三司。加少保。醴泉觀使。有海野詞一卷。

黃叔暘云。純甫東都故老。詞多感慨。如金人捧露盤。憶秦娥等曲。悽然有黍離之感。

金人捧露盤庚寅春奉使過京師感懷作

記神京。繁華地。舊游踪。正御溝。春水溶溶。平康巷陌。繡鞍金勒躍青驄。解衣沽酒。醉絃管。柳綠花紅。到如今。餘霜鬢。嗟前事。夢魂中。但寒烟。滿目飛蓬。雕欄玉砌。空餘三十六離宮。塞笳驚起。暮天鴈。寂寞東風。

憶秦娥 邯鄲道上

風蕭瑟。邯鄲古道傷行客。傷行客。繁華一瞬。不堪思憶。叢臺歌舞無消息。金樽玉管空陳跡。空陳跡。連天草樹。暮雲凝碧。

菩薩蠻 次韻龍深甫

杏花寒食佳期近。一簾烟雨琴書潤。砌下水潺潺。玉笙吹暮寒。陽臺雲易散。往事尋思懶。花底醉相扶。當時人在無。

閻蒼舒 蜀人官至侍郎嘗北使汴京

水龍吟

少年聞說京華。上元景色烘晴晝。朱輪畫轂。雕鞍玉勒。金衢爭驟。春滿鰲山。夜沉陸海。一天星斗。正紅毬過了。鳴鞘聲斷。回鸞馭。鈞天奏。誰料此生親到。五十年。都城如舊。而今但有。傷心烟霧。縈愁楊柳。寶籙宮前。絳霄樓下。不堪回首。願黃圖早復。端門燈火。照人還又。

左 譽 字與言。天台人。歷仕後。去為浮屠。所著有筠翁長短句。

王仲言云。與言策名之後。籍甚宦途。錢塘幕府樂籍。有名姝張芸。女名穠。色藝妙天下。君頗顧之。如盈盈秋水。淡淡春山。與一段離愁堪畫處。橫風斜雨。捲衰柳。及帷雲剪水。滴粉搓酥。皆為穠作。當時都人有曉風殘月柳三變。滴粉搓酥。左與言之對。後穠委身立勳大將家。易姓章。疏封大國。紹興中。因覓官行闕。暇日訪西湖兩山間。忽逢車輿甚盛。中觀一麗人。褰簾顧君而顰。曰。如今若把菱花照。猶恐相逢是夢中。視之乃穠也。君醒然悟入。即拂衣東渡。一意空門。

眼兒媚

樓上黃昏杏花寒。斜月小闌干。一雙燕子。兩行征鴈。畫角聲殘。綺窗人在東風裏。灑淚對春閑。也應似舊。盈盈秋水。淡淡春山。

陸凝之。字永仲。號石室。餘杭人。布衣。高宗召見。不赴。

念奴嬌觀潮

遠山一帶。翹晴空極目。天涯浮白。楓落鴉翻談笑處。不覺雲濤橫席。酒病方蘇。睡魔猶殢。一掃無留迹。吳帆越棹。恍然飛上空碧。長記草賦梁園。凌雲筆勢。倒三江秋色。對此驚心空悵望。老作紅塵閑客。別浦烟平。小樓人散。回首千波寂。西風掃露。爲君重噴霜笛。

楊无咎。字補之。清江人。高宗朝累徵不起。自號清庵長者。有逃禪集二卷。

南歌子次東坡端午韻

小雨疎疎過。長江滾滾流。落霞殘照晚明樓。又是一番重午。身寄南州。羅綺紛香陌。魚龍漾彩舟。不堪回首鳳池頭。誰道於今霜鬢。猶是淹留。

生查子

秋來愁更深。黛拂雙蛾淺。翠袖怯天寒。脩竹蕭蕭晚。孤鴻遠。小立背西風。又是重門掩。此意有誰知。恨與

甘草子

秋暮。永夜西樓。冷月明窗戶。夢破櫓聲中。憶在松江路。敲枕試尋會遊處。記歷歷。風光堪數。誰與浮家五湖去。儘醉眠秋雨。

明月棹孤舟周二五

寶髻雙垂烟縷縷。年紀小。未周三五。壓衆精神。出羣標格。偏向衆中翹楚。記得譙門初見處。禁不定。亂紅飛去。掌託鞋兒。肩拖裙子。悔不做閑男女。

於中好

牆頭艷杏花初試。繞珍叢。細撥紅蕙。欲知占盡春明媚。悄無意。看桃李。持杯準擬花前醉。早一葉兩葉飛墜。晚來旋旋深無地。更聽得。東風起。

阮

閱 一作閱。字閱休。一作閱休。建炎初知袁州。致仕。寓居宜春。著詩話總龜。

洞仙歌贈宜春官妓趙佛奴

趙家姊妹。合在昭陽殿。因甚人間有飛燕。見伊底盡道。獨步江南。便江北。也何會慣見。惜伊情性好。不解嗔人。長帶桃花笑時臉。向尊前酒底。見了須歸。似恁地。能得幾回細看。待不眨眼兒。覷著伊。將眨眼工夫。看伊幾遍。

侯

寘 字彥周。東武人。晁說之甥。紹興中。以直學士知建康。有嬾窟詞一卷。

朝中措 元夕上潭帥劉共甫

年來玉帳罷兵籌。燈市小遲留。花外香隨金勒。酒邊人倚紅樓。沙堤此去。傳柑待宴。天上風流。還記月華小隊。春風十里潭州。

風入松

少年心醉杜韋娘。會格外疎狂。錦箋預約西湖上。共幽深。竹院松莊。愁夜黛眉顰翠。惜歸羅帕分香。重來一夢繞湖塘。空烟水微茫。同心眼底無

蘇小。記舊遊。凝竚淒涼。入扇柳風殘酒。點衣花雨斜陽。

會 澆 字端伯。編樂府雅詞。

調笑梅

清友。羣芳右。萬縞紛披茲獨秀。天寒月薄黃昏後。 縞袂亭亭招手。故山
千樹連雲岫。借問如今安否。

會 惇 字鉉父。有詞一卷。

黃叔暘云。鉉父故相之孫。辭播樂府。

點絳脣重九飲栖霞

九日傳杯。要攜佳客棲霞去。滿城風雨。記得潘郎句。 紫菊紅萸。何意留
儂住。愁如許。暮烟一縷。正在歸時路。

朱 雍 紹興中。乞召試賢良。有梅詞二卷。

好事近梅

春色為誰來。枝上半留殘雪。恰近小園香徑。對霜林寒月。 危欄淒斷笛
聲長。吹到偏嗚咽。最好短亭歸路。有行人先折。

姚進道 華亭人。

青玉案和費方回韻送伯固歸吳中

三年枕上吳中路。遣黃耳隨君去。若到松江呼小渡。莫驚鷗鷺。四橋盡是。
老子經行處。 朝川圖上看春暮。常記高人右丞句。作箇歸期天已許。春
衫猶是。小蠻鍼線。會濕西湖雨。

劉之翰 荆南人。

水調歌頭獻田都統

涼露洗金井。一葉下梧桐。謫仙浪游何處。華髮作詩翁。烏帽蕭蕭一幅。坐對清泉白石。矯首撫長松。獨鶴歸來晚。聲在碧霄中。神仙宅。留玉節。駐金狨。黔南一道。十萬貔虎控雕弓。笑折碧荷倒影。自唱采蓮新曲。詞句滿秋風。劍佩入千歲。長入大明宮。
田世輔為金州都統制。時之翰待峽州遠安主簿闕。作此詞獻之。田覽之大喜。致書約來金城。欲厚加資給。而之翰遽亡。明年。田出闕武。恍惚見之翰立道左。因大驚異。亟送千緡與其孤。

江 緯

向湖邊

退處鄉關。幽棲林藪。舍宇第須茅蓋。翠巘清泉。啓軒窗遙對。遇等閑。鄰里過從。親朋臨顧。草草便成歡會。策杖攜壺。向湖邊柳外。旋買溪魚。便斫銀絲鱸。誰復欲。痛飲。如長鯨吞海。共惜醺酣。恐歡娛難再。矧清風明月。非錢買。休追念。金馬玉堂心膽碎。且鬪尊前。有阿誰身在。

卷十三 宋詞六十八首

辛棄疾

字幼安。歷城人。耿京聚兵山東。節制忠義軍馬。留掌書記。令奉表南歸。高宗召見。授承務郎。累官浙東安撫使。加龍圖閣待制。進樞密都承旨。德祐初。以謝枋得請。贈少師。謚忠敏。有稼軒長短句十二卷。

東風夜放花千樹。更吹隕星如雨。寶馬雕車香滿路。鳳簫聲動。玉壺光轉。一夜魚龍舞。蛾兒雪柳黃金縷。笑語盈盈暗香去。衆裏尋他千百度。驀然回首。那人卻在。燈火闌珊處。

踏莎行中秋後二夕帶湖篆崗小酌

夜月樓臺。秋香院宇。笑吟吟地人來去。是誰秋到便淒涼。當年宋玉悲如許。隨分盃盤。等閑歌舞。問他有甚堪悲處。思量卻也有悲時。重陽節近多風雨。

又和趙興國知錄韻

吾道悠悠。憂心悄悄。最無聊處秋先到。西風林外有啼鴉。夕陽山下多衰草。長憶商山。當年四老。塵埃也走咸陽道。爲誰書到便悒然。至今此意無人曉。

念奴嬌書東流村壁

野塘花落。又匆匆過了。清明時節。剗地東風欺客夢。一枕雲屏寒怯。曲岸持觴。垂楊繫馬。此地曾經別。樓空人去。舊遊飛燕能說。聞道綺陌東頭。行人曾見。簾底纖纖月。舊恨春江流不盡。新恨雲山千疊。料得明朝。尊前重見。鏡裏花難折。也應驚問。近來多少華髮。

破陣子爲陳同甫賦壯詩以寄之

醉裏挑燈看劍。夢回吹角連營。八百里分麾下炙。五十絃翻塞外聲。沙場

秋點兵。馬作的盧飛快。弓如霹靂弦驚了。卻君王天下事。贏得生前身後名。可憐白髮生。

祝英臺近

寶釵分。桃葉渡。烟柳暗南浦。怕上層樓。十日九風雨。斷腸點點飛紅。都無人管。更誰勸。流鶯聲住。鬢邊覩。試把花卜歸期。才簪又重數。羅帳燈昏。哽咽夢中語。是他春帶愁來。春歸何處。卻不解。帶將愁去。

沁園春帶湖新居

三徑初成。鶴怨猿驚。稼軒未來。甚雲山自許。平生意氣。衣冠人笑。抵死塵埃。意倦須還。身閑貴早。豈爲尊羹鱸膾哉。秋江上。看驚絃鴈避。駭浪船回。東崗更葺茅齋。好都把。軒窗臨水開。要小舟行釣。先應種柳。疎籬護竹。莫礙觀梅。秋菊堪餐。春蘭可佩。留待先生手自栽。沉吟久。怕君恩未許。此意徘徊。

滿江紅

家住江南。又過了。清明寒食。花徑裏。一番風雨。一番狼籍。紅粉暗隨流水去。園林漸覺清陰密。算年年。落盡刺桐花。寒無力。庭院靜。空相憶。無處說。閑愁極。怕流鶯乳燕。得知消息。尺素如今何處也。綠雲依舊無踪跡。謾教人。羞去上層樓。平蕪碧。

又

敲碎離愁。紗窗外。風搖翠竹。人去後。吹簫聲斷。倚樓人獨。滿眼不堪三月

暮。舉頭已覺千山綠。但試把一紙寄來書。從頭讀。相思字。空盈幅。相思意。何時足。滴羅襟。點點淚珠盈掬。芳草不迷行客路。垂楊只礙離人目。最苦是。立盡月黃昏。闌干曲。

又送李正之提刑入蜀

蜀道登天。一盃送。繡衣行客。還自歎。中年多病。不堪離別。東北看騰諸葛表。西南更草相如檄。把功名。收拾付君侯。如椽筆。兒女淚。君休滴。荆楚跡。吾能識。要新詩。準備廬山山色。赤壁磯頭千古浪。銅鞮陌上三更月。正梅花。萬里雪深時。須相憶。

又江行簡楊濟翁周顯先

過眼溪山。怪都是。舊時曾識。還記得。夢中行遍。江南江北。佳處徑須攜杖去。能消幾兩平生屐。笑塵勞。三十九年非。長爲客。吳楚地。東南坼。英雄事。曹劉敵。被西風吹盡了。無塵跡。樓觀甫成人已去。旌旗未卷頭先白。歎人生。哀樂轉相尋。今猶昔。

水調歌頭舟次揚州和楊濟翁周顯先韻

落日塞塵起。口馬獵清秋。漢家組練十萬。列艦聳層樓。誰道投鞭飛渡。憶昔鏑鳴血汚。風雨佛狸愁。季子正年少。匹馬黑貂裘。今老矣。搔白首。過揚州。倦游欲去江上。手種橘千頭。二客東南名勝。萬卷詩書事業。嘗試與君謀。莫射南山虎。直覓富平侯。

又

四坐且勿語。聽我醉中吟。池塘春草未歇。高樹變鳴禽。鴻雁初飛江上。蟋蟀還來牀下。時序百年心。誰要卿料理。山水有清音。歡多少。歌長短。酒淺深。而今已不如昔。後定不如今。閑處直須行樂。良夜更教秉燭。高會惜分陰。白髮短如許。黃菊倩誰簪。

又王子三山被召陳端仁給事飲餞

長恨復長恨。裁作短歌行。何人爲我楚舞。聽我楚狂聲。余既滋蘭九畹。又樹蕙之百畝。秋菊更餐英。門外滄浪水。可以濯吾纓。一盃酒。問何似。身後名。人間萬事毫髮。常重泰山輕。悲莫悲生離別。樂莫樂新相識。兒女古今情。富貴非吾事。歸與白鷗盟。

又

帶湖吾甚愛。千丈翠奩開。先生杖履無事。一日走千回。凡我同盟鷗鷺。今日既盟之後。來往莫相猜。白鶴恁何處。嘗試與偕來。破青萍。排翠藻。立蒼苔。窺魚笑汝癡計。不解舉吾杯。廢沼荒丘疇昔。明月清風此夜。人世幾歡哀。東岸綠陰少。楊柳更須栽。

賀新郎別茂嘉十一弟

綠樹聽鶉鳩。更那堪。杜鵑聲住。鶉鳩聲切。啼到春歸無啼處。苦恨芳菲都歇。算未抵。人間離別。馬上琵琶關塞黑。更長門。翠輦辭金闕。看燕燕。送歸妾。將軍百戰身名裂。向河梁。回頭萬里。故人長絕。易水蕭蕭西風冷。滿座衣冠似雪。正壯士。悲歌未徹。啼鳥還知如許恨。料不啼。清淚長啼血。誰

伴我醉明月。

又賦琵琶

鳳尾龍香撥。自開元。霓裳曲罷。幾番風月。最苦潯陽江頭客。畫舸亭亭待發。記出塞。黃雲堆雪。馬上離愁三萬里。望昭陽。宮殿孤鴻沒。絃解語。恨難說。遼陽驛使音塵絕。瑣窗寒。輕攏慢撚。淚珠盈睫。推手含情還卻手。一抹梁州哀徹。千古事。雲飛烟滅。賀老定場無消息。想沉香亭北。繁華歇。彈到此。爲嗚咽。

木蘭花慢 除州送花倅

老去情味減。對別酒。怯流年。况屈指中秋。十分好月。不照人圓。無情水都。不管。共西風。只管送歸船。秋晚萼鱸江上。夜深兒女燈前。征衫便好去。朝天。玉殿正思賢。想夜半承明。留教視草。卻遣籌邊。長安故人問我。道愁腸。滯酒只依然。目斷秋霄落鴈。醉來時響空絃。

摸魚兒 淳熙己亥自湖北漕移湖南同官王正之置酒小山亭賦

更能消。幾番風雨。匆匆春又歸去。惜春長怕花開早。何況落紅無數。春且住。見說道。天涯芳草無一。作迷歸路。怨春不語。算只有殷勤。畫簷蛛網。盡日惹飛絮。長門事。準擬佳期又誤。蛾眉曾有人妒。千金縱買相如賦。脈脈此情誰訴。君莫舞。君不見。玉環飛燕皆塵土。閑愁最苦。休去倚危欄。斜陽正在。烟柳斷腸處。羅大經云。詞意殊怨。使在漢唐時。寧不買種豆種桃之禍。然聞壽皇見此詞。頗不悅。終不加以罪。可謂盛德。

太常引 建康中秋夜爲呂潛叔賦

一輪秋影轉金波。飛鏡又重磨。把酒問姮娥。被白髮、欺人奈何。乘風好去。長安萬里。直下看山河。斫去桂婆娑。人道是、清光更多。

水龍吟 過南礪雙溪樓

舉頭西北浮雲。倚天萬里須長劍。人言此地。夜深長見。斗牛光焰。我覺山高。潭空水冷。月明星淡。待燃犀下看。凭欄卻怕。風雷怒。魚龍慘。峽束蒼江對起。過危樓。欲飛還斂。元龍老矣。不妨高臥。冰壺涼簟。千古興亡。百年悲笑。一時登覽。問何人。又卸。片帆沙岸。繫斜陽纜。

又 旅次登樓

楚天千里清秋。水隨天去。秋無際。遙岑遠目。獻愁供恨。玉簪螺髻。落日樓頭。斷鴻聲裏。江南遊子。把吳鉤看了。闌干拍遍。無人會。登臨意。休說鱸魚堪膾。儘西風。季鷹歸未。求田問舍。怕應羞見。劉郎才氣。可惜流年。憂愁風雨。樹猶如此。倩何人喚取。紅巾翠袖。揜英雄淚。

鷓鴣天 鵝湖歸病起作

枕簟溪堂冷欲秋。斷雲依水晚來收。紅蓮相倚深如怨。白鳥無言定是愁。書咄咄。且休休。一丘一壑也風流。不知筋力衰多少。但覺新來懶上樓。

西河 送錢仲耕自江西移守婺州

西江水。道是西江人淚。無情卻解送行人。月明千里。從今日日倚高樓。傷心烟樹如薺。會君難。別君易。草草不知人意。十年著破繡衣茸。種成桃

李。問君。可是。厭承明。東方鼓吹千騎。對梅花更消一醉。看明年。調鼎風味。老病自憐憔悴。過吾廬定有。幽人相問。歲晚淵明歸來未。

永遇樂京口北固亭懷古

千古江山。英雄無覓。孫仲謀處。舞榭歌臺。風流總被。雨打風吹去。斜陽草樹。尋常巷陌。人道寄奴曾住。想當年。金戈鐵馬。氣吞萬里如虎。元嘉草草。封狼居胥意。贏得倉皇北顧。四十三年。望中猶記。燈火揚州路。可堪回首。佛狸祠下。一片神鴉社鼓。憑誰問。廉頗老矣。尙能飯否。岳倦翁云。此作微覺用事多。

漢宮春立春

春已歸來。看美人頭上。裊裊春幡。無端風雨未肯。收盡餘寒。年時燕子。料今宵。夢到西園。渾未辦。黃柑薦酒。更傳青韭堆盤。卻笑東風從此。便薰梅染柳。更沒些閑。閑時又來鏡裏。轉變朱顏。清愁不斷。問何人。會解連環。生怕見。花開花落。朝來塞鴈先還。

又會稽秋風亭觀雨

亭上秋風。記去年。嫋嫋。會到吾廬。山河舉目。雖異風景。非殊。功成者去。覺團扇。便與人疎。吹不斷。斜陽依舊。茫茫禹跡都無。千古茂林猶在。甚風流章句。解擬相如。只今木落江冷。渺渺愁余。故人書報。莫因循。忘卻尊鱸。誰念我。新涼燈火。一編太史公書。

新荷葉和趙德莊韻

人已歸來。杜鵑欲勸誰歸。綠樹如雲。等閑付與鶯飛。兔葵燕麥。問劉郎。幾度沾衣。翠屏幽夢。覺來水繞山圍。有酒重攜。小園隨意芳菲。往日繁華。而今物是人非。春風半面。記當年。初識崔徽。南雲鴈少。錦書無箇因依。

南鄉子登京口北固亭

何處望神州。滿眼風光北固樓。千古興亡多少事。悠悠。不盡長江滾滾流。年少萬兜鍪。坐斷東南戰未休。天下英雄誰敵手。曹劉。生子當如孫仲謀。

蝶戀花元日立春

誰向椒盤簪綵勝。整整韶華。爭上春風鬢。往日不堪重記省。爲花常抱新春恨。春未來時先借問。晚恨開遲。早又飄零近。今歲花期消息定。只愁風雨無憑準。

清平樂獨宿博山王氏菴

繞牀飢鼠。蝙蝠翻燈舞。屋上松風吹急雨。破紙窗間自語。平生塞北江南。歸來華髮蒼顏。布被秋宵夢覺。眼前萬里江山。

菩薩蠻書江西造口壁

鬱孤臺下清江水。中間多少行人淚。西北是長安。可憐無數山。青山遮不住。畢竟東流去。江晚正愁余。山深聞鷓鴣。

羅大經云。南渡初。金人追隆祐太后御舟。

至造口。不及而還。鷓鴣之句。謂恢復之事行不得也。

生查子有覓詞者爲賦

去年燕子來。繡戶深深處。花徑得泥歸。都把琴書污。
今年燕子來。誰聽呢喃語。不見捲簾人。一陣黃昏雨。

浪淘沙山寺夜作

身世酒盃中。萬事皆空。古來三五箇英雄。雨打風吹何處是。漢殿秦宮。
夢入少年叢。歌舞匆匆。老僧夜半誤鳴鐘。驚起西窗眠不得。捲地西風。

定風波暮春漫興

少日春懷似酒濃。插花走馬醉千鍾。老去逢春如病酒。唯有。茶甌香篆小薰籠。
卷盡殘花風未定。休恨。花開原自要春風。試問春歸誰得見。飛燕來時相遇夕陽中。

范成大

字致能。吳郡人。紹興中進士。累官權吏部尚書。參知政事。尋帥金陵。以病請閑。進資政殿學士。領洞霄宮。加大學士。卒諡文穆。有石湖集詞一卷。

眼兒媚萍鄉道中

酣酣日脚紫烟浮。妍暖破輕裘。困人天氣。醉人花氣。午夢扶頭。
春慵恰似春塘水。一片縠紋愁。溶溶曳曳。東風無力。欲皺還休。
春慵恰

菩薩蠻湘東驛

客行忽到湘東驛。明朝真是瀟湘客。晴碧萬里雲。幾時逢故人。
江南如塞北。別後書難得。先自鴈來稀。那堪春半時。
江南如

謁金門宜春道中野塘春水可喜有懷舊隱

塘水碧。仍帶麴塵顏色。泥泥縠紋無氣力。東風如愛惜。
恰似越來溪側。

也有一雙鷓鴣。只欠柳絲千百尺。繫船春弄笛。

秦樓月寒食日湖南提舉胡元高家席上聞琴

湘江碧。故人同作湘中客。湘中客。東風回鴈。杏花寒食。溫溫月到藍橋側。醒心絃裏春無極。春無極。明朝殘夢。馬嘶南陌。

霜天曉角梅

晚晴風歇。一夜春堪折。脈脈花疎天淡。雲來去。數枝月。勝絕愁更絕。此情誰與說。惟有兩行低鴈。知人倚。闌干雪。

黃公度

字思憲。莆陽人。紹興八年進士第一。官尚書考功員外郎。有知稼翁集詞一卷。

好事近

湖上送殘春。已負別時歸約。好在故園桃李。為誰開。誰落。還家應是荔支天。浮蟻要人酌。莫把舞裙歌扇。便等閑拋卻。

卜算子別士口弟之官

薄宦各東西。往事隨風雨。先自離歌不忍聞。又何況春將暮。愁共落花多。人逐征鴻去。君向瀟湘我向秦。後會知何處。

青玉案

鄰雞不管離懷苦。又還是催人去。回首高城音信阻。霜橋月館。水村烟市。總是思君處。裊殘別袖燕支雨。謾留得愁千縷。欲倩歸鴻分付與。鴻飛不住。倚欄無語。獨立長天暮。
按本集。公登第後。為趙忠簡所器。而秦檜頗銜之。及召赴行在。雖

知非當路意。而迫於君命。故寓意此詞。蓋去就早定矣。

葛立方 字常之。丹陽人。勝仲子。紹興八年進士。官至吏部侍郎。有歸愚集詞一卷。

卜算子

裊裊水芝紅。脈脈蒹葭浦。浙浙西風澹澹烟。幾點疎疎雨。
草草展杯觴。對此盈盈女。葉葉紅衣當酒船。細細流霞舉。

張孝祥

字安國。烏江人。紹興二十四年廷試第一。累遷中書舍人。直學士院。兼都督府參贊軍事。領建康留守。尋以荆南湖北路安撫使請祠。進顯謨閣直學士。有于湖集詞一卷。

黃叔暘云。于湖有紫微雅詞。湯衡為序。稱其平昔未嘗著藁。筆酣興健。頃刻即成。卻無一字無

來處。

滿江紅聽雨

斗帳高眠。寒窗靜。瀟瀟雨意。南樓近。更移三鼓。漏傳一水。點點不離楊柳外。聲聲只在芭蕉裏。也不管。滴破故鄉心。愁人耳。
無似有。遊絲細。聚復散。真珠碎。天應分付與。別離滋味。破我一牀蝴蝶夢。輸他雙枕鴛鴦睡。向此際。別有好思量。人千里。

念奴嬌

星沙初下。望重湖遠水。長雲漠漠。一葉扁舟誰念我。今日天涯飄泊。平楚南來。大江東去。處處風波惡。吳中何地。滿懷俱是離索。
長記送我行時。綠波亭上。泣透青羅薄。檣燕低飛人去後。依舊湘城簾幕。不盡山川。無窮烟浪。辜負秦樓約。漁歌聲斷。為君雙淚傾落。

鷓鴣天

日日青樓醉夢中。不知樓外已春濃。杏花未濕疎疎雨。楊柳初搖短短風。
扶畫鷁。躍花驄。湧金門外小橋東。行行又入笙歌裏。人在珠簾第幾重。

西江月 洞庭

問訊湖邊春色。重來又是三年。東風吹我過湖船。楊柳絲絲拂面。
世路如今已慣。此心到處悠然。寒光亭下水連天。飛起沙鷗一片。

六州歌頭

長淮望斷。關塞莽然平。征塵暗。霜風勁。悄邊聲。黯銷凝。追想當年事。殆天
數。非人力。洙泗上。絃歌地。亦殫腥。隔水氈鄉。落日牛羊下。區脫縱橫。看名
王宵獵。騎火一川明。笳鼓悲鳴。遣人驚。念腰間箭。匣中劍。空埃蠹。竟何
成。時易失。心徒壯。歲將零。渺神京。干羽方懷遠。靜烽燧。且休兵。冠蓋使。紛
馳驚。若爲情。聞道中原遺老。常南望。翠葆霓旌。使行人到此。忠憤氣填膺。
有淚如傾。朝野遺記云。安國在建康留守席上賦此。歌闋。魏公爲罷席而入。

姚

寬

字令威。剡川人。爲六部監門。有西溪居士樂府一卷。

憶王孫

麩麩楊柳綠初低。澹澹梨花開未齊。樓上情人聽馬嘶。憶郎歸。細雨春風
濕酒旗。

生查子

郎如陌上塵。妾似隄邊絮。相見兩悠悠。踪跡無尋處。酒面撲春風。淚眼
零秋雨。過了別離時。還解相思否。

踏莎行

蘋葉烟深。荷花露濕。碧蘆紅蓼秋風急。采菱渡口日將沉。飛鴻樓上人空立。彩鳳難雙。紅綃暗泣。回紋未剪吳刀澀。夢魂歸處不留踪。厭厭一夜涼蟾入。

程垓

字正伯。眉山人。有書舟雅詞一卷。

酷相思

月桂霜林寒欲墜。正門外、催人起。奈離別、如今真個是。欲住也、留無計。欲去也、來無計。馬上離魂衣上淚。各自箇、供憔悴。問江路、梅花開也未。春到也、須頻寄。人別也、須頻寄。

小桃紅

不恨殘花鞦韆。不恨殘春破。只恨流光。一年一度。又催新火。縱青天、白日繫長繩。也留春得麼。花院從教鎖。春事從教過。燒筍園林。嘗梅臺榭。有何不可。已安排、珍簟小胡牀。待日長閑坐。

芭蕉雨

雨過涼生藕葉。晚庭消盡暑。渾無熱。枕簟不勝香滑。爭奈寶帳情生。金尊意愜。玉人何處夢蝶。思一見、冰雪。須寫個帖兒。叮嚀說。試問道。肯來麼。今夜小院無人。重樓有月。

摸魚兒

卷十三

宋詞六十八首

一八五

掩淒涼。黃昏庭院。角聲何處嗚咽。矮窗曲屋風燈冷。還是苦寒時節。凝竚切。念翠被。薰籠夜夜成虛設。倚窗愁絕。聽鳳竹聲中。犀幃影外。簌簌釀寒雪。傷心處。卻憶當年輕別。梅花滿院初發。吹香弄蕊無人見。惟有暮雲千疊。情未徹。又誰料。而今好夢分吳越。不堪重說。但記得當初。重門鎖處。猶有夜深月。

念奴嬌

秋風秋雨。正黃昏供斷。一窗愁絕。帶減衣寬誰念我。難忍重城離別。轉枕寒帷。挑燈整被。總是相思切。知他別後。負人多少風月。不是怨極愁濃。只愁重見了。相思難說。料得新來魂夢裏。不管飛來蝴蝶。排悶人間。寄愁天上。終有歸時節。如今無奈。亂雲依舊千疊。

南浦

金鴨爨薰香。向晚來。春醒一枕無緒。濃綠漲瑤窗。東風外。吹盡亂紅飛絮。無言竚立。斷腸惟有流鶯語。碧雲欲暮。空惆悵韶華。一時虛度。追思舊日心情。記題葉西樓。吹花南浦。老去覺歡疎。傷春恨。多付斷雲殘雨。黃昏院落。問誰猶在。凭欄處。可堪杜宇。但只解聲聲。催他春去。

滿庭芳

臨安晚登

南月驚烏。西風破鴈。又是秋滿平湖。採蓮人靜。寒色戰菰蒲。舊信江南好。景。一萬里。輕覓尊罍。誰知道。吳儂未識。蜀客已情孤。憑高增悵望。湘雲盡處。都是平蕪。問故鄉何日。重見吾廬。縱有荷紉芰製。終不似。菊短籬疎。

歸情遠。二更雨夢。依舊繞庭梧。

漁家傲彭門道中

獨木小舟烟雨濕。燕兒亂點春江碧。江上青山隨意覓。人寂寂。落花芳草催寒食。昨夜青樓今日客。吹愁不得東風力。細拾殘紅書怨泣。流水急。不知那個傳消息。

南鄉子

幾日訴離尊。歌盡陽關不忍分。此度天涯真個去。銷魂。相送黃花落葉村。斜日又黃昏。蕭寺無人半掩門。今夜粉香明日淚。休論。只要羅巾記舊痕。

憶秦娥

青門深。海棠開盡春陰陰。春陰陰。萬里雲水。一寸歸心。玉樓深鎖烟消沉。知他何日同登臨。同登臨。待收紅淚。細說如今。

謁金門

春夜雨。催潤柳塘花塢。小院重門深幾許。畫簾香一縷。獨立晚庭凝竚。細把花枝閑數。燕子不來天欲暮。說愁無處所。

卜算子

獨自上層樓。樓外青山遠。望到斜陽欲盡時。不見西飛燕。獨自下層樓。樓下蛩聲怨。待到黃昏月上時。依舊柔腸斷。

菩薩蠻

畫橋拍拍春江綠。行人正在春江曲。花潤接平川。有人花底眠。東風元自好。只怕催花老。安得萬垂楊。繫教春日長。

愁倚欄令

春猶淺。柳初芽。杏初花。楊柳杏花交映處。有人家。玉窗明。煖烘霞。小屏上。水遠山斜。昨夜酒多春睡重。莫驚他。

水龍吟

夜來風雨匆匆。故園定是花無幾。愁多怨極。等閑孤負。一年芳意。柳困桃慵。杏青梅小。對人容易。算好春長在。好花長見。元只是。人憔悴。回首池南舊事。恨星星。不堪重記。如今但有。看花老眼。傷時清淚。不怕逢花瘦。只愁怕。老來風味。待繁紅亂處。留雲借月。也須拚醉。

洞庭春色

錦字親裁。淚巾偷裹。細說舊時。記笑桃門巷。妝窺寶鑿。弄花庭榭。香濕羅衣。幾度相隨游冶去。任月細風尖猶未歸。多少事。有垂楊眼見。紅燭心知。如今事都過也。但贏得。雙鬢成絲。歎半妝紅豆。相思有分。兩分青鏡。重合難期。惆悵一春飛絮夢。恁悠悠。颺教人分付誰。銷魂處。又梨花雨暗。半掩重扉。

卷十四 宋詞六十八首

韓元吉 字无咎。號南澗。許昌人。官吏部尚書。有焦尾集一卷。

六州歌頭

東風著意。先上小桃枝。紅粉膩。嬌如醉。倚朱扉。記年時。隱映新妝面。臨水岸。春將半。雲日煖。斜陽轉。夾城西。草軟沙平。驟馬垂楊渡。玉勒爭嘶。認蛾眉凝笑。臉薄拂胭脂。繡戶會窺。恨依依。昔攜手處。香如霧。紅隨步。怨春遲。消瘦損。憑誰問。只花知。淚空垂。舊日堂前燕。和烟雨。又雙飛。人自老。春長好。夢佳期。前度劉郎幾許。風流地。也自應悲。但茫茫暮靄。目斷武陵溪。往事難追。

薄倖

送君南浦。對烟柳。青青萬縷。更滿眼。殘紅吹盡。葉底黃鸝自語。甚動人。多少離情。樓頭水濶山無數。記竹裏題詩。花邊載酒。魂斷江干春暮。都莫問。功名事。白髮星星如許。任雞鳴起舞。鄉關何在。憑高日盡。孤鴻去。漫留君住。趁醪醖。香煖持杯。且醉瑤臺路。相思記取。愁絕西窗夜雨。

謁金門 春雪

春尙淺。誰把玉英裁剪。儘道梅梢開未遍。卷簾花滿院。樓上酒融歌煖。樓下水平烟遠。卻似湧金門外見。絮飛波影亂。

霜天曉角 題采石蛾眉亭

倚天絕壁。直下江千尺。天際雨蛾橫黛。愁與恨。幾時極。暮潮風正急。酒闌聞塞笛。試問謫仙何處。青山外。遠烟碧。

水龍吟 題二峯閣詠英華女子

雨餘疊巘浮空。望中秀色仙都是。洞天未鎖。人間春好。玉妃會墜。錦瑟繁絃。鳳笙清響。九霄歌吹。問分香舊事。劉郎去後。知誰伴。風前醉。回首暝烟千里。但紛紛。落紅如淚。多情易老。青鸞何許。詩成誰寄。斗轉參橫。半簾花影。一溪寒水。悵飛鳥路杳。行雲夢斷。有二三峯翠。

周必大

字子充。一字弘道。廬陵人。紹興二十一年進士。歷官左丞相。封益國公。贈太師。謚文忠。有省齋集。近體樂府一卷。

點絳脣贈歌者小瓊

秋夜乘槎。客星容到天孫渚。眼波微注。將謂牽牛渡。見了還非。重理霓裳舞。雖無誤。幾年一遇。莫訝周郎顧。

京鏗

字仲遠。豫章人。登紹興二十七年進士第。由縣令擢御史。遷右司郎官。出為四川安撫使。進刑部尚書。慶元初。官左丞相。卒贈太保。初謚文穆。以家諱從其子請。謚文忠。改謚莊定。有松坡居士樂府一卷。

雨中花重陽

玉局祠前。銅壺閣畔。錦城藥市爭奇。正紫萸綴席。黃菊浮卮。巷陌連鑣並轡。樓臺吹竹彈絲。登高望遠。一年好景。九日佳期。自憐行客。猶對佳賓。留連豈是貪癡。誰會得心馳北闕。與寄東籬。惜別未催鷓首。追歡且醉蛾眉。明年此會。他鄉今日。總是相思。

尤袤

字延之。無錫人。紹興中進士。累官禮部尚書。正奉大夫。贈光祿大夫。謚文簡。有梁溪集。

瑞鷓鴣詠落梅

清溪西畔小橋東。落月紛紛水映空。五夜客愁花片裏。一年春事角聲中。歌殘玉樹人何在。舞破山香曲未終。卻憶孤山醉歸路。馬蹄香雪襯東風。

仲 弁

字彌性。江都人。紹興中進士。授平江教授。改左承奉郎。歷光祿寺丞。終朝請大夫。淮東安撫司參議。有浮山集。

水調歌頭浮遠堂

靜練平千頃。華棟俯中流。凌晨畫戟來看。宿雨斷虹收。八九胸中雲夢。三千筆端風月。無處快凝眸。笑詠一堂上。揮塵氣橫秋。俯危欄。紅日下。暮雲收。無窮偉觀。祇應天意爲君謀。容我時醒時醉。獨泛微烟微雨。浩蕩逐輕鷗。不羨岳陽勝。丹碧聳層樓。

念奴嬌同前

練江風靜。臥冰奩百尺。朱欄飛入。江遠浮天天在水。水滿半天雲濕。白鳥明邊。青山斷處。眼冷江頭立。月明潮上。葦間漁唱聲急。幾度吹老蘋花。野香無數。欲寄應難及。天借詩人供醉眼。尊俎一時收拾。竹裏行廚。花間步障。風雨生呼吸。酒闌歌罷。釣船先具蓑笠。

朱 熹

字元晦。一字仲晦。婺源人。第進士。仕至轉運副使。崇政殿說書。煥章閣待制。致仕。贈太師。封信國公。改徽國。諡文。有文公集詞一卷。

水調歌頭繫括杜牧之九日齊州詩

江水浸雲影。鴻鴈欲南飛。攜壺結客何處。空翠渺烟霏。塵世難逢一笑。况

有紫萸黃菊。堪插滿頭歸。風景今朝是。身世昔人非。 酬佳節。須酩酊。莫相違。人生如寄。何事辛苦。怨斜暉。無盡今來古往。多少春花秋月。那更有危機。與問牛山客。何必淚沾衣。

真德秀

字景元。更景希。浦城人。第慶元進士。歷官翰林學士。知制誥。贈銀青光祿大夫。謚文忠。學者稱西山先生。

蝶戀花 紅梅

兩岸月橋花半吐。紅透肌香。暗把遊人誤。盡道武陵溪上路。不知迷入江南去。 先自冰霜真態度。何事枝頭。點點胭脂污。莫是東君嫌淡素。問花花又嬌無語。

趙汝愚

字子直。漢王元佐七世孫。家餘干。舉進士第一。累官光祿大夫。右丞相。贈太師。追封沂國公。謚忠定。

柳梢青 題豐樂樓

水月光中。烟霞影裏。湧出樓臺。空外笙簫。人間笑語。身在蓬萊。 天香暗逐風回。正十里荷花盡開。買箇輕舟。山南遊遍。山北歸來。

洪 适

字景伯。皓子。中博學宏詞科。累官尚書右僕射。同中書門下平章事。兼樞密使。謚文惠。有盤洲集詞二卷。

好事近 別傳文

柳岸碧漪深。底事催人行色。無計相留情話。只別愁如織。 小蠻樊素兩傾城。幾度醉狂客。明日扁舟西去。聽歌聲不得。

生查子

桃疎蝶惜香。柳困鶯銜絮。日影過簾旌。多少閑愁緒。紅綻武陵溪。綠暗章臺路。春色似行人。無意花間住。

浣溪沙 錢范子芬行

整頓春衫欲跨鞍。一杯相屬少開顏。愁蛾不似舊時彎。未見兩星添柳宿。忍教三疊唱陽關。相思空望會稽山。

虞美人

芭蕉滴滴窗前雨。望斷江南路。亂雲重疊幾多山。不似倦飛鷗鳥便知還。角聲更聽誰門弄。夜夜思歸夢。鄱江樓下水含漪。姑負釣灘烟艇綠蓑衣。

吳

傲

字益恭。休寧人。紹興二十七年進士。淳熙初。通判邕州。已除知州。兼廣南西路安撫都監。以親老丐祠。主管台州崇道館。轉朝散郎致仕。寶祐中。追謚文肅。有竹洲集詞一卷。

滿庭芳 寄葉蔚宗

草滿池塘。鶯啼楊柳。燕忙知爲泥融。飄花流水。竹外小橋通。又是一春憔悴。摘殘英。遍繞芳叢。長安遠。平蕪盡處。疊疊但雲峯。西湖行樂處。牙檣漾鷁。錦帳翻虹。想年時桃李。應已成空。欲寫相思寄與。雲天闊。難覓征鴻。空凝想。時時殘夢。依約上陽鐘。

浣溪沙 題星州寺

十里青山泝碧流。夕陽沙晚片帆收。重重烟樹出層樓。人去人歸芳草

渡鷗飛鷗沒白蘋洲。碧桐翠竹記曾遊。

又題餘干傳舍

畫楫朱欄繞碧山。平湖徙倚水雲寬。人家楊柳帶汀灣。目力已隨飛鳥盡。機心還逐白鷗閑。蕭蕭微雨晚來寒。

減字木蘭花中秋獨與靜之飲

碧梧秋老。滿地琅玕紛不掃。門掩黃昏。惟有年時月照人。淒涼滿眼。肯作六年燈火伴。莫說淒涼。來歲如今又一方。

楊萬里

字廷秀。吉水人。紹興中進士。歷祕書監。以寶文閣待制致仕。進寶謨閣學士。贈光祿大夫。謚文節。有誠齋集樂府一卷。

好事近

月未到誠齋。先到萬花川谷。不是誠齋無月。隔一庭脩竹。如今纔是十三夜。月色已如玉。未是秋光奇絕。看十五十六。

李處全

字粹伯。淳熙中侍御史。有晦菴詞一卷。

水調歌頭送王景文

上馬趣攜酒。送客古朱方。秋風斜日山際。低草見牛羊。酩酊不知更漏。但見橫江白露。清映月如霜。平睨廣寒殿。誰說路岐長。醉還醒。時起舞。念吾鄉。江山爾爾。回首千載幾興亡。一笑書生事業。誰笑管城居士。不換碧油幢。好在中冷水。擊節奏伊涼。

菩薩蠻

杜鵑只管催歸去。知渠教我歸何處。故國淚生痕。那堪枕上聞。巖裝吾已具。泛宅吳中路。弭楫喚東鄰。江東日暮雲。

張

震

字東父。號無隱居士。益寧人。孝宗朝爲諫官。

黃叔暘云。無隱居士詞甚婉媚。蓋富貴人語也。

驀山溪

青梅如豆。斷送春歸去。小綠間長紅。看幾處。雲歌柳舞。偎花識面。對月共論心。攜素手。采香遊。踏遍西池路。水邊朱戶。會記銷魂處。小立背秋千。空悵望。娉婷韻度。楊花撲面。香糝一簾風。情脈脈。酒厭厭。回首斜陽暮。

蝶戀花

梅子初青春已暮。芳草連雲。綠遍西池路。小院繡簾纔半舉。銜泥紫燕雙飛去。人在赤欄橋畔住。不解傷心。還解相思否。清夢欲尋猶間阻。紗窗一夜蕭蕭雨。

羅

願

字端良。號存齋。歙縣人。紹興中。以蔭補承務郎。監臨安新城稅。歷鄂州守。有鄂州小集。

水調歌頭中秋和施司諫

秋宇淨如水。月鏡不安臺。鬱孤高處張樂。語笑脫塵埃。簷外白毫千丈。坐上銀河萬斛。心境兩佳哉。俯仰共清絕。底處著風雷。問天公。邀月姊。媿凡才。婆娑人世。羞見蓬鬢漾金壘。來歲公歸何處。照耀彩衣簪橐。禁直且休催。一曲庾江上。千古繼韶陔。

崔與之

字正子。廣州人。紹熙四年進士。累官廣東經略安撫使。兼知廣州。拜參知政事。右丞相。皆力辭。

以觀文殿大學士致仕。封南海郡公。卒謚清獻。有集。

水調歌頭

萬里雲間戍。立馬劍門關。亂山極目無際。直北是長安。人苦百年塗炭。鬼哭三邊鋒鏑。天道久應還。手寫留屯奏。炯炯寸心丹。對青燈。搔白髮。漏聲殘。老來勳業。未就妨卻一身閑。梅嶺綠陰青子。蒲澗清泉白石。怪我舊盟寒。烽火平安夜。歸夢到家山。

劉克莊

字潛夫。莆田人。以蔭仕。淳熙中。賜同進士出身。官龍圖閣直學士。有後村別調一卷。

憶秦娥

遊人絕。綠陰滿野芳菲歇。芳菲歇。養蠶天氣。采茶時節。枝頭杜宇啼成血。陌頭楊柳吹成雪。吹成雪。淡烟疎雨。江南三月。

玉樓春呈林節推

年年躍馬長安市。客裏似家家似寄。青錢喚酒日無何。紅燭呼盧宵不寐。易挑錦婦機中字。難得玉人心下事。男兒西北有神州。莫灑水西橋畔淚。

賀新郎端午

思遠樓前路。望平隄。十里湖光。畫船無數。綠蓋盈盈紅粉面。葉底荷花解語。鬪巧結同心雙縷。尙有經年離別恨。一絲絲。總是相思處。相見也。又重午。清江舊事傳荆楚。歎人情。千載如新。尙沉菰黍。且盡樽前今日醉。誰肯獨醒弔古。汎幾盞。菖蒲綠醕。兩兩龍舟爭競渡。奈珠簾。暮捲西山雨。看

未足。怎歸去。

又遊周氏花園

溪上收殘雨。倚危欄。薄綿乍脫。日陰亭午。鬧市不知春色處。散在荒園廢墅。漸小白。長紅無數。客子雖非河陽令。也隨緣。暫作鶯花主。那可負。甕中醕。碧雲四合千巖暮。恨匆匆。余方有事。子姑歸去。趁取羣芳未搖落。暇日提魚就煮。歎激電。光陰如許。回首明年何處在。問桃花。尙記劉郎否。公莫笑。醉中語。

滿江紅

落日登樓。誰管領。倦遊在客。待喚起。滄浪漁父。隔江吹笛。看水看山身尙健。憂晴憂雨頭先白。對暮雲。不見美人來。遙天碧。山中鶴。應相憶。沙上鷺。渾相識。想石田。茆屋草深三尺。空有鬢如潘騎省。斷無面見陶彭澤。便倒傾。海水浣衣塵。難湔滌。

清平樂贈維揚陳師文參議家舞姬

宮腰束素。只怕能輕舉。好築避風臺護取。莫遣驚鴻飛去。一團香玉溫柔。笑顰俱有風流。貪與蕭郎眉語。不知舞錯伊州。

摸魚兒

怪新來。倚樓看鏡。清狂渾不如舊。暮雲千里傷心處。一作色那更亂蟬疎柳。凝望久。愴故國。百年陵闕誰回首。功名大謬。歎采藥名山。讀書精舍。此計幾時就。封侯事。久矣輸人妙手。滄洲。一作扁舟。聊作漁叟。高冠長劍都閑。

物。世上切身惟酒。千載後。君試看。拔山扛鼎俱烏有。英雄骨朽。問顧曲周郎。而今還解。來聽小詞否。

長相思

朝有時。暮有時。潮水猶知日兩回。人生長別離。來有時。去有時。燕子猶知社後歸。君行無定期。

樓鏜 字巨山。淳熙中知江陰軍。

浣溪沙 雙檜堂

夏半陽烏景最長。小池不斷藕花香。電影雷聲催急雨。十分涼。 芡剝明珠隨意嚼。瓜分瓊玉趁時嘗。雙檜堂深新釀好。且傳觴。

吳琚 字居甫。休人。憲聖皇后姪。太寧郡王益之子。歷尚書郎。部使者。直學士。慶元中。以鎮安節度使

守建康。遷少保。卒諡忠惠。有雲壑集。

醉江月 觀潮應制

玉虹遙挂。望青山隱隱。有如一抹。忽覺天風吹海立。好似春霆初發。白馬凌空。瓊鰲駕水。日夜朝天闕。飛龍舞鳳。鬱葱環拱吳越。 此景天下應無。東南形勝。偉觀真奇絕。好是吳兒飛彩幟。蹴起一江秋雪。黃屋天臨。水犀雲擁。看擊中流楫。晚來波靜。海門飛上明月。

趙彥端 字德莊。乾道淳熙間。以直寶文閣。知建寧府。有介庵詞四卷。

千秋歲

杏花風下。獨立春寒夜。微雨度。疎星挂。輝輝濃艷出。嫋嫋繁枝亞。朱檻倚。

輕羅醉裏添還卸。寂寞情猶乍。悵望驂鸞駕。衣褪玉。香欺麝。一花拚一醉。杯重憑誰把。春去也。重簾翠幕人如畫。

謁金門

休相憶。明日遠如今日。樓外綠烟村冪冪。花飛如許急。柳外晚來船集。波底夕陽紅濕。送盡去雲成獨立。酒醒愁又入。張正夫云。德莊宗室之秀。賦西窗謁金門云。波底夕陽紅溼。阜陵問誰詞。答云。彥端所作。上云。我家裏人也。會作此等語。喜甚。

青玉案贈勉道琵琶人

當年萬里龍沙路。載多少離愁去。冷壓層簾雲不度。芙蓉雙帶。垂楊嬌髻。絃索初調處。花凝玉立東風暮。會記江邊麗人句。異縣相逢能幾許。多情誰料。琵琶洲畔。同醉清明雨。

沙塞子

春水綠波南浦。漸理棹。行人欲去。黯銷魂。柳際輕烟。花梢微雨。長亭放餞無計住。但芳草。迷人去路。忍回頭。斷雲殘日。長安何處。

清平樂席上贈人

桃根桃葉。一樹芳相接。春到江南三二月。迷損東家蝴蝶。殷勤踏取青陽。風前花正低昂。與我同心支子。報君百結丁香。

點絳脣途中逢管倅

顛顛天涯。故人相遇情如故。別離何處。忍唱陽關句。我是行人。更送行人去。愁無據。寒蟬鳴處。回首斜陽暮。

虞美人

斷蟬高柳斜陽處。池閣絲絲雨。綠檀珍簟卷新紅。屈曲杏花蝴蝶小屏風。春山疊疊秋波漫。收拾殘鍼線。又成嬌困倚檀郎。無事更拋蓮子打鴛鴦。

豆葉黃

粉牆丹檻柳絲中。簾箔輕明花影重。午醉醒來一面風。綠蔥蔥。幾顆櫻桃葉底紅。

管

鑑

字明仲。有養拙堂詞一卷。

生查子

天教百媚生。賦得多情怨。背整玉搔頭。寬了黃金釧。情隨歌意深。故故回嬌盼。不是不相知。只為難相見。

魏子敬

生查子

愁盈鏡裏山。心疊琴中恨。露濕玉蘭秋。香伴金屏冷。雲歸月正圓。鴈到人無信。孤損鳳凰釵。立盡梧桐影。劉與伯云。此詞題道塗壁。甚工。

甄龍友

字雲卿。永嘉人。紹興中進士。官國子監簿。

霜天曉角題赤壁

峨眉仙客。四海文章伯。來向東坡遊戲。人間世。著不得。去國誰愛惜。在天何處覓。但見樽前人唱。前赤壁。後赤壁。

俞國寶 俞一作于。臨川人。淳熙間太學生。有醒菴遺珠集。

風入松題酒肆

一春長費買花錢。日日醉湖邊。玉驄慣識西湖路。驕嘶過。沽酒樓前。紅杏香中歌舞。綠楊影裏秋千。暖風十里麗人天。花壓鬢雲偏。畫船載得春歸去。餘情付。湖水湖烟。明日重扶殘醉。來尋陌上花鈿。

衛元卿

洋州人。領薦不得志。游山谷間。

謁金門

花過雨。又是一番紅素。燕子歸來愁不語。故巢無覓處。誰在玉樓歌舞。誰在玉關辛苦。若使邊塵吹得去。東風侯萬戶。

李石

石

字知幾。資陽人。乾道中。以薦任太學博士。出爲成都倅。有方舟集。

臨江仙

烟柳疎疎人悄悄。畫樓風外吹笙。倚欄聞喚小紅聲。薰香臨欲睡。玉漏已三更。坐待不來來又去。一方明月中庭。粉牆東畔小橋橫。起來花影下。扇子撲流螢。

漁家傲贈鼎湖官伎

西去征鴻東去水。幾重別恨千山裏。夢繞綠窗書半紙。何處是。桃花溪畔人千里。瘦玉倚香愁黛翠。勸人須要人先醉。問道明朝行也未。猶自記。燈前背立偷垂淚。

張

鉉

字功甫。號約齋。西秦人。官奉議郎。有玉照堂詞一卷。

鵲橋仙菱

連汀接潏。紫蒲帶藻。萬鏡香浮光滿。濕烟吹霽。木蘭輕照。波底紅嬌翠婉。玉纖採來。銀籠攜去。一曲山長水遠。綵鴛雙慣。貼人飛恨。南浦離多夢短。

蘭陵王荷花

蓼汀側。朝靄依依弄色。知何許。湘女淡妝。羽節飛來帶秋碧。輕裙素綃織。誰與明璫競飾。無言處。相倚翹迴。應有柔情正堆積。當年駐香鷁。記草媚羅裙。波映文席。□□□□□□□□□□□□□□□□。斜陽返照暮雨濕。愛天際涼入。愁寂。念疇昔。謾太華峯頭。幽夢尋覓。而今兩鬢如花白。但一線才思。半星心力。新詞奇句便做有。怎道得。

滿庭芳促織

月洗高梧。露溥幽草。寶釵樓外秋深。上花沿翠。螢火墜牆陰。靜聽寒聲斷續。微韻轉。淒咽悲沉。爭求侶。殷勤勸織。促破曉機心。兒時會記得。呼燈灌穴。斂步隨音。任滿身花影。猶自追尋。攜向畫堂試鬪。亭臺小。籠巧裝金。今休說。從渠牀下。涼夜聽孤吟。

杜 旗

字伯高。號橋齋。金華人。呂成公門下士。與弟四人。並有名譽。

陳同甫云。伯高奔風逸足。而鳴以和鸞。仲高麗句。晏叔原不得擅美。叔高戈矛森立。有吞虎食牛之氣。左右輝映。匪獨一門之盛。可謂一時之豪。葉正則贈幼高云。杜子五兄弟。詞林俱上

頭。

醉江月石頭城

江山如此。是天開萬古。東南王氣。一自尋孫橫短策。坐使英雄鵠起。玉樹聲銷。金蓮影散。多少傷心事。千年遼鶴。併疑城郭非是。當日萬駟雲屯。潮生潮落。處石頭孤峙。人笑褚淵今齒冷。只有袁公不死。斜日荒烟。神州何在。欲墮新亭淚。元龍老矣。世間何限餘子。

摸魚兒湖上

放扁舟。萬山環處。平鋪碧浪千頃。仙人憐我征塵久。借與夢遊清枕。風乍靜。望兩岸。羣峯倒浸玻璃影。樓臺相映。更日薄烟輕。荷花似醉。飛鳥墮寒鏡。中都內。羅綺千街萬井。天教此地幽勝。仇池仙伯今何在。隄柳幾眠還醒。君試問。問此意。只今更有何人領。功名未竟。待學取鳴夷。仍攜西子。來動五湖興。

驀山溪

春風如客。可是繁華主。紅紫未全開。早綠遍。江南千樹。一番新火。多少倦遊人。纖腰柳。不知愁。猶作風前舞。小闌干外。雨雨幽禽語。問我不歸家。有佳人。天寒日暮。老來心事。惟只有春知。江頭路。帶春來。更帶春歸去。

劉儼

一云名仙掄。字叔儼。廬陵人。有招山集。

黃叔暘云。叔儼有招山詩集樂章。尤爲人所膾炙。

菩薩蠻海棠

東風去了。秦樓畔。一川烟草無人管。芳樹雨初晴。黃鸝三二兩聲。海棠花

已謝。春事無多也。只有牡丹時。知他歸不歸。

念奴嬌送張明之赴京西幕

餘艸東下。望西江千里。蒼茫烟水。試問襄州何處是。雉堞連雲天際。叔子殘碑。臥龍陳迹。遺恨斜陽裏。後來人物。如君瓌偉能幾。其肯爲我來耶。河陽下土。正是強人意。勿謂時平無事也。便以言兵爲諱。眼底山河。樓頭鼓角。都是英雄淚。功名機會。要須閑暇先備。

又長沙趙帥席上作

西風何事。爲行人掃蕩。煩襟如洗。熏漲蒸瀾都捲盡。一片瀟湘清泚。酒病驚秋。詩愁入鬢。對影人千里。楚宮故事。一時分付流水。江上買取扁舟。排雲湧浪。直過金沙尾。歸去江南丘壑處。不用重尋月姊。風露杯深。芙蓉裳冷。笑傲烟霞裏。草廬如舊。臥龍知爲誰起。

訴衷情

征衣薄薄不禁風。長日雨絲中。又是一年春事。花信到梧桐。雲漠漠。水溶溶。去匆匆。客懷今夜。家在江西。身在江東。

岳

珂 字肅之。號倦翁。飛孫。管內勸農使。知嘉興府。歷戶部侍郎。淮東總領。兼制置使。有玉楮集。

祝英臺近北固亭

淡烟橫。層霧斂。勝概分雄占。月下鳴榔。風急怒濤颭。關河無限清愁。不堪臨鑑。正雙鬢。秋風塵染。謾登覽。極目萬里沙場。事業頻看劍。古往今來。南北限天塹。倚樓休弄新聲。重城門掩。歷歷數。西州更點。

程

珙

字懷古。休寧人。紹熙四年進士。累官寶文閣學士。知福州。兼福建安撫使。封新安郡侯。以端明殿學士致仕。卒贈特進少師。有洛水集詞一卷。

念奴嬌憶先廬春山之勝

歸來一笑。尙看看趁得。人間寒食。阿壽牽衣仍問我。雙鬢新來添白。忍見庭前。去年芳草。依舊青青色。西湖雨後。綠波兩岸平拍。天教斷送流年。三之一矣。又是成疎隔。燕子春寒渾未到。誰說江南消息。玉樹熏香。冰桃翻浪。好箇真消息。這回歸去。松風深處橫笛。

王千秋

字錫老。東平人。有審齋詞一卷。

賀新郎石城弔古

弔古城頭去。正高秋。霜晴木落。路通洲渚。欲問紫髯分鼎事。只有荒祠烟樹。巫覡去。久無簫鼓。霸業荒涼遺堞墜。但蒼崖。日閱征帆渡。興與廢。幾今古。夕陽細草空凝竚。試追思。當時子敬。用心良誤。要約劉郎銅雀醉。底事遽爭荆楚。遂但見。蜀吳烽舉。致使五官伸脚睡。喚諸兒。畫取長陵土。遺此恨。欲誰語。

程

先

字傳之。休寧人。父官團練。以偏師禦金人於池州。殉節死。當錄其嗣。固讓不受。隱居東山。遺其子永奇師事晦菴。卽語錄所稱程次卿是也。

鎖窗寒有感

雨洗紅塵。雲迷翠麓。小車難去。淒涼感慨。未有今年春暮。想曲江。水邊麗人。影沉香歇。誰爲主。但兔葵燕麥。風前搖蕩。徑花成土。空被多情苦。歎

嘉會難逢。少年幾許。紛紛沸鼎。負了青陽百五。待何時。重覩太平。典衣貰酒相爾汝。算蘭亭。有此歡娛。又卻悲今古。

蘇 洞 字召叟。山陰人。有冷然閣集。

雨中花懷劉改之

十載尊前。放歌起舞。人間酒戶詩流。盡期君凌厲。羽翮高秋。世事幾如人意。儒冠還負身謀。歎天生李廣。才氣無雙。不得封侯。榆關萬里。一去飄然。片雲甚處神州。應悵望。家人父子。重見無由。隴水寂寥傳恨。淮山宛轉。供愁。這回休也。燕鴻南北。長隔英游。

劉圻父 字子寰。號篁嶼。游朱文公之門。有麻沙集。

花發沁園春呈史滄洲

換譜伊涼。選歌燕趙。一番樂事重起。花新笑靨。柳軟纖腰。濟楚衆芳圍裏。年年佳會。長是傍。清明天氣。正魏紫。衣染天香。蜀紅妝。破春睡。一簇猩羅鳳翠。遍東園西城。點檢芳事。銓齋吏散。畫館人稀。幾闋管絃清脆。人生適意。流轉共。風光遊戲。到遇景。取次成歡。怎教良夜休醉。

卷十五 宋詞六十六首

姜 夔 字堯章。鄱陽人。流寓吳興。有白石詞五卷。

范石湖云。白石有裁雲縫月之妙手。敲金戛玉之奇聲。趙子固云。白石。詞家之申韓也。黃叔暘云。白石詞極精妙。不減清真。其高處有美成所不能及。沈伯時云。白石清勁知音。未亦免有生硬處。張叔夏云。姜白石如野雲孤飛。去留無迹。又云。白石詞不惟清虛。且又騷雅。讀

之使人神觀飛越。

探春慢 過響溪別鄭次皋諸君

衰草愁烟。亂鴉送日。飛沙迴旋平野。拂雪金鞭。欺寒茸帽。還記章臺走馬。誰念漂零久。謾贏得、幽懷難寫。故人青盼相逢。小窗閑共情話。長恨離多會少。重訪問竹西。珠淚盈把。鴈磧沙平。漁汀人散。老去不堪遊冶。無奈苕溪月。又喚我、扁舟東下。甚日歸來。梅花零亂春夜。

一萼紅 人日登長沙定王臺

古城陰。有官梅幾許。紅萼未宜簪。池面冰膠。牆腰雪老。雲意還又沉沉。翠藤共、閑穿徑竹。漸笑語、驚起臥沙禽。野老林泉。故王臺榭。呼喚登臨。南去北來何事。蕩湘雲楚水。日極傷心。朱戶黏雞。金盤簇燕。空歎時序侵尋。記會共、西樓雅集。想垂柳、還裊萬絲金。待得歸鞍到時。只怕春深。

揚州慢 傳熙丙申至日過揚州

淮左名都。竹西佳處。解鞍少駐初程。過春風十里。盡薺麥青青。自胡馬、窺江去後。廢池喬木。猶厭言兵。漸黃昏清角。吹寒都在空城。杜郎俊賞。算如今、重到須驚。縱豈蔻詞工。青樓夢好。難賦深情。二十四橋仍在。波心蕩、冷月無聲。念橋邊紅藥。年年知爲誰生。

點絳脣 吳越

燕鴈無心。太湖西畔隨雲去。數峯清苦。商略黃昏雨。第四橋邊。擬共天隨住。今何許。凭欄懷古。殘柳參差舞。

暗香 石湖詠梅

舊時月色。算幾番照我。梅邊吹笛。喚起玉人。不管清寒與攀摘。何遜而今
漸老。都忘卻。春風詞筆。但怪得。竹外疎花。香冷入瑤席。江國正寂寂。歎
寄與路遙。夜雪初積。翠尊易泣。紅萼無言。耿相憶。長記會攜手處。千樹壓。
西湖寒碧。又片片。吹盡也。幾時見得。

疎影 前題

苔枝綴玉。有翠禽小小。枝上同宿。客裏相逢。籬角黃昏。無言自倚修竹。昭
君不慣胡沙遠。但暗憶。江南江北。想珮環。月下歸來。化作此花幽獨。猶
記深宮舊事。那人正睡裏。飛近蛾綠。莫似春風。不管盈盈。早與安排金屋。
還教一片隨波去。又卻怨。玉龍哀曲。等恁時。重覓幽香。已入小窗橫幅。張

叔夏云。暗香疎影二曲。前無古人。後無來者。真爲絕唱。

長亭怨慢

漸吹盡。枝頭香絮。是處人家。綠深門戶。遠浦縈迴。暮帆零亂。向何許。閱人
多矣。誰得似。長亭樹。樹若有情時。不會得。青青如此。日暮。望高城不見。
只見亂山無數。韋郎去也。怎忘得。玉環分付。第一是。早早歸來。怕紅萼。無
人爲主。算只有。奔刀。難剪離愁千縷。

齊天樂 蟋蟀

庾郎先自吟愁賦。淒淒更聞私語。露濕銅鋪。苔侵石井。都是會聽伊處。哀
音似訴。正思婦無眠。起尋機杼。曲曲屏山。夜涼獨自甚情緒。西窗又吹

暗雨。爲誰頻斷續。相和砧杵。候館吟秋。離宮弔月。別有傷心無數。幽詩謾
與。笑籬落呼燈。世間兒女。寫入琴絲。一聲聲更苦。張叔夏云。全章精粹所詠。瞭然在
目。且不留滯于物。

念奴嬌 荷花

鬧紅一舸。記年時常與。鴛鴦爲侶。三十六陂人未到。水佩風裳無數。翠葉
吹涼。玉容消酒。更灑菰蒲雨。嫣然搖動。冷香飛上詩句。日暮青蓋亭亭。
情人不見。爭忍凌波去。只恐舞衣寒易落。愁入西風南浦。高柳垂陰。老魚
吹浪。留我花間住。田田多少。幾回沙際歸路。

湘月即念奴嬌之兩指聲也

五湖舊約。問經年底事。長負清景。暝入西山。漸喚我。一葉夷猶乘興。倦網
都收。歸禽時度。月上汀洲冷。中流容與。畫橈不點清鏡。誰解喚起湘靈。
烟鬟霧鬢。理哀絃鴻陣。玉塵談玄。歎坐客。多少風流名勝。暗柳蕭蕭。飛星
冉冉。夜久知秋信。鱸魚應好。舊家樂事誰省。

淡黃柳 合肥

空城曉一作畫角。吹入垂楊陌。馬上單衣寒惻惻。看盡鵝黃嫩綠。都是江南
舊相識。正岑寂。明朝又寒食。強攜酒。小橋宅。怕梨花落盡成秋色。燕燕
飛來。問春何在。唯有池塘自碧。

側犯 芍藥

恨春易去。甚春卻向揚州住。微雨。正繭栗梢頭弄詩句。紅橋二十四。總是

行雲處。無語。漸半脫。宮衣笑相顧。金壺細葉。千朵圍歌舞。誰念我。鬢成絲。來此共樽俎。後日西園。綠陰無數。寂寞劉郎自修花譜。

惜紅衣荷花

枕簟邀涼。琴書換日。睡餘無力。細灑冰泉。并刀破甘碧。牆頭喚酒。誰問訊。城南詩客。岑寂。高樹晚蟬。說西風消息。虹梁水陌。魚浪吹香。紅衣半狼籍。維舟試望。故國渺天北。可惜渚邊沙外。不共美人遊歷。問甚時同賦。三十六陂秋色。

琵琶仙 吳興

雙槳來時。有人似。舊曲桃根桃葉。歌扇輕約。飛花蛾眉正奇絕。春漸遠。汀洲自綠。更添了。幾聲啼鴉。十里揚州。三生杜牧。前事休說。又還是。宮燭分烟。奈愁裏匆匆換時節。都把一襟芳思。與空階榆莢。千萬縷。藏鴉細柳。爲玉尊。起舞迴雪。想見西出陽關。故人初別。

淒涼犯 合肥秋夕

綠楊巷陌。西風起。邊城一片離索。馬嘶漸遠。人歸甚處。戍樓吹角。情懷正惡。更衰草。寒烟淡薄。似當時。將軍部曲。迤邐度沙漠。追念西湖上。小舫攜歌。晚花行樂。舊游在否。想如今。翠凋紅落。謾寫羊裙。等新鴈。來時繫著。怕匆匆。不肯寄與。誤後約。

翠樓吟 武昌安遠樓成

月冷龍沙。塵清虎落。今年漢酺初賜。新翻胡部曲。聽氈幕。元戎歌吹。層樓

高峙。看檻曲縈紅。簷牙飛翠。人姝麗。粉香吹下。夜寒風細。此地宜有神
仙。擁素雲黃鶴。與君遊戲。玉梯凝望久。歎芳草萋萋千里。天涯情味。仗酒
被清愁。花消英氣。西山外。晚來還捲。一簾秋霽。

法曲獻仙音張彥遠官舍

虛閣籠寒。小簾通月。暮色偏宜高處。樹隔離宮。水平馳道。湖山盡入尊俎。
奈楚客淹留久。砧聲帶愁去。屢回顧。過秋風未成歸計。誰念我重見冷
楓紅舞。喚起淡妝人。問逋仙。今在何許。象筆鸞箋甚而今。不道秀句。怕平
生幽恨。化作沙邊烟雨。

眉嫵戲張仲遠

看垂楊連苑。杜若吹沙。愁損未歸眼。信馬青樓去。重簾下。鴛鴦人妙飛燕。
翠尊共款。聽艷歌。郎意先感。便攜手。月地雲堦裏。愛良夜微燠。無限風
流疎散。有暗藏弓履。偷寄香翰。明月聞津鼓。湘江上。催人還解春纜。亂紅
萬點。悵斷魂。烟水遙遠。又爭似相攜。乘一舸。鎮長見。

石湖仙寄石湖處士

松江烟浦。是千古三高。游衍佳處。須信石湖仙。似鴟夷。翩然引去。浮雲安
在。我自愛。綠香紅嫵。容與看世間。幾度今古。盧溝舊會駐馬。爲黃花。閑
吟秀句。見說吳兒。也學綸巾欹羽。玉友金蕉。玉人金縷。緩移箏柱。聞好語。
明年定在槐府。

解連環

玉鞍重倚。卻沉吟未上。又縈離思。爲大喬。能撥春風。小喬妙攜箏。鴈啼秋水。柳怯雲鬆。更何必。十分梳洗。道郎攜羽扇。那日隔簾。半面會記。西窗夜涼雨霽。歎幽歡未足。何事輕棄。問後約。空指薔薇。算如此溪山。甚時重至。水驛燈昏。又見在。曲屏近底。念惟有。夜來皓月。照伊自睡。

八歸湖中送胡德華

芳蓮墜粉。疎桐吹綠。庭院暗雨乍歇。無端抱影銷魂處。還見篠牆螢暗。蘇
堵蛩切。送客重尋西去路。問水面。琵琶誰撥。最可惜。一片江山。總付與啼
鴉。長恨相從未款。而今何事。又對西風離別。渚寒烟淡。棹移人遠。縹緲
行舟如葉。想文君望久。倚竹愁生步羅襪。歸來後。翠尊雙飲。下了珠簾。玲
瓏閑看月。

玲瓏四犯越中歲暮

疊鼓夜寒。垂燈春淺。匆匆時事如許。倦遊歡意少。俛仰悲今古。江淹又吟
恨賦。記當時。送君南浦。萬里乾坤。百年身世。惟有此情苦。揚州柳垂官
路。有輕盈換馬。端正窺戶。酒醒明月下。夢逐潮聲去。文章信美。知何用。謾
贏得。天涯羈旅。教說與春來。要尋花伴侶。

陸游

字務觀。山陰人。以蔭補登仕郎。隆興初。賜進士出身。范成大帥蜀。爲參議官。人譏其頽放。因自

號放翁。嘉泰初。詔同脩國史。升寶章閣待制。有劍南集詞二卷。

南鄉子

劉潛夫云。放翁稼軒。一掃纖豔。不事斧鑿。高則高矣。但時時掉書袋。要是一癖。

歸夢寄吳檣。水驛江程去路長。想見芳洲初繫纜。斜陽。烟樹參差認武昌。
愁鬢點新霜。曾是朝衣惹御香。重到故鄉交舊少。淒涼。却恐他鄉勝故鄉。

好事近

益口放船歸。薄暮散花洲宿。兩岸白蘋紅蓼。映一蓑新綠。有沽酒處便
爲家。菱芡四時足。明日又乘風去。任江南江北。

朝中措

怕歌愁舞懶逢迎。妝晚託春醒。總是向人深處。當時枉道無情。關心近
日。啼紅密訴。剪綠深盟。杏館花陰恨淺。畫堂銀燭嫌明。

又

萋萋儻鼓錢。流年燭焰動金船。綵燕難尋前夢。酥花空點春妍。文園謝
病。蘭成久旅。回首淒然。明月梅山笛夜。和風禹廟鶯天。

水龍吟 春日游摩訶池

摩訶池上追游路。紅綠參差春晚。韶光妍媚。海棠如醉。桃花欲暖。挑菜初
閑。禁烟將近。一城絲管。看金鞍爭道。香車飛蓋。爭先占新亭館。惆悵年
華暗換。黯銷魂。雨收雲散。鏡奩掩月。釵梁拆鳳。秦箏斜鴈。身在天涯。亂山
孤壘。危樓飛觀。歎春來只有。楊花和恨。向東風滿。

采桑子

寶釵樓上妝梳晚。懶上秋千。閑撥沉烟。金縷衣寬睡髻偏。鱗鴻不寄遼

東信。又是經年。彈淚花前。愁入春風十四絃。

漁家傲 寄仲高

東望山陰何處是。往來一萬三千里。寫得家書空滿紙。流清淚。書回已是明年事。寄語紅橋橋下水。扁舟何日尋兄弟。行徧天涯真老矣。愁無寐。鬢絲幾縷茶烟裏。

極相思

江頭疎雨輕烟。寒食落花天。翻紅墜素。殘霞暗錦。一段淒然。惆悵東君。堪恨處。也不念。冷落樽前。那堪更看。漫空相趁。柳絮榆錢。

雙頭蓮 呈范至能待制

華髮星星。驚壯志成虛。此身如寄。蕭條病驥。向暗裏消盡。當年豪氣。夢斷故國山川。隔重重烟水。身萬里。舊社凋零。青門俊遊誰記。盡道錦里繁華。歎官閑晝永。柴荆添睡。清愁自醉。念此際付與。何人心事。縱有楚柁吳檣。知何時東逝。空悵望。鱸美菰香。秋風又起。

鵲橋仙

華燈縱博。雕鞍馳射。誰記當年豪舉。酒徒一半取封侯。獨去作。江邊漁父。輕舟八尺。低篷三扇。占斷蘋洲烟雨。鏡湖元自屬閑人。又何必。官家賜與。

又夜聞杜鵑

茅簷人靜。蓬窗燈暗。春晚連江風雨。林鶯巢燕總無聲。但月夜。常啼杜宇。

催成清淚。驚殘孤夢。又揀深枝飛去。故山猶自不堪聽。况半世。飄然羈旅。

感皇恩

小閣倚秋空。下臨江渚。漠漠孤雲未成雨。數聲新鴈。回首杜陵何處。壯心空萬里。人誰許。黃閣紫樞。築壇開府。莫怕功名欠人做。如今熟計。只有故鄉歸路。石帆山脚下。菱三畝。

沁園春 三榮橫谿閣小宴

粉破梅梢。綠動萱叢。春意已深。漸珠簾低捲。筇枝微步。冰開躍鯉。林暖鳴禽。荔子扶疎。竹枝哀怨。濁酒一尊和淚斟。凭欄久。歎山川冉冉。歲月駸駸。當時豈料如今。謾一事。無成霜鬢侵。看故人強半。沙堤黃閣。魚懸帶玉。貂映蟬金。許國雖堅。朝天無路。萬里淒涼誰寄音。東風裏。有灞橋烟柳。知我歸心。

又

一別秦樓。轉眼新春。又近放燈。憶盈盈倩笑。纖纖柔握。雪香花語。玉暖酥凝。念遠愁腸。傷春病思。自怪平生殊未會。君知否。漸香消蜀錦。淚漬吳綾。難求繫日長繩。况倦客。飄零少舊朋。但江郊鴈起。漁村笛遠。寒缸委燼。孤硯生冰。水繞山圍。烟昏雲慘。縱有高臺常怯登。銷魂處。是魚箋不到。蘭夢無憑。

真珠簾

山村水館參差路。感羈游。正似殘春風絮。掠地穿簾。知是竟歸何處。鏡裏新霜空自憫。問幾時。鸞臺鰲署。遲暮。謾憑高懷遠。書空獨語。自古儒冠多誤。悔當年早不。扁舟歸去。醉下白蘋洲。看夕陽鷗鷺。菰菜鱸魚都棄了。只換得。青衫塵土。休顧。早收身江上。一蓑烟雨。

陳亮

字同父。永康人。淳熙間詣闕上書。孝宗欲官之。亟渡江歸。至光宗策進士。擢第一。授僉書建康府判官廳公事。未至官而卒。端平初謚文毅。有龍川集詞一卷。

水龍吟

鬧花深處層樓。畫簾半捲東風軟。春歸翠陌。平莎茸嫩。垂楊金淺。遲日催花。淡雲閣雨。輕寒輕暖。恨芳菲世界。游人未賞。都付與鶯和燕。寂寞憑高念遠。向南樓。一聲歸鴈。金釵鬪草。青絲勒馬。風流雲散。羅綬分香。翠綰封淚。幾多幽怨。正銷魂又是。疎烟淡月。子規聲斷。

洞仙歌 秋雨追次李元膺韻

瑣窗秋暮。夢高唐人困。獨立西風萬千恨。又簷花落處。滴碎空堦。芙蓉怨。無限秋容老盡。枯荷催欲折。多少離聲。鎖斷天涯訴幽悶。似蓬山去後。方士來時。揮粉淚。點點梨花香潤。斷送得人間。夜霖鈴。更落葉梧桐。孤燈成暈。

虞美人

東風蕩颺輕雲縷。時送瀟瀟雨。水邊臺榭燕新歸。一點香泥濕帶落花飛。海棠糝徑鋪香繡。依舊成春瘦。黃昏庭院柳啼鴉。記得那人和月折梨花。

花。

劉

過

字改之。襄陽人。一云太和人。有龍洲詞一卷。

黃叔陽云。改之稼軒之客。詞多壯語。蓋學稼軒者也。

陶九成云。改之造詞。瞻逸有思致。沁園

春二首。尤纖麗可愛。

賀新郎 贈鄉人朱唐卿

多病劉郎瘦。最傷心。天寒歲晚。客他鄉久。大舸翩翩何許至。元是高陽舊友。便一笑。相歡攜手。與問武昌城下月。又何如。揚子江頭柳。追往事。兩眉皺。燭花自剪明如晝。喚青娥。小紅樓上。殷勤勸酒。昵昵琵琶恩怨語。春筍輕籠翠袖。看舞徹。金釵微溜。若見故鄉吾父老。道長安。市上強如舊。重會面。幾時又。

又去年秋余試牒四明賦贈老娼至今天下與禁中皆歌之江西人來以為鄧南秀詞非也

老去相如倦。向文君。說似而今。怎生消遣。衣袂京塵曾染處。空有香紅尚軟。料彼此。魂銷腸斷。一枕新涼。眠客舍。聽梧桐。疎雨秋風顫。燈暈冷。記初見。樓低不放珠簾捲。晚妝殘。翠蛾狼籍。淚痕流臉。人道愁來須殢酒。無奈愁深酒淺。但託意。焦琴紈扇。莫鼓琵琶江上曲。怕荻花。楓葉俱淒怨。雲萬疊。寸心遠。

又西湖

睡覺啼鶯曉。醉西湖。兩峯日日。買花簪帽。去盡酒徒無人問。惟有玉山自倒。任拍手。兒童爭笑。一舸乘風翩然去。避魚龍。不見波聲悄。歌韻遠。喚蘇

小。神仙路遠蓬萊島。紫雲深。參差禁樹。有烟花遶。人世紅塵西障日。百計不如歸好。付樂事。與他年少。費盡柳金梨雪句。問沉香亭北。何時召。心未慙。鬢先老。

清平樂

新來塞北。傳到真消息。赤地居民無一粒。更五單于爭立。維師尙父鷹揚。熊羆百萬堂堂。看取黃金假鉞。歸來異姓真王。

唐多令 重過武昌

蘆葉滿汀洲。寒沙帶淺流。二十年重過南樓。柳下繫船猶未穩。能幾日。又中秋。黃鶴斷磯頭。故人會到否。舊江山。渾是新愁。欲買桂花同載酒。終不似。少年遊。

又重過江南

解纜蓼花灣。好風吹去帆。二十年重過新灘。洛浦凌波人去後。空夢繞。翠屏間。飛霧濕征衫。蒼蒼烟樹寒。望星河。低處長安。綺陌紅樓應笑我。爲花事。過江南。

沁園春 美人足

洛浦凌波。爲誰微步。輕生暗塵。記踏花芳徑。亂紅不損。步苔幽砌。嫩綠無痕。襯玉羅慳。銷金樣窄。載不起。盈盈一段春。嬉游倦。笑教人款捻。微褪些跟。有時自度歌勻。悄不覺。微尖點拍頻。憶金蓮移換。文鴛得侶。繡茵催袞。舞鳳輕分。懊恨深遮。牽情半露。出沒風前烟縷裙。知何似。似一鈎新月。

淺碧籠雲。

又美人指甲

銷薄春冰。碾輕寒玉。漸長漸彎。見鳳鞋泥污。恨人強別。龍涎香斷。撥火輕翻。學撫瑤琴。時時欲剪。更掬水魚鱗。波底寒。纖柔處。試摘花香滿。鏤棗成斑。時將粉淚偷彈。記縮玉。曾教柳傅看。算恩情相著。搔便玉體。歸期暗訴。劃遍闌干。每到相思。沉吟靜處。斜倚朱脣皓齒間。風流甚。把仙郎暗搯。莫放春閑。

行香子 山水扇面

佛寺雲邊。茅舍山前。樹陰中。酒旆低懸。峯巒空翠。溪水清漣。只欠桃花。欠沙鳥。欠漁船。無限風烟。景趣天然。最宜他。隱者盤旋。何人村墅。若箇林泉。恰似敲湖。似方口。似斜川。

楊

炎 號止齋翁。廬陵人。有西樵語業一卷。

鵲橋仙

思歸時節。乍寒天氣。總是離人愁緒。夜來無奈被西風。更吹做。一簾秋雨。征衫拂淚。闌干倚醉。羞對黃花無語。寄書除是鴈來時。又只恐。書成鴈去。

蝶戀花 別范南伯

離恨做成春夜雨。添得春江。剗地東流去。弱柳繫船都不住。爲君愁絕聽鳴鶻。君到南徐芳草渡。想得尋春。依舊當年路。後夜獨憐回首處。亂山

遮莫無重數。

又稼軒坐間作首句用丘六書中語

點檢笙歌多釀酒。不放東風。獨自迷楊柳。院院翠陰停永晝。曲欄隨處堪垂手。昨日解醒今夕又。消得情懷。長被春傷憊。門外馬嘶人去後。亂紅不管花消瘦。

秦樓月

東風寂。垂楊舞困春無力。春無力。落紅不管。杏花狼籍。斷腸芳草萋萋碧。新來怪底相思極。相思極。冷烟池館。又將寒食。

水調歌頭

把酒對斜日。無語問西風。胭脂何事都做。顏色染芙蓉。放眼暮江千頃。中有離愁萬斛。無處落征鴻。天在闌干角。人倚醉醒中。千萬里。江南北。浙西東。吾生如寄。尙想三徑菊花叢。誰是中州豪傑。借我五湖舟楫。去作釣魚翁。故國且回首。此意莫匆匆。

滿江紅

筆染相思。暗題盡。朱門白壁。動離思。春生遠岸。烟銷殘日。楊柳結成羅帶恨。海棠染就胭脂色。想深情。幽怨繡屏間。雙鸞鵲。春水綠。春山碧。花有恨。人無力。對一奩愁思。十分孤寂。寸寸錦腸渾欲斷。盈盈玉淚應偷滴。倩東風。吹鴈過江南。傳消息。

張

輯

字宗瑞。鄱陽人。有東澤綺語債二卷。

朱湛盧云。東澤得詩法于姜堯章。世謂謫仙復作。不知其又能詞也。

疎簾淡月寓桂枝香

梧桐雨細。漸滴做秋聲。被風驚碎。潤逼衣篝線。裊蕙爐沉水。悠悠歲月天涯醉。一分秋。一分憔悴。紫簫吹斷。素箋恨切。夜寒鴻起。又何苦。淒涼客裏。負草堂春綠。竹溪空翠。落葉西風吹老。幾番塵世。從前諳盡江湖味。聽商歌。歸興千里。露侵宿酒。疎簾淡月。照人無寐。

如此江山寓齊天樂

西風揚子江頭路。扁舟雨晴呼渡。岸隔瓜洲。津橫蒜石。搖盡波聲千古。詩人一去。但對峙金焦。斷磯青樹。欲下斜陽。長淮渺渺正愁予。中流笑與客語。把貂裘爲浣。半生塵土。品水烹茶。看碑憶鶴。恍似舊曾游處。聊憑陸誦。問入極神游。肯重來否。如此江山。更蒼烟白鷺。

釣船笛寓好事近

載酒岳陽樓。秋入洞庭深碧。極目水天無際。正白蘋風急。月明不見宿鷗驚。醉把玉欄拍。誰謂百年心事。恰釣船橫笛。月明不見宿

月當窗寓霜天曉角

看朱成碧。會醉梅花側。相遇匆匆相別。又爭似。不相識。南北千里隔。幾時重見得。最苦子規啼處。一片月。當窗白。

山漸青寓長相思

山無情。水無情。楊柳飛花春雨晴。征衫長短亭。擬行行。重行行。行一作吟

到江南第幾程。江南山漸青。

碧雲深 寓憶秦娥

風淒淒。井欄絡緯驚秋啼。涼侵好夢。月正樓西。卷簾望月知心誰。關河空隔長相思。長相思。碧雲暮合。有美人兮。

南浦月 寓點絳脣 賦瀟湘漁父

來剪萼絲。江頭一陣鳴蓑雨。孤篷歸路。吹得蘋風暮。短髮蕭蕭。笑與沙鷗語。休歸去。玉龍嘶處。邀月過南浦。

沙頭雨 寓點絳脣

帶醉歸時。月華猶在吹簫處。曉愁情緒。忘卻匆匆語。客裏風霜。詩鬢空如許。江南去。岸花迎櫓。遙隔沙頭雨。

花自落 寓謁金門

春寂寞。簾底蕙爐烟薄。聽盡歸鴻書怎託。相思天一角。象筆鸞箋閑卻。秀句與誰商略。睡起愁懷何處著。無風花自落。

垂楊碧 寓謁金門

花半濕。睡起一窗晴色。千里江南真咫尺。醉中歸夢直。前度蘭舟送客。雙鯉沉沉消息。樓外垂楊如此碧。問春來幾日。

闌千萬里心 寓憶王孫

小樓柳色未春深。湘月牽情入苦吟。翠袖風前冷不禁。怕登臨。幾曲闌干萬里心。

卷十六 宋詞六十一首

謝懋

字勉仲。有靜寄居士樂章二卷。

黃叔暘云。居士樂章二卷。吳坦角明爲序。稱其片言隻字。夏玉鏗金。蘊藉風流。爲世所貴。

石州引

日脚斜明。秋色半陰。人意淒楚。飛雲特地凝愁。做弄晚來微雨。誰家別院。舞困幾葉霜紅。西風送客聞砧杵。鞭馬出都門。正潮平洲渚。無語。匆匆短棹。滿載離愁。片帆高舉。京洛紅塵。因念幾年羈旅。淺顰輕笑。當時風月逢迎。別來誰畫雙眉嫵。回首一銷凝。望歸鴻容與。

洞仙歌春用

愁邊雨細。漠漠天如醉。搖颺游絲晚風外。釀輕寒和暝色。花柳難勝。春自老。誰管啼紅斂翠。關情潛入夜。斜濕簾櫳。幾處挑燈耿無寐。念陽臺。當日事。好伴雲來。因箇甚。不入襄王夢裏。便添起。寒潮捲長江。又恐是離人。斷腸清淚。

念奴嬌中秋呈徐叔至

霽天湛碧。正新涼風露。冰壺清徹。河漢無聲光練練。湧出銀蟾孤絕。巖桂香飄。井梧影轉。冷浸宮袍潔。西廂往事。一簾輕夢悽切。腸斷楚峽雲歸。尊前無緒。知有愁如髮。此夕姮娥應也恨。冷落瓊樓金闕。禁漏迢迢。邊鴻杳杳。幽意憑誰決。闌干星斗。落梅三弄初闕。

憶少年 寒食

池塘綠遍。王孫芳草。依依斜日。遊絲捲晴晝。繫東風無力。蜨趁幽香蜂釀蜜。秋千外。臥紅堆碧。心情費消遣。更梨花寒食。

黃

機

字幾仲。一云字幾叔。東陽人。有竹齋詩餘一卷。

乳燕飛 次岳總幹韻

擊碎珊瑚樹。爲留春。怕春欲去。駛如風雨。春不留兮君休問。付與流鶯白語。但莫賦。綠波南浦。世上功名花梢露。政何如。一笑翻金縷。繫白日。莫教暮。蒼頭引馬城西路。趁池亭。荻芽尙短。梅心未苦。小雨欲晴晴不定。漠漠雪飛輕絮。算行樂。春來幾度。鞭影不搖鞍小據。過橫塘。試把前山數。雙白鷺。忽飛去。

摸魚兒

惜春歸。送春惟有。亂紅撲簌如雨。亂紅也。怨春狼籍。搵得淚痕無數。腸斷處。更喚起。羣鴉催發長亭路。征鞍難駐。但脈脈含顰。嗔人底事。剛愛逐春去。闌干凭。芳草斜陽凝竚。愁連滿眼烟樹。髻鬆不理金釵溜。鸞鏡一奩香霧。花誰主。悵玉容。寂寞春知否。單衣嬾卸。任門外東風。流鶯聲裏。盡日攪飛絮。

喜遷鶯 香風亭上

平湖百畝。種滿湖蓮葉。繞堤楊柳。冉冉波光。輝輝烟影。空翠濕霑襟袖。靜愜鄰雞啼午。暝逼沙鷗眠晝。西園路。更紅塵不斷。蜨酣蜂瘦。知否堪畫。

處野薺蕪菁。胷地鋪茵繡。桃李陰邊。桑麻叢裏。斜矗酒帘誇酒。竹寺小依山路。茅店平窺津口。春又晚。正香風有客。倚欄搔首。

水龍吟

晴江滾滾東流。爲誰流得新愁去。新愁都在。長亭望際。扁舟行處。歌罷翻香。夢回呵酒。別來無據。恨荼蘼吹盡。櫻桃過了。便只恁。成孤負。須信情鍾易感。數良辰。佳期應誤。才高自歎。彩雲空詠。凌波謾賦。團扇塵生。吟箋淚漬。一觴慵舉。但叮嚀雙燕。明年還解。寄平安否。

鵲橋仙

一番雨過。江頭綠漲。催喚扁舟解去。重來言語縱堪憑。一作是相寬。怎得似而今且住。陽關聲斷。同心未縮。簌簌淚珠無數。秋鴻春燕往還時。莫忘了。錦箋分付。

醉江月

春愁幾許。似春雲藹藹。連空無數。隱約眉尖偏易得。沒箇因由分付。楊柳烟濃。海棠花暗。綠漲牆頭路。小樓應是。有人和淚凝竚。長記寶軸妝成。鴛鴦繡幰。輕笑歌金縷。香雪精神依舊否。風月誰憐虛度。帶減衣寬。十分顛顛。兩下平分取。黃昏可更。子規聲碎烟塢。

傳言玉女次岳總幹韻

日薄風柔。池面欲平還皺。紋楸玉子。磔磔敲春晝。繡衾半捲。花氣濃熏香獸。小團初試。轆轤銀甃。夢斷陽臺。甚情懷似病酒。冰奩羞對。比年時更

瘦。雙燕乍歸。寄與綠箋紅豆。那堪又是牡丹時候。

清平樂

西園啼鳥。留得春多少。客裏情懷無日好。愁損連天芳草。博山灰冷香殘。微風吹滿銀箋。卓午花陰不動。一雙蝴蝶團圓。

又江上九日

西風獵獵。又是登高節。一片情懷無處說。秋滿江頭紅葉。誰憐鬢影淒涼。新來更點吳霜。孤負萸囊菊盞。年年客裏重陽。

憶秦娥

秋蕭索。梧桐落盡西風惡。西風惡。數聲新雁。數聲殘角。離愁不管人飄泊。年年孤負黃花約。黃花約。幾重庭院。幾重簾幕。

蝶戀花

碧樹涼颼驚畫扇。窗戶齊開。秋意參差滿。先自離愁裁不斷。蛩螿更作聲聲怨。山繞千重溪百轉。隔了溪山。夢也無由見。歸計憑誰占近遠。銀缸昨夜花如糝。

醜奴兒

綺窗撥斷琵琶索。一一相思。一一相思。無限柔情說似誰。銀鈎欲寫回文曲。淚滿烏絲。淚滿烏絲。薄倖知他知不知。

劉

鎮

字叔安。南海人。嘉泰二年進士。自號隨如。學者稱為隨如先生。

劉潛夫云。叔安樂府。麗不至褻。新不犯陳。周柳辛陸之能事。庶乎兼之。

漢宮春鄭質守席上懷舊

日軟風柔。望暖紅連島。晴綠平川。尋芳拾蕊勝伴。陌上鮮妍。玉驄歸路。記青門。會墮吟鞭。人去後。庭花弄影。一簾香月娟娟。追念舊游何在。歎佳期虛度。錦瑟華年。博山夜來燼冷。誰換沉烟。屏幃半掩。奈夢雲不到愁邊。春易老。相思無據。閑情分付魚箋。

水龍吟丙戌清明和章質夫韻

弄晴臺館收烟候。時有燕泥香墜。宿醒未解。單衣初試。騰騰春思。前度桃花。去年人面。重門深閉。記彩鸞別後。青驄歸去。長亭路。芳塵起。十二屏山遍倚。任蒼苔點紅如綴。黃昏人靜。暖香吹月。一簾花碎。芳意婆娑。綠陰風雨。畫橋烟水。笑多情司馬。留春無計。濕青衫淚。

浣溪沙丁亥餞元宵

簾幕收燈斷續紅。歌臺人散彩雲空。夜寒歸路噤魚龍。宿醉未消花市月。芳心已逐柳塘風。丁寧鶯燕莫匆匆。

清平樂趙園避暑

柳陰庭院。簾約風前燕。著雨荷花紅半斂。消得盈盈綠扇。竹光野色生寒。玉纖雪藕冰盤。長記酒醒人靜。暗香吹月闌干。

危

稹字逢吉。臨川人。淳熙進士。歷屯田郎。出知漳州。有巽齋集。

漁家傲

老去諸餘情味淺。詩情不上閑釵釧。寶幌有人紅兩靨。簾間見。紫雲元在

深深院。十四條絃音調遠。柳絲不隔芙蓉面。秋入西窗風露晚。歸去懶。酒酣一任烏巾岸。

吳禮之 字子和。錢唐人。有順受老人詞五卷。

蝶戀花

滿地落紅初過雨。綠樹成陰。紫燕風前舞。烟草低迷縈小路。晝長人靜扃朱戶。沉水香銷新剪苧。敲枕朦朧。花底聞鶯語。春夢又還隨柳絮。等閑飛過東牆去。

霜天曉角

西風又急。細雨黃花濕。樓枕一篙烟水。蘭舟漾。畫橋側。念昔空淚滴。故人何處覓。魂斷菱歌淒怨。疎簾外。暮山碧。

又王生陶氏月夜共汎西湖賦此弔之

連環易闕。難解同心結。癡駭佳人才子。情緣重。怕離別。意切人路絕。共沉烟水闊。蕩漾香魂何處。長橋月。短橋月。

劉光祖 字德脩。簡州人。登進士第。慶元初。官侍御史。改司農少卿。遷起居郎。終顯謨閣直學士。提舉嵩

山崇福宮。卒諡文節。有鶴林詞一卷。

醉落魄

春風開者。一時還共春風謝。柳條送我今槐夏。不飲香醪。孤負人生也。曲塘泉細幽琴寫。胡牀滑篋應無價。日遲睡起疎簾挂。何不歸歟。花竹秀而野。

洞仙歌荷花

晚風收暑。小池塘荷淨。獨倚胡牀酒初醒。起徘徊。時有香氣吹來。雲藻亂。葉底游魚動影。空擎承露蓋。不見冰容。惆悵明妝曉鸞鏡。後夜月涼時。月淡花低。幽夢覺。欲憑誰省。且應記。臨流凭闌干。便遙想江南。紅酣千頃。

昭君怨

人在醉鄉居住。記得舊會來去。疎雨聽芭蕉。夢魂遙。惆悵柳烟何處。日

閻丘次杲

朝中措

橫江一抹是平沙。沙上幾千家。到得人家盡處。依然水接天涯。危欄送目。翩翩去鷁。點點歸鴉。漁唱不知何處。多應只在蘆花。

馬莊父

字子嚴。建安人。自號古洲居士。

二郎神

柳花
日高睡起。又恰見。柳梢飛絮。倩說與。年年相挽卻。又因他相誤。南北東西。何時定。看碧沼青浮無數。念蜀郡風流。金陵年少。那尋張緒。應許。雪花比並。撲簾堆戶。更羽綴游絲。氈鋪小徑。腸斷鶉鳩喚雨。舞態顛狂。恨腰輕怯。散了幾回重聚。空暗想。昔日長亭別酒。杜鵑催去。

朝中措

竹
龍孫脫穎破苔紋。英氣欲凌雲。深處未須留客。春風自掩柴門。蒲團宴

坐。輕敲茶臼。細撲爐薰。彈到琴心三疊。鷓鴣啼傍黃昏。

孤鸞

沙堤香軟。正宿雨初收。落梅飄滿。可奈東風暗逐。馬蹄輕捲。湖波又還漲。綠粉牆陰。日融烟暖。驀地刺桐枝上。有一聲春喚。任酒帘飛動。畫樓晚。便指數燒燈。時節非遠。陌上叫聲。好是賣花行院。玉梅對妝雪柳。鬧蛾兒。象生嬌顫。歸去爭先戴取。倚寶釵雙燕。

李

洪

字子大。廬陵人。與弟漳詠。注浙。著李氏花萼集五卷。其姪直倫爲之序。

浪淘沙櫻桃

上苑又春殘。櫻顆如丹。明光宮裏水晶盤。想得退朝花底散。宣賜千官。往事記金鑿。荔子難攀。多情更有酪漿寒。蜀客筠籠相贈處。愁憶長安。

李

詠

字子永。洪弟。

賀新郎感舊

門掩長安道。捲重簾。垂楊散暑。嫩涼生早。午夢驚回。庭陰翠。蝶舞鶯吟未了。正露冷。芙蓉池沼。金雁塵昏。幺絃斷。理餘音。尙想腰肢。裊。歡漸遠。思還繞。臨臯望極。滄江渺。晚潮平。湘烟萬頃。斷虹殘照。彩舫凌波分飛後。別浦菱花自老。問錦鯉。何時重到。樓迴層城。看不見。對瀟瀟。暮雨憐芳草。幽恨闊。楚天杳。

水調歌頭題甘將軍廟卷雪樓

危樓雲雨上。共下水扶天。羣山四合。飛動寒翠。落簷前。盡是清秋。闌檻。一

笑波翻濤怒。雪陣卷蒼烟。炎暑去無迹。清駛久翩翩。夜將闌。人欲靜。月初圓。素娥弄影光射。空際渺嬋娟。不用濯纓垂釣。喚取龍宮仙駕。耕此萬瓊田。橫笛望中起。吾意已超然。

李

漳

字子清。一作子申。洪弟。

多麗

好人人。去來欲見無因。記當時。竊香倚煖。豈期蝶散鷓分。到而今。漫勞夢想。歎後會。慘啼痕。繡閣銀屏。知他何處。一重山盡。一重雲。暮天杳。梗踪萍跡。還是寄孤村。寂寥月。今宵爲誰。虛照黃昏。細追思。深誠密意。黯然一餉銷魂。仗游魚。謾傳尺素。望塞鴻。空憶回紋。帳衾寒。香銷塵滿。博山沉水。更誰薰。斷腸也。無聊情味。唯是清芳樽。沉吟久。移燈向壁。掩上重門。

李

浙

字子秀。洪弟。

踏莎行 送新城交代李達善

紅藥香殘。綠筠粉嫩。春歸何處尋春信。繡鞍初上馬蹄輕。舉頭便覺長安近。別酒無情。啼妝有恨。山城向晚斜陽褪。清江極目帶寒烟。錦鱗去後憑誰問。

鄭

域

字中卿。號松窗。三山人。慶元中。曾使金。著燕谷剽聞。

念奴嬌 戊午生日作

嗟來咄去。被天公把做。小兒調戲。蹀雪龍庭歸未久。還促炎州行李。不半年間。北口南越。一萬二千里。征衫著破。著衫人可知矣。休問海角天涯。

黃蕉丹荔。白足供甘旨。泛綠依紅無箇事。時舞斑衣而已。救蟻藤橋。養魚盆沼。是亦經綸耳。伊周安在。且須學老萊子。

戴復古 字式之。天台人。陸游門人。有石屏集詞一卷。

清平樂興國軍呈李司直

今朝欲去。忽有留人處。說與江頭楊柳樹。繫我扁舟且住。十分酒興詩腸。難禁冷落秋光。借取春風一笑。狂夫到老猶狂。

黃 銖 字子厚。建安人。有穀城集。

江神子晚泊分水

秋風嫋嫋夕陽紅。晚烟濃。暮雲重。萬疊青山。山外叫歸鴻。獨上高樓三百尺。憑玉楯。睇層空。人間日月去匆匆。碧梧桐。又西風。北去南來。消盡幾英雄。擲下玉尊天外去。多少事。不言中。

漁家傲朱晦翁示歐陽公鼓子詞戲賦

永日離憂千萬緒。雪舟遠汎清漳浦。珍重故人寒夜語。揮玉塵。沉沉晝閣凝香霧。風砌落花留不住。紅蜂翠蝶閑飛舞。明日柳陰江上路。雲起處。蒼山萬疊人歸去。

巖 仁 字次山。邵武人。與同族巖羽巖參。時稱邵武二巖。有清江歎乃一卷。

黃叔暘云。次山詞。極能道閨閣之趣。

玉樓春

春風只在園西畔。薺菜花繁蝴蝶亂。冰池晴綠照還空。香徑落紅吹已斷。

意長翻恨遊絲短。盡日相思羅帶緩。寶奩如月不欺人。明日歸來君試看。

好事近 舟行

曉色未分明。敲動月邊鼉鼓。卯酒一杯徑醉。又別君南浦。春江如席照晴空。大舶夾雙櫓。陽斷斜陽渡口。正落紅如雨。

一落索

清曉鶯啼紅樹。又一雙飛去。日高花氣撲人來。獨自個。傷春無緒。別後暗寬金縷。倩誰傳語。一春不忍上高樓。爲怕見。分攜處。

鷓鴣天

一曲危絃斷客腸。津橋捩柁轉牙樞。江心雲帶蒲帆重。樓上風吹粉淚香。瑤草碧。柳芽黃。載將離恨過瀟湘。請君看取東流水。方識人間別意長。

又

行盡春山春事空。別愁離恨滿江東。三更鼓潤官樓雨。五夜燈殘客舍風。寒淡淡。曉朦朧。黃雞催斷丑時鐘。紫騮嚼勒金銜響。衝破飛花一道紅。

易

袂

字彥祥。一作彥章。長沙人。一云寧鄉人。寧宗朝。賜進士第一。累官禮部尚書。有山齋集。

驀山溪

海棠枝上。留得嬌鶯語。雙燕幾時來。並飛入。東風院宇。夢回芳草。綠遍舊池塘。梨花雪。桃花雨。畢竟春誰主。東郊拾翠。襟袖霑飛絮。寶馬趁雕輪。亂紅中。香塵滿路。十千斗酒。相與買春同。吳姬唱。秦娥舞。拚醉青樓暮。

趙善扛 字文鼎。宗室。號解林居士。

重疊金

玉關芳草黏天碧。春風萬里思行客。嬌馬向風嘶。道歸猶未歸。南雲新
有鴈。望眼愁邊斷。膏沐爲誰容。倚樓烟雨。中。

十拍子上巳

柳絮飛時綠暗。荼蘼開後春酣。花外青帘迷酒思。陌上晴光收翠嵐。佳辰
三月三。解珮人逢游女。踏青草鬪宜男。醉倚畫欄。檻檻北。夢繞清江江
水南。飛鸞與共驂。

宴清都 饒明遠兄縣丞榮滿赴調

疎柳無情緒。都不管。渡頭行客欲去。猶依賴得。玉光萬頃。爲人留住。相從
歲月如驚。歎回首。離歌又賦。更舉目。斜照沉沉。西風剪剪。秋墅。君行定
憶南池。歌筵舞地。花晨月午。入甄步日。三雍奏樂。送君雲路。別情未抵遺
愛。試聽取。湖山共語。便可能。無意同傾。一尊露醕。

賀新郎

晝永重簾捲。乍池塘。一番過雨。芰荷初展。竹引新梢半含粉。綠蔭扶疎滿
院。過花絮。蜨稀蜂懶。窗戶沉沉人不到。伴清幽。時有流鶯轉。凝思久。意何
限。玉釵墜枕風鬟顫。湛虛堂。壺冰瑩徹。簟波零亂。自是仙姿清無暑。月
影空隨素扇。破午睡。香銷餘篆。一枕湖山千里夢。正白蘋。烟棹歸來晚。雲
弄碧。楚天遠。

毛 升 字平仲。信安人。仕止州倅。有樵隱詞一卷。

滿庭芳自宛陵易倅東陽留別諸同寮

世事難窮。人生無定。偶然蓬轉萍浮。爲誰教我。徙宦到東州。還似翩翩海燕。舞春至。歸及涼秋。回頭笑。渾家數口。又泛五湖舟。悠悠當此去。黃童白叟。莫謾相留。但谿山好處。深負重游。珍重諸公送我。臨歧淚。欲語先流。應須記。從今風月。相憶在南樓。

滿江紅

潑火初收。秋千外。輕烟漠漠。春漸遠。綠楊芳草。燕飛池閣。已著單衣寒食後。夜來還是東風惡。對空山。寂寂杜鵑啼。梨花落。傷別恨。閑情作。十載事。驚如昨。向花前月下。共誰行樂。飛蓋低迷南苑路。滿裙悵望東城約。但老來。顛顛賴惜春心。年年覺。

謁金門

春已半。芳草池塘綠遍。山北山南花爛熳。日長蜂蝶亂。閑掩屏山六扇。夢好強教驚斷。愁對畫梁雙語燕。故人心不見。

畫堂春

華燈收盡雪初殘。踏青還爾游盤。落梅強半已飛翻。剗地春寒。多病故人日遠。幾時雙燕來還。可憐樓上一凭欄。不見長安。

王 楙

一作或。字子文。號潛齋。金華人。以父介陰補官。嘉定十二年進士第。寶祐初。拜端明殿學士。僉書樞密院事。封吳郡侯。卒贈七官位特進。

西河

天下事。問天怎忍如此。陵圖誰把。獻君王。結愁未已。少豪氣。槩總成塵。空
餘白骨黃葦。千古恨。吾老矣。東游會弔淮水。繡春臺上一回登。一回搵
淚。醉歸撫劍倚西風。江濤猶壯人意。只今袖手野色裏。望長淮。猶二千
里。縱有英心誰寄。近新來。又報烽烟起。絕域張騫歸來未。

曹

豳

字西士。號東畝。瑞安人。嘉泰二年進士第。累官左司諫。以論事忤旨。遷起居郎。進禮部侍郎。以
寶章閣待制致仕。諡文恭。

西河和王潛齋韻

今日事。何人弄得如此。漫漫白骨蔽川原。恨何日已。關河萬里寂無烟。月
明空照蘆葦。謾哀痛。無及矣。無情莫問江水。西風落日慘新亭。幾人墮
淚。戰和何者是良籌。扶危但看天意。只今寂寞藪澤裏。豈無人。高臥閭
里。試問安危誰寄。定相將。有詔催公起。須信前書言猶未。

洪咨夔

字舜俞。於潛人。嘉定二年進士。累遷吏部侍郎。兼給事中。進刑部尚書。拜翰林學士。知制誥。加
端明殿學士。卒。贈兩官。有平齋集詞一卷。

眼兒媚

平沙芳草渡頭村。綠遍去年痕。遊絲下上。流鶯來往。無限銷魂。
綺窗深。靜人歸晚。金鴨水沉溫。海棠影下。子規聲裏。立盡黃昏。

趙汝汝

字叔午。樂清人。嘉定中登第。僉判雷州。以詩忤權要。謫官。尋卒。

清平樂

初鶯細雨。楊柳低愁縷。烟浦花橋如夢裏。猶記倚樓別語。小屏依舊圍香。恨拋薄醉殘妝。判卻寸心雙淚。爲他花月淒涼。

章穎 字茂獻。臨江軍人。第進士。累官禮部尚書。兼侍讀。贈光祿大夫。謚文肅。

小重山

柳暗花明春事深。小欄紅芍藥。已抽簪。雨餘風軟碎鳴琴。遲遲日。猶帶一分陰。把酒莫沉吟。身閑無個事。且登臨。舊游何處不堪尋。無尋處。惟有少年心。

郭應祥 字承禧。臨江人。嘉定間進士。官楚越間。有笑笑詞一卷。

玉樓春

匆匆相遇匆匆去。恰似當初元未遇。生憎黃土嶺頭塵。強學章臺街裏絮。雨荒三徑雲迷路。總是離人堪恨處。從今對酒與常歌。空惹離情千萬緒。

陸恣 字子逸。會稽人。左丞相之孫。耆舊續聞稱爲陸辰州。

瑞鶴仙

臉霞紅印枕。睡起來。冠兒猶是不整。屏間麝煤冷。但眉山壓翠。淚珠彈粉。堂深晝永。燕交飛。風簾露井。悵無人與說。相思近日。帶圍寬盡。重省殘燈朱幌。淡月疎窗。那時風景。陽臺路迴。雲雨夢。便無準。待歸來。先指花梢教看。卻把心期細問。問因循過了。青春怎生意穩。

張叔夏云。景中帶情。屏去一切浮

豔。

卷十七 宋詞六十首

盧祖臯

字申之。永嘉人。一云邛州人。慶元中登第。嘉定中爲軍器少監。有蒲江集詞一卷。黃叔暘云。蒲江樂章甚工。字字可入律呂。

倦尋芳

香泥壘燕。密葉巢鶯。春晴寒淺。花徑風柔。著地舞裯紅軟。鬪草烟欺羅袂薄。秋千影落春遊倦。醉歸來。記寶帳歌慵。錦屏香暖。別來悵。光陰容易。還又荼蘼。牡丹開遍。妒恨疎狂。那更柳花迎面。鴻羽難憑芳信短。長安猶近。歸期遠。倚危樓。但鎖日。繡簾高捲。

西江月

燕掠晴絲裊裊。魚吹水葉粼粼。禁街微雨灑芳塵。寒食清明相近。謾著宮羅試煖。閑呼社酒酬春。晚風簾幕悄無人。二十四番花信。

清平樂

柳邊深院。燕語明如剪。消息無憑聽又懶。隔斷畫屏雙扇。寶盃金縷紅牙。醉魂幾度兒家。何處一春游蕩。夢中猶恨楊花。

烏夜啼

段段寒沙淺水。蕭蕭暮雨孤篷。香羅不共征衫遠。砧杵客愁中。別恨慵看楊柳。歸期暗數芙蓉。碧梧聲到紗窗曉。昨夜已秋風。

又西翺

漾煖紋波。颭颭吹晴絲。雨濛濛。輕衫短帽。西湖路。花氣撲春驄。鬪草寒
衣濕翠。秋千瞥眼飛紅。日長不放春醪困。立盡海棠風。

謁金門

蘭棹舉。相趁落紅飛去。一隙輕簾凝睇處。柳絲牽不住。昨日翠蛾金縷。
今夜碧波烟渚。好夢無憑窗又雨。天涯知幾許。

又

閑院宇。獨自行來行去。花片無聲簾外雨。峭寒生碧樹。做弄清明時序。
料理春醒情緒。憶得歸時停棹處。畫橋看落絮。

水龍吟 淮西重午

會昌湖上扁舟。幾年不醉西山路。流光又是。宮衣初試。安榴半吐。千里江
山。滿川烟草。薰風淮楚。念離騷恨遠。獨醒人去。闌干外。誰懷古。亦有魚
龍戲舞。豔晴川。綺羅歌鼓。鄉情節意。樽前同是。天涯羈旅。漲綠池塘。翠陰
庭院。歸期無據。問明年此夜。一眉新月。照人何處。

又 茶蘼

蕩紅流水無聲。暮烟細草黏天遠。低徊倦蝶。往來忙燕。芳期頓懶。綠霧迷
牆。翠虬騰架。雪明香暖。笑依依欲挽。春風教住。還疑是。相逢晚。不似梅
妝瘦減。占人間。丰神蕭散。攀條弄蕊。天涯猶記。曲欄小院。老去情懷。酒邊
風味。有時重見。對枕幃空想。東窗舊夢。帶將離恨。

洞仙歌 茉莉

玉肌翠袖。較似荼蘼瘦。幾度熏醒夜窗酒。問炎州何事。得許清涼。塵不到。一段冰壺剪就。晚來庭戶悄。暗數流光細。拾芳英。黯黯回首。念日暮江東。偏爲魂銷。人易老。幽韻清標似舊。正紋簾如波帳如烟。更奈向月明露濃時候。

鷓鴣天

庭綠初圓結蔭濃。香溝收拾樹梢紅。池塘少歇鳴蛙雨。簾幕輕迴舞燕風。春又老。笑誰同。澹烟斜日小樓東。相思一曲臨風笛。吹過雲山第幾重。

魚游春水

離愁禁不去。好夢別來無覓處。風翻征袂。觸日年芳如許。軟紅塵裏鳴鞭。鐙拾翠叢中勾伴侶。都負歲時。暗關情緒。昨夜山陰杜宇。似把歸期驚倦旅。遙知樓倚東風。凝顰暗數。寶香拂拂遺鴛錦。心事悠悠尋燕語。芳草暮寒。亂花微雨。

賀新郎 彭傳師於二高祠前作釣雪亭趙子野邀余賦之

挽住風前柳。問鴟夷。當日扁舟。近會來否。月落潮生無限事。零落茶烟未久。謾留得。尊鱸依舊。可是功名從來誤。撫荒祠。誰繼風流後。今古恨。一搔首。江涵鴈影梅花瘦。四無塵。雪飛雲凍。夜窗如畫。萬里乾坤清絕處。付與漁翁釣叟。又恰是。題詩時候。猛拍闌干呼鷗鷺。道他年。我亦垂綸手。飛過我。共樽酒。

沁園春 雙溪押韻

幾葉凋楓。半篙寒日。傍橋繫船。愛洞門深鎖。人間福地。雙溪分占。天上星躔。破帽欹寒。短鞭敲月。此地經行知幾年。空贏得似沈郎消瘦。還欠詩篇。沙鷗伴我愁眠。向水驛。風亭紅蓼邊。有村醪可飲。且須同醉。溪魚堪鱸。切莫論錢。笠澤陂頭。垂虹亭上。橙蟹肥時霜滿天。相隨否。算江南江北。惟有君閑。

高觀國

字賓王。山陰人。有竹屋癡語一卷。

陳唐卿云。竹屋梅谿詞。要是不經人道語。其妙處。少游美成亦未及也。張叔夏云。竹屋白石。邦卿夢窗。格調不凡。句法挺異。俱能特立清新之意。刪削靡曼之詞。自成一派。

蘭陵王春用

灑塵閣。冪冪天垂似幕。春寒峭。吹斷萬絲。濕影和烟暗。簾箔。清愁曉來覺。佳景悵悵過卻。芳郊外。鶯恨燕愁。不管秋千冷紅索。行雲楚臺約。念今古凝情。朝暮如昨。啼紅濕翠。春情薄。謾一犁江上。半篙堤外。勾引輕陰趁。畫角。正孤緒寂寞。斑駁。止還作。聽點點簷聲。沉沉春酌。只愁入夜東風惡。怕催教花放。攢將花落。溟濛烟草夢正遠。恨怎託。

御街行詠鞠

藤筠巧織花紋細。稱穩步。如流水。踏青陌上雨初晴。嫌怕濕文鴛雙履。要人送上。逢花須住。纔過處。香風起。裙兒挂在簾兒裏。更不把。窗兒閉。紅紅白白簇花枝。恰稱得。尋春芳意。歸來時晚。紗籠引道。扶下人微醉。

又賦簾

香波半窄深深院。正日上。花陰淺。青絲不動玉鈎閑。看翠額輕籠葱蒨。鶯聲似隔。篆烟微度。愛橫影。參差滿。那回低挂朱欄畔。念悶損。無人捲。窺春偷倚不勝情。彷彿見。如花嬌面。纖柔緩揭。瞥然飛去。不似春風燕。

玲瓏四犯

水外輕陰。做弄得飛雲。吹斷晴絮。駐馬橋西。還繫舊時芳樹。不見翠陌尋春。漫問著。小桃無語。恨燕鶯。不識閑情。卻隔亂紅飛去。少年會失春風意。到如今。怨恨難訴。魂驚冉冉江南遠。烟草喚愁如許。此意待寫翠箋。奈斷腸。都無新句。問甚時舞鳳。歌鸞花底。再看仙侶。

菩薩蠻

春風吹綠湖邊草。春光依舊湖邊道。玉勒錦障泥。少年游冶時。烟明花似繡。且醉旗亭酒。斜日照花西。歸鴉花外啼。

解連環柳

露條烟葉。惹長亭舊恨。幾番風月。愛細縷。先窄輕黃。漸拂水藏鴉。翠陰相接。纖軟風流。眉黛淺。三眠初歇。奈年華又晚。紫絆游蜂。絮飛晴雪。依依灞橋怨別。正千絲萬緒。難禁愁絕。悵歲久。應長新條。念會繫花驄。屢停蘭楫。弄影搖晴。恨閑損。春風時節。隔郵亭。故人望斷。舞腰瘦怯。

燭影搖紅

別浦潮平。遠村帆落烟江冷。征鴻相喚著。行飛。不耐霜風緊。雪意垂垂未定。正慘慘。雲橫疎影。酒醒情緒。日晚登臨。淒涼誰問。行樂京華。軟紅不

斷香塵噴。試將心事卜歸期。終是無憑準。寥落年華將盡。誤玉人。高樓凝恨。第一休負。西子湖邊。江梅春信。

喜遷鶯

涼雲歸去。再約著晚來。西樓風雨。水靜簾陰。鷗閑菰影。秋到露汀烟浦。試省喚回幽恨。盡是愁邊新句。倦登眺。動悲涼還在。殘蟬吟處。淒楚空見。訴香鎖霧局。心似秋蓮苦。寶瑟彈冰。玉臺窺月。淺黛可憐偷聚。幾時翠瀾題葉。無復繡簾吹絮。鬢華晚。念庾郎情在。風流誰與。

霜天曉角

春雲粉色。春水和烟濕。試問西湖楊柳。東風外。幾絲碧。望極連翠陌。蘭橈雙槳急。欲訪莫愁何處。旗亭在。畫橋側。

卜算子

屈指數春來。彈指驚春去。檐外蛛絲網落花。也要留春住。幾日喜春晴。幾夜愁春雨。十二雕窗六曲屏。題徧傷春句。

少年遊草

春風吹碧。春雲映綠。曉夢入芳茵。軟襯飛花。遠連流水。一望隔香塵。萋萋多少。江南舊恨。翻憶翠羅裙。冷落閑門。淒迷古道。烟雨正愁人。

齊天樂

碧雲闕處無多雨。愁與去帆俱遠。倒葦沙閑。枯蘭砌冷。寥落寒江秋晚。樓陰縱覽。正魂怯清吟。病多消黯。怕揖西風。袖羅香自去年減。風流江左。

久客。舊游得意處。朱簾會卷。載酒春情。吹簫夜約。猶憶玉嬌香軟。塵樓故苑。歎壁月空簷。夢雲飛觀。送絕征鴻。楚峯烟數點。

又中秋夜懷梅谿

晚雲知有關山念。澄霄卷開清霽。素景中分。冰盤正盜。何啻嬋娟千里。危欄靜倚。正玉管吹涼。翠觴留醉。記約清吟。錦袍初喚醉魂起。孤光天地共影。浩歌誰與舞。淒涼風味。古驛烟寒。幽垣夢冷。應念秦樓十二。歸心對此。想斗插天南。鴈橫遼水。試問姮娥。有愁能爲寄。

玉樓春

春烟淡淡生春水。會記芳洲蘭棹艤。岸花香到舞衣邊。汀草色分歌扇底。棹沉雲去情千里。愁壓雙鴛飛不起。十年春事十年心。怕說濺裙當日意。

永遇樂 次韻弔青樓

淺暈脩蛾。脆痕紅粉。猶記窺戶。香斷奩空。塵生砌冷。誰喚青鸞舞。春風花信。秋宵月約。歷歷此心會許。銜芳恨。千年怨結。玉骨未應成土。木蘭艇子。莫愁何在。謾繫寒江烟樹。事逐雲沉。情隨珮冷。短夢分今古。一杯遙夜。孤光難曉。多少碎人腸處。空淒黯。西風細雨。盡吹淚去。

金人捧露盤

楚宮閑。金成屋。玉爲欄。斷雲夢。容易驚殘。驪歌幾疊。至今愁思怯陽關。清音恨阻。抱哀箏。知爲誰彈。年華晚。月華冷。霜華重。鬢華斑。也須念。閑損

雕鞍斜減小字。錦江三十六鱗寒。此情天闊。正梅信。笛裏關山。

鳳栖梧

雲喚陰來鳩喚雨。謝了江梅。可踏江頭路。拚卻一番花信阻。不成日日春寒去。見說東風桃葉渡。岸隔青山。依舊橫眉嫵。歸鴈不如箏上柱。一行常見相思苦。

賀新郎梅

月冷霜袍擁。見一枝。年華又晚。粉愁香凍。雲隔溪橋人不度。的皜春心未縱。清影怕。寒波搖動。更沒纖毫塵俗態。倚高情。預得春風寵。沉凍蝶。挂么鳳。一杯正要吳姬捧。想見那。柔酥弄白。暗香偷送。回首羅浮今在否。寂寞烟迷翠壠。又爭奈。桓伊三弄。開遍西湖春意爛。算羣花。正作江山夢。吟思怯。暮雲重。

祝英臺近荷花

擁紅妝。翻翠蓋。花影暗南浦。波面澄霞。蘭艇採香去。有人水濺湘裙。相招晚醉。正月上。涼生風露。雨凝佇。別後歌斷雲閑。嬌姿黯無語。魂夢西風。端的此心苦。遙想芳臉輕顰。凌波微步。鎮輪與。沙邊鷗鷺。

清平樂

春蕪雨濕。燕子低飛急。雲壓前山羣翠失。烟水滿湖輕碧。小蓮相見灣頭。清寒不到青樓。請上琵琶絃索。今朝破得春愁。

史達祖

字邦卿。休人。有梅溪詞二卷。

姜堯章云。邦卿詞奇秀清逸。融情景于一家。會句意于兩得。張功甫云。生詞織繡泉底。去塵眼中。妥貼輕圓。辭情俱到。有瓌奇警邁。清新閑婉之長。而無詭蕩汗淫之失。端可分鑲清真。平

睨方回。

綺羅香春用

做冷欺花。將烟困柳。千里偷催春暮。盡日冥迷。愁裏欲飛還住。驚粉重。蝶宿西園。喜泥潤。燕歸南浦。最妨他。佳約風流。鈿車不到杜陵路。沉沉江上望極。還被春潮晚急。難尋官渡。隱約遙峯。和淚謝娘眉嫵。臨斷岸。新綠生時。是落紅。帶愁流處。記當日。門掩梨花。剪燈深夜語。

雙雙燕春燕

過春社了。度簾幕中間。去年塵冷。差池欲住。試入舊巢相並。還相雕梁藻井。又軟語。商量不定。飄然快拂花梢。翠尾分開紅影。芳徑。芹泥雨潤。愛貼地爭飛。競誇輕俊。紅樓歸晚。看足柳昏花暝。應自棲香正穩。便忘了。天涯芳信。愁損翠黛雙蛾。日日畫欄獨凭。

玉樓春梨花

玉容寂寞誰為主。寒食心情愁幾許。前身清淡似梅妝。遙夜依微留月住。香迷蝴蝶飛時路。雪在秋千來住處。黃昏著了素衣裳。深閉重門聽夜雨。

萬年歡

兩袖梅風。謝橋邊岸痕。猶帶陰雪。過了。匆匆燈市。草根青發。燕子春愁未

醒。誤幾處。芳音遼絕。烟溪上。采菘人歸。定應愁沁花骨。非于厚情易歇。奈燕臺句老。難道離別。小徑吹衣。會記故里風物。多少驚心舊事。第一是。侵墜羅襪。如今但。柳髮晞春。夜來和露梳月。

壽樓春尋春服感念

裁春衫尋芳。記金刀素手。同在晴窗。幾度因風殘絮。照花斜陽。誰念我。今無裳。自少年。消磨疎狂。但聽雨挑燈。敲牀病酒。多夢睡時妝。飛花去。良宵長。有絲闌舊曲。金譜新腔。最恨湘雲人散。楚蘭魂傷。身是客。愁爲鄉。算玉簫。猶逢韋郎。近寒食。人家。相思未忘蘋藻香。

祝英臺近

落花深。芳草暗。春到斷腸處。金勒驕風。欲過大堤去。翠樓葛嶺西邊。恰如舊約。畫欄映。一枝瓊樹。正凝佇。芳意欺月。矜春。渾欲便偷去。多少鶯聲。不敢寄愁與。謝郎日日西湖。如今歸後。幾時見。倚簾吹絮。

西江月

西月澹窺樓角。東風暗落簷牙。一燈初見影窗紗。又是重簾不下。幽思屢隨芳草。閑愁又似楊花。楊花芳草遍天涯。繡被春寒夜夜。

夜行船正月十八日聞賣杏花有感

不剪春衫愁意態。過收燈。有些寒在。小雨空簾。無人深巷。已早杏花先賣。白髮潘郎寬沈帶。怕看山。憶他眉黛。草色拖裙。烟光染鬢。長記故園挑菜。

蝶戀花

二月東風吹客袂。蘇小門前。楊柳如腰細。胡蝶識人遊冶地。舊會來處花開未。幾夜湖山生夢寐。萍泊尋芳。只怕春寒裏。今歲清明逢上巳。相思先到濺裙水。

臨江仙

草脚青回細膩。柳梢綠轉苗條。舊遊重到合魂銷。棹橫春水渡。人凭赤欄橋。歸夢有時會見。新愁未肯相饒。酒香紅被夜迢迢。莫教無用月。來照可憐宵。

又

倦客如今老矣。舊遊可奈春何。幾會湖上不經過。看花南陌醉。駐馬翠樓歌。遠眼愁隨芳草。湘裙憶著春羅。枉教裝得舊時多。向來簫鼓地。會見柳婆娑。

八歸

秋江帶雨。寒沙縈水。人瞰畫樓愁獨。烟蓑散響驚詩思。還被亂鷗飛去。秀句難續。冷眼盡歸圖畫上。認隔岸。微茫雲屋。想半屬。漁市樵村。欲暮競燃竹。須信風流未老。憑持酒。慰此淒涼心目。一鞭南陌。數篙官渡。賴有歌眉舒綠。只匆匆遠眺。早覺閑愁挂喬木。應難禁。故人天際。望徹淮山。相思無鴈足。

過龍門

醉月小紅樓。錦瑟篁篴。夜來風雨曉來收。幾點落花饒柳絮。同爲春愁。寄信問晴鷗。誰在芳洲。綠波寧處有蘭舟。獨對舊時攜手地。情思悠悠。

秋霽

江水蒼蒼。望倦柳愁荷。共感秋色。廢閣先涼。古簾空暮。鴈程最嫌風力。故園信息。愛渠入眼南山碧。念上國。誰是鱸鱸江漢未歸客。還又歲晚。瘦骨臨風。夜聞秋聲。吹動岑寂。露蛩鳴。清燈冷屋。翻書愁上鬢毛白。年少俊遊。渾斷得。但可憐處。無奈萋萋驚魂。採香南浦。剪梅烟驛。

惜黃花定興道中

涵秋寒渚。染霜丹樹。尙依稀。是來時。夢中行路。時節正思家。遠道仍懷古。更對著。滿城風雨。黃花無數。碧雲欲暮。美人兮。美人兮。未知何處。獨自捲簾櫳。誰爲開尊俎。恨不得。御風歸去。

齊天樂賦橙

犀紋隱隱鶯黃嫩。籬落翠深偷見。細雨重移。新霜試摘。佳處一年秋晚。荆江未遠。想橘友荒涼。木奴嗟怨。就說風流。草泥來趁蟹螯健。并刀寒映素手。醉魂沉夜飲。會倩排遣。沆瀣含酸。金罌裹玉。簌簌吳鹽輕點。瑤姬齒軟。待惜取團圓。莫教分散。入手溫存。怕羅香自滿。

又白髮

秋風早入潘郎鬢。斑斑遽驚如許。暖雪侵梳。晴絲拂領。栽滿愁城深處。瑤簪謾妒。便羞插宮花。自憐衰暮。尙想春情。舊吟屢斷茂陵女。人間公道

惟此歎朱顏也。恁容易隳去。湮了重緇。搔來更短。方悔風流相誤。郎潛幾縷。漸疎了銅駝。俊遊儔侶。縱有黶黶。奈何詩思苦。

又湖上卽席分賦得羽字

鴛鴦拂破蘋花影。低低趁涼飛去。畫裏移舟。詩邊就夢。葉葉碧雲分雨。芳游自許。過柳影閑波。水花平渚。見說西風。爲人吹恨上瑤樹。闌干斜照未滿。杏牆應望斷。春翠偷聚。淺約揆香。深盟搗月。誰是窗間青羽。孤筇幾柱。問因甚參差。暫成離阻。夜色空庭。待歸聽俊語。

夜合花

柳鎖鶯魂。花翻蝶夢。自知愁染潘郎。輕衫未攬。猶將淚點偷藏。念前事。怯流光。早春窺。酥雨池塘。向銷凝裏。梅開半面。情滿徐妝。風絲一寸柔腸。會在歌邊惹恨。燭底縈香。芳機瑞錦。如何未織鴛鴦。人扶醉。月依牆。是當初。誰敢疎狂。把閑言語。花房夜久。各自思量。

東風第一枝春雪

巧沁蘭心。偷黏草甲。東風欲障新暖。謾疑碧瓦難留。信知暮寒較淺。行天入鏡。做弄出、輕鬆纖軟。料故園、不捲重簾。誤了乍來雙燕。青未了。柳回白眼。紅欲斷。杏開素面。舊游憶著。山陰後。盟遂妨上苑。熏爐重熨。便放慢。春衫鍼線。怕鳳靴。挑菜歸來。萬一灞橋相見。

又立春

草脚愁回。一作蘇花心夢醒。鞭香拂散牛土。舊歌空憶珠簾。彩筆倦題繡戶。

黏雞貼燕。想占斷。東風來處。暗惹起。一搦相思。亂藏翠盤紅縷。今夜覓。夢池秀句。明日動。探花芳緒。寄聲沽酒人家。款一作預約嬉一作俊遊伴侶。憐他梅柳。怎忍俊。天街酥雨。待過了。一月燈期。日日醉扶歸去。張叔夏云。不獨措辭精粹。又且見時節風物之感。

風流子

紅樓橫落日。蕭郎去。幾度碧雲飛。記窗眼遞香。玉臺妝罷。馬蹄敲月。沙路人歸。如今但。一鶯通信息。雙燕說相思。入耳舊歌。怕聽金縷。斷腸新句。羞染烏絲。相逢南溪上。桃花嫩嬌樣。淺淡羅衣。恰是怨深腮赤。愁重聲遲。悵東風巷陌。草迷春恨。軟塵庭戶。花誤幽期。多少寄來芳字。都待還伊。

三姝媚

烟光搖縹瓦。望晴簷風裊。柳花如灑。錦瑟橫牀。想淚痕塵影。鳳絃長下。倦出犀帷。頻夢見。王孫驕馬。諱道相思。偷理綃裙。自驚腰袂。惆悵南樓遙夜。記翠箔張燈。枕肩歌罷。又入銅駝。遍舊家門巷。首詢聲價。可惜東風。將恨與。閑花俱謝。記取崔徽模樣。歸來暗寫。

喜遷鶯元宵

月波凝滴。望玉壺天近。了無塵隔。翠眼困花。冰絲織練。黃道寶光相直。自憐詩酒瘦難。應接許多春色。最無賴。是隨香趁燭。會伴狂客。踪跡謾記。憶老了杜郎。忍聽東風笛。柳院燈疎。梅廳雪在。誰與細傾春碧。舊情拘未定。猶自學當年游歷。怕萬一。誤玉人夜寒。窗際簾隙。

湘江靜

暮草堆青雲。浸浦。記匆匆。倦篙會駐。漁榔四起。沙鷗未落。怕愁沾詩句。碧袖一聲歌。石城怨。西風隨去。滄波蕩晚。菰蒲弄秋。還重到。斷魂處。酒易醒。思正苦。想空山。桂香懸樹。三年夢冷。孤吟意短。屢烟鐘津鼓。展齒厭登臨。移橙後。幾番涼雨。潘郎漸老。風流頓減。閑居未賦。

陽春

杏花烟。梨花月。誰與暈開春色。坊巷曉悵悵。東風斷。舊火銷處近寒食。少年踪跡。愁暗隔。水南山北。還是寶絡雕鞍被。鶯聲喚來香陌。記飛蓋西園。寒猶凝。驚醉耳。誰家夜笛。燈前重簾不挂。帶華裾。粉淚會拭。如今故里信息。賴海燕。年時相識。奈芳草。正鎖江南夢。春衫怨碧。

卷十八 宋詞六十一首

汪莘

字叔耕。休寧人。嘉定間。下詔求言。叩闕三上書。不報。為楊慈湖。朱晦庵。真西山諸公所歎服。後

築室柳溪。自號方壺居士。有方壺存稿詞二卷。

孫山甫云。柳塘長短句。似坡翁。不受音律束縛。

程洺水曰。叔耕蘊霞箋玉簡之奇。而憂深思

遠。未易遽班之賀白也。

杏花天

美人家在江南住。每惆悵江南日暮。白蘋洲畔花無數。還憶瀟湘風度。幸自是斷腸無處。怎強作鶯聲燕語。東風占斷秦箏柱。也逐落花歸去。

好事近

夾岸隘桃花。花下蒼苔如積。驀地輕寒一陣。上桃花顏色。東鄰西舍絕經過。新月是相識。白玉闌干斜倚。作蓬山春夕。

謁金門

簷漏滴。都是春歸消息。帶雨牡丹無氣力。黃鸝愁雨濕。爭看洛陽春色。忘却連天草碧。南浦綠波雙漿急。沙頭人佇立。

玉樓春贈別孟倉使

一片江南春色晚。牡丹花謝鶯聲懶。問君離恨幾多長。芳草連天猶覺短。昨夜溪頭新溜滿。樽前自起噴龍管。明朝飛棹下錢塘。心共白蘋香不斷。

憶秦娥

村南北。夜來陡覺霜風急。霜風急。征途情緒。塞垣消息。佳人獨抱琵琶泣。一江明月空相憶。空相憶。寒衣未絮。荻花狼藉。

乳燕飛感秋采楚詞賦此

去郢頻回首。正橫江。菰橈容與。蘭旌悠久。悵望龍門都不見。似把長楸辜負。念往日。佳人爲偶。獨向芳洲相思處。采蘋花。杜若空盈手。乘赤豹。誰來後。雲中眼界窮高厚。覽山川。冀州還在。陶唐何有。木葉紛紛秋風晚。縹緲瀟湘左右。見帝子。冰魂相守。應記揮絃相對日。酌一杯。太乙東皇酒。問此意。君知否。

八聲甘州

惜餘春。蚊蜨引春來。杜鵑趣春歸。算何如桃李。渾無言說。開落忘機。多謝黃鸝舊友。相逐落花飛。芳草連天遠。愁殺斜暉。誰向西湖南畔。問亭臺在否。花木應非。看孤山山下。惟說隱君廬。想錢塘春遊依舊。到梨花寒食。隘舟車。尋常事。不須惆悵。暮雨沾衣。

吳

潛

字毅夫。寧國人。嘉定十年進士第一。淳祐中。參知政事。拜右丞相。兼樞密使。進左丞相。封慶國公。改封許國公。景定初。安置循州。卒。贈少師。有履齋詩餘二卷。

滿江紅滕王閣

萬里西風。吹我上。滕王高閣。正檻外。楚山雲漲。楚江濤作。何處征帆林杪去。有時野鳥沙邊落。近簾鉤。暮雨掩空來。今猶昨。秋漸緊。添離索。天正遠。傷漂泊。歎十年心事。休休莫莫。歲月無多人易老。乾坤雖大愁難著。向黃昏。斷送客魂銷。城頭角。

醉江月瓜洲會趙南仲端明

紅塵飛騎。報元戎小隊。踏青南陌。雪浪堆邊呼曉度。吳楚半江分拆。歲月驚心。風埃眯目。相對頭俱白。楊花撩亂。可憐如此春色。誰道燕燕鶯鶯。多情猶自。認得年時客。重唱江南腸斷句。爲我滿傾雲液。畫鼓舟移。金鞍人遠。一晌烟波隔。斜陽冉冉。依然無限悽惻。

二郎神

小樓向晚。正柳鎖。一城烟雨。計十里吳山。繡簾朱戶。曾學宮詞內舞。浪逐

東風無人管。但脈脈。歲移年度。嗟往事未塵。新愁還織。怎堪重訴。凝竚。問春何事。飛紅飄絮。縱杜曲秦川。舊家都在。誰寄音書說與。野草淒迷。暮雲沉黯。渾自替人無緒。珠淚滴。應把寸腸萬結。夜帷深處。

鵲橋仙

扁舟乍泊。危亭孤嘯。目斷閑雲千里。前山急雨過溪來。盡洗卻。人間暑氣。暮鴉木末。落鳧天際。都是一番一作團秋意。癡兒騃女。賀新涼。也不道。西風又起。

青玉案

十年三二過蘇臺路。還又是匆匆去。迅景流光容易度。鷺洲鷗渚。葦汀蘆岸。總是銷魂處。蒼烟欲合斜陽暮。付與愁人砌愁句。爲問新愁愁底許。酒邊成醉。醉邊成夢。夢斷前山雨。

李昂英

一作昂英。字俊明。一云字公昂。番禺人。一云。資州人。寶慶中進士第二人。任臨汀推官。累官吏部侍郎。卒諡忠簡。有文溪詞一卷。

蘭陵王

燕穿幕。春在深深院落。單衣試。龍沫旋熏。又怕東風曉寒薄。別來情緒惡。瘦得腰圍柳弱。清明近。正似海棠。怯雨芳踪任飄泊。釵留去年約。恨易老。嬌鶯多誤靈鵲。碧雲杳。緲天涯。各望不斷芳草。又迷香絮。迴文強寫字。屢錯。淚欲注。還閣。孤酌。駐春脚。更彩局誰收。寶軫慵學。階除拾取飛花。嚼。是。多少。春恨。等閑吞卻。闌干猛拍。歎命薄。悔舊諾。

史薦之。紹定初。知江陰軍。

望海潮浮遠堂

危岑孤秀。飛軒爽豁。空江泱泱黃流。吳札故丘。春申舊國。西風吹換清秋。滄海浪初收。共登高臨眺。尊俎綢繆。鳳集高岡。駒留空谷接英游。八窗盡控瓊鉤。送帆檣杳杳。潮汐悠悠。今古興懷。關河極目。愁邊滅沒輕鷗。淮岸隔重洲。認澹霞天末。一縷青浮。未許英雄老去。西北是神州。

章謙亨

字牧叔。吳興人。爲鉛山令。

念奴嬌垂楊

垂楊得地。在樓臺側畔。無人攀折。不似津亭舟繫處。只伴客愁離別。絲過搖金帶。鋪新翠。雅稱鶯調舌。芳筵相映。最宜斜挂殘月。卻得連日春寒。未教輕滾。一片庭前雪。應恨張郎今老去。難比風流時節。醉眼渾醒。愁眉都展。舞困腰肢怯。有時微笑。把伊綰箇雙結。

趙以夫

字川父。長樂人。端平中知漳州。有虛齋樂府二卷。

孤鸞梅

江頭春早。問江上寒梅。占春多少。自照疎星冷。祇許春風到。幽香不知甚處。但迢迢。滿河烟草。回首誰家竹外。有一枝斜好。記當年會共花前笑。念玉雪襟期。有誰知道。喚起羅浮夢。正參橫月小。淒涼更吹塞管。謾相思。鬢毛驚老。待覓西湖半曲。對霜天清曉。

龍山會九日

九日無風雨。一笑凭高。浩氣橫秋宇。羣峯青可數。寒城小。一水縈迴如縷。西北最關情。謾遙指。東徐南楚。黯銷魂。斜陽冉冉。鴈聲悲苦。今朝寒菊依然。重上南樓。草草成歡聚。詩朋休浪賦。舊題處。俛仰已隨塵土。莫放酒行疎。清漏短。涼蟾當午。也全勝。白衣未至。獨醒凝竚。

角招梅

曉寒薄。苔枝上。剪成萬點冰萼。暗香無處著。立馬斷魂。晴雪籬落。溪略約。恨寄驛。音書遼邈。夢繞揚州東閣。風流舊日。何郎想。依然林壑。離索。引杯自酌。相看冷淡。一笑人如削。水雲寒漠漠。底處羣仙。飛來霜鶴。芳姿綽約。正月滿。瑤臺珠箔。徙倚闌干。寂寞。盡分付。許多愁。城頭角。

徵招雪

玉壺凍裂琅玕折。駸駸逼人衣袂。暖絮漲空飛。失前山橫翠。欲低還又起。似妝點。滿園春意。記憶當時。剡中情味。一溪雲水。天際絕人行。高吟處。依稀灞橋鄰里。更剪剪梅花。落雲階月砌。化工真解事。強勾引。老來詩思。楚天暮。驛使不來。悵曲欄獨倚。

二郎神次陳唯道

野塘暗碧。漸點點。翠鈿明鏡。想畫永珠簾。人閑金屋。時倚妝臺照影。睡起闌干凝思處。漫數盡。歸鴉栖暝。知月下鶯黃。雲邊蛾綠。爲誰重整。會倩鴈傳鵲報。心期罕定。奈柳絮浮雲。桃花流水。長是參差不並。莫怨春歸。莫愁柘老。蠶已三眠將醒。腸斷句。枉費丹青漠漠。水遙烟迥。

雙瑞蓮

千機雲錦裏。看並蒂新房。駢頭芳蕊。清標艷態。兩兩翠裳霞袂。似是商量心事。倚綠蓋。無言相對。天蘸水。彩舟過處。鴛鴦驚起。縹緲漾影搖香。想劉阮風流。雙仙姝麗。閑情未斷。猶戀人間歡會。莫待西風吹老。薦玉醴。碧筒拚醉。清露底。月照一襟歸思。

永遇樂 七夕和劉隨如

雲鴈將秋。露螢照夜。涼透窗戶。星網珠疎。月奩金小。清絕無點暑。天孫河鼓。東西相望。隱隱光流華渚。妝樓上。青瓜玉果。多少駉兒癡女。金鍼暗度。蛛絲密結。便有繫人心處。經歲離思。霎時歡愛。愁緒空萬縷。人間天上。一般情味。枉了錦箋囑付。又何似。吹笙仙子。跨黃鶴去。

鵲橋仙

翠鋪心事。紅樓歡宴。深夜沉沉無暑。竹邊荷外再相逢。又還逐、浮雲飛去。錦箋尙濕。珠香未歇。空惹閑愁千縷。尋思不似鵲橋人。猶自得、一年一度。

陳經國

嘉禧淳祐間人。有龜峯詞一卷。

沁園春 丁酉歲感事

誰使神州。百年陸沉。青氈未還。悵晨星殘月。北州豪傑。西風斜日。東帝江山。劉表坐談。深源輕進。機會失之彈指間。傷心事。是年年冰合。在在風寒。說和說戰都難。算未必。江沱堪宴安。歎封侯心在。鱣鯨失水。平戎策就。

虎豹當關。渠自無謀。事猶可做。更別殘燈抽劍看。麒麟閣。豈中興人物。不盡儒冠。

又送陳起莘歸長樂

過了梅花。縱有春風。不如早還。正燕泥日煖。草綿別路。鶯朝烟淡。柳拂征鞍。黎嶺天高。建溪雷吼。歸好不知行路難。龜山下。漸楊梅初熟。盧橘猶酸。名場老我。問關分歲晚。誅茅湖上山。歎龍舒君去。尙留破硯。魚軒人老。長把連環鏡。影霜侵。衣痕塵暗。贏得狂名傳世間。君歸日。見家林舊竹。爲報平安。

方

岳

字巨山。祁門人。理宗朝。兩爲文學掌故。官中祕書。出守袁州。有秋厓先生小稿。

臺城路和楚客賦蘆

孤蓬夜傍低叢宿。蕭蕭雨聲悲切。一岸霜痕。半山烟色。愁到沙頭枯葉。淡雲沒滅。黯西風吹老。滿汀新雪。天豈無情。離騷點點送歸客。歸去來兮。怎得。儘驚翹鷗倚。乍寒時節。秋晚山川。夕陽浦。贏得別腸千結。濤翻浪疊。那得似西來。一筇橫絕。搔首江南。鴈銜千里月。

滿江紅九日台城樓

且問黃花。陶令後。幾番重九。應解笑。秋厓人老。不堪詩酒。宇宙一舟吾倦矣。山河兩戒。君知否。倚西風。無奈劍花寒。虬龍吼。江欲醺。談天口。秋何負。持螯手。儘石麟蕪沒。斷烟衰柳。故國山圍青玉案。何人印佩黃金斗。尙只消。江左管夷吾。終須有。

水調歌頭 平山堂用東坡韻

秋雨一何碧。山色倚晴空。江南江北愁思。分付酒螺紅。蘆葉蓬舟千里。菰菜蓴羹一夢。無語寄歸鴻。醉眼渺河洛。遺恨夕陽中。蘋洲外。山欲暝。斂眉峯。人間俯仰。陳迹歎息兩仙翁。不見當時楊柳。只是從前烟雨。磨滅幾英雄。天地一孤嘯。匹馬又西風。

又九日多景樓用吳侍郎韻

醉我一壺玉。了此十分秋。江濤還比當日。擊楫渡中流。問訊重陽烟雨。俯仰人間今古。此意渺滄洲。天地幾今夕。舉白與君浮。舊黃花。新白髮。笑重游。滿船明月。猶在何日大刀頭。誰跨揚州鶴去。已怨故山猿老。借箸欲前籌。莫倚闌干北。天際是神州。

蝶戀花 用韻秋懷

鴈落寒沙秋惻惻。明月蘆花。共是江南客。騎鶴樓高邊羽急。柔情不盡淮山碧。世路只催雙鬢白。菰菜蓴羹。正自令人憶。歸夢不知江水隔。烟帆飛過平如席。

張

集

字方叔。潤州人。有芸窗詞一卷。

青玉案 被檄出郊題陳氏山居

西風亂葉溪橋樹。秋在黃花羞澀處。滿袖塵埃推不去。馬蹄濃露。雞聲淡月。寂歷荒村路。身名多被儒冠誤。十載重來慢如許。且盡清樽公莫舞。六朝舊事。一江流水。萬感天涯暮。

洪璫 字叔璫。自號空同詞客。有詞一卷。

驀山溪 憶中都

潮平風穩。行色催津鼓。回首望重城。但滿眼。紅雲紫霧。分香解佩。空記小樓東。銀燭暗。繡簾垂。昵昵凭肩語。關山千里。垂柳河橋路。燕子又歸來。但惹得。滿身花雨。彩箋不寄。蘭夢更無憑。燈影下。月明中。魂斷金釵股。

踏莎行

滿滿金盃。垂垂玉筍。離歌不放行人去。醉中扶上木蘭船。醒來忘卻桃源路。帶縮同心。釵分一股。斷魂空草高唐賦。秋山萬疊水雲深。茫茫無著相思處。

永遇樂 送春

歌雪徘徊。夢雲溶曳。欲勸春住。薄倖楊花。無端杜宇。抵死催教人。參差烟岫。千回百匝。不解禁春歸路。病厭厭。那堪更聽。小樓一夜風雨。金釵鬪草。玉盤行菜。往事了無憑據。合數松兒。分香柏子。總是牽情處。小桃朱戶。題詩在否。尙憶去年崔護。綠陰中。鶯鶯燕燕。也應解語。

瑞鶴仙

聽梅花吹動。涼夜何其。明星有爛。相看淚如霰。問而今去也。何時會面。匆匆聚散。便作秋鴻社燕。最傷心。夜來枕上。斷雲零雨何限。因念。人生萬事。回首悲涼。都成夢幻。芳心繾綣。空惆悵。巫陽館。况船頭一轉。三千餘里。隱隱高城不見。恨無情。春水連天。片帆如箭。

齊天樂

轆轤聲破銀牀凍。霜寒又侵鴛被。皓月疎鐘。悲風斷漏。驚起畫樓人睡。銀
 屏十二。歎塵滿絲簧。暗消金翠。可恨風流。故人迢遞隔千里。相思情緒
 最苦。舊歡無續處。魂夢空費。斷鴈無情。離鸞有恨。空想吳山越水。花惟玉
 悴。但翠黛愁橫。紅鉛淚洗。待剪江梅。倩誰傳此意。

方千里 三衢人。有和清真詞。

齊天樂

碧紗窗外黃鸝語。聲聲似愁春晚。岸柳飄綿。庭花墮雪。惟有平蕪如剪。重
 門向掩。看風動疎簾。浪鋪湘簟。暗想前歡。舊遊心事寄詩卷。鱗鴻音信
 未覩。夢魂尋訪後。關山又隔無限。客館愁思。天涯倦跡。幾許良宵展轉。閑
 情意遠。記密閣深閨。繡衾羅薦。睡起無人。料應眉黛斂。

塞垣春 和周清真

四遠天垂野。向晚景。雕鞍卸。吳藍滴草。塞綿藏柳。風物堪畫。對雨收。霧霽
 初晴也。正陌上。烟光灑。聽黃鸝。啼紅樹。短長音如寫。懷抱幾多愁。年時
 趁歡會。幽雅。盡日足相思。奈春晝難夜。念征塵滿堆襟袖。那堪更。獨游花
 陰下。一別鬢毛減。鏡中霜滿把。

醜奴兒

淩波臺畔花如剪。幾點吳霜。烟淡雲黃。東閣何人見晚妝。江南春近書
 千里。誰寄清香。別墅橫塘。鼓角聲中又夕陽。

迎春樂

紅深綠暗春無跡。芳心蕩。冶遊客。記搖鞭。跋馬銅駝陌。凝睇認。珠簾側。絮滿愁城風卷白。遞多少。相思消息。何處約歡期。芳草外。高樓北。

汪

暉

字處微。績溪人。開禧中一至闕下。不就舉試而歸。棲隱山中卒。里人私謚曰康範先生。

蝶戀花 秋夜簡趙尉

午夜涼生風小住。銀漢無聲。雲約疎星度。佳客欲眠知未去。對牀只欠蕭蕭雨。素月四更山外吐。酒醒衾寒。消盡沉烟縷。料想玉樓人倚處。歸帆日竚烟中浦。

尹

煥

字惟曉。山陰人。官左司。有梅律集。

霓裳中序第一 茉莉

青鬢粲素靨。海國仙人偏耐熱。飡盡風香露屑。便萬里凌空。肯憑蓮葉。盈盈步月。悄似憐。輕去瑤闕。人何在。憶渠癡小。點點愛清絕。愁絕。舊遊輕別。忍重看。瑣香金篋。淒涼清夜。簾第杳杳。詩魂真化風蝶。冷香清到骨。夢十里。梅花霽雪。歸來也。慊慊心事。自共素娥說。

唐多令 吳興席上

蘋末轉清商。溪聲供夕涼。緩傳杯。催喚紅妝。斜綰烏雲新浴罷。裙拂地。水沉香。歌短舊情長。重來驚鬢霜。悵綠陰。青子成雙。說著前歡佯不記。一作保鷗蓮子。打鴛鴦。周公謹云。可與杜牧之尋芳較晚為偶。

馮取洽

字熙之。延平人。自號雙溪翁。

蝶戀花和玉林韻

秋到雙溪溪上樹。葉葉涼聲。未省來何許。盡拓溪樓窗與戶。倚欄清夜窺河鼓。那得吟朋同此住。獨對秋芳。欲寄花無處。杖屨相從曾有語。未來先自愁君去。

摸魚兒和玉林韻蓋爲遺蛻山中桃花作

歎劉郎。那回輕別。霏霏三落紅雨。玄都觀裏應遺恨。一抹淡烟殘縷。愁望處。想霧暗雲深。忘卻來時路。新花舊主。記刻羽流商。裁紅剪翠。山徑日將暮。空枝上。時有幽禽對語。聲聲如問來否。人生行樂須聞健。衰老念誰免此。吾所與。在溪上。深深錦繡花千塢。何時定去。但對酒思君。呼兒爲我。頻唱小桃句。

陳以莊

字敬叟。建安人。有月溪集。

水龍吟錢塘記恨

晚來江闊潮平。越船吳榜催人去。稽山滴翠。胥濤濺恨。一襟離緒。訪柳章臺。問桃仙浦。物華如故。向秋娘渡口。秦娘橋畔。依稀是。相逢處。窈窕青門紫曲。舊羅新衣。翻金縷。舊音恍記。輕攏慢撚。哀絃危柱。金屋難成。阿嬌已遠。不堪春暮。聽一聲杜宇。紅殷綠老。雨花風絮。

盧

炳

字叔陽。有映堂詞一卷。

謁金門

春寂寂。節物又催寒食。樓上捲簾雙燕入。斷魂愁似織。門外雨餘風急。

滿地落英紅濕。好夢驚回無處覓。天涯芳草碧。

又

春事寂。苦筍鱗魚初食。風捲繡簾飛絮入。柳絲繁似織。迅速韶光去急。雨過綠陰尤濕。回首舊遊何處覓。遠山空佇碧。

點絳脣

過眼溪山。向來都是經行處。驂鸞人去。冷落吹簫侶。小立江亭。愁對蒹葭浦。無情緒。酒杯慵舉。閑看江楓舞。

踏莎行

秋色人家。夕陽洲渚。西風催過黃華渡。江烟引素忽飛來。水禽破暝雙雙去。奔走紅塵。棲遲羈旅。斷腸猶憶江南句。白雲低處鴈回峯。明朝便踏瀟湘路。

沈端節 字約之。吳興人。有克齋詞一卷。

虞美人

去年寒食初相見。花上雙飛燕。今年寒食又花開。垂下重簾不許燕歸來。隔簾聽燕呢喃語。似說相思苦。東君都不管閑愁。一任落花飛燕兩悠悠。

潘 牯 初名公筠。夢南臺人。持方牛首與之。遂易名。字庭堅。閩縣人。端平初進士。通判潭州。有紫巖集。

羽仙歌

雕簷綺戶。倚晴空如畫。會是吳王舊臺榭。自浣紗人去後。落日平蕪行雲

斷。幾見花開。花謝。淒涼闌檻外。一簇青山。多少圖王共爭霸。莫閑愁。金
杯激灑。對酒當歌。歡娛地。夢中興亡休話。漸倚遍西風。晚潮生。明月裏。鷺
鷺背人飛下。

馮艾子

字偉壽。號雲月。雙溪子。

黃叔暘云。偉壽精于律呂。詞多自製腔。

春風嫵娜

被梁間雙燕。話盡春愁。朝粉謝。午花柔。倚紅欄。故與蜨圍蜂繞。柳綿無數。
飛上搔頭。鳳管聲圓。蠶房香煖。笑挽羅衫。須少留。隔院蘭馨趁風遠。鄰牆
桃影伴烟收。些子風情未減。眉頭眼尾。萬千事。欲說還休。薔薇露。一作刺
牡丹毬。慙慙記省。前度綢繆。夢裏飛紅。覺來無覓。望中新綠。別後空稠。相
思難偶。歎無情明月。今年已是。一作見三度如鈎。

黃昇

一作長。字叔暘。號玉林。有散花菴詞一卷。

胡季直云。玉林蚤棄科舉。雅意讀書。間從吟詠自適。游受齋嘗稱其詩為晴空冰柱。樓秋房聞
其與魏菊莊友善。併以泉石清士目之。

月照梨花

晝景方永。重簾花影。好夢猶酣。鶯聲喚醒。門外風絮交飛。送春歸。脩蛾
畫了無人問。幾多別恨。淚洗殘妝粉。不知嘶馬何處。烟草萋迷。鷓鴣啼。

醉江月題玉林

玉林何有。有一彎蓮沼。數間茅宇。斷塹疎籬。聊補葺。那得粉牆朱戶。禾黍

西風雞豚曉日。活脫田家趣。客來茶罷。自挑野菜同煮。多少甲第連雲。十眉環座。人醉黃金塢。回首邯鄲春夢破。零落珠歌翠舞。得似衰翁。蕭然陋巷。長作溪山主。紫芝可採。更尋巖谷深處。

又

西風解事。爲人間洗盡。三庚煩暑。一枕新涼宜客夢。飛入藕花深處。冰雪襟懷。琉璃世界。夜氣清如許。劃然長嘯。起來秋滿庭戶。應笑楚客才高。蘭成愁悴。遺恨傳千古。作賦吟詩空自好。不直一盃秋露。淡月闌干。微雲河漢。耿耿天催曙。此情誰會。梧桐葉上疎雨。

鵲橋仙

青林雨歇。珠簾風細。人在綠陰庭院。夜來能有幾多寒。已瘦了。梨花一半。寶釵無據。玉琴難托。合造一襟幽怨。雲窗霧閣事茫茫。試與問。杏梁雙燕。

文及翁

字時學。號本心。綿州人。歷官參知政事。

賀新涼遊西湖有感

一勺西湖水。渡江來。百年歌舞。百年酣醉。回首洛陽花石盡。烟渺黍離之地。更不復。新亭墮淚。簇樂紅妝。搖畫舫。問中流。擊楫何人。是。千古恨。幾時洗。余生自負澄清志。更有誰。磻溪未遇。傅巖未起。國事如今誰倚仗。衣帶一江而已。便都道。江神堪恃。借問孤山林處士。但掉頭。笑指梅花蕊。天下事。可知矣。

李芸子 字耘叟。號芳州。昭武人。

木蘭花慢

占西風早處。一番雨。一番秋。記故國斜陽。去年今日。落葉林幽。悲歌幾回
激烈。寄疎狂。酒令與詩籌。遺恨清商易改。多情紫燕難留。嗟休。觸緒繭
絲抽。舊事續何由。奈予懷渺渺。羈愁鬱鬱。歸夢悠悠。生平不如老杜。便如
他。飄泊也風流。寄語庭柯徑菊。甚時得棹孤舟。

巖 羽 字儀卿。樵川人。自號滄浪逋客。

滿江紅送廖叔仁赴闕

日近觚稜。秋漸滿。蓬萊雙闕。正錢塘江上。潮頭如雪。把酒送君天上去。瓊
瑤玉佩鸞鵠列。丈夫兒。富貴等浮雲。看名節。天上事。吾能說。今老矣。空
凝絕。對西風慷慨。唾壺歌缺。不灑世間兒女淚。難堪親友中年別。問相思。
他日鏡中看。蕭蕭髮。

李廷忠 字居厚。號橘山。有樂府一卷。

生查子 薔薇

玉女翠帷薰。香粉開妝面。不是占春遲。羞被羣花見。纖手織柔條。絳雪
飛千片。流入紫金卮。未許停歌扇。

王以寧 字周士。長沙人。歷官宣撫司參謀。制置襄鄧。

水調歌頭 裴公亭懷古

歲歲橘洲上。老葉舞愁紅。西山光翠依舊。影落酒盃中。人在子亭高處。下

望長沙城郭。獵獵酒帘風。遠水湛寒碧。獨釣綠蓑翁。懷往事。追昨夢。轉頭空。孫郎前日豪健。頤指五都雄。起擁奇才劍客。十萬銀戈赤幘。歌鼓壯軍容。何似裴相國。談道老主峯。

卷十九 宋詞六十六首

吳文英

字君特。四明人。從吳毅夫遊。有夢窗甲乙丙丁稿四卷。

張叔夏云。吳夢窗如七寶樓臺。眩人眼目。折碎下來。不成片段。尹惟曉云。求詞于吾宋。前有

清真。後有夢窗。此非予之言。四梅之公言也。沈伯時云。夢窗深得清真之妙。但用事下語太

晦處。人不易知。

倦尋芳 餞周糾定夫

暮帆挂雨。冰岸飛梅。春思零亂。送客將歸。偏是故宮離苑。醉酒會同涼月舞。尋芳還隔紅塵面。去難留。悵芙蓉路窄。綠楊天遠。便繫馬。鶯邊清曉。烟草晴花。沙潤香軟。爛錦年華。誰念故人遊倦。寒食相思堤上路。行雲應。在孤山畔。寄新吟。莫空回。五湖春鴈。

又花翁偶舊歡吳門老妓李憐邀分韻同賦此詞

墜瓶恨井。塵鏡迷樓。空閉孤燕。寄別崔微。清瘦畫圖春面。不約舟移楊柳繫。有緣人。映桃花見。紋分攜。悔香瘢。謾熱。綠鬟輕剪。聽細語。琵琶幽怨。客鬢蒼華。衫袖濕徧。漸老芙蓉。猶自帶霜重看。一縷情深朱戶掩。兩痕愁起。青山遠。被西風。又驚吹。夢雲分散。

又上元

海霞倒影。空霧飛香。天市催晚。暮靨宮梅。相對畫樓簾捲。羅襪輕塵花笑。語。寶釵爭豔。春心眼。亂簫聲。正風柔柳弱。舞肩交燕。念窈窕。東鄰深巷。燈外歌沉。月上花淺。驚夢離雲。點點漏壺清怨。珠絡香消。空念往。紗窗人老。羞相見。漸銅壺。閉春陰。曉寒人倦。

燭影搖紅 錢馮深居翼日深居初度

飛蓋西園。晚秋恰勝。春天氣。霜花開盡。錦屏空。紅葉新裝綴。時放清杯泛水。暗淒涼。東風舊事。夜吟不就。松影闌干。月籠寒翠。莫唱陽關。但憑彩袖歌千歲。秋星入夢。隔明朝。十載吳宮會。一棹回潮。渡葦。正西窗。燈花報喜。柳蠻櫻素。試酒爭憐。不教不醉。

法曲獻仙音 和丁宏庵韻

落葉霞翻。敗窗風咽。暮色淒涼深院。瘦不關秋。淚緣生別。情銷鬢霜千點。悵翠冷。搔頭燕。那能語。恩怨。紫簫遠。記桃枝。向隨春渡。愁未洗。鉛水。又將恨染。粉縵。離箱。忍重拈。燈夜裁剪。望極藍橋。彩雲飛。羅扇歌斷。料鸚籠玉鎖。夢裏隔花時見。

憶舊游 別黃澹翁

送人猶未苦。苦送春隨。人去天涯。片紅都飛盡。陰陰潤綠。暗裏啼鴉。賦情頓雪雙鬢。飛夢逐塵沙。歎病渴淒涼。分香瘦減。兩地看花。西湖斷橋路。想繫馬垂楊。依舊敲斜。葵麥迷烟處。問離巢孤燕。飛過誰家。故人爲寫深

怨。空壁掃秋蛇。但醉上吳臺。殘陽草色歸思賒。

點絳脣懷蘇州

明月茫茫。夜來應照南橋路。夢遊熟處。一枕啼秋雨。可惜人生不向吳城住。心期誤。鴈將秋去。天遠青山暮。

又試燈夜初晴

捲盡愁雲。素娥臨夜新梳洗。暗塵不起。酥潤凌波地。輦路重來。彷彿燈前事。情如水。小樓薰被。春夢笙歌裏。

又

推枕南窗。棟花寒入單紗淺。雨簾不捲。空礙調雛燕。一握柔葱。香染榴巾汗。音塵斷。畫羅閑扇。山色天涯遠。

又

時霎清明。載花不過西園路。嫩陰綠樹。正是春留處。燕子重來。往事東流去。征衫貯。舊寒一縷。淚濕風簾絮。

西子妝夢窗自度腔湖上清明薄遊

流水麴塵。艷陽酷酒。畫舸遊情如霧。笑拈芳草不知名。乍凌波。斷橋西挽。垂楊謾舞。總不解。將春繫住。燕歸來。問綵繩纖手。如今何許。歡盟誤。一箭流光。又趁寒食去。不堪衰鬢著飛花。傍綠陰。冷烟深樹。玄都秀句。記前度。劉郎會賦。最傷心。一片孤山細雨。

唐多令

何處合成愁。離人心上秋。縱芭蕉不雨也颼颼。都道晚涼天氣好。有明月。怕登樓。年事夢中休。花空烟水流。燕辭歸客尙淹留。垂柳不繫裙帶住。謾長是。繫行舟。張叔夏云。此詞疎快不質實。

玉漏遲中秋

鴈邊風訊小。飛瓊望杳。碧雲先晚。露冷闌干。定怯藕絲冰腕。淨洗浮雲片。玉勝花影。春燈相亂。秦鏡滿。素娥未肯。分秋一半。每圓處。卽良宵。甚此夕偏饒。對歌臨怨。萬里嬋娟。幾許霧屏雲幔。孤兔淒涼照水。曉風起。銀河西轉。摩淚眼。瑤臺夢回人遠。

祝英臺近除夜立春

剪紅情。裁綠意。花信上釵股。殘日東風。不放歲華去。有人添燭西窗。不眠侵曉。笑聲轉。新年鶯語。舊樽俎。玉纖會擘黃柑。柔香繫幽素。歸夢湖邊。還迷鏡中路。可憐千點吳霜。寒銷不盡。又相對。落梅如雨。

又春日客龜溪游廢園

采幽香。巡古苑。竹冷翠微路。鬪草溪根。沙印小蓮步。自憐兩鬢清霜。一年寒食。又身在。雲山深處。晝閑度。因甚天也慳春。輕陰便成雨。綠暗長亭。歸夢趁風絮。有情花影闌干。鶯聲門徑。解留我。霎時凝竚。

又上元

晚雲開。朝雪霽。時節又燈市。夜約遺香。南陌少年事。笙簫一片紅雲。飛來海上。繡簾捲。細桃春起。舊遊地。素娥城闕年年。新妝趁羅綺。玉練冰輪。

無塵浣流水。曉霞紅處啼鴉。良宵一夢。畫堂正。日長人睡。

霜花腴重陽前一日汎石湖

翠微路窄。醉晚風。憑誰爲整。敲冠。霜飽花腴。燭銷人瘦。秋光做也都難。病懷強寬。恨鴈聲。偏落歌前。記年時。舊宿淒涼。暮烟秋雨野橋寒。 妝壓鬢英爭艷。度清商一曲。暗墜金蟬。芳節多陰。蘭情稀會。晴暉稱拂吟箋。更移晝船。引珮環。邀下嬋娟。算明朝。未了重陽。紫萸應耐看。

喜遷鶯同丁基仲過希道家看牡丹

凡塵流水。正春在。絳闕瑤階十二。暖日明霞。天香盤錦。低映曉光梳洗。故苑浣花沉恨。化作天紅斜紫。困無力。倚闌干。還倩東風扶起。 公子留意處。羅蓋牙籤。一一花名字。小扇翻歌。密圍留客。雲葉翠溫羅綺。灑瀲紫金盃重。人倚妝臺微醉。夜和露。剪殘枝。點點花心清淚。

又福山蕭寺歲除

江亭年暮。趁飛鴈。又聽數聲柔櫓。藍尾杯單。膠牙錫淡。重省舊時羈旅。雪舞野梅籬落。寒擁漁家門戶。晚風峭。做初番。花信春還知否。 何處圍艷冶。紅燭畫堂。博鑿良宵午。誰念行人。愁先芳草。輕送年華如羽。自別短檠不睡。空索彩桃新句。便歸好。料鵝黃已染。西池千縷。

聲聲慢閩重九飲郭園

檀欒金碧。婀娜蓬萊。遊雲不蘸芳洲。露柳霜蓮。十分點綴殘秋。新彎畫眉未穩。似含羞。低度牆頭。愁送遠。駐西臺車馬。共惜臨流。 知道池亭多宴。

掩庭花長是。驚落秦謳。膩粉闌干。猶聞凭袖香留。輸他翠漣拍甃。瞰新妝。終日凝眸。簾半捲。帶黃花。人在小樓。

又錢魏繡使泊吳江爲友人賦

旋移輕鷁。淺傍垂虹。還因送客遲留。淚雨橫波。遙山眉上新愁。行人倚欄心事。問誰知。只有沙鷗。念聚散。幾楓丹霜渚。尊綠春洲。漸近香菰炊黍。想紅絲織字。未遠青樓。寂寞漁鄉。爭如連醉溫柔。西窗夜深剪燭。夢頻生。不放雲收。共悵望。認孤烟。起處是舟。

高陽臺落梅

宮粉彫痕。仙雲墮影。無人野水荒灣。古石埋香。金沙鎖骨連環。南樓不恨吹橫笛。恨曉風。千里關山。半飄零。庭上黃昏。月冷闌干。壽陽宮裏愁鸞鏡。問誰調玉髓。暗補香瘢。細雨歸鴻。孤山無限春寒。離魂難倩招清此。夢縞衣。解珮溪邊。最愁人。啼鳥晴明。葉底清圓。

又豐樂樓

脩竹凝妝。垂楊駐馬。憑欄淺畫成圖。山色誰題。樓前有鴈斜書。東風緊送斜陽下。弄舊寒。晚酒醒餘。自消凝。能幾花前。頓老相如。傷春不在高樓上。在燈前敲枕。雨外熏爐。怕艤遊船。臨流可奈清癯。飛紅若到西湖底。攪翠瀾。總是愁魚。莫重來。吹盡香綿。淚滿平蕪。

滿江紅嶽山湖

雲氣樓臺。分一派。滄浪翠蓬。開小景。玉盆寒浸。巧石盤松。風送流花時過。

岸。浪搖晴練欲飛空。算鮫宮。祇隔一紅塵。無路通。神女驚。凌曉風。明月
低。響丁東。對兩蛾猶鎖。怨綠烟中。秋色未教飛盡鴈。夕陽長是墜疎鐘。又
一聲。欸乃過前巖。移釣篷。

遶佛閣

暗塵四斂。樓觀迥出。高映孤館。清漏將短。厭聞夜久籤聲動。書幔。桂花又
滿。閑步露草。偏愛幽遠。花氣清婉。望中迤邐城陰度。河岸。倦客最蕭索。
醉倚斜陽穿柳綫。還似汴隄虹梁橫水面。看浪颺春燈。舟下如箭。此行重
見。歎故友難逢。羈思空亂。兩眉愁。向誰舒展。

解語花 梅花

門橫皴碧。路入蒼烟。春近江南岸。暮寒如剪。臨溪影。一一半斜清淺。飛翼
弄晚。蕩千里。暗香平遠。端正看。瓊樹三枝。總似蘭昌見。酥瑩雲容。夜暖。
伴蘭翹清瘦。蕭鳳柔婉。冷雲荒翠。幽棲久。無語暗申春怨。東風半面。料準
擬。何郎詩卷。歡未闌。烟雨青黃。宜晝陰庭館。

荔支香近七夕

輕睡時聞晚鵲。噪庭樹。又說今夕天津。西畔重歡遇。蛛絲暗鎖紅樓。燕子
穿簾處。天上未比人間更情苦。秋鬢改。妒月姊。長眉嫵。過雨西風。數葉
井梧秋舞。夢入藍橋。幾點疎星映朱戶。淚濕沙邊凝竚。

尉遲杯 賦楊公小蓬萊

垂楊逕。洞鑰啓。時遣流鶯迎。涓涓暗谷流紅。應有緗桃千頃。臨池笑靨。春

色滿銅華弄妝影。記年時。試酒湖陰。褪花會采新杏。珠窗繡網玄經。纔
石研開奩。雨潤雲凝。小小蓬萊香一掬。愁不到。朱嬌翠靚。清樽伴。人間日
永。斷琴和棋聲竹露冷。笑從前。醉臥紅塵。不知仙在人境。

霜葉飛重九

斷烟離緒關心事。斜陽紅隱霜樹。半壺秋水薦黃花。香撲西風雨。縱玉勒。
輕飛迅羽。淒涼誰弔荒臺古。記醉踏南屏。彩扇咽。寒蟬倦夢。不知蠻素。
聊對舊節傳杯。塵箋蠹管。斷闕經歲慵賦。小蟾斜影轉東籬。夜冷殘蛩語。
早白髮。緣愁萬縷。驚鷗從捲烏紗去。謾細將。茱萸看。但約明年。翠微高處。

瑞鶴仙

淚荷拋碎壁。正漏雲。篩雨斜捎窗隙。林聲怨秋色。對小山不迭。寸眉愁碧。
涼欺岸幘。暮砧催。銀屏剪尺。最無聊。燕去堂空。舊幕暗塵羅額。行客。西
園有分。斷柳淒花。似會相識。西風破屐。林下路。水邊石。念寒蛩殘夢。歸鳩
心事。那聽江村夜笛。看雪飛。蘋底蘆梢。未如鬢白。

又贈道女陳華山內夫人

彩雲棲翡翠。聽鳳笙。吹下飛翰天際。晴霞翦輕袂。澹春姿雪態。寒梅清泚。
東皇有意。旋安排。闌干十二。早不知。爲雲爲雨。盡日建章門閉。堪比。紅
綃纖素。紫燕輕盈。內家標致。游仙舊事。星斗下。夜香裏。口華峯口口。紙屏
橫幅。春色長供午睡。更醉乘。玉井秋風。采花弄水。

齊天樂

新烟初試花如夢。疑收楚峯殘雨。茂苑人歸。秦樓燕宿。同惜天涯爲旅。遊情最苦。早柔綠迷津。亂莎荒圃。數樹梨花。晚風吹墮半汀鷺。流紅江上去遠。翠樽曾共醉。雲外別墅。淡月秋千。幽香巷陌。愁結傷春深處。聽歌看舞。駐不得當時。柳蠻櫻素。睡起慊慊。洞簫誰院宇。

又

烟波桃葉西陵路。十年斷魂潮尾。古柳重攀。輕鷗驟別。陳迹危亭獨倚。涼颺乍起。渺烟磧飛帆。暮山橫翠。但有江花。共臨秋鏡照憔悴。華堂燭暗送客。眼波回盼處。芳艷流水。素骨凝冰。柔葱蘸雪。猶憶分瓜深意。清樽未洗。夢不濕行雲。謾沾殘淚。可惜秋宵。亂蛩疎雨裏。

掃花遊送春古江村

水園沁碧。驟夜雨飄紅。竟空林島。艷春過了。有塵香墜鈿。尙遺芳草。步繞新陰。漸覺交枝徑小。醉深窈。愛綠葉翠圓。勝看花好。芳架雪未掃。怪翠被佳人。困迷清曉。柳絲繫棹。問閨門自古。送春多少。倦蝶慵飛。故撲簪花破帽。醉殘照。掩重城。暮鐘不到。

瑞龍吟德清清明競渡

大溪面。遙望繡羽衝烟。錦梭飛練。桃花三十六陂。鮫宮睡起。嬌雷乍轉。去如箭。催趁戲旗遊鼓。素瀾雪濺。東風冷濕鮫腥。淡陰送晝。輕霏弄晚。洲上青蘋生處。鬪春不管。懷沙人遠。殘日半開。一川花影零亂。山屏醉纈。連掉東西岸。闌干倒。千紅妝壓鉛香不斷。傍暝疎簾捲。翠漣皺淨。笙歌未

散。算柳嬌桃嬾。猶自有。玉龍黃昏吹怨。重雲暗閣。春霖一片。

解蹀躞

醉雲又兼醒雨。楚夢時來往。倦蜂剛著梨花惹。游蕩。還做一段相思。冷波
葉舞愁紅。送人雙漿。暗凝想。情共天涯秋黯。朱橋鎖深巷。會稀投得輕
分頓惆悵。此去幽曲誰來。可憐殘照西風。半妝樓上。

玉樓春 京市舞女

茸茸狸帽遮梅額。金蟬羅剪胡衫窄。乘肩爭看小腰身。倦態強隨閑鼓笛。
問稱家住城東陌。欲買千金應不惜。歸來困頓帶春眠。猶夢婆娑斜趁
拍。

澡蘭香 淮安重午

盤絲繫腕。巧篆垂簷。玉隱紺紗睡覺。銀瓶露井。彩筆雲窗。往事少年依約。
爲當時。會寫榴裙。傷心紅綃褪萼。黍夢光陰。漸老汀洲烟蕝。莫唱江南
古調。怨抑難招。楚江沉魄。薰風燕乳。暗雨梅黃。午鏡澡蘭簾幕。念秦樓也
擬人歸。應剪菖蒲自酌。但悵望。一縷新蟾。隨人天角。

惜紅衣 余從姜石帚遊苕霅間二十五年矣重來傷今感昔聊以詠懷

鷺老秋絲。蘋愁暮雪。鬢那不白。倒柳移栽。如今暗溪碧。烏衣細語。傷伴惹。
茸紅會約。南陌。前度劉郎。尋流花踪跡。朱樓水側。雪面波光。汀蓮沁顏
色。當時醉近。繡箔夜吟寂。三十六磯重到。清夢冷雲南北。買釣舟溪上。應
有烟蓑相識。

風入松

聽風聽雨過清明。愁草瘞花銘。樓前綠暗分攜路。一絲柳、一寸柔情。料峭春寒中酒。交加曉夢啼鶯。西園日日掃林亭。依舊賞新晴。黃蜂頻撲秋千索。有當時、纖手香凝。惆悵雙鴛不到。幽堵一夜苔生。

鶯啼序

殘寒正欺病酒。掩沉香繡戶。燕來晚、飛入西城。似說春事遲暮。畫船載、清
明過却。晴烟冉冉吳宮樹。念羈情、遊蕩隨風。化爲輕絮。十載西湖。傍柳
繫馬。趁嬌塵、軟霧。翅紅漸。招入仙溪。錦兒偷寄幽素。倚銀屏、春寬夢窄。斷
紅濕。歌紈金縷。暝隄空。輕把斜陽。總還鷗鷺。幽蘭旋老。杜若還生。水鄉
尙寄旅。別後訪、六橋無信。事往花萎。瘞玉埋香。幾番風雨。長波妒眄。遙山
羞黛。漁燈分影。春江宿。記當時、短楫桃根渡。青樓彷彿。臨分敗壁題詩。淚
墨慘淡塵土。危亭望極。草色天涯。歎鬢侵半苧。暗點檢、離痕歡唾。尙染
鮫綃。繡鳳迷歸。破鸞慵舞。殷勤待寫。書中長恨。藍霞遼海沈過。鴈謾相思。
彈入哀箏柱。傷心千里江南。怨曲重招。斷魂在否。

玉漏遲

絮花寒食路。晴絲罥日。綠陰吹霧。客帽欺風。愁滿畫船烟浦。綵挂秋千散
後。悵塵鎖、燕簾鶯戶。從間阻。夢雲無準。鬢霜如許。夜久繡閣藏嬌。記掩
扇傳歌。剪燈留語。月約星期。細把花鬚頻數。彈指一襟怨恨。謾空倩、啼鶻
聲訴。深院宇。黃昏杏花微雨。

金盞子 吳城連日賞桂一夕風雨悉已零落獨寓窗晚花方作小蕾未及見開遂有新邑之役場來西

館籬落間嫣然一枝可愛見侶人而喜爲賦此解

賞月梧園恨廣寒宮樹曉風搖落莓砌掃蛛塵空腸斷薰爐燼消殘萼殿
秋尙有餘花鎖烟窗雲幄新鴈又無端送人江上短亭初泊籬角夢依
約人一笑惺忪翠袖薄悠然醉魂喚醒幽叢畔淒香霧雨漠漠晚吹乍顛
秋聲早屏空金雀明朝想猶有數點蜂黃伴我斟酌

絳都春 余往來清華館六年賦咏屢以感昔傷今益不堪懷乃復作此解

春來鴈渚弄豔冶又入垂楊如許困舞瘦腰啼濕宮黃池塘雨碧沿蒼蘚
雲根路尙追想凌波微步小樓重上憑誰爲唱舊時金縷凝竚烟蘿翠
竹欠羅袖爲倚天寒日暮強醉梅邊招得花奴來樽俎東風須惹春雲住
更莫把飛瓊吹去便教攜取熏籠夜溫繡戶

十二郎 垂虹橋上有垂虹亭屬吳江

素天際水浪拍碎凍雲不凝記曉葉題霜秋燈吟雨曾繫長橋過艇又是
賓鴻重來後猛賦得歸期纔定嗟繡鴨解言香鱸堪釣尙廬人境幽興
爭如共載月娥妝鏡念倦客依前貂裘茸帽重向淞江照影酌酒蒼茫倚
歌平遠亭上玉虹腰冷迎醉面暮雪飛花幾點黛愁山暝

蔣捷 字勝欲義興人有竹山詞一卷

賀新郎

渺渺啼鴉了。巨魚天寒生峭嶼。五湖秋曉竹几一鐙人做夢嘶馬誰行古

道起搔首。窺星多少。月有微黃籬無影。挂牽牛。數朵青花小。秋太淡。添紅
棗。愁痕倚賴。西風掃。被西風。翻催鬢鬢。與秋俱老。舊院隔霜簾不捲。金
粉屏邊醉倒。計無此。中年懷抱。萬里江南吹簫恨。恨參差。白鴈橫天杪。烟
未斂。楚山杳。

又約友三月旦飲

鴈嶼晴嵐薄。倚層屏。千樹高低。粉纖紅弱。雲隘東風藏不盡。吹豔生香。萬
壑。又散入。汀蘅洲藥。擾擾匆匆。塵上面。看歌鶯舞燕逢春樂。人共物。知誰
錯。寶釵樓上圍簾幕。小嬋娟。雙調彈箏。半霄鸞鶴。我輩中人無此分。琴
思詩情當却。也勝似。愁橫眉角。芳景三分才過二。便綠陰門巷。楊花落。沾
斗酒。且同酌

又

夢冷黃金屋。歎秦箏。斜鳩陣裏。素絃塵撲。化作嬌鶯飛歸去。猶認窗紗舊
綠。正過雨。荆桃如菽。此恨難平。君知否。似瓊臺。湧起彈碁局。消瘦影。嫌明
燭。鴛樓碎瀉東西玉。問芳踪。何時再展。翠釵難卜。待把宮眉橫雲樣。描
上生綃畫幅。怕不是。新來妝束。綵扇紅牙今都在。恨無人。解聽開元曲。空
掩袖。倚寒竹。

洞仙歌對雨思友

世間何處。最難忘。杯酒。惟是停雲想親友。此時無一盞。千種離愁。西風外。
長伴枯荷衰柳。去年深夜語。傾倒書窗。窗燭心懸小紅豆。記得到門時。

雨正蕭蕭。嗟今雨。此情非舊。待與子。相期采黃花。又未卜重陽。果能晴否。

又柳

枝枝葉葉。受東風調弄。便是鶯穿也微動。自鵝黃千縷。數到飛綿。閑無事。誰管將春迎送。輕柔心性在。教得遊人。酒舞花吟恣狂縱。更誰家。鸞鏡裏。貪學纖蛾。移來傍。妝樓新種。總不道。江頭鎖清愁。正雨渺烟茫。翠陰如夢。

瑞鶴仙 鄉城見月

紺烟迷鴈跡。漸碎鼓零鐘。街喧初息。風檠背寒壁。放冰蜍飛到。蛛絲簾隙。瓊瑰暗泣。念鄉關。霜蕪似織。謾將身。化鶴歸來。忘却舊遊端的。歡極。蓬壺藻浸。花院梨溶。醉連春夕。柯雲罷弈。櫻桃在。夢難覓。勸清光。乍可。幽窗相伴。休照紅樓夜笛。怕人間。換譜伊涼。素娥未識。

白苧

正春晴。又春冷。雲低欲落。瓊苞未剖。早是東風作惡。旋安排。一雙銀蒜鎖。羅幕。幽幽。水生漪。皺嫩綠。潛鱗初躍。惜惜門巷。桃樹紅纔約。略知甚時。霽華烘破青青萼。憶昨。引蜨花邊。近來重見。身學垂楊瘦削。問小翠眉山。爲誰攢却。斜陽院宇。任蛛絲。胃徧。玉箏絃索。戶外惟聞。放剪刀聲。深在妝閣。料想裁縫。白苧春衫薄。

女冠子 元夕

蕙花香也。雪晴池館如畫。春風飛到。寶釵樓上。一片笙簫。琉璃光射。而今

燈漫挂。不是暗塵明月。那時元夜。况年來心懶意怯。羞與蛾兒爭耍。江
城人悄。初更打。問繁華誰解。再向天公借。剔殘紅燄。但夢裏隱隱。鈿車羅
帕。吳箋銀粉。待把舊家風景。寫成閑話。笑綠鬟鄰女。倚窗猶唱。夕陽西
下。

永遇樂綠陰

清逼池亭。潤侵山閣。雲氣凝聚。未有蟬前。已無蝶後。花事隨逝水。西園支
徑。今朝重到。半礙醉筇吟袂。除非是鶯身瘦小。暗中引雛穿去。梅簷滴
溜。風來吹斷。放得斜陽一縷。玉子敲枰。香綃落剪。聲度深幾許。層層離恨。
淒迷如此。點破謾煩輕絮。應難認。爭春舊館。倚紅杏處。

高陽臺送翠英

燕捲晴絲。蜂黏落絮。天教綰住閑愁。閑裏清明。匆匆粉澀紅羞。燈搖搖縹
暈。茸窗冷。語未闌。娥影分收。好傷情。春也難留。人也難留。芳塵滿目悠悠。
爲問縈雲珮響。還繞誰樓。別酒纔斟。從前心事都休。飛鶯縱有風吹轉。奈
舊家。苑已成秋。莫思量。楊柳灣西。且擣吟舟。

絳都春

春愁怎畫。正鶯背帶綠。酴醿花謝。細雨院深。淡月廊斜。重簾挂。歸時記約
燒燈夜。早拆盡。千秋紅架。縱然歸近。風光又是。翠陰初夏。姹姬。頻青
泣。白恨玉珮罷舞。芳塵凝榭。幾擬倩人。付與香蘭。秋羅帕。知他墮策斜攏馬。
在底處。垂楊樓下。無言暗擁嬌鬟。鳳釵溜也。

聲聲慢 秋聲

黃花深巷。紅葉低窗。淒涼一片秋聲。豆雨聲來。中間夾帶風聲。疎疎二十
五點。麗譙門。不鎖更聲。故人遠。問誰搖玉佩。簷底鈴聲。彩角聲吹月墮。
漸連營馬動。四起笳聲。閃爍鄰燈。燈前尚有砧聲。知他訴愁到曉。碎嚶嚶。
多少蛩聲。訴未了。把一半。分與鴈聲。

金盞子

練月縈窗。夢乍醒黃花。翠竹庭館。心字夜香消。人孤零雙鷓。被他羞看擬
待。告訴天公。減秋聲一半。無情鴈。正用恁時飛來。叫雲尋伴。猶記杏權
煖。銀燭下。纖影卸佩款。春澗暈紅豆小。鶯衣嫩。珠痕澹印芳汗。自從信誤
青鸞。想籠鸚停喚。風刀快。但剪畫簷梧桐。怎剪愁斷。

梅花引

白鷗問我。泊孤舟。是身留。是心留。心若留時。何事鎖眉頭。風拍小簾燈暈
舞。對閑影。冷清清。憶舊遊。舊遊舊遊。今在否。花外樓。柳下舟。夢也夢也。
夢不到。寒水空流。漠漠黃雲。濕透木棉裘。都道無人愁似我。今夜雪。有梅
花。似我愁。

解佩令

春晴也好。春陰也好。著些兒。春雨越好。春雨如絲。繡出花枝紅裊。怎禁他。
孟婆合皂。梅花風悄。杏花風小。海棠風。鷲地寒峭。歲歲春光。被二十四
風吹老。棟花風。爾且慢到。

虞美人聽雨

少年聽雨歌樓上。紅燭昏羅帳。壯年聽雨客舟中。江闊雲低斷雁叫西風。而今聽雨僧廬下。鬢已星星也。悲歡離合總無情。一任階前點滴到天明。

又梳樓

絲絲楊柳絲絲雨。春在溟濛處。樓兒忒小不藏愁。幾度和雲飛去覓歸舟。天憐客子鄉關遠。借與花消遣。海棠紅近綠闌干。纔捲朱簾却又晚風寒。

祝英臺近次韻惜別

柳邊樓。花下館。低卷繡簾半。簾外天絲。擾擾似情亂。知他蛾綠纖眉。鵝黃小袖。在何處。閑遊閑翫。最堪歎。箏面一寸塵深。玉柱網斜。鴈譜字紅蕩。剪燭記同看。幾回傳語東風。將愁吹去。怎奈向。東風不管。

行香子舟宿閩灣

紅了櫻桃。綠了芭蕉。送春歸客尙蓬飄。昨宵穀水。今夜蘭皋。奈雲溶溶。風淡淡。雨瀟瀟。銀字笙調。心字香燒。料芳踪乍整還凋。待將春恨。都付春潮。過窈娘堤。秋娘渡。泰娘橋。

柳梢青遊女

學唱新腔。秋千梁上。釵股敲雙。柳雨花風。翠鬆裙褶。紅膩鞋幫。歸來門掩銀缸。淡月裏。疎鐘漸撞。嬌欲人扶。醉嫌人問。斜倚樓窗。

霜天曉角 折花

人影窗紗。是誰來折花。折則從他折去。知折去。向誰家。 簷牙。枝最佳。折時高折些。說與折花人道。須插向。鬢邊斜。

卷二十一 宋詞七十六首

陳允平

字君衡。號西麓。明州人。有日湖漁唱二卷。

張叔夏云。詞欲雅而正。志之所之。一為物所役。則失其雅正之音。近代陳西麓所作。平正亦有佳者。

摸魚兒 西湖送春

倚東風。畫欄十二。芳陰簾幕低護。玉屏翠冷梨花瘦。寂寞小樓烟雨。腸斷處。悵折柳。柔情舊別長亭路。年華似羽。任錦瑟聲寒。瓊簫夢遠。羞對綵鸞舞。 文園賦。重憶河橋眉嫵。啼痕猶濺紈素。丁香共結相思恨。空託繡羅金縷。春已暮。縱燕約鶯盟。無計留春住。傷春倦旅。趁暗綠稀紅。扁舟短棹。載酒送春去。

絳都春

鞦韆倦倚。正海棠半坼。不耐春寒。帶雨弄晴。飛梭庭院。繡簾閉。梅妝欲試。芳情懶。翠顰愁入眉彎。霧蟬香冷。霞綃淚搵。恨襲湘蘭。悄悄池臺步晚。任紅暎杏靨。碧沁苔痕。燕子未來。東風無語。又黃昏。琴心不度春雲遠。斷腸難託啼鵲。夜深猶倚。垂楊二十四欄。

醉江月賦水仙

漢江露冷。是誰將瑤瑟。彈向雲中。一曲清冷。聲漸杳。月高人在珠宮。暈額黃輕。塗腮粉艷。羅帶織青葱。天香吹散。珮環猶自丁東。回首杜若汀洲。金鈿玉鏡。何日得相逢。獨立飄飄。烟浪遠。羅襪羞濺春紅。渺渺予懷。迢迢良夜。三十六陂風。九疑何處。斷魂飛度千峯。

又

霽空虹雨。傍啼螿莎草。宿鷺汀洲。隔岸人家。砧杵急。微寒先到簾鉤。步幄塵高。征衫酒潤。誰煖玉香篝。風燈微暗。夜長頻換更籌。應是鴈柱調箏。鴛梭織錦。付與兩眉愁。不似樽前今夜月。幾度同。上南樓。紅葉無情。黃花有恨。辜負十分秋。歸心如醉。夢魂飛趁東流。

清平樂

鳳城春淺。寒壓花梢顫。有約不來梁上燕。十二繡簾空捲。去年共倚秋千。今年獨倚闌干。誤了海棠時候。不成直待花殘。

永遇樂

玉腕籠寒。翠欄凭曉。鶯調新簧。暗水穿苔。遊絲度柳。人靜芳晝長。雲南歸鴈。樓西飛燕。去來慣認炎涼。王孫遠。青青草色。幾回望斷柔腸。薔薇舊約。樽前一笑。等閑辜負年光。鬪草庭空。拋梭架冷。簾外風絮香。傷春情緒。惜花時候。日斜尙未成妝。聞嬉笑。誰家女伴。又還採桑。

八寶妝

望遠秋平初過雨。微茫水滿烟汀。亂蕩疎柳。猶帶數點殘螢。待月重樓誰共倚。信鴻斷續兩三聲。夜如何。頓涼驟覺。紈扇無情。還思驂鸞素約。念鳳簫鴈瑟。取次塵生。舊日潘郎。雙鬢半已星星。琴心錦意暗懶。又爭奈西風吹恨醒。屏山冷。怕夢魂飛度藍橋不成。

綺羅香 秋雨

鴈字蒼寒。蛩疏翠冷。又是淒涼時候。小揭珠簾。衣潤唾花羅縷。洗曉鷺。獨立衰荷。翅歸燕。尙棲殘柳。想黃華。羞澁東籬。斷無新句到重九。孤檠清夢易覺。腸斷唐宮舊曲。聲迷官漏。滴入愁心。秋似玉樓人瘦。烟檻外。催落梧桐。帶西風。亂捎鴛鴦。記畫簾。燈影沉沉。共裁春夜韭。

探春 蘇堤春曉

上苑烏啼。中洲鷺起。疎鐘纔度雲窈。篆冷香篝。燈微塵幌。殘夢猶吟芳草。搔首捲簾看。認何處。六橋烟柳。翠繞纔艤。西泠趁取過湖人少。掠水風花繚繞。還暗憶年時。旗亭歌酒。隱約春聲。鈿車寶勒。次第鳳城開了。惟有踏青心。縱早起。不嫌寒峭。畫欄閑立。東風舊紅誰掃。

秋霽 平湖秋月

千頃玻璃。送遠日斜陽。漸下林闥。題葉人歸。採菱舟散。望中水天一色。碾空桂魄。玉繩低轉雲無迹。有素鷗閑伴。夜深呼棹過環碧。相思萬里。頓隔輝媛。幾回瑤臺。同駐鸞翼。對西風。憑誰問取。人間那得有今夕。應笑廣寒宮殿窄。露冷烟澹。還看數點殘星。兩行新鴈。倚樓橫笛。

凝雲沍曉。正蘼花纔積。荻絮初殘。華表翩躚何處鶴。愛吟人正孤山。凍解苔鋪。水融莎甃。誰凭玉勾闌。茸衫氈帽。冷香吹上吟鞭。將次柳際瓊消。梅邊粉瘦。添做十分寒。閑踏輕澌來薦菊。半潭新漲微瀾。水北峯巒。城陰樓觀。留向月中看。巘雲深處。好風飛下晴湍。

掃花遊雷峯落照

數峯蘸碧。記載酒紺園。柳塘花塢。最堪避暑。愛蓮香送晚。翠嬌紅嫵。欸乃菱歌乍起。蘭橈競舉。日斜處。望孤鶩斷霞初下。芳杜。遙想山寺古。看倒影金輪。翅光朱戶。暝烟帶樹。有投林鷺宿。凭樓僧語。可惜流年。付與朝鐘暮鼓。謾凝竚。步長橋。月明歸去。

驀山溪花港觀魚

春波浮綠。小隱桃溪路。烟雨正林塘。翠不礙。錦鱗來去。芹香藻膩。偏愛鯉花肥。簷影下。柳陰中。逐浪吹萍絮。宮溝泉滑。怕有題紅句。釣餌已忘機。都付與。人間兒女。濠梁興在。鷗鷺笑人癡。三湘夢。五湖心。雲水蒼茫處。

齊天樂南屏晚鐘

赤欄橋畔斜陽外。臨江暮山凝紫。戲鼓纔停。漁榔乍歇。一片芙蓉秋水。餘霞散綺。正銀鑰停關。畫橈催艤。魚板敲殘。數聲初入萬松裏。坡翁詩夢未老。翠微樓上月。曾共誰倚。御苑烟花。宮斜露草。幾度西風彈指。黃昏盡也。有眠月閑僧。醉香遊子。鷺嶺猿啼。喚人吟思起。

明月引和白雲趙宗簿

雨餘芳草碧蕭蕭。暗春潮。蕩雙橈。紫鳳青鸞舊夢帶文簫。綽約珮環風不定。雲欲墮。六銖香。天外飄。相思爲誰蘭恨銷。渺湘魂。無處招。素紉猶在。眞眞意。還倩誰描。舞鏡空懸羞對月明宵。鏡裏心。心裏月。君去矣。舊東風。新畫橋。

唐多令吳江道上寄鄭可大

何處是秋風。月明霜露中。算淒涼未到梧桐。會向垂虹橋上看。有幾樹。水邊楓。客路怕相逢。酒濃愁更濃。數歸期猶是初冬。欲寄相思無好句。聊折贈。鴈來紅。

又

休去採芙蓉。秋江烟水空。帶斜陽一片征鴻。欲頓閑愁無頓處。都著在。兩眉峯。心事寄題紅。畫橋流水東。斷腸人無奈秋濃。回首層樓歸去爛。早新月。挂梧桐。

戀繡衾

細桃紅淺柳褪黃。燕初來。宮漏漸長。任日轉。花梢也。倚蘭屏。猶未試妝。秦鸞舊曲無心理。憶年時。相傍採桑。聽綠樹。嬌鶯囀。一聲聲。都是斷腸。

又

銀鴛金鳳畫暗銷。曉簾櫳。新翠漸交。算多少。相思恨。被東風。吹上柳梢。羅窗夜夜梨花瘦。奈月明。香夢易遙。便擬倩。題紅句。趁落花。流過謝橋。

小重山

岸柳黃深綠漸饒。林塘初雨過。漲蒲萄。秋千亭榭彩旗交。鶯聲裏。春在杏花梢。慵整翠雲翹。眉尖愁兩點。倩誰描。斜陽芳草暗魂銷。東風遠。猶凭赤欄橋。

慶春宮

斜日明霞。殘虹分雨。軟風淺掠蘋波。聲冷瑤笙。情疎寶扇。酒醒無奈秋何。彩雲輕散。漫敲缺。銅壺浩歌。眉痕留怨。依約遙峯。學斂雙蛾。銀牀露洗涼柯。屏掩香銷。忍掃裯羅。楚驛梅邊。吳江楓畔。庾郎從此愁多。草蛩喧砌。料催織。回文鳳梭。相思遼遠。簾卷翠樓。月冷星河。

垂楊懷古

銀屏夢覺。漸淺黃嫩綠。一聲鶯小。細雨輕塵。建章初閉東風悄。依然千樹長安道。翠雲鎖。玉窗深窈。斷橋人空倚斜陽。帶舊愁多少。還是清明過了。任烟縷露條。碧纖青嫋。恨隔天涯。幾回惆悵蘇堤曉。飛花滿地誰爲掃。甚薄倖。隨波縹緲。啼鴉不喚春歸。人自老。

周

密

字公謹。濟南人。僑居吳興。自號弁陽曠翁。又號蕭齋。有草窗詞二卷。一名鷺洲漁笛譜。

大聖樂東園餞春

嬌綠迷雲。倦紅顰曉。嫩晴芳樹。漸午陰。簾影移香。燕語夢回。千點碧桃吹雨。冷落錦衾歸後。記前度。蘭橈停翠浦。凭欄久。謾凝竚。鳳翹慵聽金縷。留春問誰最苦。奈花自無言鶯自語。對畫樓殘照。東風吹遠。天涯何許。怕

折露條愁輕別。更烟暝。長亭啼杜宇。垂楊晚。但羅袖。晴沾飛絮。

花犯水仙花

楚江湄。湘娥乍見。無言灑清淚。淡然春意。空獨倚東風。芳思誰記。凌波路。冷秋無際。香雲隨步起。謾記漢宮仙掌。亭亭明月底。冰絃寫怨更多情。騷人恨枉賦。芳蘭幽芷。春思遠。誰賞國香風味。相將共。歲寒伴侶。小窗淨。沉烟熏翠被。幽夢覺。涓涓清露。一枝燈影裏。

探春脩門度歲

綵勝宜春。翠盤消夜。客裏暗驚時候。剪燕心情。呼盧音語。景物總成懷舊。愁鬢妒垂楊。早穉眼。漸濃如豆。儘教寬盡春衫。畢竟爲誰消瘦。梅浪半空如繡。便管領芳菲。忍辜詩酒。映竹占花。臨窗卜鏡。還念歲寒宮袖。簫鼓動春城。競點綴。玉梅金柳。廝勾元宵。燈前共誰攜手。

瑤花瓊花

朱鈿寶玦。天上飛瓊。比人間春別。江南江北。曾未見。謾擬梨雲梅雪。淮山春晚。問誰識。芳心高潔。消幾番。花落花開。老了玉關豪傑。金壺剪送瓊枝。看一騎紅塵。香度瑤闕。韶華正好。應自喜。初識長安蜂蝶。杜郎老矣。想舊事。花須能說。記少年。一夢揚州。二十四橋明月。

玉京秋

烟水闊。高林弄殘照。晚蛩淒切。碧砧度韻。銀牀飄葉。衣濕桐陰露冷。採涼花。時賦秋雪。難輕別。一襟幽事。砌蛩能說。客思吟商還怯。怨歌長。瓊壺

暗缺。翠扇疎。紅衣香褪。翻成銷歇。玉骨西風。恨最恨。閑却新涼時節。楚簫咽。誰倚西樓淡月。

解語花

晴絲罥蝶。暖蜜酣蜂。重簾卷春寂寂。雨萼烟梢。壓闌干。花雨染衣紅濕。金鞍誤約。空極目。天涯草色。闌苑玉簫人去後。惟有鶯知得。餘寒猶掩翠戶。梁燕乍歸。芳信未端的。淺薄東風。莫因循。輕把杏鈿狼籍。塵侵錦瑟。殘日紅窗春夢窄。睡起折枝無意緒。斜倚秋千立。

曲遊春遊西湖

禁苑東風外。颺煖絲晴絮。春思如織。燕約鶯期。惱芳情偏在。翠深紅隙。漠漠香塵隔。沸十里。亂絲叢笛。看畫船。盡入西泠。閑却半湖春色。柳陌新烟凝碧。映簾底宮眉。堤上遊勒。輕暝籠烟。怕梨雲夢冷。杏香愁翳。歌管酬寒食。奈蝶怨。良宵岑寂。正恁醉月搖花。怎生去得。

秋霽秋日遊西湖

重到西泠。記芳園載酒。畫舸橫笛。水曲芙蓉。渚邊鷗鷺。依依似舊相識。年華易失。段橋幾換垂楊色。謾自惜。愁損庾郎雙鬢點華白。殘蛩露草。怨蝶飛花。轉眼西風。又陳迹。歎如今。才消量減。樽前辜負。醉吟筆。欲寄遠情。秋水隔。舊遊空在。凭高望極斜陽。亂山浮紫。暮雲凝碧。

臺城路梅

宮簷融暖。晨妝懶。輕霞未勻酥臉。倚竹嬌顰。臨溪瘦影。依約樽前重見。盈

盈笑靨。映珠絡玲瓏。翠綃葱蒨。夢入羅浮。滿衣清露暗香染。東風千樹
易老。怕紅顏旋減。芳意偷變。贈遠天寒。吟香夜永。多少江南新怨。瓊梳靜
掩。任剪雪裁雲。競誇輕艷。畫角黃昏。夢隨春去遠。

又

東風又入江南岸。年年漢宮春早。寶曆無痕。生香有韻。消得何郎花惱。孤
山夢繞。記路隔金沙。那回會到。夜月相思。翠樽誰共飲香醪。天寒宮怨
贈遠。水邊憑爲問。春到多少。竹外凝情。牆陰照影。誰見嫣然一笑。冷香未
了。怕玉管西樓。一聲霜曉。花自多情。看花人自老。

又赤壁重遊

清溪數點芙蓉雨。蘋飈涼泛吟鷁。洗玉空明。浮珠沆漭。人靜籟沉波息。仙
潢咫尺。想翠羽瓊樓。有人相憶。天上人間。未知今夕是何夕。此生此夜
此景。自仙翁去後。清致誰識。散髮吟商。簪花弄水。誰伴空江橫笛。流年暗
惜。怕一度西風。井梧吹碧。底事閒愁。醉歌浮大白。

又

曲屏遮斷行雲路。西樓怕聽疎雨。硯凍凝華。香寒散霧。呵筆慵題詩句。長
安倦旅。歎衣染塵痕。鏡添秋縷。過盡飛鴻。錦箋誰與寄愁去。簫臺應是
怨別。曉寒梳洗懶。依舊眉嫵。酒滴爐香。花圍坐暖。閑却珠鞦鈿柱。芳心謾
語。恨柳外遊鞦。繫情何許。暗卜歸期。細將梅蕊數。

又蟬

槐陰忽送清商怨。依稀正聞還歇。寫怨聲長。危絃調苦。前夢蛻痕枯葉。傷情惜別。是幾度斜陽。幾回殘月。轉眼西風。一襟幽恨向誰說。輕鬟猶記動影。翠蛾應妒我。雙鬢如雪。枝冷頻移。葉疎猶抱。肯負好秋時節。淒淒切切。漸迤邐黃昏。砌蛩相接。露洗餘悲。暮烟聲更咽。

一枝春酒邊聞歌和韻

淡碧春姿。柳眠醒。似怯朝來疎雨。芳程乍數。喚起探花情緒。東風尙淺。甚先有。翠嬌紅嫵。應自把。羅綺圍春。占得畫屏春聚。留連繡叢深處。愛歌雲裊裊。低隨香縷。瓊窗夜暖。試與細評新譜。妝眉媚粉。料無奈。弄顰佯妒。還只怕。簾外籠鶯。笑人醉語。

又春晚和韻

簾影移陰。杏蕲寒。乍濕西園絲雨。芳期暗數。又是去年心緒。金花謾剪。倩誰畫。舊時眉嫵。空自傷。楊柳風流。淚滴軟綃紅聚。羅窗那回歌處。歎庭花倦舞。香銷冰縷。樓空燕冷。碎錦懶尋底譜。么絃謾賦。會記是。倚嬌成妒。深院悄。門掩梨花。倩鶯寄語。

綠蓋舞風輕白蓮

玉立照新妝。翠蓋亭亭。凌波步步秋漪。真色生香。明璫搖淡月。舞袖斜倚。耿耿芳心。奈千縷晴絲縈繫。恨閒遲。不嫁東風。顰怨嬌蕊。花底謾卜幽期。素手採珠房。粉艷初洗。雨濕鉛腮。碧雲深。暗聚軟綃清淚。訪藕尋蓮。楚江遠。相思誰寄。棹歌回。衣露滿身花氣。

玲瓏四犯戲調夢窗

波暖塵香。正嫩日輕陰。搖蕩清晝。幾日新晴。初展綺窗紋繡。年少忍負才華。儘占斷。艷歌芳酒。奈翠簾。蝶舞蜂喧。催趁禁烟時候。杏腮紅透。梅鈿皺。燕歸時。海棠廝勾。尋芳較晚。東風約。還約劉郎歸後。憑問柳陌情人。比似垂楊誰瘦。倚畫欄無語。春恨遠。頻回首。

拜星月春暮寄夢窗

膩葉陰清。孤花香冷。迤邐芳洲春換。薄酒孤吟。悵相如遊倦。想人在絮幕。香簾凝望。誤認幾許烟檣風軟。芳草天涯。負華堂雙燕。記簫聲淡月梨花院。研箋紅謾寫東風怨。一夜花落鶻啼。喚四橋吟伴。蕩歸心已過江南岸。清宵夢遠。逐飛花亂。幾千萬。絲縷垂楊。繫春愁不斷。

長亭怨慢

記千竹萬荷深處。綠淨池臺。翠涼亭宇。醉墨題香。閑簫橫玉。晝吟趣。勝流星聚。知幾誦燕臺句。零落碧雲空。歎轉眼歲華如許。凝佇望涓涓一水。夢到隔花窗戶。十年舊事。儘消得庾郎愁賦。燕樓鶴表半飄零。算惟有盟鷗堪語。慢倚遍河橋。一片涼雲吹雨。

宴清都雪川圖

老去閑情懶。東風外。霏霏花絮零亂。輕鷗漲綠。啼鶻暗碧。一春過半。尋芳已是來遲。怕迤邐年華暗換。還應恨。白雪歌空。秋霜鬢冷難管。凭欄自笑清狂。事隨花謝。愁與春緩。持盃顧曲。登樓賦筆。杜郎才減。前歡已隔前

溪。但耿耿。臨高望眼。翅輕紅。一棹歸時。半蟾弄晚。

霓裳中序第一

湘屏展翠疊。恨入宮溝流怨葉。缸冷金花暗結。又鴈影帶霜。蛩音淒月。珠寬腕雪。歎錦箋芳字盈篋。人何在。玉簫舊約。忍對素娥說。愁絕。衣砧幽咽。任帳底。沉烟漸滅。紅蘭誰採。贈別。悵洛浦分綃。漢臯遺玦。舞鸞光半缺。最怕聽。離絃乍闕。憑欄久。一庭香露。桂影弄淒蜨。

惜餘春慢 避暑和韻

紺玉波寬。碧雲亭小。冉冉水花香細。魚牽翠帶。燕掠紅衣。雨窗萬荷喧睡。臨檻自採瑤房。鉛粉沾襟。雪絲縈指。喜嘶蟬樹遠。盟鷗鄉近。鏡奩光裏。簾戶悄。竹色侵棋。槐陰移漏。晝永簾花鋪水。清眠乍足。晚浴初慵。瘦約楚裙尺二。曲砌虛庭夜深。月透龜紗。涼生蟬翅。看銀潢瀉露金井。鴉啼漸起。

祝英臺近 攬秀園

倚玲瓏。尋窈窕。瑤草四時碧。小小蓬萊。花氣透簾隙。幾回翠水荷初。蒼崖梅小。綺寮掩。玉壺春色。柳屏窄。芳檻日日東風。幾陣吹吟筆。曲折花房。鶯燕似會識。最憐燈影纔收。歌塵初靜。畫樓外。一聲秋笛。

又石溪次韻日熙堂主人

帶餘醒。尋舊雨。愁與病相半。綠意陰陰。絲竹靜深院。絕憐事逐春移。淚隨花落。似剪斷。蛟房珠串。喜重見。爲誰倦。酒慵詩。篔簹屏掩。雙扇。白髮潘郎。羞見看花伴。可堪好夢殘時。新愁生處。烟月冷。子規聲斷。

徵招九日有懷揚守齋

江蘼搖落江楓冷。霜空鴈程初到。萬景正悲秋。奈曲終人杳。登臨嗟老矣。問古今。清愁多少。一夢東園。十年心事。恍然驚覺。腸斷紫霞深。知音遠。寂寂怨琴。淒調短髮已無多。怕西風吹帽。黃花空自好。問誰識。對花懷抱。楚山遠。九辨難招。更晚烟殘照。

聲聲慢柳花

燕泥沾粉。魚浪吹香。芳堤十里新晴。靜惹遊絲。花邊裊裊扶春。多憐漂泊。記章臺。曾挽青青。堪愛處。是撲簾嬌嫩。隨馬輕盈。長是河橋三月。做一番晴雪。惱亂詩魂。帶雨沾衣。羅襟點點離痕。休綴潘郎鬢影。怕綠窗。年少人驚。卷春去。剪東風。千縷碎雲。

又送王聖與次韻

瓊壺敲月。白髮簪花。十年一夢揚州。恨入琵琶。小憐重見灣頭。樽前漫題金縷。奈芳情。已逐東流。還送遠。甚長安亂葉。都是閑愁。次第重陽近也。看黃花綠酒。只合遲留。脆柳無情。不堪重繫行舟。百年正消幾別。對西風。休賦登樓。怎去得。怕淒涼。時節團扇悲秋。

醉落魄 洪魯仲之江西書以爲別

寒侵徑葉。鴈風擊碎珊瑚屑。硯涼閑試霜晴帖。頌菊騷蘭。秋事正奇絕。故人又作江西別。書樓虛度中秋節。碧欄倚遍誰人說。愁是新愁。月是舊時月。

水龍吟

燕翎誰寄愁箋。天涯極望。王孫草。新烟換柳。光風浮蕙。餘寒尙峭。倚杖看雲。剪燈聽雨。幾番詩酒。歎長安倦客。江南舊恨。飛花亂。清明後。堤上斜陽風驟。散香綿。輕沾吟袖。麴塵兩岸。紋波十里。暖蒸香透。海闊雲深。水流春遠。夢魂難勾。問鶯邊按譜。花前覓句。解相思否。

又

舞紅輕帶愁飛。寶鸞暗憶。章臺路。吟香醉雨。吹簫門巷。飄梭院宇。立盡殘陽。眼迷晴樹。夢隨風絮。歎江潭冷落。依依舊恨。人空老。柳如許。錦瑟年華暗度。賦行雲。空題短句。晴絲繫燕。么絃彈鳳。文君更苦。烟水流紅。暮雲凝紫。是春歸處。悵江南望遠。蘋花自採。寄將愁與。

又白蓮

素鸞飛下青冥。舞衣半惹涼雲碎。藍田種玉。綠房迎曉。一奩秋意。擎露盤深。憶君涼夜。暗傾鉛水。想鴛鴦正結。梨雲好夢。西風冷。還驚起。應是飛瓊仙會。倚涼颺。碧簪斜墜。輕妝鬪白。明璫照影。紅衣羞避。霽月三更。粉香千點。靜聞十里。聽湘絃奏徹。冰綃偷剪。聚相思淚。

天香龍涎香

碧腦浮冰。紅薇染露。驪宮玉唾誰搗。麝月雙心。鳳雲百和。寶釧珮環爭巧。濃熏殘炷。疑醉度。千花春曉。金餅著衣。餘潤銀葉。透簾微裊。素被瓊篝夜悄。酒初醒。翠屏深窅。一縷舊情空趁。斷烟飛繞。羅袖餘馨漸少。悵東閣

淒涼夢難到。誰念韓郎。清愁漸老。

珍珠簾 琉璃簾

寶堦斜轉春宵翳。雲屏敞。霞卷東風新霽。光照萬星寒。曳冷雲垂地。暗憶連昌遊冶事。照炫轉。熒煌珠翠。難比。是鮫人織就。水綃清淚。猶記夢入瑤臺。正玲瓏透月。瓊扉十二。細縷逗濃香。接翠蓬雲氣。編夜梨花生煖白。浸澗灩。一池春水。乘醉。恍歸時人在。明河影裏。

疎影 梅影

冰條凍葉。又橫斜照水。一花初發。素壁秋屏。招得芳魂。彷彿玉容明滅。疎疎滿地。珊瑚冷。全誤却。撲花幽蝶。甚美人。忽到窗前。鏡裏好春難折。閑想孤山舊事。浸清漪倒映。千樹殘雪。暗裏東風。可慣無情。攪碎一簾香月。輕妝誰寫。崔徽面。認隱約。烟綃重疊。記夢回。紙帳殘燈。瘦倚數枝清絕。

玉漏遲 題吳夢窗霜花腴詞集

老來歡意少。錦鯨去。紫簫聲杳。怕展金奩。依舊故人懷抱。猶想烏絲醉墨。驚醉語。香紅圍繞。閑自笑。與君共是。承平年少。雨窗短夢難憑。是幾調宮商。幾番吟嘯。淚眼東風。回首四橋烟草。載酒倦遊處。已換却。花間啼鳥。春恨悄。天涯暮雲殘照。

南樓令

開了木芙蓉。一年秋已空。送新愁。千里孤鴻。搖落江蘼多少恨。吟不盡。楚雲峯。往事夕陽紅。故人江水東。翠衾寒。幾夜霜濃。夢隔屏山飛不去。隨

夜鶻繞疎桐。

西江月

波影暖浮玉甃。柳陰深鎖金鋪。湘桃花褪燕調雛。又是一番春暮。碧柱情深鳳怨。雲屏夢淺鶯呼。繡窗人倦冷熏爐。簾影搖搖亭午。

又茶縠閣

花氣半侵雲閣。柳陰近隔春城。畫欄明月按瑤箏。醉倚滿身花影。翠格素虬晴雪。錦籠紫鳳香雲。東風吹玉滿閑亭。二十四簾春靜。

鷓鴣天清明

燕子時時度翠簾。柳寒猶未透香綿。落花門巷家家雨。新火樓臺處處烟。情默默。恨恹恹。東風吹動畫秋千。刺桐開盡聲聲鳥。無奈春風祇醉眠。

又

相傍清明晴更愜。閉門空自惜花殘。海棠半坼難禁雨。燕子初歸不奈寒。金鴨冷。錦鴛閑。銀缸空照小屏山。翠羅袖薄東風悄。獨倚西樓第幾欄。

夜行船

寒菊淒風棲小蝶。簾櫳靜。半規涼月。夢不分明。恨無憑據。腸斷錦箋盈篋。哀角吹霜寒正怯。倚瑤箏。暗愁難說。寶獸頻添。玉蟲暗剪。長記舊家時節。

杏花天

瑞雲盤翠侵宮額。眉柳嫩。不禁愁積。返魂誰染東風筆。寫出郢中春色。

人去後。垂楊自碧。歌舞夢。欲尋無迹。愁隨雨。槩江南北。日暮石城風急。

又昭君

漢宮乍出慵梳掠。關月冷。玉沙飛幕。龍香撥。指春風弱。一曲哀絃謾托。君恩薄。空憐命薄。青塚遠。幾番花落。丹青自是難描摸。不是當時畫錯。

又

金池瓊苑曾經醉。是多少。紅情綠意。東風一枕。遊仙睡。換却鶯花人世。漸暮色。鶻聲四起。正愁滿。香溝御水。一色柳烟三十里。爲問春歸那裏。

浪淘沙

芳草碧茸茸。染恨無窮。一春心事雨聲中。窄素宮羅寒尙峭。閑倚熏籠。猶記粉牆東。同醉香叢。金鞍何處驟花驄。裊裊綠窗殘夢斷。紅杏東風。

點絳脣 南嶺釣隱年存叟

午夢初回。卷簾盡放春愁去。晝長無侶。自對黃鸝語。絮影蘋香。春在無人處。移舟去。未成新句。一硯梨花雨。

謁金門

花不定。燕尾剪開紅影。幾點落英蜂翅趁。日遲簾幕靜。試把翠蛾輕暈。愁薄寶臺鸞鏡。屈指一春將次盡。歸期猶未穩。

又吳山觀濤

天水碧。染就一江秋色。鰲戴雪山龍起蟄。快風吹海立。數點烟鬟青滴。一杼霞綃紅濕。白鳥明邊帆影直。隔江聞夜笛。

又

芳事晚。數點杏鈿香淺。惻惻輕寒風剪剪。錦屏春夢遠。 穉柳拖烟嬌軟。花影暗藏深院。初試輕衫并畫扇。牡丹紅未展。

清平樂

曉鶯嬌咽。庭戶溶溶月。一樹湘桃飛茜雪。紅豆相思漸結。 看看芳草平沙。遊鸞猶未歸家。自是蕭郎漂泊。錯教人恨楊花。

鳳棲梧 生香亭

竹杏花深連別墅。曲曲回廊。小小閑庭宇。忽地香來無覓處。杖藜閑趁遊蜂去。 老桂凝秋森玉樹。澗底孤芳。萼萼吹詩句。一掬幽情知幾許。鈎簾半畝藤花雨。

少年遊 宮詞擬小山

簾銷寶篆捲宮羅。蜂蝶撲飛梭。一樣春風。燕梁鶯戶。那處得春多。 曉妝日日隨春輦。多在牡丹坡。花深深處。柳陰陰處。一片笙歌。

甘州 燈夕寄二隱

漸淒淒芳草綠江南。輕暉弄春容。記少年遊處。簫聲巷陌。燈影簾櫳。月暖烘鑪戲鼓。十里步香紅。鼓枕聽新雨。往事朦朧。 還是春江夢曉。怕等閑愁見。鴈影西東。喜故人好在。水驛寄詩筒。數芳程。漸催花信。送歸帆。知第幾番風。空吟想。梅花千樹。人在其中。

一萼紅 登蓬萊閣有感

步深幽。正雲黃天淡。雪意未全休。鑑曲寒沙。茂林烟草。俛仰今古悠悠。歲華晚。飄零漸遠。誰念我。同載五湖舟。磴古松斜。厓陰苔老。一片清愁。回首天涯歸夢。幾魂飛西浦。淚灑東州。故國山川。故園心眼。還似王粲登樓。最負他。秦鬟妝鏡。好江山。何事此時遊。爲喚狂吟老監。共賦銷憂。

卷二十一 宋詞七十首

王沂孫

字聖與。號碧山。又號中仙。會稽人。有碧山樂府二卷。一名花外集。

天香 龍涎香

孤嶠蟠烟。層濤蛻月。驪宮夜採鉛水。訊遠槎風。夢深薇露。化作斷魂心字。紅瓷候火。還乍識。冰環玉指。一縷紫簾翠影。依稀海天雲氣。幾回帶嬌半醉。翦春燈。夜寒花碎。更好故溪飛雪。小窗深閉。荀令如今頓老。總忘却樽前舊風味。謾惜餘熏。空篝素被。

南浦 春水

柳下碧粼粼。認麴塵。乍生色嫩如染。清溜滿銀塘。東風細。參差縠紋初遍。別君南浦。翠眉會照波痕淺。再來漲綠。迷舊處。添却殘紅幾片。蒲萄過雨新痕。正拍拍輕鷗。翩翩小燕。簾影蘸樓陰。芳流去。應有淚珠千點。滄浪一舸。斷魂重唱蘋花怨。采香幽徑。鴛鴦睡。誰道蒹裙人遠。

又前題

柳外碧連天。漾翠紋。漸平低蘸雲影。應是雪初消。巴山路。蛾眉乍窺清鏡。

綠痕無際。幾番飄蕩。江南恨。弄波素鞵。知甚處。空把落紅流盡。何時橘
里。尊鄉。泛一舸。翩然。東風歸興。孤夢繞滄浪。蘋花漠漠。雨昏烟暝。連筒接
縷。故溪深。掩柴門靜。只愁雙燕。銜春去。拂破藍光千頃。

花犯 苔梅

古蟬娟。蒼鬢素靨。盈盈瞰流水。斷魂十里。歎紺縷飄零。難繫離思。故山歲
晚。誰堪寄。琅玕聊自倚。謾記我。綠蓑衝雪。孤舟寒浪裏。三花兩蕊。破蒙
茸。依依似有恨。明珠輕委。雲臥穩。藍衣正。護春顛顛。羅浮夢。半蟾挂曉。么
鳳冷。山中人乍起。又喚取。玉奴歸去。餘香空翠被。

露華 碧桃

紺葩乍坼。笑爛熳嬌紅。不是春色。換了素妝。重把青螺輕拂。舊歌共渡烟
江。却占玉奴標格。風霜峭。瑤臺種時。付與仙骨。閑門晝掩。悽惻。似淡月
梨花。重化清魄。尙帶唾痕香凝。怎忍攀摘。嫩綠漸暖。溪陰。簌簌粉雲飛出。
芳艷冷。劉郎未應認得。

無悶 雪意

陰積龍荒。寒度鴈門。西北高樓獨倚。悵短景無多。亂山如此。欲喚飛瓊起
舞。怕攪碎。紛紛銀河水。凍雲一片。藏花護玉。未教輕墜。清致。悄無似。有
照水南枝。已攬春意。誤幾度憑欄。莫愁凝睇。應是梨花夢好。未肯放。東風
來人世。待翠管。吹破蒼茫。看取玉壺天地。

眉妩 新月

漸新痕。懸柳澹影穿花。依約破初暝。便有團圓意。深深拜。相逢誰在香逕。
畫眉未穩。料素娥猶帶離恨。最堪愛。一曲銀鈎小。寶簾挂秋冷。
千古盈虧休問。歎謾磨玉斧。難補金鏡。太液池猶在。淒涼處。何人重賦清景。
故山夜永。試待他。窺戶端正。看雲外山河。還老桂花舊影。

水龍吟 牡丹

曉寒慵揭珠簾。牡丹院落。落花開未。玉闌干畔。柳絲一把。和風半倚。國色微
酣。天香乍染。扶春不起。自真妃舞罷。謫仙賦後。繁華夢。如流水。池館家
家芳事。記當時。買栽無地。爭如一朵。幽人獨對。水邊竹際。把酒花前。剩拚
醉了。醒來還醉。怕洛中春色。匆匆又入。杜鵑聲裏。

又海棠

世間無此傳。玉環未破。東風睡。將開半斂。似紅還白。餘花怎比。偏占年
華。禁烟纔過。夾衣初試。歎黃州一夢。燕宮絕筆。無人解。看花意。猶記花
陰同醉。小闌干。月高人起。千枝媚色。一庭芳景。清寒似水。銀燭延嬌。綠房
留艷。夜深花底。怕明朝。小雨濛濛。便化作燕支淚。

又落葉

曉霜初著青林。望中故國。淒涼早。蕭蕭漸積。紛紛猶墜。門荒徑悄。渭水風
生。洞庭波起。幾番秋杪。想重崖半沒。千峯盡出。山中路。無人到。前度題
紅杏。杏。翅宮溝。暗流空澆。啼螿未歇。飛鴻欲過。此時懷抱。亂影翻窗。碎聲
敲砌。愁人多少。望吾廬。甚處。只應今夜。滿庭誰掃。

屋角疎星。庭陰暗水。猶記藏鴉新樹。試折梨花。行入小欄深處。聽粉片、簌簌飄墜。有人在。夜窗無語。料如今。門掩孤燈。畫屏塵滿斷腸句。佳期渾似流水。還見梧桐幾葉。輕敲朱戶。一片愁聲。應做兩邊愁緒。江路遠。歸鴈無憑。寫繡箋。倩誰將去。謾無聊。猶掩芳樽。醉聽深夜雨。

齊天樂

碧痕初化池塘草。熒熒野光相趁。扇薄星流。盤明露滴。零落秋原飛燐。練裳暗近。記穿柳生涼。度荷分暝。誤我殘編。翠囊空歎夢無準。樓陰時過數點。倚欄人未睡。會賦幽恨。漢苑飄苔。秦陵墜葉。千古淒涼不盡。何人爲省。但隔水餘輝。傍林殘影。已覺蕭疎。更堪秋夜永。

又蟬

綠槐千樹。西窗悄。厭厭晝眠驚睡。飲露身輕。吟風翅薄。半翦冰箋誰寄。淒涼倦耳。謾重拂琴絲。怕尋冠珥。短夢深宮。向人猶自訴憔悴。殘紅收盡。過雨。晚來頻斷續。都是秋意。病葉難留。纖柯易老。空憶斜陽身世。窗明月碎。甚已絕餘音。尙遺枯蛻。鬢影參差。斷魂清鏡裏。

又前題

一襟餘恨。宮魂斷。年年翠陰庭樹。乍咽涼柯。還移暗葉。重把離愁深訴。西窗過雨。怪瑤珮流空。玉箏調柱。鏡暗妝殘。爲誰嬌鬢尙如許。銅仙鉛淚似洗。歎移盤去遠。難貯零露。病翼驚秋。枯形閱世。消得斜陽幾度。餘音更

苦甚獨抱清商。頓成淒楚。謾想薰風。柳絲千萬縷。

又贈秋匡道人西歸

冷烟殘水山陰道。家家擁門黃葉。故里魚肥。初寒鴈落。孤艇將歸時節。江南恨切。問還與何人。共歌新闕。換盡秋芳。想渠西子更愁絕。當時無限舊事。歎繁華似夢。如今休說。短褐臨流。幽懷倚石。山色重逢都別。江雲凍結。算只有梅花。尚堪攀折。寄取相思。一枝和夜雪。

三姝媚 次周公謹故京送別韻

蘭缸花半綻。正西窗淒淒。斷螢新鴈。別久逢稀。謾相看華髮。共成銷黯。總是飄零。更休賦。梨花秋苑。何況如今。離思難禁。俊才都減。今夜山高江淺。又月落帆空。酒醒人遠。彩袖烏絲。解愁人惟有。斷歌幽婉。一信東風。再約看。紅腮青眼。只恐扁舟西去。蘋花弄晚。

又櫻桃

紅櫻懸翠葆。漸金鈴枝深。瑤階花少。萬顆燕支。贈舊情爭奈。弄珠人老。扇底清歌。還記得。樊姬嬌小。幾度相思。紅豆都銷。碧絲空裊。芳意茶蘼開早。正夜色瑛盤。素蟾低照。薦筍同時。歎故園春事已無多了。貯滿筠籠。偏暗觸。天涯懷抱。謾想青衣初見。花陰夢好。

慶清朝 榴花

玉局歌殘。金陵句絕。年年負却薰風。西鄰窈窕。獨憐入戶飛紅。前度綠陰載酒。枝頭色比似裙同。何須擬。蠟珠作蒂。湘彩成叢。誰在舊家殿閣。自

太真仙去。掃地春空。朱旛護取。如今應誤花工。顛倒絳英滿徑。想無車馬到山中。西風後。尙餘數點。還勝春濃。

高陽臺

淺萼梅酸。新溝水綠。初晴節序暄妍。獨立雕欄。誰憐枉度華年。朝朝準擬清明近。料燕鈕。須寄銀箋。又爭知。一字相思。不到吟邊。雙蛾不拂青鸞冷。任花陰寂寂。掩戶閑眠。屢卜佳期。無憑却恨金錢。何人寄與天涯信。趁東風。急整歸鞭。縱飄零。滿院楊花。猶是春前。

又西麓陳君衡遠遊未還周公謹有懷人之賦倚其歌而和之

駝褐輕裝。狨轡小隊。冰河夜渡流澌。朔雪平沙。飛花亂拂蛾眉。琵琶已是淒涼調。更賦情。不比當時。想如今。人在龍庭。初勸金卮。一枝芳信應難寄。向山邊水際。獨抱相思。江雁孤回。天涯人自歸遲。歸來依舊秦淮碧。問此愁。還有誰知。對東風。空似垂楊。零亂千絲。

又

殘雪庭陰。輕寒簾影。霏霏玉管春葭。小帖金泥。不知春是誰家。相思一夜窗前夢。奈個人。水隔天遮。但淒然。滿樹幽香。滿地橫斜。江南自是離愁苦。况游驄古道。歸鴈平沙。怎得銀箋。殷勤與說年華。如今處處生芳草。縱縱凭高。不見天涯。更消他。幾度東風。幾度飛花。

掃花游秋聲

商飈乍發。淅淅初聞。蕭蕭還住。頓驚倦旅。背青燈弔影。起吟愁賦。斷續

無憑。試立荒庭聽取。在何許。但落葉滿階。惟有高樹。迢遞歸夢阻。正老
耳難禁。病懷淒楚。故山院宇。想邊鴻孤唳。砌蛩私語。數點相和。更著
蕉蕉
細雨。避無處。這閑愁。夜深尤苦。

又 綠陰

小庭蔭碧。遇驟雨疎風。剩紅如掃。翠交徑小。問攀條弄蕊。有誰重到。謾說
青青。比似花時更好。怎知道。一別漢南。遺恨多少。清晝人悄悄。任密護
簾寒。暗迷窗曉。舊盟誤了。又新枝嫩子。總隨春老。漸隔相思。極目長亭路
杳。攬懷抱。聽蒙茸。數聲啼鳥。

又

捲簾翠濕。過幾陣殘寒。幾番風雨。問春住否。但匆匆暗裏。換將花去。亂碧
迷人。總是江南舊樹。謾凝竚。念昔日采香。人更何許。芳徑攜酒處。又蔭
得青青。嫩苔無數。故林晚步。想參差漸滿。野塘山路。倦枕閑牀。正好微曛
院宇。送淒楚。怕涼聲。又催秋暮。

又

滿庭嫩碧。漸密葉迷窗。亂枝交路。斷紅任處。但匆匆換得。翠痕無數。暗影
沉沉。靜鎖清和院宇。試凝佇。怕一點舊香。猶在幽樹。濃陰知幾許。且拂
簾清眠。引筇閑步。杜郎老去。算尋芳較晚。倦懷難賦。縱勝花時。到了愁風
怨雨。短亭暮。謾青青。怎遮春去。

瑣窗寒

趁酒梨花。催詩柳絮。一窗春怨。疎疎過雨。洗盡滿階芳片。數東風。二十四番。幾番誤了。西園宴。認小簾朱戶。不如飛去。舊巢雙燕。會見雙蛾淺。自別後。多應黛痕不展。撲蝶花陰。怕看題詩團扇。試憑他。流水寄情。翅紅不到春更遠。但無聊。病酒厭厭。夜月茶蘼院。

又春寒

料峭東風。廉纖細雨。落梅飛盡。單衣惻惻。再整金猊香燼。誤千紅。試妝較遲。故園不似清明近。但滿庭柳色。柔絲羞舞。淡黃猶凝。芳景。還重省。向薄晚窺簾。嫩陰欹枕。桐花漸老。已做一番風信。又看看。綠遍西湖。早催塞北歸鴈影。等歸時。爲帶春歸。併帶江南恨。

應天長

疎簾蝶粉。幽徑燕泥。花間小雨初足。又是禁城寒食。輕舟泛晴綠。尋芳地。來去熟。尙彷彿。大堤南北。望楊柳。一片陰陰。搖曳新綠。重訪艷歌人。聽取春聲。猶是杜郎曲。蕩漾去年春色。深深杏花屋。東風會共宿。記小刻。近窗新竹。舊游遠。沉醉歸來。滿院銀燭。

摸魚兒

洗芳林。夜來風雨。匆匆還送春去。方纔送得春歸了。那又送君南浦。君聽取。怕此際。春歸也。過吳中路。君行到處。便快折河邊。千條翠柳。爲我繫春住。春還住。休索吟春伴侶。殘花今已塵土。姑蘇臺下。烟波遠。西子近來何許。能喚否。又只恐。殘春到了無憑據。煩君妙語。更爲我且將春。連花帶

柳。寫入翠箋句。

聲聲慢

啼螿門靜。落葉堆深。秋聲又入吾廬。一枕新涼。西窗晚雨疎疎。舊香舊色換却。但滿川。殘柳荒蒲。茂陵遠。任歲華苒苒。老盡相如。昨夜西風初起。想尊邊呼權。橘後思書。短景淒然。殘歌空扣銅壺。當時送行共約。鴈歸時。人賦歸歟。鴈歸也。問人歸。如鴈也無。

望梅

畫欄人寂。喜輕盈照水。犯寒先坼。裊數枝。雲縷絞綃。露淺淺塗黃。漢宮嬌額。翦玉裁冰。已占斷。江南春色。恨風前素艷。雪裏暗香。偶成拋擲。如今眼穿故國。待拈花弄蘂。時話思憶。想隴頭。依約飄零。甚千里芳心。杳無消息。粉怯珠愁。又只恐。吹殘羌笛。正斜飛。半窗曉月。夢回隴驛。

張

炎

字叔夏。循王俊裔。居臨安。自號樂笑翁。有玉田詞二卷。鄭思肖為之序。仇仁近云。叔夏詞意度超玄。律呂協洽。嘗與白石老仙相鼓吹。

南浦春水

波暖綠鱗鱗。燕飛來。好是蘇堤纔曉。魚沒浪痕圓。流紅去。翻喚東風難掃。荒橋斷浦。柳陰撐出。扁舟小。回首池塘。青欲遍。絕似夢中芳草。和雲流出空山。甚年年淨洗。花香不了。新綠乍生時。孤村路。猶憶那回會到。餘情渺渺。茂林觴詠。如今悄。前度劉郎。歸去後溪上。碧桃多少。

水龍吟 白蓮

仙人掌上芙蓉。涓涓猶溼金盤露。輕妝照水。纖裳玉立。飄飄似舞。幾度消凝。滿湖烟月。一汀鷗鷺。記小舟夜悄。波明香遠。渾不見。花開處。應是浣紗人妒。褪紅衣。被誰輕誤。閑情雅澹。冶容清潤。憑嬌待語。隔浦相逢。偶然傾蓋。似傳心素。怕湘臯珮解。綠雲十里。卷西風去。

解連環孤鴈

楚江空晚。悵離羣萬里。恍然驚散。自顧影。欲下寒塘。正沙淨草枯。水平天遠。寫不成書。只寄得。相思一點。歎因循誤了。殘氈擁雪。故人心眼。誰憐旅愁荏苒。謾長門夜悄。錦箏彈怨。想伴侶。猶宿蘆花。也會念春前。去程應轉。暮雨相呼。怕驀地。玉關重見。未羞他。雙燕歸來。畫簾半捲。

探春雪霽

銀浦流雲。綠房迎曉。一抹牆腰月淡。暖玉生香。懸冰解凍。碎滴瑤階如霰。纔放些晴意。早瘦了。梅花一半。也知不做花香。東風何事吹散。搖落似成秋苑。甚釀得春來。怕教春見。野渡舟迴。前村門掩。應是不勝清怨。次第尋芳去。灞橋外。蕙香波暖。猶妒簷聲。看燈人在深院。

又歲晚吳中作

列屋烘爐。深門響竹。催殘客裏時序。投老情懷。薄游滋味。消得幾回淒楚。聽鴈聽風雨。更聽過。數聲柔櫓。暗將一點歸心。試託鄉書分付。試問西樓在否。休忘了。盈盈端正窺戶。簾卸蟾冰。柳縈蛾雪。次第滿城簫鼓。閑見誰家月。渾不記。舊游何處。伴我微吟。恰有梅花一樹。

高陽臺 西湖春感

接葉巢鶯。平波卷絮。斷橋斜日歸船。能幾番游。看花又是明年。東風且伴
薔薇住。到薔薇。春已堪憐。更淒然。萬綠西冷。一抹荒烟。當年燕子知何
處。但苔深韋曲。草暗斜川。見說新愁。如今也到鷗邊。無心再續笙歌夢。掩
重門。淺醉閑眠。莫開簾。怕見飛花。怕聽啼鶯。

掃花遊 春飲殊鄉醉餘偶賦

嫩寒禁暖。正草色侵衣。野光如洗。去城數里。繞長堤。是柳。釣船如鱗。小立
斜陽。試數花風第幾。問春意。待留取。斷紅心事難寄。芳信成。撚指甚遠。
客他鄉。老懷如此。醉餘夢裏。尙分明認得。舊時羅綺。可惜空簾。誤却歸來
燕子。勝遊地。想依然。斷橋流水。

又高疏寮東野園

烟霞萬壑。記曲徑尋幽。霽痕初曉。綠窗窈窕。看隨花。甃石。就泉通沼。幾日
不來。一片蒼雲未掃。自長嘯。恨喬木荒涼。都是殘照。碧天秋浩渺。聽虛
籟泠泠。飛下孤峭。山空翠老。步仙風。怕有采芝人到。野色閑門。芳草不除
更好。境深悄。比斜川。又清多少。

渡江雲 久客山陰王菊存問予近作書以寄之

山空天入海。倚樓望極。風急暮潮初。一簾鳩外雨。幾處閑田。隔水動春鉏。
新烟禁柳。想如今。綠到西湖。猶記得。當年深隱。門掩雨。三株。愁余。荒洲
古。綴斷梗。疎萍。更漂流。何處。空自覺。圍羞帶減。影怯燈孤。長疑卽見桃花

面甚近來。翻致無書。書縱遠。如何夢也都無。

又次趙元甫韻

錦香繚繞地。深燈挂壁。簾影浪花斜。酒船歸去後。轉首河橋。那處認紋紗。重盟鏡約。還記得。前度秦嘉。惟只有。葉題堪寄。流不到天涯。驚嗟。十年心事。幾曲闌干。想蕭娘聲價。閑過了。黃昏時候。疎柳啼鴉。浦潮夜湧。平沙淨。問斷鴻。知落誰家。書又遠。空江片月蘆花。

綺羅香紅葉

萬里飛霜。千山落木。寒艷不招春妒。楓冷吳江。獨客又吟愁句。正船艤。流水孤村。似花繞。斜陽芳樹。甚荒溝。一片淒涼。載情不去。載愁去。長安誰問倦旅。羞見衰顏借酒。飄零如許。謾倚新妝。不入洛陽花譜。爲回風。起舞樽前。盡化作。斷霞千縷。記陰陰。綠遍江南。夜窗聽暗雨。

清平樂

候蛩淒斷。人語西風岸。月落沙平江似練。望盡蘆花無鴈。暗教愁損蘭成。可憐夜夜閑情。只有一枝梧葉。不知多少秋聲。

疎影梅影

黃昏片月。似滿地碎陰。還更清絕。枝北枝南。疑有疑無。幾度背燈難折。依稀倩女離魂處。緩步出。前村時節。看夜深。竹外橫斜。應妒過雲明滅。窺鏡蛾眉淡掃。爲容不在貌。獨抱孤潔。莫是花光。描取春痕。不怕麗譙吹徹。還驚海上。燃犀去。照水底。珊瑚疑活。做弄得。酒醒天寒。空對一庭香雪。

邁陂塘

愛吾廬。傍湖千頃。蒼茫一片清潤。晴嵐暖翠融融處。花影倒窺天鏡。沙浦迥。看野水。涵波隔柳橫孤艇。眠鷗未醒。甚占得尊鄉。都無人見。斜照起春暝。休重省。莫問山中秦晉。桃源今度難認。林間却是長生路。一笑元非捷徑。深更靜。待散髮。吹簫鶴背天風冷。憑高露飲。正碧落塵空。光搖半壁。月在萬松頂。

甘州 餞沈秋江

記玉關踏雪事清遊。寒氣敝貂裘。傍枯林古道。長河飲馬。此意悠悠。短夢依然江表。老淚灑西州。一字無題處。落葉都愁。載取白雲歸去。問誰留。楚珮弄影中洲。折蘆花贈遠。零落一身秋。向尋常。野橋流水。待招來。不是舊沙鷗。空懷感。有斜陽處。最怕登樓。

月下笛 甬東積翠山舍

萬里孤雲。清遊漸遠。故人何處。寒窗裏。會記經行舊時路。連昌約略無多柳。第一是。難聽夜雨。謾驚回悽悄。相看燭影。擁衾誰語。張緒歸何暮。冷落依依。短橋鷗鷺。天涯倦旅。此時心事良苦。只愁重灑西州淚。問杜曲。人家在否。恐翠袖。正天寒。猶倚梅花那樹。

臺城路 送周方由之吳

朗吟未了西湖酒。驚心又歌南浦。折柳官橋。呼船野渡。還聽垂虹風雨。漂流最苦。況如此江山。此時情緒。怕有鴟夷笑。人何事。載詩去。荒臺祇今

在否。再休登望遠。都是愁處。暗草埋沙。明波洗月。誰念天涯羈旅。荷陰未暑。快料理歸程。再盟鷗鷺。只有空山。近來無杜宇。

又寄太白山人陳又新

薛濤箋上相思字。重開又還重摺。太白秋聲。東瀛柳色。一縷輕痕輕折。虛沙動月。歎千里悲歌。唾壺敲缺。記得巴山。此時懷抱那時說。寒香深處話別。病來渾瘦損。懶賦清切。笑裏移春。吟邊慨古。多少英游消歇。迴潮似咽。送一點愁心。故人天末。江影沉沉。夜涼鷗夢闊。

又杭友抵越適鑑曲漁舍會飲

春雲不暖垂楊柳。吹却絮雲多少。燕子人家。夕陽巷陌。行入野畦深窈。壽花鬪草。記小艇尋芳。斷橋初曉。那日心情。幾人同向近來老。消憂何處最好。夜遊頻秉燭。猶是遲了。南浦歌闌。東林社冷。贏得如今懷抱。吟悰暗惱。待醉也慵聽。勸歸啼鳥。怕攬離愁。亂紅休去掃。

又庚辰會江蘭坡於薊北恍然如夢回憶舊遊已十八年矣

十年舊事翻疑夢。重逢可憐俱老。水國春空。山城歲晚。無語相看一笑。荷衣換了。任京洛塵沙。冷凝風帽。見說吟情。近來不到謝池草。歡遊會步翠窈。亂紅迷紫曲。芳意今少。舞扇招香。歌撓喚玉。猶憶錢塘蘇小。無端暗惱。又幾度流連。燕昏鶯曉。回首妝樓。甚時重去好。

又爲湖天賦

扁舟忽過蘆花浦。閑情便隨鷗去。水國吹簫。虹橋問月。西子如今何許。危

闌謾拊。正獨立蒼茫。半空飛露。倒影虛明。洞庭波映廣寒府。魚龍吹浪自舞。渺然凌萬頃。如聽風雨。夜氣浮山。晴暉蕩日。無尋秋處驚鳥。自語。尙記得當時。故人來否。勝景平分。此心遊太古。

真珠簾 近雅軒卽事

雲深別有深庭宇。小簾櫺。占取芳菲多處。花暗曲房春。潤幾番酥雨。見說蘇堤晴未穩。便好趁。踏青人去。休去。且料理琴書。夷猶今古。誰見靜裏閑心。縱荷衣未葺。雪巢堪賦。醒醉一乾坤。任此情如許。茂樹石牀同坐久。又却被。清風留住。欲住。奈簾影妝樓。翦燈人語。

三姝媚 送舒亦山

蒼潭枯海樹。正雪竇高寒。水聲東去。古意蕭閑。問結廬人遠。白雲誰侶。賀監猶存。還散跡。千巖風露。抱瑟空游。都是淒涼。此愁誰語。莫趁江湖鷗鷺。怕太乙爐烟。暗銷鉛虎。投老心情。判歸來何事。共成羈旅。布襪青鞋。休悞入。桃源深處。待得重逢。却說巴山夜雨。

憶舊遊 新朋故侶醉酒遲留吳山縱橫渺渺今予懷也

記開簾送酒。隔水懸燈。款語梅邊。未了清游興。又飄然獨去。何處山川。淡風暗收榆莢。吹下沈郎錢。歎客裏光陰。消磨艷冶。都在尊前。留連。住人處。是鑑曲窺鶯。蘭沼圍泉。醉拂珊瑚樹。寫百年幽恨。分付吟箋。故舊幾回飛夢。江雨夜涼船。縱忘却歸期。千山未必無杜鵑。

探芳信 次周草窗韻

坐清晝。正冶思縈花。餘醒倦酒。甚探芳人老。芳心尙如舊。銷魂忍說銅駝事。不是因春瘦。向西園。竹掃頽垣。蔓羅荒甃。風雨夜來驟。歎歌冷鶯簾。恨凝蛾岫。愁到今年。都似去年否。賦情懶聽山陽笛。目極空搔首。我何堪。老却江潭漢柳。

梅子黃時雨病中懷歸

流水孤村。愛塵事頓消。來訪深隱。向醉裏誰扶。滿身花影。鷗鷺相看如一。作鷺相比。瘦。近來不是傷春病。嗟流景。竹外野橋。猶繫烟艇。誰引。斜川歸興。便啼鵲縱少。無奈時聽。待棹擊空明。魚波千頃。彈斷琵琶留不住。最愁人是黃昏近。江風緊。一行柳絲吹暝。

瑣窗寒

亂雨敲春。深烟帶晚。水窗慵凭。空簾慢卷。數日更無花影。怕依然。舊時歸燕。定知未識江南冷。最憐他樹底。鶯紅不語。背人吹盡。清澗通幽徑。謾移燈剪韭。試溫香鼎。分吟醉裏。過了幾番風信。想竹間。高閣半開。小車未來。猶自等。傍新晴。隔柳呼船。待教潮信穩。

又王碧山又號中仙越人也其詩清峭其詞閑雅有姜白石意趣今絕響矣余悼之

斷碧分山。空簾剩月。故人天外。香留酒滯。蝴蝶一生花裏。想如今。愁魂正遠。夜臺夢語秋聲碎。自中仙去後。詞箋賦筆。便無清致。都是淒涼意。悵玉筍埋雲。錦衣歸去。形容憔悴。料應也孤吟山鬼。那知人是彈折素琴。黃金鑄出相思淚。但柳枝。門掩清陰。候蛩愁暗葦。

法曲獻仙音 聽琵琶有懷昔游

雲隱山暉。樹分溪影。未放妝臺簾卷。箏密籠香。鏡圓窺粉。花深自然寒淺。正人在。銀屏底。琵琶半遮面。語聲軟。且休彈。玉關愁怨。怕喚起。西湖那時春感。楊柳古灣頭。記小憐。隔水會見。聽到無聲。謾贏得。情緒難剪。把一襟心事。散入落梅千點。

西河史元叟依綠莊賞荷

花最盛。西湖會泛烟艇。鬧紅深處小秦箏。斷橋夜飲。鴛鴦水宿。不知寒。如今翻被驚醒。那時事。都倦省。闌干來此閑凭。是誰分得半機雲。恍疑晝錦。想當年飛燕。皺裙時。舞盤微墮珠粉。軟波不剪。素練靜。碧盈盈。移下秋影。醉裏玉書難認。且脫巾露髮。飄然乘興。一葉愁香。天風冷。

長亭怨 辛卯歲會菊泉於薊北踰八年會于甬東未幾別去將復之北作此以饒

記橫篴。玉關高處。萬疊沙寒。雪深無路。做却貂裘。遠遊歸後。共誰語。故人何許。渾忘了。江南舊雨。不擬重逢。應笑我。飄零如羽。同去。釣珊瑚海樹。底事便成行旅。烟迷斷浦。更幾點。戀人飛絮。如今又。京國尋春。定應被。薇花留住。且莫把孤愁。說與當時歌舞。

又有懷故居

望花外。小橋流水。門巷悄然。玉簫聲絕。鶴去臺空。珮環何處。弄明月。十年前事。愁千折。心情頓別。露粉風香。誰爲主。都成消歇。淒咽。曉窗分袂處。同把帶鸕親結。江空歲晚。肯忘了。尊前會說。恨西風。不庇寒蟬。便掃盡。一

林殘葉。謝楊柳多情。還有綠陰時節。

西子妝 吳夢窗自製此曲余喜其聲調爛雅久欲效而未能甲午春寓羅江陳文卿間行江上景况離

離因填此詞惜舊譜零落不能倚聲歌也

白浪搖天。清陰漲地。一片野情幽意。楊花點點是春心。替風前。萬花吹淚。遙岑寸碧。有誰看。朝來清氣。自沉吟。甚流光輕把繁華如此。斜陽外。隱約孤村。隔塢閑門閉。漁舟何似。想桃源。路通人世。危欄靜倚。千年事。都消一醉。謾依依。愁落鵲聲萬里。

風入松

小窗晴綠占閑波。晝影舞飛梭。惜春猶問花多少。柳陰中。春已無多。乍試泥金巧扇。初裁水碧輕羅。園林未肯愛清和。人醉牡丹坡。笑歌且醉平生事。問東風。畢竟如何。燕子尋常巷陌。酒邊莫唱西河。

瑤臺聚八仙

秋月娟娟。人正遠。魚鴈待拂吟箋。也知遊事。多在第二橋邊。花底鴛鴦深處睡。柳陰淡隔裏湖船。路綿綿。夢吹舊曲。如此山川。平生幾兩謝屐。便放歌自得。直上風烟。峭壁誰家。長嘯竟落松前。十年孤劍萬里。又何似。畦分抱瓮泉。中山酒。且醉滄石髓。白眼青天。

南樓令

風雨客殊鄉。梧桐傍小窗。甚秋聲。今夜偏長。暗憶舊時歌舞地。誰得似。牧之狂。茉莉擁釵梁。窩雲一枕香。醉夢騰多少思量。明月半牀人睡覺。聽

說道夜深涼。

南歌子

葉密春聲聚。花多瘦影重。只留一路過東風。圍得生香不斷錦薰籠。月
地連金屋。雲樓瞰翠蓬。惺鬆語笑隔簾櫳。知是誰調鸚鵡。柳陰中。

浪淘沙

香霧濕雲鬢。蕊珮珊珊。酒醒微步晚波寒。金鼎尚存丹已化。雪冷虛壇。
遊冶未知還。鶴怨空山。瀟湘無夢繞叢蘭。碧海茫茫歸不去。却在人間。

卷二十一 宋詞五十一首

石孝友 字次仲。有金谷遺音一卷。

點絳脣

霽景澄秋。晚風吹盡朝來雨。夕陽烟樹。萬里山光暮。一帶長川自在流
今古。人何處。月波橫素。冷浸蒹葭浦。

又

醉倚危檣。望中歸思生天際。山腰渚尾。幾簇漁樵市。帆落西風一段蘆
花水。八千里。錦書欲寄。新鴈會來未。

西地錦

回望玉樓金闕。正水遮山隔。風兒又起。雨兒又煞。好愁人天色。兩岸荻
花楓葉。爭舞紅吹白。中秋過也。重陽近也。作天涯孤客。

好事近

微雨灑芳塵。醞造可人春色。聞道夢雲樓外。正小桃花發。殷勤留取最繁枝。樽前待閑折。準擬亂紅深處。化一雙蝴蝶。

清平樂

天涯重九。獨對黃花酒。醉撚黃花和淚嗅。憶得去年攜手。去年同醉流霞。醉中折盡黃花。還是黃花時候。去年人在天涯。

謁金門

雲樹直。雨歇半空猶濕。山影插尖高幾尺。依依銜落日。遠岸雙飛鷓鴣。一水無情自碧。颯颯白蘋風正急。斷腸人獨立。

臨江仙

醉袖吟鞭行色裏。帽簷低處風斜。晚山一半被雲遮。殘陽明遠水。古木集栖鴉。暮去朝來緣底事。不如早早還家。曲屏深幌小窗紗。翠沾眉上柳。紅搵臉邊花。

又

長記夢雲樓上住。殘燈影裏遲留。依稀綠慘更紅羞。露痕雙臉淚。山樣兩眉愁。一點輕帆天際去。雲濤烟浪悠悠。今宵獨宿古江頭。水腥魚菜市。風碎荻花洲。

南歌子

亂絮飄晴雪。殘花繡地衣。西園歌舞驟然稀。只有多情蝴蝶。作團飛。舊

事深琴怨。新愁減帶圍。倚樓凝望更依依。怕見一天風雨。捲春歸。

又

春淺梅紅小。山寒嵐翠薄。斜風吹雨入簾幕。夢覺南樓嗚咽。數聲角。歌
酒工夫懶。別離情緒惡。舞衫寬盡不堪著。若比那回相見。更消削。

鷓鴣天

別後應憐信息疎。西風幾度到庭梧。夜來縱有鴛鴦夢。春去空餘蛺蝶圖。
烟樹遠。塞鴻孤。垂垂天影帶平蕪。憑誰寫此相思曲。寄與馮川鄭小奴。

眼兒媚

愁雲淡淡雨蕭蕭。暮暮復朝朝。別來應是。眉峯翠減。腕玉香銷。小軒獨
坐相思處。情緒好無聊。一叢萱草。數竿脩竹。幾葉芭蕉。

減字木蘭花贈何藻

新荷小小。比目魚兒翻翠藻。小小新荷。點破清光景趣多。青青半捲。一
寸芳心渾未展。待得圓時。罩定鴛鴦一對兒。

孫惟信

字季蕃。號花翁。有詞一卷。

沈伯時云。孫花翁有好詞。亦善運意。但雅正中忽有一兩句市井語。可惜。

風流子

三疊古陽關。輕寒沁。清月滿征鞍。記玉笋攬衣。翠囊親贈。繡巾拭淚。金柳
初攀。自回首。燕臺雲掩冉。鳳閣雨闌珊。天有盡頭。水無西注。鬢難留黑。帶
易成寬。啼妝東風悄。菱花在擬倩。錦鳥封還。應任恨蛾凝黛。慵髻堆鬟。

奈情逐事遷。心隨春老。夢和香冷。歡與花殘。閑殺烟茸窗閣。十二屏山。

劉

褒

字伯寵。登淳熙進士。除司門郎中。歷官朝請郎。知西全州。有集。

滿庭芳留別

柳裊金絲。梨鋪香雪。一年春事方中。燭前乍見。花艷覺羞紅。枕臂香痕未落。舟橫岸。作計匆匆。明朝去。暮天平水。雙槳碧雲東。隔籬歌一闋。琵琶聲斷。燕子樓空。歎陽臺夢杳。行雨無踪。後會芙蓉未老。從今去。日望歸鴻。愁如織。斷腸啼鴉。多事訴春風。

張

槃

有梅厓集。

綺羅香漁浦有感

浦月窺檐。松泉漱枕。屏裏吳山何處。暗粉疎紅。依舊爲誰勻注。都負了。燕約鶯期。更閑却。柳烟花雨。縱十分。春到郵亭。賦懷應是斷腸句。青青原上薺麥。還被東風無賴。翻成離緒。望極天西。惟有隴雲江樹。斜照帶。一縷新愁。盡分付。暮潮歸去。步閑階。時卜心期。落花空細數。

潘希白

字懷古。號漁莊。永嘉人。寶祐中登第。幹辦臨安府節制司公事。德祐中。起爲史館檢校。不赴。

大有九日

戲馬臺前。采花籬下。問歲華。還是重九。恰歸來。南山翠色依舊。簾櫳昨夜聽風雨。都不似。登臨時。時候。一片宋玉情懷。十分衛郎清瘦。紅萸佩。空對酒。砧杵動微寒。暗欺羅袖。秋色無多。早是敗荷衰柳。強整帽簷欹側。曾經向。天涯搔首。幾回憶。故國尊鱸。霜前鴈後。

湯 恢 號西村。

二郎神用徐幹臣韻

瑣窗睡起。閑佇立。海棠花影。記翠楫銀塘。紅牙金縷。杯泛梨花冷。燕子銜
來相思字。道玉瘦。不禁春病。應蝶粉半銷。鴉雲斜墜。暗塵侵鏡。還省香
痕碧唾。春衫都凝。悄一似荼蘼。玉肌翠帔。消得東風喚醒。青杏單衣。楊花
小扇。閑却晚春風景。最苦是。蝴蝶盈盈弄晚。一簾風靜。

張 矩 字子成。有梅淵詞。

應天長 麴院風荷

換橋渡舫。添柳護堤。坡仙舊跡今續。四面水窗如染。香波釀春麪。田田處。
成暗綠。正萬羽。背風斜轟。亂鷗去。不信雙鴛。午睡猶熟。還記湧金樓。共
撫雕欄。低度浣沙曲。自與故人輕別。榮枯換涼燠。亭亭影。驚艷日。忍到手。
又成輕觸。悄無語。獨撚花鬚。心事會卜。

又南屏晚鐘

翠屏對晚。烏榜占隄。鐘聲又斂春色。幾度半空敲月。山南應山北。歡娛地。
空浪迹。謾記省。五更聞得。洞天曉。夾柳橋疎。穩縱香勒。前度湧金樓。嘯
傲東風。鷗鷺半相識。暗數院僧歸盡。長虹臥深碧。花間恨。猶記憶。正素手。
暗裁輕拆。夜深後。不道人來。燈細窗隙。

趙耆孫

遠朝歸梅

金谷先春。見乍開。江梅玉膩。珠簾院落。人靜雨疎。烟細橫斜。帶月別。是一般風味。金尊裏。任遺英亂點。殘粉低墜。惆悵秦隴當年。念水遠天長。故人難寄。山城倦眼。無緒更看桃李。當時醉魄。算依舊。徘徊花底。斜陽外。謾回首。畫樓十二。

毛

翊

字元白。號吾竹。

踏莎行題草窗詞卷

顧曲多情。尋芳未老。一庭風日知音少。夢隨蝶去。恨牆高。醉聽鶯語。嫌籠小。紅燭呼盧。黃金買笑。彈絲踏躡長安道。彩箋拈起。錦囊花。綠窗留得。羅裙草。

翁元龍

字時可。號處靜。

瑞龍吟

清明近。還是遞攢東風。做成花訊。芳時一刻千金。半晴半雨。醉春未準。鴈橫陣。數字向人慵寫。暗雲難認。西園猛憶逢迎。翠紈障面。花間笑隱。曲徑池蓮平砌。絳裙會與。濯香湔粉。無奈燕幕鶯簾。輕負嬌俊。青榆巷陌。蹋馬紅成寸。十年夢。秋千弔影。韞羅塵褪。事往憑誰問。晝長病酒添新恨。烟冷斜陽暝。山黛遠。曲曲闌干凭損。柳絲萬尺。半堤風緊。

李肩吾

字子我。號蠟洲。

清平樂

夢魂尋遍。忽向尊前見。好似烏衣春社燕。軟語東風庭院。丁寧記取兒

家。碧雲隱約紅霞。直下小橋流水。門前一樹桃花。

康仲伯

憶真妃

匆匆一望關河。聽離歌。艇子急催雙槳。下清波。淋浪醉闌干淚。奈情何。明日畫橋西畔。暮雲多。

覃懷高

水調歌頭遊武夷

翠蕤插雲表。初意隔仙凡。臨風據案一見。邂逅似開顏。幾欲拏舟九曲。便擬捫參絕頂。直下俯塵寰。聊此稅吾駕。贏得片時閑。問仙人。緣底事。去不還。長風浩浩何許。清夢杳難攀。只有蒼烟古木。好在清湍白石。依舊畫圖間。回首武夷路。窈靄沒雲鬟。

趙旭

曲入冥

握管淚盈眸。欲寫還休。人間情是阿誰留。千丈游絲不落地。風外悠悠。烟雨晚山稠。人在西樓。幾行候鴈下汀洲。一箇思鄉寒夜客。萬種離愁。

梅扶字叔茂

菩薩蠻

絲絲楊柳鶯聲近。晚風吹過秋千影。寒色一簾輕。燈殘夢不成。耳邊消息在。笑指花梢待。又是不歸來。滿庭花自開。

楊彥齡

浣溪沙武進廳壁

倦客東歸得自由。西風江上泛扁舟。夜寒霜月素光流。想得故人千里外。醉吟應上謝家樓。不多天氣近中秋。

李珣 字元暉

擊梧桐別西湖社友

楓葉濃於染。秋正老。江上征衫寒淺。又是秦鴻過。霽烟外。寫出離愁幾點。年來歲去。朝生暮落。人似吳潮展轉。怕聽陽關曲。奈短笛喚起。天涯情遠。雙屐行春。扁舟嘯晚。憶著鷗湖鶯苑。小小梅花屋。雪月後。記把山屏牢掩。惆悵明朝。何處故人相望。但碧雲半斂。定蘇堤。重來時候。芳草如剪。

方有聞

字躬明。號堂溪。歙州人。中進士。授南豐尉。擢國子學錄由。知和州。遷轉運判官。有堂溪集。

點絳脣

七里灘邊。江光漠漠山如戟。漁舟一葉。徑入寒烟碧。笑我塵勞。羞對雙臺石。身如織。年年行役。魚鳥渾相識。

陳德武

三山人。有白雲遺音一卷。

浣溪沙送春

月落桐梢杜宇啼。雲埋芳樹鷓鴣飛。夜闌分作送春詩。山上安山經幾歲。口中添口又何時。相思一曲訴伊誰。

汪存

字公澤。婺源人。授西京文學。辭官歸養。學者稱四友先生。

步蟾宮 冬日送姪赴省

玉京此去春猶淺。正雪絮。馬頭零亂。姮娥剪就綠雲裳。待來步蟾宮與換。明年二月桃花岸。雙槳浪平烟煖。揚州十里小紅樓。盡卷上。珠簾一半。

周格非

多麗

隴頭泉。未到隴下輕分。一聲聲。淒涼嗚咽。豈堪側耳重聞。細思量。那時攜手。畫樓高。簾幕黃昏。月不長圓。雲多輕散。天應偏妒。有情人。自別後。小窗幽院。無處不消魂。羅衣上。殘妝未減。猶帶啼痕。自一從。瓶沉簪折。要知欲見無因。也渾疑。事如春夢。又只恐。人是朝雲。破鏡分來。朱絃斷後。不堪獨自對芳樽。試與問。多才誰更。匹配得文君。須知道。東陽瘦損。不爲傷春。

陳襲善

漁家傲 憶營伎周子文

鷺嶺峯前欄獨倚。愁眉蹙損愁腸碎。紅粉佳人傷別袂。情何已。登山臨水年年是。長記同來今獨至。孤舟晚漾湖光裏。衰草斜陽無限意。誰與寄。西湖水是相思淚。

丁羲叟

漁家傲

十里寒塘初過雨。采蓮舟上誰家女。秋水接雲迷遠樹。天光暮。船頭忘了回來路。卻繫蘭舟深處住。歌聲驚散鴛鴦侶。波上清風花上露。無計去。

月明腸斷雙棲羽。

呂直夫

洞仙歌

征鞍帶月。濃露沾襟袖。馬上輕衫峭寒透。望翠峯深淺。憶著眉兒。腰肢嬾。忍看風前細柳。別時頻囑付。早寄書來。能及清明到家否。這言語。便夢裏。也在心頭。重相見。不知伊瘦儂瘦。縱百卉。千花已離披。須趁得。酴醾。牡丹時候。

王武子

一作子武。文獻通考經籍志有詞一卷。

玉樓春聞笛

紅樓十二春寒側。樓角何人吹玉笛。天津橋上舊曾聽。三十六宮秋草碧。昭華人去無消息。江上青山空晚色。一聲落盡短亭花。無數行人歸未得。

趙君舉

字子發。

眼兒媚

曉山日薄半春陰。烟煖柳拖金。滿眼新晴。歌聲樓影。悠蕩碧波心。閑亭客散人歸去。疎雨濕羅襟。樓閣濛濛。斷虹明處。十里暮雲深。

王文甫

虞美人迴文

黃金嫩柳搖絲軟。永日堂空掩。卷簾飛燕未歸來。客去醉眠欹枕。帶殘杯。

眉山淺拂青螺黛。整整垂雙帶。水沉香熨窄衫輕。瑩玉碧溪春溜眼波橫。

施芸隱

摸魚兒 瓊花

柳蒙茸。暗後波路。烟飛慘澹平楚。香車深駐。猊環掩。遙認翠華雲母。芳景暮。鴛鴦鬢。銖衣來按飛瓊舞。淒涼洛浦。漸玉漏沉沉。清陰滿地。乘月步虛去。銷凝處。誰說三生小杜。翔螭聲斷。簫鼓情知。禁苑酥塵流。羞與倡紅同譜。春幾度。想依舊。苔痕長印唐昌土。風流千古。人在小紅樓。珠簾半捲。香注玉壺露。

鄭覺齋

揚州慢 瓊花

弄玉輕盈。飛瓊淡竚。襪塵步下迷樓。試新妝纔了。炷沉水香毬。記曉剪春冰馳送。金莖露濕。緹騎星流。甚天中月色。被風吹夢南州。樽前相見。似羞人。蹤跡萍浮。問弄雪飄枝。無雙亭上。何日重遊。我欲纏腰騎鶴。烟霄遠。舊事悠悠。但凭欄無語。烟花三月春愁。

王月山

臺城路 初秋

夜來疎雨鳴金井。一葉舞風紅淺。蓮渚生香。蘭臯浮爽。涼思頓欺班扇。秋光冉冉。任老卻蘆花。西風不管。清興難磨。幾回有句到詩卷。長安故人

別後。料征鴻聲裏。畫欄凭遍。橫竹吹商。疎砧點月。好夢又隨雲遠。閑情似
綫。共繫損柔腸。不堪裁剪。聽著寒蛩。一聲聲是怨。

房舜卿

秦樓月

與君別。相思一夜梅花發。梅花發。淒涼南浦。斷橋斜月。盈盈微步。凌波
襪。東風笑倚天涯闊。天涯闊。一聲羌管。暮雲愁絕。

林正大

字敬之。號隨菴。嘉泰中人。著有風雅遺音四卷。

為憶當時。沉醉裏。青樓弄月。閑想像。繡幃珠箔。魂飛心折。羞向姮娥談舊
事。幾經三五盈還缺。望翠眉。蟬鬢一天涯。傷離別。尋昨夢。巫雲結。流別
淚。湘江咽。對花深兩岸。忽添悲切。試與含愁彈綠綺。知音不遇絃空絕。忽
窗前。一夜寄相思。梅花發。

薛夢桂

字叔載。號梯巖。

單衣乍著。滯寒更傍東風作。珠簾壓定銀鈎索。雨弄新晴。輕旋玉塵落。
花唇巧借妝紅約。嬌羞纔放三分萼。尊前不用多評泊。春淺春深。都向杏
梢覺。

三姝媚

薔薇花謝去。更無情連夜。送春風雨。燕子呢喃。似念人憔悴。往來朱戶。漲

綠烟深。早零落。點池萍絮。暗憶年華。羅帳分釵。又驚春暮。芳草淒迷征路。待去也還將。畫輪留住。縱使重來。怕粉容消膩。却羞郎覩。細數盟言。猶在帳。青樓何處。綰盡垂楊。爭似相思寸縷。

會 揆 字舜卿。號懶翁。

西江月

檐雨輕敲夜夜。牆雲低度朝朝。日長天氣已無聊。何況洞房人悄。眉共新荷不展。心隨垂柳頻搖。午眠髣髴見金翹。驚覺數聲啼鳥。

黃孝邁 字德文。號雪舟。

湘春夜月

近清明。翠禽枝上銷魂。可惜一片清歌。都付與黃昏。欲共柳花低訴。怕柳花輕薄。不解傷春。念楚鄉旅宿。柔情別緒。誰與溫存。空樽夜泣。青山不語。殘月當門。翠玉樓前。惟是有一陂湘水。搖蕩湘雲。天長夢短。問甚時。重見桃根。這次第。算人間沒箇。并刀剪斷。心上愁痕。

水龍吟

閒情小院沉吟。草深柳密。簾空翠。風簷夜響。殘燈慵剔。寒衾怯睡。店舍無烟。關山有月。梨花滿地。二十年好夢。不會圓合。而今老。都休矣。誰共題詩。秉燭。兩厭厭。天涯別袂。柔情一寸。七分是恨。三分是淚。芳信不來。玉簫塵染。粉衣香退。待問春怎把。千紅換得。一池綠水。

江 開 字開之。號月湖。

浣溪沙

手撚花枝憶小蘋。綠窗空鎖舊時春。滿樓飛絮一箏塵。素約未傳雙燕語。新愁還入賣花聲。十分春事倩行雲。

杏花天

謝娘庭院通芳徑。四無人花梢轉影。幾番心事無憑準。等得青春過盡。鞦韆下。佳期又近。算畢竟。沉吟未穩。不成又是教人恨。待倩楊花去問。

卷二十一 宋詞五十九首

文天祥

字宋瑞。又字履善。吉水人。舉進士第一。歷軍官右丞。兼樞密使。加少保。信國公。爲元兵所執。留燕三年。不屈死柴市。有文山集。

大江東去驛中言別友人

水天空闊。恨東風不借。世間英物。蜀鳥吳花殘照裏。忍見荒城頽壁。銅雀春情。金人秋淚。此恨憑誰雪。堂堂劍氣。斗牛空認奇傑。那信江海餘生。南行萬里。送扁舟齊發。正爲鷗盟留醉眼。細看濤生雲滅。睨柱吞羸。回旗走懿。千古衝冠髮。伴人無寐。秦淮應是孤月。

鄧

剡

字光薦。廬陵人。宋亡後。以節行稱。有中齋集。

賣花聲

疎雨洗天清。枕簟涼生。井梧一葉做秋聲。誰念客身輕似葉。千里飄零。夢斷古臺城。月澹潮平。便須攜酒訪新亭。不見當時王謝宅。烟草青青。

南樓令

雨過水明霞。潮回岸帶沙。葉聲寒飛透窗紗。懊恨西風催世換。更隨我。落天涯。寂寞古豪華。烏衣日又斜。說與亡燕入誰家。只有南來無數鴈。和明月。宿蘆花。

王鼎翁

字炎午。安福人。上舍生。有梅邊集。

沁園春

又是年時。杏紅欲吐。柳綠初芽。奈尋春步遠。馬嘶湖曲。賣花聲過。人唱窗紗。暖日晴烟。輕衣羅扇。看遍王孫七寶車。誰知道。十年魂夢。風雨天涯。休休何必傷嗟。謾贏得。青青兩鬢華。且不知門外。桃花何代。不知江左。燕子誰家。世事無情。天公有意。歲歲東風歲歲花。拚一笑。且醒來杯酒。醉後杯茶。

何夢桂

字巖叟。初名應祈。字申甫。淳安人。咸淳中。廷試一甲二名。授台州軍事判官。歷仕至大理寺卿。

至元中。累徵不起。有曆齋集詞一卷。

摸魚兒

記年時。人人何處。長亭會共杯酒。酒闌歸去。行人人遠。折不盡長亭柳。漸白首。待把酒。送君恰又清明後。青條似舊。問江北江南。離愁如我。還更有人否。留不住。強把蔬盤瀹韭。行舟又報潮候。風急岸花飛盡也。一曲啼紅滿袖。春波皺。青草外。人間此恨年年有。留連握手。歎人世相逢。百年歡笑。能得幾回又。

留春不住。又早是清明。楊花飛絮。杜宇聲聲。黃昏庭院。那更半簾風雨。勸春且休歸去。芳草天涯無路。悄無語。待闌干立盡。落紅無數。誰憇長門事。記得當年。會趁梨園舞。霓羽香銷。梁州聲歇。昨夢轉頭今古。金屋玉樓何在。尚有花鈿塵土。君不顧。怕傷心休上。危樓高處。

李南金

自號二溪冰雪翁。

賀新郎贈妓

流落今如許。我亦三生杜牧。爲秋娘著句。先自多愁多感慨。更值江南春暮。君看取。落花飛絮。也有吹來穿繡幌。有因風。飄墮隨塵土。人世事。總無據。佳人命薄君休訴。若說與。英雄心事。一生更苦。且盡樽前今日意。休記綠窗眉嫵。但春到。兒家庭戶。幽恨一簾烟月曉。恐明朝。鴈亦無尋處。渾欲倩。鶯留住。

莫

崧

字若山。

摸魚兒

聽春教。燕顰鶯訴。朝朝花因風雨。六橋忘卻。清明後。碧盡柳絲千縷。蜂蝶侶。正閑覓。閑花閑草。閑歌舞。最憐西子。尙薄薄雲情。盈盈波淚。點點舊眉嫵。流紅記。空泛秋宮怨句。才人何處。嬌妒。落紅無限。隨風絮。詩恨有誰會遇。堪恨處。恨二十四番。花信催花去。東君暗苦。更多囑多情。多愁杜宇。多訴斷腸語。

徐一初

摸魚兒

對茱萸。一年一度。龍山今在何處。參軍莫道無勳業。消得從容樽俎。君看
 取。便破帽。飄零也得傳千古。當年幕府。知多少時流。等閑收拾。有箇客如
 許。追往事。滿目山河晉土。征鴻又過邊羽。登臨莫上高層望。怕見故宮
 禾黍。觴綠醕。澆萬斛牢愁。淚閣新亭雨。黃花無語。畢竟是。西風披拂。猶識
 舊時主。

劉辰翁

字會孟。廬陵人。舉進士。值宋亂。隱居不仕。有須溪集附詞。

寶鼎現 丁酉元夕

紅妝春騎。踏月花影。千旗穿市。望不盡。瑤樓歌舞。習習香塵蓮步底。簫聲
 斷。約彩鸞歸去。未怕金吾呵醉。甚輦路。喧闐且止。聽得念奴歌起。父老
 猶記宣和事。抱銅仙。清淚如水。還轉盼。沙河多麗。滉漾明光連邸第。簾影
 凍。散紅光成綺。月浸蒲桃十里。看往來。神仙才子。肯把菱花撲碎。腸斷
 竹馬兒童。空見說。三千樂指。等多時。春不歸來。到春時欲睡。又說向。燈前
 擁髻。暗滴鮫珠墜。便當日。親見霓裳。天上人間夢裏。

大酺 春寒

任瑣窗深。重簾閉。春寒知有人處。當年笑花信。問東風情性。是嬌是妒。冰
 柳成鬚。吹桃欲削。知更海棠堪否。相將燕歸。又看香泥半雪。欲歸還誤。漫
 低回芳草。依稀寒食。朱門封絮。少年慣羈旅。亂山斷。欹樹喚船渡。正暗

思。雞聲落月。梅影孤屏。更夢衾。千里似霧。相如倦遊去。掩四壁。淒其春暮。
休回首。都門路。幾番行曉。個個阿嬌深貯。而今斷烟細雨。

蘭陵王送春

送春去。春去人間無路。鞦韆外。芳草連天。誰遣風沙暗南浦。依依甚意緒。
謾憶海門飛絮。亂鴉過。斗轉城荒。不見來時試燈處。春去最誰苦。但箭
鴈沈邊。梁燕無主。杜鵑聲裏長門暮。想玉樹凋土。淚盤如露。咸陽送客屢
回顧。斜日未能渡。春去尙來否。正江令恨別。庾信愁賦。蘇堤盡日風和
雨。歎神遊故國。花記前度。人生流落顧孺子。共夜語。

黃公紹

謙郡人。咸淳進士。

青玉案

年年社日停針線。爭忍見雙飛燕。今日江城春已半。一身猶在。亂山深處。
寂寞溪橋畔。征衫著破誰針線。點點行行淚痕滿。落日解鞍芳草岸。花
無人戴。酒無人勸。醉也無人管。

李萊老

字遜翁。

清平樂題草窗詞

日寒風細。庭館浮花氣。白髮潘郎吟欲醉。綠暗蘼蕪千里。西園南浦東
城。一春多少閑情。日暮采蘋歌遠。夢回喚得愁醒。

李彭老

字周隱。號箕房。

天香龍涎香

搗麝成塵。薰薇注露。風酣百和花氣。品重雲頭。葉翻蕉樣。共說內家新製。波浮海沫。誰喚覺。鮫人春睡。清潤俱饒。片片芬馥。半是沉水。相逢酒邊。雨外。火初溫。翠爐烟細。不似寶珠金縷。領巾紅墜。荀令如今憔悴。消未盡。當時愛香意。燼暖燈寒。秋聲素被。

摸魚兒蕙

過垂虹。四橋飛雨。沙痕初漲春水。腥波十里吳歛遠。綠蔓半縈船尾。連復碎。愛滑卷。青簫香裊冰絲細。山人雋味。笑杜老無情。香羹碧澗。空祇賦芹美。歸期早。誰似季膺高致。鱸魚相伴菰米。紅塵如海丘園夢。一葉又秋風起。湘湖外。看采擷。芳條際曉隨魚市。舊遊謾記。但望極江南。秦鬟賀鏡。渺渺隔烟翠。

桂枝香蟹

松江岸側。正亂葉墜紅。殘浪收碧。猶記燈寒暗聚。斷疎輕入。休嫌郭索尊前笑。且開顏。共傾芳液。翠橙絲霧。玉葱瀉雪。嫩黃初擘。與那日。新詩換得。又幾度相逢。落潮秋色。常是籬邊早菊。慰渠岑寂。如今謾有江山興。更誰憐。草泥蹤跡。但將身世。浮沉醉鄉。舊遊休憶。

浣溪沙題贛州漁笛譜

玉雪庭心夜色空。移花小檻鬪春紅。輕衫短帽醉歌重。彩扇舊題烟雨外。玉簫新譜燕鶯中。闌干到處是春風。

清平樂

綠窗初曉。枕上聞啼鳥。不恨王孫歸不早。只恨天涯芳草。錦書紅淚千行。一春無限思量。折得垂楊寄與。絲絲都是愁腸。

一萼紅寄弁陽嘯翁

過薔薇。正風暄雲澹。春去未多時。古岸停橈。單衣試酒。滿眼芳草斜暉。故人老。經年賦別。燈暈裏。相對夜何其。泛剡清愁。買花芳事。一卷新詩。流水孤航漸遠。想家山猿鶴。喜見重歸。北阜尋幽。青津問釣。多情楊柳依依。最難忘。吟邊舊語。數菖蒲。老是來期。幾夕相思。夢蝶。飛繞蘋溪。

王易簡

字理得。山陰人。

天香龍涎香

烟嶠收痕。雲沙擁沫。孤槎萬里春聚。蠟杵冰塵。水研花片。帶得海山風露。纖痕透曉。銀鏤小。初浮一縷。重剪紗窗暗燭。深垂繡簾微雨。餘馨惱人最苦。染羅衣。少年情緒。謾省珮珠會解。蕙羞蘭妒。好是芳釵翠嫵。恨素被濃熏夢無據。待剪秋雲。殷勤寄與。

水龍吟白蓮

翠裳微護冰肌。夜深暗泣瑤臺露。芳容淡泞。風神蕭散。凌波晚步。西子殘妝。環兒初起。未須匀注。看明璫素襪。相逢憔悴。當應被。薰風誤。十里雲愁雪妒。抱淒涼。盼嬌無語。當時姊妹。朱顏褪酒。紅衣按舞。別浦重尋。舊盟惟有。一行鷗鷺。伴玉顏。月曉。盈盈冷豔。洗人間暑。

摸魚兒蕙

怪鮫宮。水晶簾捲。冰痕初斷。香縷柔波蕩。漿人難到。三十六陂烟雨。春又去。伴點點。荷錢隱約吳中路。相思日暮。恨洛浦娉婷。芳鈿翠剪。奩影照淒楚。功名夢。消得西風一度。高人今在何許。鱸香菰冷斜陽裏。多少天涯意緒。誰記取。但枯豉。紅鹽溜玉凝秋筍。樽前起舞。算惟有淵明。黃花歲晚。此興共千古。

又前題

過湘臯。碧龍驚起。冰涎猶護髣髴影。春洲未有菱歌伴。獨占暮烟千頃。呼短艇。試剪取。纖條玉溜青絲瑩。樽前細認。似水面新荷。波心半卷。點點翠鈿淨。淒涼味。酪乳那堪比並。吳鹽一箸秋冷。當時不爲鱸魚去。聊爾勤渠歸興。還記省。是幾度。西風幾處吹愁醒。鷗昏鷺暝。謾換得霜痕。蕭蕭兩鬢。羞與共秋鏡。

齊天樂

碧雲深鎖。齊姬恨。纖柯暗翻冰羽。錦瑟重調。綃衣乍著。聊飲人間風露。相逢甚處。記槐影初涼。柳陰新雨。聽盡殘聲。爲誰驚起又飛去。商量秋信最早。晚來吟未徹。都是淒楚。斷韻還連。餘悲似咽。欲和愁邊佳句。幽期與語。怕寒葉凋零。蛻痕塵土。古木斜暉。向人懷抱苦。

馮應瑞

字祥父。號友竹。

天香

龍涎香
枯石流痕。殘沙擁沫。驪宮夜蟄驚起。海市收時。鮫人分處。誤入衆芳叢裏。

呂同老 字和甫。

水龍吟 白蓮

冰肌不污天真。曉來玉立瑤池裏。亭亭翠蓋。盈盈素靨。時妝淨洗。太液波翻。霓裳舞罷。斷魂流水。甚依然舊日。濃香淡粉。花不似。人憔悴。欲喚凌波仙子。泛扁舟。浩波千里。只愁回首。冰奩半掩。明璫亂墜。月影淒迷。露華零落。小欄誰倚。共芳盟猶有。雙棲雪鷺。夜寒驚起。

齊天樂 蟬

綠陰初蔽林塘路。淒淒乍留清韻。倦咽高槐。驚嘶別柳。還憶當時曾聽。西窗夢醒。歎絃絕重調。珥空難整。綽約冰綃。夜深誰念露華冷。不知身世易老。一聲聲斷續。頻報秋信。墜葉山明。疎枝月小。惆悵齊姬薄倖。餘音未盡。早枯翼飛仙。暗嗟殘景。見洗冰奩。怕翻雙翠鬢。

天香 龍涎香

冰片鎔肌。水沉換骨。蜿蜒夢斷瀛島。剪碎腥雲。杵勻枯沫。妙手製成翻巧。金篝候火。無似有。微熏初好。簾影垂風不動。屏深護春宜小。殘梅舞紅褪了。珮珠寒。滿懷清峭。幾度酒餘重省。舊愁多少。荀令風流未減。怎奈向飄零賦情老。待寄相思。仙山路杳。

練恕可 字行之。越州人。

水龍吟 白蓮

素姬初宴瑤池。珮環誤落雲深處。分香華井。洗妝湘渚。天姿淡泞。碧蓋吹

涼。玉冠迎曉。盈盈笑語。記當時乍識。江明夜淨。只愁被。嬋娟誤。幾點沙
邊飛鷺。舊盟寒。遠迷烟雨。相思未盡。纖羅曳水。清鉛泣露。玉鏡臺空。銀瓶
綆絕。斷魂何許。待今宵試採。中流一葉。共凌波去。

齊天樂蟬

碧柯搖曳聲何許。陰陰晚涼庭院。露濕身輕。風生翅薄。昨夜綃衣初剪。琴
絲宛轉。弄幾曲新聲。幾番悽惋。過雨高槐。爲渠一洗故宮怨。清虛襟度
謾與。向人低訴處。幽思無限。敗葉枯形。殘陽絕響。消得西風腸斷。塵情已
倦。任翻鬢雲寒。綴貂金淺。蛻羽難留。頓驚仙夢遠。

又前題

蛻仙飛珮流空遠。珊珊數聲林杪。薄暑眠輕。濃陰聽久。勾引淒涼多少。長
吟未了。想猶怯高寒。又移深窈。與整綃衣。滿身風露正清曉。微熏庭院
晝永。那回會記得。如訴幽抱。斷響難尋。餘悲獨省。葉底還驚秋早。齊宮路
杳。歎事往魂銷。夜閑人悄。謾想輕盈。粉奩雙鬢好。

桂枝香蟹

西風故國。記乍脫內黃。歸夢溪曲。還是秦星夜映。楚霜秋足。無腸枉抱東
流恨。任年年。褪筐微綠。草汀篝火。蘆州緯箔。早寒漁屋。 敘舊別。芳筍薦
玉。正香擘新橙。清泛佳菊。依約行沙亂雪。誤驚窗竹。江湖歲晚相思遠。對
孤燈。謾懷幽獨。嫩湯浮眼。枯形蛻殼。斷魂重續。

趙汝鈞

字真卿。號月洲。

水龍吟 白蓮

露華洗盡凡妝。玉妃來侍瑤池宴。風裳水佩。冰肌雪艷。清涼不汗。解語情多。凌波步穩。酒容消散。想溫泉浴罷。天然真態。渾疑是。宮妝淺。暗想淒愁別岸。粉痕消。香腮凝腕。雪空水冷。此情惟許。驚知鷗見。羽扇微搖。翠帷低擁。清涼亭院。待夜深。月上闌干。更邀取。姮娥伴。按結句與調稍異。

唐

玘

字玉潛。號菊山。越州人。與林景熙相善。宋亡。同為采藥之行。潛拾諸陵遺骸攢葬。樹以冬青。私識焉。世人多其義烈。

摸魚兒 蕙

漸滄浪。凍痕銷盡。瓊絲初漾。明鏡鮫人夜。剪龍髯滑。織就水晶簾冷。鳥鳧葉淨。最好似。嫩荷半捲。浮晴影。玉流翠凝。早枯豉融香。紅鹽和雪。醉齒嚼清瑩。功名夢。曾被秋風喚醒。故人應動高興。悠然世味渾如水。千里舊懷誰省。空對景。奈回首。姑蘇臺畔愁波暝。烟寒夜靜。但只有芳洲。蘋花與老。何日泛歸艇。

桂枝香 蟹

松江舍北。正水落晚汀。霜老枯荻。還見青篚似繡。紺螯如戟。西風有恨無腸斷。悵東流。幾番潮汐。夜燈爭聚。微光挂影。誤投簾隙。更喜薦新筍。玉液正半殼含黃。一醉秋色。纖手香橙風味。有人相憶。江湖歲晚聽飛雪。但沙痕。空記行迹。至今茶鼎。時時猶記。眼波愁碧。

臺城路 蟬

蛻痕初染仙莖露。新聲又移涼影。珮玉流空。綃衣剪霧。幾度槐昏柳暝。幽窗睡醒。奈欲斷還連。不堪重聽。怨結齊姬。故宮烟樹翠陰冷。當時舊情在否。晚妝清鏡裏。猶記嬌鬢。亂咽頻驚。餘悲漸杳。搖曳風枝未定。秋期話盡。又抱葉淒淒。暮寒山靜。付與孤蛩。苦吟清夜永。

水龍吟白蓮

淡妝人更嬋娟。晚奩淨洗鉛華膩。泠泠月色。蕭蕭風度。嬌紅欲避。太液池空。霓裳舞倦。不堪重記。歎冰魂猶在。翠輿難駐。玉簪爲誰輕墜。別有凌空一葉。泛清寒。素波千里。珠房淚濕。明璫恨遠。舊遊夢裏。羽扇生秋。瓊樓不夜。尙遺仙意。奈香雲易散。綃衣半脫。露涼如水。

李居仁 字師呂。號五松。

水龍吟白蓮

蘼仙羣擁宸遊。素肌似怯波心冷。霜裳縞夜。冰壺凝露。紅塵洗盡。弄玉輕盈。飛瓊綽約。淡妝臨鏡。更多情一片。碧雲不捲。籠嬌面。回清影。菱唱數聲乍聽。載名娃。藕絲紫艇。雪鷗沙鷺。夜來同夢。曉風吹醒。酒暈全消。粉痕微漬。色明香瑩。問此花。曷貯瑤池。應未許。繁紅竝。按結句與調稍異。

王夢應 字靜得。攸縣人。咸熙中進士。調廬陵尉。元兵陷臨安。起兵勤王。兵敗。奔永新卒。

念奴嬌

欲霜更雨。記青黃籬落。東風前此。簾外秋容人共老。鴈與愁飛千里。水郭烟明。竹陂波小。萬葉寒聲起。凭高那更。九嶷吹盡雲氣。婉婉空復多情。

年年歸夢。花與柴桑似。誰解魂銷風日晚。短笛孤舟秋水。江蟹籠新。露黃斟淺。澆得鄉關思。平蕪天遠。一痕黃抹秋霽。

譚宣子

字明之。號在菴。

謁金門

人病酒。生怕日高催繡。昨夜新番花樣瘦。旋描雙蝶。瘦。閒凭繡牀呵手。卻說春愁還又。門外東風吹綻柳。海棠花廝勾。

江城子詠柳

嫩黃初染綠初描。倚春嬌。索春饒。燕外鶯邊。想見萬絲搖。便作無情終軟美。天賦與。眼眉腰。短長亭外短長橋。駐金鑣。繼蘭橈。可愛風流年紀可憐宵。辦得重來攀折後。烟雨暗。不辭遙。

陳逢辰

字振祖。號存熙。

烏夜啼

月痕未到朱扉。送郎時。暗裏一汪兒淚。沒人知。搵不住。收不聚。被風吹。吹作一天愁雨。損花枝。

樓

采

字君亮。

瑞鶴仙

凍痕消夢草。又招得。春歸舊家池沼。園扉掩寒峭。倩誰將花信。徧傳深窈。追遊趁早。便裁卻。輕衫短帽。任殘梅。飛滿溪橋。和月醉眠清曉。年少。青絲纖手。綵勝嬌鬟。賦情誰表。南樓信杳。江雲重。雁歸少。記衝香嘶馬。流紅

回岸。幾度綠楊殘照。想暗黃。依舊東風。霸陵古道。

法曲獻仙音

花匣么絃。象奩雙陸。舊日留歡情意。夢到銀屏。恨裁蘭燭。香篝夜闌鴛被。料燕子。重來地。桐陰鎖窗綺。倦梳洗。暈芳鈿。自羞鸞鏡。羅袖冷。烟柳畫欄半倚。淺雨壓荼蘼。指東風。芳事餘幾。院落黃昏。怕春鶯。驚笑憔悴。倩柔紅約定。喚取玉簫同醉。

二郎神

露牀轉玉。喚睡醒。綠雲梳曉。正倦立銀屏。新寬衣帶。生怯輕寒料峭。悶絕相思無人問。但怨入。牆陰啼鳥。嗟露屋鎖春。晴風暄晝。柳輕梅小。人情日長。謾憶秋千嬉笑。悵燼冷爐薰。花深鶯靜。簾箔微紅。醉裊帶結留詩。粉痕銷帕。情遠竊香年少。凝恨極。盡日憑高目斷。淡烟芳草。

奚

滅 字倬然。號秋崖。

華胥引中秋紫霞席上

澄空無際。一幅輕綃。素秋弄色。剪剪天風。飛飛萬里。吹淨碧。遙想玉杵芒寒。聽佩環無迹。圓缺何心。有心偏照歌席。多少情懷。甚年年。共憐今夕。藻宮珠殿。還吟飄香秀筆。隱約霓裳聲度。認紫霞樓笛。獨鶴歸來。更無清夢成覓。

趙聞禮 字立之。號鈞月。

水龍吟 吟水仙

幾年埋玉藍田。綠雲翠水烘春暖。衣熏麝馥。鞦韆羅塵心。凌波步淺。鈿碧搔頭膩。黃冰腦。參差難剪。乍聲沉素瑟。天風珮冷。翩躚舞。霓裳徧。湘波盈。盈月滿。抱相思。夜寒腸斷。含香有恨。招魂無路。瑤琴寫怨。幽韻淒涼。暮江空渺。數峯清遠。粲迎風笑。持花酌酒。結南枝伴。

卷一十四 宋詞七十首

寇寺丞

點絳脣

春睡瞢騰。覺時鴛被堆香煖。起來猶懶。獨自情何限。深院日斜。人靜花陰轉。柔腸斷。凭高不見。芳草連天遠。

陳參政

木蘭花慢送陳石泉自北歸

北歸人未老。喜依舊。著南冠。正雪暗滹沱。雲迷芒碭。夢落邯鄲。鄉心促。日行萬里。幸此身。生入玉門關。多少秦烟隴霧。西湖淨洗征衫。燕山望不見吳山。回首一征鞍。慨故宮離黍。故家喬木。那忍重看。鈞天紫微何處。問瑤池。入駿幾時還。誰在天津橋上。杜鵑聲裏闌干。

杜郎中

玉樓春

風解池冰蟬翅薄。庭樹枯枝翻翠萼。背寒就暖起偏慵。半捲珠簾憑畫閣。

晴景融融烟漠漠。天際行人乖信約。病身先是怕春來。長到恁時添瘦削。

德祐太學生

百字令德祐乙亥

半堤花雨對芳辰。消遣無奈情緒。春色尙堪描畫在。萬紫千紅塵土。鵲促歸期。鶯收佞舌。燕作留人語。繞欄紅藥。韶華留此孤主。真個恨殺東風。幾番過了。不似今番苦。樂事賞心磨滅盡。忽見飛書傳羽。湖水湖烟。峯南峯北。總是堪傷處。新塘楊柳。小腰猶自歌舞。見湖海新聞。二四謂衆宮女行。五謂朝士

去。六謂臺官默。七指太學上書。八九謂只陳宜中在。東風謂賈似道。飛書傳羽。北軍至也。新塘楊柳謂賈妾。

祝英臺近德祐乙亥

倚危欄。斜日暮。驀驀甚情緒。穉柳嬌黃。全未禁風雨。春江萬里雲濤。扁舟飛渡。那更聽。塞鴻無數。歎離阻。有恨流落天涯。誰念泣孤旅。滿目風塵。冉冉如飛霧。是何人惹愁來。那人何處。怎知道。愁來不去。穉柳謂幼君。嬌黃謂太

后。扁舟飛渡謂北軍至。塞鴻指流民也。人惹愁來謂賈出。那人何處謂賈去。

無名氏

魚遊春水春景

秦樓東風裏。燕子還來尋舊壘。餘寒猶峭。紅日薄侵羅綺。嫩草方抽碧玉茵。媚柳輕窵黃金縷。鶯轉上林。魚遊春水。幾曲闌干遍倚。又是一番新桃李。佳人應怪歸遲。梅妝淚洗。鳳簫聲絕。沉孤鴈。望斷清波無雙鯉。雲山

萬重。寸心千里。

眉峯碧

蹙破眉峯碧。纖手還重執。鎖日相看未足時。忍便使鴛鴦隻。薄暮投村驛。風雨愁通夕。窗外芭蕉窗裏人。分葉上心頭滴。
玉照新志。裕陵親書其後。此詞甚佳。不知何人所作。

撲蝴蝶

烟條雨葉。綠遍江南岸。思歸倦客。尋芳來較晚。岫邊紅日初斜。陌上花飛正滿。淒涼數聲羌管。怨春短。玉人應在。明月樓中畫眉嬾。蠻箋錦字。多時魚雁斷。恨隨去水東流。事與行雲共遠。羅衾舊香猶暖。
胡元任云。非惟藻麗可喜。其腔調亦自婉美。

踏莎行

碧蘚迴廊。綠楊深院。花期夜入簾猶捲。照人無奈月華明。潛身卻恨花陰淺。密約難憑。幽歡未展。看看滴盡銅壺箭。闌干敲遍不應人。分明燭下聞刀剪。

玉瓏瓏

城南路。橋南樹。玉鈎簾卷香橫霧。新相識。舊相識。淺顰低笑。嫩紅輕碧。惜惜。劉郎去。阮郎住。為雲為雨朝還暮。心相憶。空相憶。露荷心性。柳花踪跡。得得得。
能改齋漫錄。近有士人。嘗於錢塘江漲橋為狹斜之游。作此詞。其後朝廷復收河南。士人陷而不返。其友作詩寄之。且附以龍涎香詩云。江漲橋邊花發時。故人會共著征衣。請君莫唱橋南曲。花已飄零

人不歸。士人在河南得詩。酬之云。認得吳家心字香。玉窗春夢紫羅囊。餘薰未歇人何許。洗破征衣更斷腸。

九張機見樂府雅詞

一張機。采桑陌上試春衣。風晴日暖慵無力。桃花枝上。啼鶯言語。不肯放人歸。

又

四張機。鴛鴦織就欲雙飛。可憐未老頭先白。春波碧草。曉寒深處。相對浴紅衣。

又

五張機。橫紋織就沈郎詩。中心一句無人會。不言愁恨。不言憔悴。只恁寄相思。

又

七張機。春蠶吐盡一生絲。莫教容易裁羅綺。無端剪破。仙鸞彩鳳。分作兩邊衣。

又

九張機。雙花雙葉又雙枝。薄情自古多離別。從頭到底。將心縈繫。穿過一條絲。

又

輕絲。象牀玉手出新奇。千花萬草光凝碧。裁縫衣著。春天歌舞。飛蝶語黃鸝。

又

春衣素絲染就已堪悲。塵昏汗污無顏色。應同秋扇。從茲永棄。無復奉君時。

玉樓春題鈴山驛壁 見能改齋漫錄

東風楊柳門前路。畢竟雕鞍留不住。柔情勝似嶺頭雲。別淚多於花上雨。青樓畫幕無重數。聽得樓邊車馬去。若將眉黛染情深。直到丹青難畫處。

踏青游贈妓崔念四

識箇人人。恰止二年歡會。似賭賽。六隻渾四。向巫山。重重去如魚水。兩情美。同倚畫樓十二。倚了又還重倚。兩日不來。時時在人心裏。擬問卜。常占歸計。拚三二人。清齋望。永同鴛被。到夢裏。驀然被人驚覺。夢也有頭無尾。
吳虎臣云。政和間士人作。都下感傳。

調笑桃源集句 見宣和九重樂府

相誤。桃源路。萬里蒼蒼烟水暮。留君不住君須去。秋月春風閑度。桃花零亂如紅雨。人面不知何處。

祝英臺近憶別 見樂府雅詞

海棠開。花影下。憶得舊遊戲。恰似驂鸞。同在彩雲裏。夢回雨散雲收。匆匆歸去。一枕乍。驚殘春睡。甚情味。人去花也飄零。餘香半。憔悴點點飛紅。都是去時淚。可堪冷落黃昏。瀟瀟微雨。斷魂處。朱欄獨倚。

又

剪餘醺。移芍藥。深院教鸚鵡。消遣宿醒。欹枕熏沉炷。自從載酒西湖。探梅南浦。久不見。雪兒歌舞。恨無據。因甚不展眉頭。凝愁過百五。雙燕無情。難寄斷腸句。可憐淚濕青綃。怨題紅葉。落花亂。一簾風雨。

水調歌頭建炎庚戌題吳江 見中吳記聞

平生太湖上。短棹幾經過。如今重到何事。愁與水雲多。擬把匣中長劍。換取扁舟一葉。歸去老漁蓑。銀艾非吾事。丘壑已蹉跎。 鱸新鱸。斟美酒。起悲歌。太平生長。豈謂今日識干戈。欲瀉三江雪浪。淨洗邊塵千里。不為挽天河。回首望霄漢。雙淚墮清波。

楊柳枝 見樂府雅詞

簌簌花飛一雨殘。乍衣單。屏風數幅畫江山。水雲閑。別易會難無計那。淚潸潸。夕陽樓上凭闌干。望長安。

浣溪沙瓜陂鋪題壁 見能改齋漫錄

剪碎香羅裛淚痕。鷓鴣聲斷不堪聞。馬嘶人去近黃昏。 整整斜斜楊柳陌。疎疎密密杏花村。一番風月更銷魂。黃季岑云。瓜洲瓜陂鋪。有用篋刀刻青泥壁為詞。

鷓鴣天上元 見蘆浦筆記

宣德樓前雪未融。賀正人見彩山紅。九衢照影紛紛月。萬井吹香細細風。 複道遠。暗相通。平陽主第五王宮。鳳簫聲裏春寒淺。不到珠簾第一重。

劉興伯云。上元詞十五首。備述宣政之盛。非想像者所能道。當與夢華錄並行也。

綠意荷葉 見樂府雜詞

碧圓自潔。向淺洲遠浦。亭亭清絕。猶有遺簪。不展秋心。能卷幾多炎熱。鴛鴦密語同傾蓋。且莫與。浣紗人說。怨歌忽斷。花風碎卻。翠雲千疊。回首當年漢舞。怕飛去。謾縹留仙裙褶。戀戀青衫。猶染枯香。還笑鬢絲飄雪。盤心清露如鉛水。又一夜。西風聽折。喜淨看。匹練秋光。倒瀉半湖明月。

擷芳詞 見古今詞話

風搖動。雨濛茸。翠條柔弱花頭重。春衫窄。香肌濕。記得年時。共伊會摘。都如夢。何會共。可憐孤似釵頭鳳。關山隔。晚雲碧。燕兒來也。又無消息。

御街行 見古今詞話

霜風漸緊寒侵袂。聽孤鴈聲嘹唳。一聲聲送一聲悲。雲淡碧天如水。披衣告語。鴈兒略住。聽我些兒事。塔兒南畔城兒裏。第二箇橋兒外。瀕河西岸小紅樓。門外梧桐雕砌。請教且與。低聲飛過。那裏有人人無寐。

應天長 見古今詞話

雕鞍成謾駐。望斷也不歸。院深天暮。倚遍舊日。會共凭肩門戶。踏青何處所。想醉拍春衫歌舞。征旆舉。一步紅塵。一步回顧。行行愁獨語。想媚容今宵。怨郎不住。來爲相思。卻又空將愁去。人生無定據。歎後會。不知何處。愁萬縷。憑仗東風。和淚吹與。

念奴嬌 和東坡韻

炎精中否。歎人材委靡。都無英物。鐵馬長驅三犯闕。誰作長城堅壁。萬里

奔騰兩宮幽陷。此恨如何雪。草廬三顧。豈無高臥英傑。天意建我中興。吾君神武。卜一作踵會孫周發。海岳封疆俱效職。一作順埃火會看消滅。翠羽南巡。叩闈無路。徒有衝冠髮。孤忠耿耿。劍鏃冷浸秋月。

又題項羽廟

鮑魚腥斷。楚將軍鞭虎。驅龍而起。空費咸陽三月火。鑄就金刀神器。垓下兵稀。陰陵道狹。月暗雲如壘。楚歌喧唱。山川都姓劉矣。悲泣喚醒虞姬。爲伊死別。血刃飛花碎。霸業銷沉。離不逝。氣盡烏江江水。古廟頽垣。斜陽紅樹。遺恨鴉聲裏。興亡休問。高陵秋草空翠。

點絳脣 秋社

燕子依依。曉來總爲誰歸去。淡雲生處。已覺賓鴻度。淺笑依聲。便面機中素。乘鸞女。瑣窗瓊宇。會有明年暑。

烏夜啼 見天機餘錦

都無一點殘紅。夜來風。底事東君歸去。太匆匆。桃花醉。梨花淚。總成空。斷送一年春在。綠陰中。

又 見古今詞話

一彎月挂危樓。似藏鉤。醉裏不知黃葉。報新秋。征鴻斷。歸雲亂。遠峯愁。愁見綠楊凝恨。在江頭。

秦樓月 題蓬萊閣

烟漠漠。海天搖蕩蓬萊閣。蓬萊閣。朱甍碧瓦。半侵寥廓。三山謾有長生

藥。茫茫雲海風濤惡。風濤惡。仙槎不見暮沙潮落。

又

秋寂寂。碧紗窗外人橫笛。人橫笛。天津橋上舊會聽得。宮妝玉指無人識。龍吟水底聲初息。聲初息。月明江岸數峯凝碧。

西江月 見翰墨

記得洛陽話別。十年社燕秋鴻。今朝相遇暮雲東。對坐旗亭說夢。破帽手遮斜日。練衣袖卷寒風。蘆花江上雨衰翁。消得幾番相送。

尉遲杯 見梅苑

歲云暮。歎光陰冉冉能幾許。江梅尚怯餘寒。長安信音猶阻。東風無據。凭欄久。欲去還凝竚。憶溪邊。月底徘徊。暗香疎影庭戶。朝來凍解霜消。南枝上。香英數點微露。把酒看花。無言有淚。還是那時情緒。花依舊。晨妝何處。謾贏得。花前愁千縷。儘高樓畫角頻吹。任教紛紛飛素。

洞仙歌 見梅苑

斷雲疎雨。冷落空山道。匹馬駸駸又重到。望孤村三兩茅屋。疎籬溪水畔。一簇蘆花晚照。尋思行樂地。事去無痕。回首湘波與天杳。歎人生幾度。能醉金尊。青鏡裏。贏得朱顏未老。又一點。枝頭破黃昏。問客路春風。爲誰開早。

萬年歡 見梅苑

天氣嚴凝。乍寒梅數枝。嶺上開坼。傅粉凝脂。疑是素娥妝拭。先報陽和信。

息更雪月。交光一色。因追念。往日歡遊。共君攜手同摘。別來又經歲隔。奈高樓夢斷。無計尋覓。冷艷寒容。啼雨恨烟愁濕。似向人前淚滴。怎不使。伊家思憶。還只恐。寂寞空枝。又隨昨夜羌笛。

鞞紅 見梅苑

粉香尤嫩。霜寒可慣。怎奈向。春心已轉。玉容別是。一般閑婉。悄不管。桃紅杏淺。月影簾櫳。金隄波面。漸細細。香風滿院。一枝折寄。故人雖遠。莫輒使江南信斷。

憶少年 見梅苑

疎疎整整。斜斜淡淡。盈盈脈脈。徒憐暗香句。笑梨花顏色。羈馬蕭蕭行。又急。空回首。水寒沙白。天涯倦牢落。忽一聲羌笛。

琴調相思引

膽樣瓶兒幾點春。剪來猶帶水雲痕。且移孤冷。相伴最深樽。每爲惜花無曉夜。教人甚處不銷魂。爲君惆悵。何獨是黃昏。

眼兒媚

蕭蕭江上荻花秋。做弄許多愁。半竿落日。兩行新鴈。一葉扁舟。惜分長怕君先去。直待醉時休。今宵眼底。明朝心上。後日眉頭。

步蟾宮

東風捏就腰肢細。繫六幅。裙兒不起。看來只慣掌中行。怎教在。燭花影裏。更闌應是鉛華退。暗蹙損。眉峯雙翠。夜深著。繭小鞋兒。斜靠著。屏風立。

搗練子 見天機餘錦

林下路。水邊亭。涼吹水曲散餘醒。小藤牀。隨意橫。猶記得。舊時經。翠荷
鬧雨做秋聲。恁時節。不堪聽。

謁金門 見天機餘錦

山無數。遮斷故人何處。見說蘭舟獨繫住。溪邊紅葉樹。憶著前時歡遇。
惹起今番愁緒。怎得西風吹淚去。陽臺為暮雨。

風光好 見天機餘錦

柳陰陰。水沉沉。風約雙鳧立不禁。碧波心。孤村橋斷人迷路。舟橫渡。旋
買村醪淺淺斟。更微吟。

天香 龍涎香

瀛嶠浮烟。滄波挂月。潛虬睡起清曉。萬里楂程。一番花信。付與露薇冰腦。
纖雲漸暖。凝翠席。氤氳不了。銀葉重調火活。珠簾日垂風悄。螺屏酒醒
夢好。繡羅幃。依舊痕少。幾度試拈心字。暗驚芳抱。隱約仙州路杳。謾珮影
玲瓏護。嬌小。素手金篝。春情未老。

裴 湘字楚老。仁宗時內官。有肯堂集。

浪淘沙 并門

鴈塞說并門。郡枕西汾。山形高下遠相吞。古寺樓臺依碧嶂。烟景遙分。
晉廟鎖溪雲。簫鼓仍存。牛羊斜日自歸村。惟有故城禾黍地。前事銷魂。

僧揮

字仲殊。安州進士。姓張氏。棄家爲僧。居杭州吳山寶月寺。有詞七卷。黃叔暘云。仲殊之詞多矣。佳者固不少。而小令爲最。

南柯子

十里青山遠。潮平路帶沙。數聲啼鳥怨年華。又是淒涼時候。在天涯。白
露收殘月。清風散曉霞。綠楊堤畔鬧荷花。記得年時沽酒。那人家。

玉樓春芭蕉

飛香漠漠簾帷暖。一線水沉烟未斷。紅樓西畔小闌干。盡日倚欄人已遠。
黃梅雨過芭蕉晚。鳳尾翠搖雙葉短。舊年顏色舊年心。留到如今春不
管。

柳梢青

岸草平沙。吳王故苑。柳裊烟斜。雨後寒輕。風前香軟。春在梨花。行人一
棹天涯。酒醒處。殘陽亂鴉。門外秋千。牆頭紅粉。深院誰家。

僧祖可

字正平。丹陽人。蘇伯固之子。住廬山。與陳師道徐俯謝逸預西江詩社。有東溪集。
吳虎臣云。正平工詩。其長短句尤佳。世徒稱其詩也。

小重山

誰向江頭遣恨濃。碧波流不斷。楚山重。柳烟和雨。隔疎鐘。黃昏後。羅幕更
朦朧。桃李小園空。阿誰猶笑語。拾殘紅。珠簾卷盡夜來風。人不見。春在
綠蕪中。

菩薩蠻

西風簌簌低紅葉。梧桐影裏銀河匝。夢破畫簾垂。月明烏鵲飛。新愁知幾。一作那致。許。欲似絲千縷。鴈已不堪聞。砧聲何處村。

又

誰能畫取沙邊雨。和烟澹掃蒹葭渚。別岸卻斜暉。采蓮人未歸。鴛鴦如解語。對浴紅衣去。去了更回頭。教儂特地愁。

釋惠洪

字覺範。有石門文字禪。

許彥周云。上人善作小詞。情思婉約似秦少游。仲殊寥寥皆不能及。

青玉案和費方回韻

綠槐烟柳長亭路。恨取次分離去。日永如年愁難度。高城回首。暮雲遮盡。目斷知何處。解鞍旅舍天將暮。暗憶丁寧千萬句。一寸柔腸情幾許。薄衾孤枕。夢回人靜。徹曉瀟瀟雨。

上清蔡真人

法駕導引

闌干曲。闌干曲。紅鷗繡簾旌。花嫩不禁纖手捻。被風吹去意還驚。眉恨蹙山青。巨堅志云。陳東靖康間嘗飲于京師酒樓。有妓倚欄歌此詞。音調清越。東不覺傾聽。其後有鏗鐵板。閑

引步虛聲。塵世無人知此曲。卻騎黃鶴上瑤京。風冷月華清五句。問何人所製。曰上清蔡真人詞也。

于真人

調見彭致中鳴鶴餘音。按北宋有虛靖真君詞。內有和于真人作。

鳳棲梧

綠暗紅稀春已暮。燕子銜泥。飛入垂楊處。柳絮欲停風不住。杜鵑聲裏山

無數。竹杖芒鞋無定據。穿過溪南。獨木橫橋路。樵子漁師來又去。一川風月誰爲主。

行香子

閨苑瀛洲。金谷重樓。總不如。茅舍清幽。野花鋪地。算也風流。卻也宜春。也宜夏。也宜秋。酒熟堪篋。客至須留。更無榮。無辱無憂。退閑一步。著甚來由。但倦時眠。渴時飲。醉時謳。

葛長庚

自號白玉蟾。閩人。一云瓊州人。居武夷。嘉定中。詔徵赴闕。館太乙宮。封紫清明道真人。有海瓊集詞二卷。

醉江月武昌懷古

漢江北瀉。下長淮。洗盡胸中今古。樓櫓橫波。征鴈遠。誰見魚龍夜舞。鸚鵡洲雲。鳳凰池月。付與沙頭鷺。功名何處。年年惟見春絮。非不豪似周瑜。壯如黃祖。亦逐秋風度。野草閑花無限數。渺在西山南浦。黃鶴樓人。赤烏年事。江漢亭前路。浮萍無據。水天幾度朝暮。

水龍吟採藥徑

雲屏謾鎖空山。寒猿啼斷松枝翠。芝英安在。朮苗已老。徒勞展齒。應記洞中。鳳簫錦瑟。鎮常歌吹。悵蒼苔路杳。石門信斷。無人問。溪頭事。回首暝烟無際。但紛紛。落花如淚。多情易老。青鸞何處。書成難寄。欲問雙蛾。翠蟬金鳳。向誰嬌媚。想分香舊恨。劉郎去後。一溪流水。

水調歌頭

江上春山遠。山下暮雲長。相留相送時見。雙燕語風檣。滿目飛花萬點。回首故人千里。把酒沃愁腸。回鴈峯前路。烟樹正蒼蒼。漏聲殘。燈焰短。馬蹄香。浮雲飛絮。一身將影向瀟湘。多少風前月下。迤邐天涯海角。魂夢亦淒涼。又是春將暮。無語對斜陽。

摸魚兒

問滄江。舊盟鷗鷺。年來景物誰主。悠悠客鬢知何事。吹滿西風塵土。渾未悟。謾自許。功名談笑侯千戶。春衫戲舞。怕三徑都荒。一犁未把。猿鶴笑君誤。君且住。未必心期盡負。江山秋事如許。月明風靜萍花路。欹枕試聽鳴櫓。還又去。道喚取。陶泓要草歸來賦。相思最苦。是野水連天。漁榔四起。蓑笠占烟雨。

霜天曉角 綠淨堂

五年安在。城市何會改。十萬人家闐闐。東亦海。西亦海。歲歲蒲澗會。地接蓬萊界。老樹知他一劍。千山外。萬山外。

賀新郎

且盡杯中酒。問平生。湖海心期。更如君否。渭樹江雲多少恨。離合古今非偶。更風雨。十常八九。長鉞歌彈明月墮。對蕭蕭。客鬢閑攜手。還怕折。渡頭柳。小樓夜久微涼透。倚危欄。一池倒影。半空星斗。此會明年知何處。蘋末秋風未久。謾輸與。鷺朋鷗友。已辦扁舟松江去。與鱸魚。尊茶論交舊。應念此。重回首。

又送趙帥之江州

倏又西風起。這一年。光景早過。三分之二。燕去鵲來。何日了。多少世間心事。待則甚。功成名遂。楓葉荻花。動涼思。又尋思。江上琵琶淚。還感慨。勞夢寐。愁來長是朝朝醉。剗地成。宋玉傷感。三閭憔悴。况是淒涼寸心碎。目斷水蒼山翠。更送客。長亭分袂。閣阜山前。梧桐雨。起風檣。露舶無窮意。君此去。趁秋霽。

又肇慶府送談金華張月窗

謂是無情者。又如何。臨歧欲別。淚珠如灑。此去蘭舟雙槳急。兩岸秋山似畫。况已是。芙蓉開也。小立西風楊柳岸。覺衣單。略說些些話。重把我。袖兒把。小詞做了。和愁寫。送將歸。要相思處。月明今夜。客裏不堪仍送客。平昔交游亦寡。况慘慘。蒼梧之野。未可淒涼休哽咽。更明朝。後日纔方卸。情默默。斜陽下。

乚 仙

憶少年

淒涼天氣。淒涼院落。淒涼時候。孤鵲叫斜月。伴寒燈。殘漏。落盡梧桐秋影瘦。菱鑑古。畫眉難就。重陽又近也。對黃花依舊。

卷二十一十五 宋詞五十首

盧 氏

天聖中。氏父作縣令。自漢州歸。氏隨父行。有詞題泥溪驛壁。

蝶戀花

蜀道青天烟霧翳。帝里繁華。迢遞何時至。回望錦川揮粉淚。鳳釵斜擘烏雲膩。綬帶雙垂金縷細。玉珮珠璫。露滴寒如水。從此鸞妝添遠意。畫眉學得遙山翠。

舒氏 王齊叟彥齡之妻。

點絳脣

獨自臨池。悶來強把闌干凭。舊愁新恨。耗却年時興。鷺散魚潛。烟斂風初定。波心靜。照人如鏡。少箇年時影。
按巨野支志云。彥齡元祐中樞密彥霖弟也。善爲詞曲。妻舒亦工篇翰。而婦翁本出武列。彥齡頗失禮於翁。翁怒。邀其女歸。竟至離絕。女在父家。偶獨行池上。懷其夫。乃作此詞。

魏夫人 丞相會子宣之室。

朱晦庵云。本朝婦人能文者。惟魏夫人及李易安二人而已。

菩薩蠻

溪山掩映斜陽裏。樓臺影動鴛鴦起。隔岸兩三家。出牆紅杏花。綠楊堤下路。早晚溪邊去。三見柳綿飛。離人猶未歸。

好事近

雨後曉寒輕。花外曉鶯啼歇。愁聽隔溪殘漏。正一聲淒咽。不堪西望去。程賒。離腸萬回結。不似海棠花下。按涼州時節。

點絳脣

波上清風。畫船明月。人歸後。漸消殘酒。獨自凭欄久。聚散匆匆。此恨年年有。重回首。淡烟疎柳。隱隱蕪城漏。

延安夫人

侯鯖錄云。是蘇丞相子容之妹。

更漏子寄季玉妹

小闌干。深院宇。依舊當時別處。朱戶鎖。玉樓空。一簾霜日紅。弄珠江。何處是。望斷碧雲無際。凝淚眼。出重城。隔溪羌笛聲。

李清照

字易安。格非之女。嫁趙明誠。有漱玉集一卷。

張正夫云。易安元宵永遇樂詞云。落日鎔金。暮雲合璧。已自工緻。至于染柳烟輕。吹梅笛怨。春
意知幾許。氣象更好。後疊云。于今憔悴。風鬟霜鬢。怕向花間重去。皆以尋常語度入音律。鍊句
精巧則易。平淡入調者難。且秋詞聲聲慢。此乃公孫大娘舞劍手。本朝非無能詞之士。未會有
一下十四疊字者。後疊又云。到黃昏。點點滴滴。又使疊字。俱無斧鑿痕。怎生得黑。黑字不許第
二人押。婦人有此奇筆。殆間氣也。

鳳凰臺上憶吹簫

香冷金猊。被翻紅浪。起來慵自梳頭。任寶奩塵滿。日上簾鉤。生怕離懷別苦。多少事。欲說還休。新來瘦。非干病酒。不是悲秋。休休。這回去也。千萬遍陽關也。則難留。念武陵人遠。烟鎖秦樓。惟有樓前流水。應念我。終日凝眸。凝眸處。從今又添一段新愁。

壺中天慢

蕭條庭院。又斜風細雨。重門須閉。寵柳嬌花寒食近。種種惱人天氣。險韻

詩成扶頭酒醒。別是閑滋味。征鴻過盡萬千心事難寄。樓上幾日春寒。簾垂四面。玉闌干慵倚。被冷香消新夢覺。不許愁人不起。清露晨流。新桐初引。多少遊春意。日高烟斂。更看今日晴未。

予謂龍柳嬌花語亦甚奇俊。前此未有能道之者。

一翦梅

紅藕香殘玉簟秋。輕解羅裳。獨上蘭舟。雲中誰寄錦書來。鴈字回時。月滿西樓。花自飄零水自流。一種相思。兩處閑愁。此情無計可消除。纔下眉頭。却上心頭。

醉花陰九日

薄霧濃雲愁永晝。瑞腦銷金獸。佳節又重陽。玉枕紗廚。半夜涼初透。東籬把酒黃昏後。有暗香盈袖。莫道不銷魂。簾卷西風。人似黃花瘦。

怨王孫春暮

帝里春晚。重門深院。草綠階前。暮天鴈斷。樓上遠信誰傳。恨綿綿。自是多沾惹。難拚舍。又是寒食也。秋千巷陌。人靜皎月初斜。浸梨花。多情

浣溪沙

樓上晴天碧四垂。樓前芳草接天涯。勸君莫上最高梯。新筍已成堂下竹。落花都入燕巢泥。忍聽林表杜鵑啼。

又

髻子傷春懶更梳。晚風庭院落梅初。淡雲來往月疎疎。玉鴨薰爐閑瑞

腦。朱櫻斗帳掩流蘇。通犀還解辟寒無。

武陵春

風住塵香花已盡。日晚倦梳頭。物是人非事事休。欲語淚先流。聞說雙溪春尚好。也擬汎輕舟。只恐雙溪舴艋舟。載不動許多愁。

點絳脣

寂寞深閨。柔腸一寸愁千縷。惜春春去。幾點催花雨。倚遍闌干。祇是無情緒。人何處。連天芳樹。望斷歸來路。

賣花聲

簾外五更風。吹夢無踪。畫樓重上與誰同。記得玉釵斜撥火。寶篆成空。回首紫金峯。雨潤烟濃。一江春浪醉醒中。留得羅襟前日淚。彈與征鴻。

聲聲慢

尋尋覓覓。冷冷清清。悽悽慘慘戚戚。乍暖還寒時候。最難將息。三杯兩盞淡酒。怎敵他。曉來風急。鴈過也。正傷心。却是舊時相識。滿地黃花堆積。憔悴損。如今有誰堪摘。守著窗兒。獨自怎生得黑。梧桐更兼細雨。到黃昏。點點滴滴。這次第。怎一箇愁字了得。

阮逸女

花心動

仙苑春濃。小桃開。枝枝已堪攀折。乍雨乍晴。輕暖輕寒。漸近賞花時節。柳搖臺榭。東風軟。簾櫳靜。幽禽調舌。斷魂遠。閑尋翠徑。頓成愁結。此恨無

人共說。還立盡黃昏。寸心空切。強整繡衾。獨掩朱扉。簟枕為誰鋪設。夜長更漏傳聲遠。紗窗映。銀缸明滅。夢回處。梅梢半籠淡月。

幼卿 能改齋漫錄云。宣和間。有女子幼卿。題詞陝府驛壁。

賣花聲

極目楚天空。雲雨無蹤。謾留遺恨鎖眉峯。自是荷花開較晚。孤負東風。客館歎飄蓬。聚散匆匆。揚鞭那忍驟花驄。望斷斜陽人不見。滿袖啼紅。

吳淑姬 嫁士人楊子治。有陽春白雪詞五卷。

黃叔暘云。淑姬詞。佳處不減李易安。

惜分飛送別

岸柳依依拖金縷。是我朝來別處。惟有多情絮。故來衣上留人住。兩眼啼紅空彈與。未見桃花又去。一片征帆舉。斷腸遙指苕溪路。

祝英臺近

粉痕消。芳信斷。好夢總無據。病酒無聊。欹枕聽殘雨。斷腸曲曲屏山。溫溫沉水。都是舊看承人處。久離阻。應念一點芳心。閑愁知幾許。偷照菱花。清瘦自羞覩。可堪梅子酸時。楊花飛絮。亂鶯又催將春去。

朱淑真 錢塘人。有斷腸集詞一卷。

蝶戀花送春

樓外垂楊千萬縷。欲繫青春。少住春還去。猶自風前飄柳絮。隨春且看歸何處。滿目山川聞杜宇。便做無情。莫也愁人意。把酒送春春不語。黃昏

却下瀟瀟雨。

眼兒媚

風日遲遲弄輕柔。花徑暗香流。清明過了。不堪回首。雲鎖朱樓。午窗睡起鶯聲巧。何處喚春愁。綠楊影裏。海棠枝畔。紅杏梢頭。

謁金門

春已半。觸目此情無限。十二闌干閑倚遍。愁來天不管。好是風和日暖。輸與鶯鶯燕燕。滿院落花簾不卷。斷腸芳草遠。

生查子元夕

去年元夜時。花市燈如晝。月上柳梢頭。人約黃昏後。今年元夜時。月與燈依舊。不見去年人。淚濕春衫袖。

又

年年玉鏡臺。梅蕊宮妝困。今歲未還家。怕見江南信。酒從別後疎。淚向愁中盡。遙想楚雲深。人遠天涯近。

蔣興祖女

靖康間。金人犯闕。陽武蔣令興祖死之。其女為賊鹵去。題詞雄州驛中。蔣令浙西人。

減字木蘭花題雄州驛

朝雲橫度。轆轤車聲如水去。白草黃沙。月照孤村三兩家。飛鴻過也。百結愁腸無晝夜。漸近燕山。回首鄉關歸路難。

鄭意娘

楊思厚之妻。撒八大尉自盱眙掠得之。不辱而死。

好事近

往事與誰論。無語暗彈清血。何處最堪腸斷。是黃昏時節。倚樓凝望又徘徊。誰解此情切。何計可同歸。鴈趁江南春色。

慕容崑卿妻

浣溪沙

滿目江山憶舊游。汀花汀草弄春柔。長亭艤住木蘭舟。好夢易隨流水去。芳心猶逐曉雲愁。行人莫上望京樓。
平江雍熙寺。月夜有客聞婦人歌此詞。傳之姑蘇。

崑卿驚曰。此余亡妻平生作也。詢所由來。正其妻殯處。

孫道絢

號冲虛居士。黃銖母。

如夢令 宮詞

翠擘紅蕉影亂。月上朱欄一半。風自碧空來。吹落歌珠一串。不見不見。人被繡簾遮斷。

憶少年葛氏姪女告歸送之

雨晴雲斂。烟花淡蕩。遙山凝碧。驅車問征路。賞春風南陌。正雨後梨花幽艷白。悔匆匆。過了寒食。歸家漸春暮。探酴醿消息。

秦樓月 季溫歸樵陽書寄

秋寂寞。秋風夜雨傷離索。傷離索。老懷無奈。淚珠零落。故人一去無期約。尺書忽寄西飛鶴。西飛鶴。故人何在。水村山郭。

鄭文妻孫氏

憶秦娥 絕妙作李嬰

花深深。一鈎羅幃。行花陰。行花陰。閑將柳帶試結同心。日邊消息空沈沈。畫眉樓上。愁登臨。愁登臨。海棠開後。望到如今。古杭雜記云。文秀州入太學。服膺齋上舍孫氏。寄以詞。一時傳播。酒樓伎館皆歌之。

燭影搖紅

乳燕穿簾。亂鶯啼樹。清明近。隔簾時度。柳花飛。猶覺寒成陣。長記眉峯偷隱。臉桃紅。猶藏酒暈。背人微笑。半顰鸞釵。輕籠蟬鬢。別久啼多。眼應不似當時俊。滿園珠翠。逞春嬌。沒個他風韻。若見賓鴻。試問待相將。綵箋寄恨。幾時得見。鬪草歸來。雙鴛微潤。

陸游妾

陸游之蜀。宿一驛中。見題壁詩。詢之。則驛中女也。遂納為妾。半載。夫人逐之。妾賦詞而別。

生查子

只知眉上愁。不識愁來路。窗外有芭蕉。陣陣黃昏雨。曉起理殘妝。整頓教愁去。不合畫春山。依舊留愁住。

美奴

陸藻敦禮侍兒。

如夢令送別

日暮馬嘶人去。船逐清波東注。後夜最高樓。還肯思量人否。無緒無緒。生怕黃昏疎雨。

卜算子

送我出東門。乍別長安道。兩岸垂楊鎖暮烟。正是秋光老。一曲古陽關。莫惜金尊倒。君向瀟湘我向秦。魚鴈何時到。

王清惠 宋昭儀。入元為女道士。號冲華。

滿江紅題驛壁

太液芙蓉。渾不是。舊時顏色。會記得。承恩雨露。玉樓金闕。名播蘭簪妃后裏。暈潮蓮。臉君王側。忽一朝。鼙鼓揭天來。繁華歇。龍虎散。風雲滅。千古恨。憑誰說。對山河百二。淚沾襟血。驛館夜驚塵土夢。宮車曉碾關山月。願嫦娥。相顧肯從容。隨圓缺。東園友聞云。此詞或傳昭儀下張璠英所賦。

徐君寶妻

岳州人。被掠至杭。其主者數欲犯之。輒以計脫。主者強焉。告曰。俟祭先夫。然後為君婦。主者許諾。乃焚香再拜。題詞壁上。投池中死。

滿庭芳題壁

漢上繁華。江南人物。尚遺宣政風流。綠窗朱戶。十里爛銀鈎。一旦刀兵齊舉。旌旗擁。百萬貔貅。長驅入。歌樓舞榭。風捲落花愁。清平三百載。典章人物。掃地都休。幸此身未北。猶客南州。破鑑徐郎何在。空惆悵。相見無由。從今後。斷魂千里。夜夜岳陽樓。

金德淑

宋宮人。入元。歸章丘李生。

望江南贈汪水雲

春睡起。積雪滿燕山。萬里長城橫縞帶。六街燈火已闌珊。人在玉樓間。

琴操

杭州伎。後削髮為尼。

滿庭芳改少游詞

山抹微雲。天連衰草。畫角聲斷斜陽。暫停征轡。聊共飲離觴。多少蓬萊舊

侶。頻回首。烟靄茫茫。孤村裏。寒鴉萬點。流水繞紅牆。魂傷。當此際。輕分
羅帶。暗解香囊。謾贏得。秦樓薄倖名狂。此去何時見也。襟袖上空有餘香。
傷心處。長城望斷。燈火已昏黃。能改齋漫錄云。西湖有一倅。閑唱少游滿庭芳。謾舉畫角聲斷。

斜陽。琴操在側云。譙門非斜陽也。倅因戲曰。爾可改韻否。琴操即改作陽字韻。東坡聞而賞之。

盼 盼 瀘南官妓。

惜春容。侑倍翁。

少年看花雙鬢綠。走馬章臺絃管逐。而今老更惜花深。終日看花看不足。
坐中美女顏如玉。爲我同歌金縷曲。歸時壓得帽簷欹。頭上春風紅簌
簌。

聶勝瓊 長安妓。歸李之間。

鷓鴣天寄別李生

玉慘花愁出鳳城。蓮花樓下柳青青。尊前一唱陽關曲。別箇人人第五程。
尋好夢。夢難成。有誰知我此時情。枕前淚共階前雨。隔箇窗兒滴到明。
蜀中妓

市橋柳送行

欲寄意。渾無所有。折盡市橋官柳。看君著上春衫。又相將。放船楚江口。
後會不知何日又。是男兒。休要鎮長相守。苟富貴。無相忘。若相忘。有如此
酒。周公謹云。詞亦可喜。

玉 英 蓬萊仙人。見巨堅志。

浪淘沙

塞上早春時。煖律猶微。柳舒金綫水回隄。料得江鄉應更好。開盡梅蹊。晝漏漸遲遲。愁損香肌。幾回無語斂雙眉。凭遍闌干十二曲。日下樓西。

吳城小龍女

江亭怨

簾卷曲欄獨倚。山展暮天無際。淚眼不會晴。家在吳頭楚尾。數點雪花亂委。撲漉沙鷗驚起。詩句欲成時。沒入蒼烟叢裏。
冷齋夜話云。黃魯直登荊州亭。柱

間有此詞。夜夢一女子云。有感而作。魯直驚悟曰。此必吳城小龍女也。

赤城韓夫人

法駕導引

東風起。東風起。海上百花搖。十八風鬟雲半動。飛花和雨著輕綃。歸路碧迢迢。

又

烟漠漠。烟漠漠。天淡一簾秋。自洗玉舟斟日醴。月華微映是空舟。歌罷海西流。
紹興間。都下有烏衣椎髻女子。歌此詞。凡九闕。皆非人世語。或記之。以問一道士。道士驚曰。此赤城韓夫人所製。水府蔡真君法駕導引也。烏衣女子疑龍云。

衛芳華

永嘉滕穆。僑居臨安。月夜游聚景園。遇一女鬼。自言是衛芳華。故宋理宗朝宮人。

木蘭花慢

記前朝舊事。會此地。會神仙。向月地雲階。重攜翠袖。來拾花鈿。繁華總隨

流水歎一場。春夢杳難圓。廢港芙蓉滴露。斷堤楊柳垂烟。兩峯南北只
依然。輦路草芊芊。恨別館離宮。烟銷鳳蓋。波沒龍船。平生玉屏金屋。對漆
燈無焰。夜如年。落日牛羊壠上。西風燕雀林邊。

紫

姑

吳興周權巽伯。乾道五年知衢州西安縣。招郡士沈延年。邀致紫姑神。賦牡丹詞。

瑞鶴仙賦一捻紅牡丹

靚嬌紅細捻。是西子。當日留心千葉。西都競裁接。好園林臺榭。何妨日涉。
輕羅慢褶。費多少。陽和調燮。向曉來露浥。芳苞一點。醉紅潮頰。雙鬢姚
黃國艷。魏紫大香。倚風羞怯。雲鬢試插。引動狂蜂蝶。况東君開宴。賞心樂
事。莫惜獻酬頻疊。看相將。紅藥翻堦。尙餘媵妾。

卷二十一十六

金詞六十一一首

完顏璫

字仲寶。一字子瑜。世宗之孫。越王永功子。自號樗軒居士。封密國公。宣宗南渡。以開府儀同三
司奉朝請。所著有如庵小藁。

青玉案

凍雲封却駝岡路。有誰訪溪梅去。夢裏疎香風暗度。覺來惟見。一窗涼月。
瘦影無尋處。明朝畫筆江天暮。定向漁蓑得奇句。試問簾前深幾許。兒
童笑道。黃昏時候。猶是廉纖雨。

蔡松年

字伯堅。從父靖除真定府判官。遂爲真定人。累官吏部尙書。參知政事。遷尙書左丞。封鄆國公。
進拜右丞相。加儀同三司。後又封衛國公。卒。加封吳國公。謚文簡。有蕭閑公集六卷。

尉遲杯

紫雲暖。恨翠雛。珠樹雙栖晚。小花靜院相逢。的的風流心眼。紅潮照玉盃。
 午香重。草綠宮羅淡。喜銀屏。小語私分。麝月春心一點。華年共有好願。
 何時定妝鬟。暮雨零亂。夢似花飛人歸月。冷一夜小山新怨。劉郎與尋常
 不淺。况不似。桃花春溪遠。覺情隨。曉馬東風。病酒餘香相半。

吳

激

字彥高。建州人。宋宰相棧之子。米芾之婿。使金留不遣。官翰林待制。皇統初。出知深州卒。有東山集詞一卷。時彥高與伯堅才譽。並推號吳蔡體。

黃叔暘云。彥高詞精妙悽惋。

風流子感舊

書劍憶遊梁。當時事。底處不堪傷。望蘭楫嫩漪。向吳南浦。杏花微雨。窺宋
 東牆。鳳城外。燕隨青步障。絲惹紫游韁。曲水古今。禁烟前後。暮雲樓閣。芳
 草池塘。回首斷人腸。流年去如電。雙鬢如霜。欲遣從來遺恨。頻近清觴。
 聽出塞琵琶。風沙浙瀝。寄書鴻鴈。烟月微茫。不似海門潮信。猶到潯陽。

春從天上來感舊

海角飄零。歎漢苑秦宮。墜露飛螢。夢回天上。金屋銀屏。歌吹競舉青冥。問
 當時遺譜。有絕藝。鼓瑟湘靈。促哀彈。似林鶯啞啞。山溜泠泠。梨園太平
 樂府。醉幾度春風。鬢髮星星。舞徹中原。塵飛滄海。風雪萬里龍庭。寫口笳
 幽怨。人憔悴。不似丹青。酒微醒。對一軒涼月。燈火青熒。

張貴謨北使時。聞彼中有歌此調者。元遺山云。會見王防禦公主說。此詞皆用琵琶故實。引據甚明。惜不能

記憶。

人月圓宴張侍御家有感

南朝千古傷心地。還唱後庭花。舊時王謝。堂前燕子。飛入人家。恍然在
遇。天姿勝雪。宮鬢堆鴉。江州司馬。青衫淚濕。同是天涯。洪景盧云。先公在燕山。赴
北人張總侍御家。集出侍兒佐酒。中有一人。意狀摧抑可憐。叩其故。乃宣和殿小宮姬也。坐客翰林直學士吳
激作詞紀之。聞者揮涕。中州樂府云。彥高賦此時。宇文叔通亦賦念奴嬌。先成而頗近鄙俚。及見彥高作。茫
然自失。是後人有求作樂府者。叔通即批云。吳郎近以樂府名天下。可往求之。

劉仲尹

字致君。蓋州人。正隆中進士。以路州節度副使召為都水監丞。有龍山集。

浣溪沙春情

繡館人人倦踏青。粉垣深處簸錢聲。賣花門外綠陰清。簾幕風柔飛燕
燕。池塘花暖語鶯鶯。有誰知道一春情。

琴調相思引

蠶欲眠時日已曛。柔柔葉大綠團雲。羅敷猶小。陌上看行人。翠實低條
梅弄色。輕花吹攏麥初勻。鳴鳩聲裏。過盡太平村。

高士談

字子文。一字季默。宣和末任忻州戶曹。仕金為翰林直學士。

減字木蘭花

西湖睡起。飛絮游絲春老矣。漲綠涵空。十頃玻璃四面風。平時事少。天
與湖山供坐嘯。他日西州。却怕羊曇感舊遊。

王庭筠

字子端。蓋州熊岳人。大定中登第。官至翰林修撰。晚年卜居黃華山。自號黃華老人。

訴衷情

夜涼清露滴梧桐。庭樹又西風。薰籠舊香猶在。曉帳暖芙蓉。雲淡薄。月朦朧。小簾櫳。江湖殘夢。半在南樓。畫角聲中。

蝶戀花

衰柳疎疎苔滿地。十二闌干。故國三千里。南去北來人老矣。短亭依舊殘陽裏。紫蟹黃柑真解事。似倩西風。勸我歸歟未。王粲登臨寥落際。鴈飛不斷天連水。

百字令 小雪家集作

山堂晚色。滿疎籬寒雀。烟橫高樹。小雪輕盈如解舞。故故穿簾入戶。掃地燒香。團圓一笑。不道因風絮。冰漸生硯。問誰先得佳句。有夢不到長安。此心安穩。只有歸耕去。試問雪溪無恙否。十里淇園佳處。修竹林邊。寒梅樹底。准擬全家住。柴門新月。小橋誰掃歸路。

趙可 字獻之。高平人。貞元二年進士。仕至翰林直學士。有玉峯散人集。

望海潮 贈妓

雲垂餘髮。霞拖廣袂。人間自有飛瓊。三館俊遊。百街高選。翩翩老阮才名。銀漢會雙星。尚相看脈脈。似隔盈盈。醉玉添春。夢雲同夜惜卿卿。離觴草草同傾。記靈犀舊曲。曉枕餘醒。海外九州。郵車一別。此生未卜他生。江上數峯青。悵斷雲殘雨。不見高城。二月遼陽。芳草千里路傍情。

劉迎 字無黨。東萊人。大定中進士。除幽王府記室。改太子司經。有詩文樂府。號山林長語。

烏夜啼

離恨遠。縈楊柳。夢魂長。繞梨花。青衫記得章臺月。歸路玉鞭斜。翠鏡啼痕印袖。紅牆醉墨籠紗。相逢不盡平生事。春思入琵琶。

又

菱鑑玉篦秋月。蕙爐銀葉朝雲。宿醒人困屏山夢。烟樹小江村。翠甲未消蘭恨。粉香不斷梅魂。離愁分付殘春雨。花外泣黃昏。

王特起

字正之。崑山人。擢第爲沁源令。後爲司監。

喜遷鶯別內

東樓歡宴。記遺簪綺席。題詩紈扇。月枕雙欹。雲窗同夢。相伴小花深院。舊歡頓成陳跡。翻作一番新怨。素秋晚。聽陽關三疊。一尊相餞。留戀情纏。綵紅淚洗妝。雨濕梨花面。鴈底關河。馬頭星月。西去一程程遠。但願此心如舊。天也不違人願。再相見。把生涯分付。藥爐經卷。

又

登山臨水。正桂嶺瘴開。蘋洲風起。玄鶴高翔。蒼鷹遠擊。白鷺欲飛還止。江上層波似練。沙際行人如蟻。目斷處。見遙峯簇翠。殘霞浮綺。千里關塞遠。鴈陣不來。猶把闌干倚。數疊悲笳。一行征旆。城郭幾番成毀。白塔前朝陵寢。青嶂故都營壘。念往事。但寒烟滿目。愁蟬盈耳。

又題郝仙女廟壁

汀洲蘋滿。記翠籠采采。相將鄰媛。蒼渚烟生。金支光爛。人在霧綃鮫館。小

鬢頓成雲散。羅襪凌波不見。翠鸞遠。但清溪如鏡。野花留壓。情睠驚變。現身後神功。絲滿吳蠶繭。漢女菱歌。湘妃瑤瑟。香動倚雲層殿。彤車載花一色。醉盡碧桃清讌。故山晚。歎流年一笑。人間飛電。

梅花引

山之麓。河之曲。一灣秀色盤虛谷。水溶溶。雨濛濛。有人行李。蕭蕭落葉中。人家籬落炊烟濕。天外雲峯迷淡碧。野雲昏。失前村。溪橋路滑。平沙沒舊痕。

韓

玉

字溫甫。北平人。擢第八翰林。爲應奉文字。後爲鳳翔府判官。有東浦詞一卷。

感皇恩 廣東與康伯可

遠柳綠含烟。土膏才透。雲海微茫露晴岫。故鄉何在。夢寐草堂溪友。舊時遊賞處。誰攜手。塵世利名。於身何有。老去生涯殫樽酒。小橋流水。一樹雪香寒瘦。故人今夜月。相思否。

減字木蘭花 贈歌者

香檀素手。緩理新詞來伴酒。音調淒涼。便是無情也斷腸。莫歌楊柳。記得渭城朝雨後。客路茫茫。幾度東風蕙草長。

賀新郎

柳外鶯聲碎。晚晴天。東風力軟。嫩寒初退。花底覓春春已去。時見亂紅飛墜。又閑傍。闌干十二。欄外青山烟縹緲。遠連空。愁與眉峯對。凝望處。雨疊翠。鴛鴦結帶靈犀佩。綺屏深。香羅帳小。寶檠燈背。誰謂彩雲和夢斷。青

翼阻尋後會。待都把。相思情綴。便做錦書難寫恨。奈菱花。都見人憔悴。那更有。枕函淚。

趙秉文

字周臣。磁州人。擢第入翰林。因言事外補。後再入館為修撰待制。轉禮部郎中。出典岢嵐。平定。甯邊二郡。南渡為直學士。遷侍讀。拜禮部尚書。再改翰林學士。自號閑閑居士。所著有益水集。

青杏兒

風雨替花愁。風雨罷。花也應休。勸君莫惜花前醉。今年花謝。明年花謝。白了人頭。乘興兩三甌。揀溪山好處追遊。但教有酒身無事。有花也好。無花也好。選甚春秋。

高憲

字仲常。遼東人。王庭筠之甥。泰和二年登第。仕博州防禦判官。

貧也樂

城下路。淒風露。今人犁田昔人墓。岸頭沙。帶蒹葭。漫漫昔時。流水今人家。黃埃赤日長安道。倦客無漿馬無草。開函關。閉函關。千古如何。不見一人閑。

党懷英

字世傑。其先馮翊人。後居泰安。宋太尉進十一代孫。舉進士。官翰林學士承旨。卒諡文獻。有竹谿集。

感皇恩

一葉下梧桐。新涼風露。喜鵲橋成渺雲步。舊家機杼。巧織紫綃如霧。新愁還織就。無重數。天上何年。人間朝暮。回首星津又空渡。盈盈別淚。散作半空疎雨。離魂都付與。秋將去。

月上海棠

傲霜枝。裊團珠。蕾冷香霏。烟雨晚秋意。蕭散繞東籬。尚彷彿。見山清氣。西風外。夢到斜川栗里。斷霞魚尾明秋水。帶三兩。飛鴻點烟際。疎林颯秋聲。似知人。倦游無味。家何處。落日西山紫翠。

王

渥

字仲澤。太原人。擢第。令甯陵。召為省掾。使宋回。為太學助教。充樞密院經歷官。遷右司都事。天

興中。出援武仙。戰歿。

水龍吟從商帥國器獵同裕之賦

短衣匹馬。清秋慣會。射虎南山下。西風白水。石鯨鱗甲。山川圖畫。千古神州。一時勝事。賓僚儒雅。快長堤萬弩。平岡千騎。波濤卷。魚龍夜。落日孤城鼓角。笑歸來。長圍初罷。風雲慘澹。貔貅得意。旌旗閑暇。萬里天河。更須一洗。中原兵馬。看鞬橐。嗚咽。咸陽道左。拜西還駕。

景

覃

字伯仁。華陽人。自號涇濱野叟。

天香

市遠人稀。林深犬吠。山連水村幽寂。田里安閑。東鄰西舍。淮擬醉時歡適。社祈雨禱。有簫鼓。喧天吹擊。宿雨新晴。壠頭閑看。露桑風麥。無端短亭暮驛。恨連年。此時行役。何似臨流蕭散。緩衣輕幘。炊黍烹雞。自勞有脆綠。甘紅薦芳液。夢裏春泉。糟牀夜滴。

又

百歲中分。流年過半。塵勞繫人無盡。桑柘週圍。管茅低架。且喜水親山近。

倦飛高鳥。算也有。閑枝栖穩。紙帳練衾。日高睡起。懶梳蓬鬢。閑堵土花
碧潤。緩芒屨。恐傷蝸蚓。側掩衡門空解。草玄誰信。俗駕輕雲易散。賴獨有
蓮峯破孤悶。世事悠悠。從教莫問。

鳳栖梧

倦客情悰紛似縷。小院無人。臥聽秋蟲語。歸意已攙新鴈去。晚涼更作瀟
瀟雨。架上秋衣蠅點素。冷菊殘妝。尙被春花妒。別有溪山容杖屨。等閑
不許知人處。

王

礪

字逸賓。汴梁人。以丞相馬吉甫舉德行才能。授鹿邑主簿。就乞致仕。

浣溪沙夢中作

林樾人家急暮砧。夕陽人影入江深。倚欄疎快北風襟。雨自北山明處
黑。雲從白鳥去邊陰。幾多秋思亂鄉心。

趙

擴

字子充。宛平人。官內翰。自號醉全道人。

南歌子

澗草萋萋綠。林鶯恰恰啼。汀沙過雨便無泥。換得芒屨隨意。到前溪。浦
澗渾堪畫。雲烟總是題。江湖老伴一蓑衣。真箇斜風細雨。不須歸。

折元禮

官治中。

望海潮從軍舟中作

地雄河岳。疆分韓晉。潼關高壓秦頭。山倚斷霞。江吞絕壁。野烟縈帶滄洲。
虎旆擁貔貅。看陣雲截岸。霜氣橫秋。千雉巖城。五更殘角月如鉤。西風

曉入貂裘。恨儒冠誤我。却羨兜牟。六郡少年。三關老將。賀蘭烽火新收。天外嶽蓮樓。想斷雲橫曉。誰識歸舟。剩著黃金換酒。羯鼓醉涼州。

劉著 字鵬南。皖城人。宣政末登進士第。仕金官翰林修撰。出守武遂。終忻州刺史。

鷓鴣天

雪照山城玉指寒。一聲羌管怨樓間。江南幾度梅花發。人在天涯鬢已斑。星點點。月團團。倒流河漢入杯盤。翰林風月三千首。寄與吳姬忍淚看。

李獻能 字欽叔。河中人。擢第入翰林。為應奉。出為鄜州觀察判官。再入選修撰。正大末。授河中帥府經

歷官。

春草碧

紫簫吹破黃昏月。簌簌小梅花。飄香雪。寂寞花底風鬟。顏色如花命如葉。千里流凝塵。凌波襪。心事鑑影鸞孤。箏絃鴈絕。舊時雪堂人。今華髮。腸斷金縷新聲。杯深不覺琉璃滑。醉夢繞南雲。花上蝶。

李晏 字致美。高平人。皇統中進士官至禮部尚書。翰林學士承旨。卒諡文簡。

虞美人

佳人酒暈潮生頰。艷艷霞千疊。雨餘紅淚濕黃昏。誤認當年人面倚朱門。飄零又送青春暮。悵望劉郎去。教人不恨五更風。只恨馬蹄無處避殘紅。

高永 字信卿。初名夔。字舜卿。又名揆。漁陽人。累舉不第。正大末上書不報。自號應菴。

大江西上曲滕王閣

閑登高閣。歎興亡滿目。風烟塵土。畫棟珠簾當日事。不見朝雲暮雨。秋水長天。落霞孤鶩。千載名如故。長空澹澹。去鴻嘹唳。誰數。遙憶才子當年。如椽健筆。坐上題佳句。物換星移。知幾度。遺恨西山南浦。往事無憑。昔人安在。漫向尋歌舞。長江東注。爲誰流盡今古。

段克己

字復之。河東人。進士。入元不仕。有遜齋樂府一卷。

漁家傲

龍尾溝邊飛柳絮。虎頭山下花無數。花底醉眠留杖屨。花上露。隨風散漫飄香霧。老去逢春能幾度。不妨且作風流主。明日不知風共雨。回首處。夕陽又下西山去。

又

詩句一春渾漫賦。一作與紛紛紅紫俱塵土。樓外垂楊千萬縷。風落絮。闌干倚遍空無語。畢竟春歸何處所。樹頭樹底無尋處。惟有閑愁將不去。依舊住。伴人直到黃昏雨。

段成己

字誠之。克己弟。進士。主宜陽簿。入元不仕。有菊軒樂府一卷。

大江東去送楊國瑞南歸

西風益浦。鴈初飛秋水。渺茫無際。有底忙時來復去。況若虛舟不繫。籬菊將開。村醪初熟。且住爲佳耳。笑言相答。個中吏隱無愧。歲月不貸。閑人君顏非少。我髮白如此。好把金杯休去手。萬事惟消沉醉。日轉山腰。馬嘶柳外。歌闋行人起。憑高西望。相思目斷烟水。

元好問

字裕之。秀容人。興定五年進士。歷官左司都事。轉行尚書省左司員外郎。金亡不仕。有遺山集。
張叔夏云。遺山詞深于用事。精于鍊句。風流蘊藉處。不減周秦。

水調歌頭賦德新王丈玉溪溪在嵩前費莊兩山絕勝處也

空濛玉華曉。瀟灑石淙秋。嵩高大。有佳處。元在玉溪頭。翠壁丹崖千丈。古木寒藤兩岸。村落帶林丘。今日好風色。可以放吾舟。百年來。算惟有。此翁游。山川邂逅佳客。猿鳥亦相留。父老雞豚鄉社。兒女籃輿竹几。來往亦風流。萬事已華髮。吾道付滄洲。

木蘭花慢遊二臺

渺漲江東下。流不盡。古今情。記海上三山。雲中雙闕。當日南城。黃鶴幾年飛去。淡春陰。平野草青青。冰井猶殘石甃。露盤已失金莖。風流千古短歌行。慷慨缺壺聲。想醜酒臨江。賦詩鞍馬。詞氣縱橫。飄零舊家王粲。似南飛。烏鵲月三更。笑殺西園賦客。壯懷無復平生。

最高樓商於魯縣北山

商於路。山遠客來稀。雞犬靜柴扉。東家勸飲薑芽脆。西家留宿芋魁肥。覺重來。猿與鶴。總忘機。問華屋。高資誰不戀。問美食。大官誰不羨。風浪裏。竟安歸。雲山既不求吾是。林泉又不責吾非。任年年。藜藿飯。芟荷衣。

玉漏遲有懷浙江別業

浙江歸路杳。西南却羨。投林高鳥。升斗微官。世累苦相縈繞。不如麒麟畫裏。又不與。巢由同調。時自笑。虛名負我。半生吟嘯。擾擾馬足車塵。被歲

月無情。暗消年少。鐘鼎山林。一事幾時會了。四壁秋蟲夜雨，更一點殘燈斜照。清鏡曉。白髮又添多少。

滿江紅

一枕餘醒。厭厭共。相思無力。人語定。小窗風雨。暮寒岑寂。繡被留歡香未減。錦書封淚紅猶濕。問寸腸。能著幾多愁。朝還夕。春草遠。春江碧。雲黯淡。花狼藉。更柳綿閑颺。柳絲難織。入夢終疑神女賦。寫情除有文通筆。恨伯勞。東去燕西飛。空相憶。

石州慢赴召史館與德新丈別去岳祠西新店明日以此寄之

擊筑行歌。按馬賦詩。年少豪舉。從渠里社浮沉。枉笑人間兒女。生平王粲。而今憔悴登樓。江山信美非吾土。天地一飛鴻。渺翩翩何許。羈旅。山中父老。相逢應念。此行良苦。幾爲虛名。誤却東家雞黍。漫漫長路。蕭蕭雨鬢黃塵。騎驢漫與行人語。詩句欲成時。滿西山風雨。

洞仙歌

黃塵鬢髮。六月長安道。羞向清溪照枯槁。似山中遠志。謾出山來。成箇甚。只是人間小草。昇平十二策。丞相封侯。說與高人應笑倒。對清風明月。展放眉頭。長恁地。大醉高歌也好。待都把功名付時流。只求箇天公。放教空老。

江神子夢德新丈因及欽叔舊遊

河山亭上酒如川。玉堂仙。重留連。猶恨春風。桃李負芳年。燕語鶯啼花落

處。歌扇後。舞衫前。舊遊風月夢相牽。路三千。去無緣。滅沒飛鴻。一線入秋烟。白髮故人今健否。西北望。一潸然。

又觀別

旗亭誰唱渭城詩。酒盈卮。兩相思。萬古垂楊。都是折殘枝。舊見青山青似染。緣底事。淡無姿。情緣不到木腸兒。鬢成絲。更須辭。只恨芙蓉。秋露冷胭脂。爲問世間離別淚。何日是。滴休時。

臨江仙 自洛陽往孟津道中作

今古北邙山下路。黃塵老盡英雄。人生長恨水長東。幽懷誰共語。遠目送歸鴻。蓋世功名將底用。從前錯怨天公。浩歌一曲酒千鍾。男兒行處是。未要論窮通。

又寄德新丈

自笑此身無定在。北州又復南州。買田何日遂歸休。向來凡落落。此去亦悠悠。赤日黃塵三百里。嵩丘幾度登樓。故人多在玉溪頭。清泉明月曉。高樹亂蟬秋。

又內鄉北山

夏館秋林山水窟。家家林影湖光。三年閑爲一官忙。簿書愁裏過。筍蕨夢中香。父老書來招我隱。臨流已蓋茅堂。白頭兄弟共論量。山田尋二頃。他日作桐鄉。

鵲橋仙

梨花春暮。垂楊秋晚。歸袖無人重挽。浮雲流水十年間。算只有。青山在眼。
風臺月榭。朱脣檀板。多病全疎酒盞。劉郎爭得似當時。比前度。心情又減。

鷓鴣天 隆德故宮同希顏欽叔知幾諸人賦

臨錦堂前春水波。蘭皋亭下落梅多。三山宮闕空銀海。萬里風埃暗綺羅。
雲子酒。雪兒歌。留連風月共婆娑。人間更有傷心處。奈得劉伶醉後何。

又

華表歸來老令威。頭皮留在姓名非。舊時逆旅黃梁飯。今日田家白板扉。
沽酒市。釣魚磯。愛閑直與世相違。墓頭不要征西字。元是中原一布衣。

太常引 東原上清宮同楊飛卿夜話汝梁舊遊追懷欽叔內翰

十年流水共行雲。相見重情親。滄海內揚塵。便疑是。前身後身。
風臺月榭。舞裙歌扇。樂事幾回新。莫話洛陽春。更誰似。金鑿故人。

清平樂 憶鎮陽

悲歡聚散。世事天誰管。梳去梳來雙鬢短。鏡裏看看雪滿。
燕南十月霜寒。孤身去住都難。何日西窗燈火。眼前兒女團圓。

又

離腸宛轉。瘦覺妝痕淺。飛去飛來雙乳燕。消息知郎近遠。
樓前小雨珊珊。海棠簾幕輕寒。杜宇一聲春去。樹頭無數青山。

邁陂塘 太和五年乙丑歲赴試并州道逢捕鴈者云今日獲一鴈殺之矣其脫網者悲鳴不能去竟自

投于地而死予因買得之葬之汾水之上累石為識號曰鴈丘并作鴈丘詞

問世間。情是何物。直教生死相許。天南地北雙飛客。老翅幾回寒暑。歡樂
趣。離別苦。就中更有癡兒女。君應有語。渺萬里層雲。千山暮雪。隻影向誰
去。橫汾路。寂寞當年簫鼓。荒烟依舊平楚。招魂楚些何嗟及。山鬼暗啼
風雨。天也妒。未信與。鶯兒燕子俱黃土。千秋萬古。為留待騷人。狂歌痛飲。
來訪鴈丘處。

點絳脣

醉裏春歸。綠窗猶唱留春住。問春何處。花落鶯無語。渺渺予懷。漠漠烟
中樹。西樓暮。一簾疎雨。夢裏尋春去。

江月晃重山 初到嵩山作

塞上秋風鼓角。城頭落日旌旗。少年鞍馬適相宜。從軍樂。莫問所從誰。
候騎纔通冀北。先聲已動遼西。歸期猶及柳依依。春閨月。紅袖不須啼。

王予可 字南雲。吉州人。

生查子

夜色靜明河。風好來千里。水殿謫仙人。皓齒清歌起。前聲金罍中。後調
銀河底。一夜嶺頭雲。繞遍樓前水。

鄧千江 臨洮人。

望海潮 獻張六太尉

雲雷天塹。金湯地險。名藩自古臯蘭。營屯繡錯。山形米聚。襟喉百二秦關。

鏖戰血猶殷。見陣雲冷落。時有雕盤。靜塞樓頭。曉月依舊玉弓彎。看看
定遠西還。有元戎閩令。上將齋壇。區脫晝空。兜鈴夕解。甘泉又報平安。吹
笛虎牙間。且宴陪珠履。歌按雲鬟。招取英靈毅魄。長繞賀蘭山。陶九成云。近世
所謂大曲。蘇小小蝶戀花。蘇東坡念奴嬌。晏叔原鷓鴣天。柳耆卿雨淋鈴。辛稼軒摸魚子。吳彥高春草碧。蔡伯
堅石州慢。張子野天仙子。朱淑真生查子。鄧千江望海潮。

卷一二十七 元詞五十二首

許衡 字仲平。河內人。被召為京兆提學。累官集賢大學士。兼國子祭酒。領太史院事。贈榮祿大夫。司

徒。諡文正。加贈太傅。開府儀同三司。魏國公。從祀孔子廟庭。有魯齋先生集。

滿江紅別大名親舊

河上徘徊。未分袂。孤懷先怯。中年後。此般憔悴。怎禁離別。淚苦滴成襟畔
濕。愁多擁就心頭結。倚東風。搔首謾無聊。情難說。黃卷在。消白日。青鏡
裏。增華髮。念歲寒交友。故山烟月。虛負人生歸去好。誰知美事難雙得。計
從今。佳會幾何時。長相憶。

張弘範 字仲疇。定興人。官至鎮國上將軍。江東道宣慰使。贈銀青榮祿大夫。平章政事。諡武略。加贈太

師。開府儀同三司。上柱國。齊國公。改諡忠武。延祐中。追封淮陽王。更諡獻武。

臨江仙憶舊

千古武陵溪上路。桃源流水潺潺。可憐仙侶剩濃歡。黃鸝驚夢破。青鳥喚
春還。回首舊遊渾不見。蒼烟一片荒山。玉人何處倚闌干。紫簫明月底。

翠袖暮雲寒。

劉秉忠

字仲晦。邢州人。少為僧。隨其師海雲入見。世祖遂留之。從代宗時。人稱為聰書記。至元初。拜光祿大夫。位太保。參預中書省事。卒贈太師。封趙國公。諡文貞。成宗時。加贈太師。諡文正。仁宗時。進封常山王。有藏春散人集。

乾荷葉

乾荷葉。色蒼蒼。老柄風搖蕩。減清香。越添黃。都因昨夜一番霜。寂寞秋江上。

燕公楠

字國材。江州人。至元初。辟贛州通判。累官資德大夫。湖廣行中書省右丞。有五峯集。

摸魚兒 答程雪樓見壽

又浮生。平頭六十。登樓悵望荆楚。出山小草成何事。閑却竹烟松雨。空自許。早搖落。江潭一似琅琊樹。蒼蒼天路。謾伏櫪心長。銜圖志短。歲晏欲誰與。梅花賦。飛墮高寒玉宇。鐵腸還解情語。英雄操與君侯耳。過眼羣兒誰數。霜鬢縷。祇夢聽。枝頭翡翠催歸去。清觴飛羽。且細酌盱泉。酣歌郢雪。風致美無度。

程鉅夫

原名文海。避武宗諱。以字行。其先休甯人。後徙居郢。至鉅夫始遷建昌。仕世祖。官翰林學士承旨。贈光祿大夫。追封楚國公。諡文憲。有雪樓集詞一卷。

摸魚兒 壽燕五峯右丞

記江梅。向來輕別。相逢今又平楚。東風小試南枝煖。早已千林烟雨。春幾許。向五老仙家。移下瓊瑤樹。溪橋驛路。更月曉堤沙。霜秋野水。疎影自容

與。平生事。幾度含章殿宇。隔花么鳳能語。苔枝天矯蒼龍瘦。誰把冰鬚細數。千萬縷。簇一點芳心。待與和羹去。移宮換羽。且度曲傳觴。主人花下。今日慶初度。

又次韻盧疎齋題歲寒亭

問疎齋。湘中朱鳳。何如江上鸚鵡。波寒木落人千里。客裏與誰同住。茅屋趣。吾自愛吾亭。更愛參天樹。勞君爲賦。渺雪鴈南飛。雲濤東下。歲晏欲何處。疎齋老。意氣經文緯武。平生握手相許。江南江北尋芳路。共看碧雲來去。黃鵠舉。記我度秦淮。君正臨清句。宣城水名歌聲緩與。怕徑竹能醒。庭花起舞。驚散夜來雨。

點絳脣送王蓋臣

綠鬢青雲。王郎故是乘驄侶。阿龍風度。想在烏衣住。帶得春來。又共春歸去。江頭路。美人何處。官柳吹風絮。

清平樂西野使君自遼左寄詩詞至樂陽猥承見及次韻代訊

新來酒戶。想勝看花處。帶得春行平壤路。同笑同歌同住。樂陽却近山家。芒鞋夜夜丹霞。流水落花歸思。蒼烟白石生涯。

盧

摯

字處道。號疎齋。涿州人。仕至翰林學士。元初稱能詩者。以劉因盧摯爲首。有疎齋集。

摸魚兒題雪樓先生歲寒亭詩卷

爲君歌。歲寒亭子。無煩洲畔鸚鵡。江山勝概。風霜地。要近魯東家住。丘壑趣。應素愛。昂霄老柏孤松樹。登高作賦。想白雪陽春。碧雲日暮。別有倚樓

處。金閨彥。尙憶西清接武。年來喬木如許。團茅時復。羲皇上。我醉欲眠。卿去。歌欲舉。還自悟。君家琢就瓊瑤句。疎齋試與。倩倚竹佳人。湘絃赴節。涼滿北窗雨。

劉敏中

章丘人。至元中為監察御史。累遷翰林學士承旨。卒諡文簡。有中齋集。

點絳脣寄程雪樓

短夢驚回。北窗一陣芭蕉雨。雨聲還住。斜日明高樹。起望行雲。送雨前山去。山如霧。斷虹猶怒。直入山深處。

楊

果

字正卿。號西菴。蒲陰人。金正大中進士。入元為北京宣撫使。拜參知政事。出為淮孟路總管。卒諡文獻。有集。

摸魚兒同遺山賦鴈丘

悵年年。鴈飛汾水。秋風依舊蘭渚。網羅驚破雙棲夢。孤影亂翻波素。還碎羽。算古往今來。只有相思苦。朝朝暮暮。想塞北風沙。江南烟月。爭忍自來去。埋恨處。依約并門舊路。一丘寂寞寒雨。世間多少風流事。天也有心相妒。休說與。還却怕。有情多被無情誤。一杯會舉。待細讀悲歌。滿傾清淚。為爾酌黃土。

仇

遠

字仁近。錢塘人。官溧陽州儒學教授。一時遊其門者。若張雨。張翥。莫維賢。皆有名當世。所著有

山村集。

八犯玉交枝招寶山觀月上

滄島雲連。綠瀛秋入。暮景却沉洲渚。無浪無風。天地白。聽得潮生人語。擊

空孤柱。翠倚高閣憑虛。中流蒼碧迷烟霧。惟見廣寒門外。青無重數。不知是水是山。不知是樹。漫漫知是何處。倩誰問。凌波輕步。謾凝睇。乘鸞素女。想庭曲。霓裳正舞。莫須長笛吹愁去。怕喚起魚龍。三更噴作前山雨。

齊天樂賦蟬

夕陽門巷荒城曲。清音早鳴秋樹。薄剪綃衣。涼生鬢影。獨飲天邊風露。朝暮暮。奈一度淒吟。一番淒楚。尙有殘聲。驀然飛過別枝去。齊宮往事。謾省。行人猶與說。當時齊女。雨歇空山。月籠古柳。彷彿舊會聽處。離情正苦。甚懶拂冰箋。倦拈琴譜。滿地霜紅。淺莎尋蛻羽。

李

冶

字仁卿。樂城人。金進士。辟知鈞州事。城潰。微服北渡。流落忻崞間。世祖聞其賢。召之。未仕。晚家封龍山下。至元初。再以學士召。就職暮月。以老病辭去。有敬齋集。

邁陂塘和元遺山鴈丘

鴈雙雙。正分汾水。回頭生死殊路。天長地久相思債。何似眼前俱去。摧勁羽。倘萬一。幽冥却有重逢處。詩翁感遇。把江北江南。風嘹月唳。并付一丘土。仍爲汝。小草幽蘭麗句。聲聲字字酸楚。拍江秋影今何在。宰木欲迷隄樹。霜魂苦。算猶勝。王嬙青塚眞娘墓。憑誰說與。對烏道長空。龍艘古渡。馬耳淚如雨。

又大名有男女以私情不遂赴水者後二日二尸相攜出水濱是歲陂荷俱並蒂

爲多情。和天也老。不應情遽如許。請君試聽雙葉怨。方見此情眞處。誰點注。香斂豔。銀塘對抹胭脂露。藕絲幾縷。絆玉骨春心。金沙曉淚。漠漠瑞紅

吐。連理樹。一樣驪山懷古。古今朝暮雲雨。六郎夫婦三生夢。幽恨從來
艱阻。須念取。共鴛鴦翡翠。照影長相聚。秋風不住。悵寂寞芳魂。輕烟北渚。
涼月又南浦。

鷓鴣天中秋同遺山飲倪文仲家蓮花白醉中賦此

太乙滄波下酒星。露醺祕訣出仙扃。情知天上蓮花白。壓盡人間竹葉青。
迷晚色。散秋馨。兵廚曉溜玉泠泠。楚江雲錦三千頃。笑殺靈均語獨醒。
王 惲

字仲謀。汲縣人。官至翰林學士。嘉議大夫。累進中奉大夫。贈翰林學士承旨。資善大夫。追封太
原郡公。謚文定。有秋澗集詞四卷。

春從天上來。見故宮人感賦

羅綺深宮。記紫袖雙垂。當日昭容。錦封香重。彤管春融。帝座一點雲紅。正
臺門事簡。更捷奏。清晝相同。聽鈞天。侍瀛池內宴。長樂歌鐘。回頭五雲
雙闕。恍天上繁華。玉殿珠櫳。白髮歸來。昆明灰冷。十年一夢無踪。寫杜娘
哀怨。和淚點。彈與孤鴻。淡長空。看五陵何似。無樹秋風。

點絳脣送董秀才西上

楊柳青青。玉門關外三千里。秦山渭水。未是銷魂地。坦臥東牀。恐減風
雲氣。功名際。願君著意。莫搵春閨淚。

水龍吟賦秋日紅梨花

纖苞淡貯幽香。玲瓏輕鎖秋陽麗。仙根借煖。定應不待。荆王翠幘。瀟灑輕
盈。玉容渾是。金莖露氣。甚西風宛轉。東欄暮雨。空點綴。真妃淚。誰遣司

花妙手。又一番。角奇爭異。使君高臥。竹亭閑寂。故來相慰。燕几螺屏。一枝披拂。繡簾風細。約洗妝快瀉。玉屏芳酒。枕秋蟾醉。

平湖樂

探蓮人語隔秋烟。波靜如橫練。入手風光莫流轉。共留連。畫船一笑春風面。江山信美。終非吾土。問何日是歸年。

又

秋風湖上水增波。水底雲陰過。憔悴湘纍莫輕和。且高歌。凌波幽夢誰驚破。佳人望斷。碧雲暮合。道別後意如何。

又

安仁雙鬢已驚秋。更甚眉頭皺。一笑相逢且開口。玉爲舟。新詞淡似鵝黃酒。醉歸扶路。竹西歌吹。人道似揚州。

又

秋風嫋嫋白雲飛。人在平湖醉。雲影湖光淡無際。錦屏圍。故人遠在千山外。百年心事。一樽濁酒。長使此心違。

後庭花破子 晚眺臨武堂

綠樹遠連洲。青山壓樹頭。落日高城望。烟霏翠滿樓。木蘭舟。彼汾一曲。春風佳可遊。

趙子孟頫

字子昂。宋太祖子秦王德芳之後。四世祖伯圭賜第湖州。遂爲湖州人。宋末。爲真州司戶參軍。至元中。以程鉅夫薦入見。授兵部郎中。累官翰林學士承旨。榮祿大夫。卒。追封魏國公。謚文敏。

有松雪詞一卷。

邵復孺云。公以承平王孫而嬰世變。黍離之悲。有不能忘情者。故長短句。深得騷人意度。

後庭花破子

清溪一葉舟。芙蓉兩岸秋。採菱誰家女。歌聲起暮鷗。亂雲愁。滿頭風雨。帶荷葉歸去休。

蝶戀花

儂是江南遊冶子。烏帽青鞋。行樂東風裏。落盡楊花春滿地。萋萋芳草愁千里。扶上蘭舟人欲醉。日暮青山。相映雙蛾翠。萬頃湖光歌扇底。一聲吹下相思淚。

虞美人 浙江舟中作

潮生潮落何時了。斷送行人老。消沉萬古意無窮。盡在長空澹澹鳥飛中。海門幾點青山小。望極烟波渺。何當駕我以長風。便欲乘桴浮到日華東。

浣溪沙 李叔固丞相會間贈歌者貴貴

滿捧金卮低唱詞。樽前再拜索新詩。老夫慚愧鬢成絲。羅袖染將修竹翠。粉香須上小梅枝。相逢不似少年時。

浪淘沙

今古幾齊州。華屋山丘。杖藜徐步立芳洲。無主桃花開又落。空使人愁。沙上往來舟。萬事悠悠。春風會見昔人遊。惟有石橋橋下水。依舊東流。

劉

因

字夢吉。容城人。至元中徵授承德郎。右贊善大夫。以母疾歸。尋以集賢學士嘉議大夫徵。固辭。卒贈翰林學士。資善大夫護軍。追封容城郡公。諡文靖。有靜脩集詞一卷。

木蘭花

未開常探花開未。又恐纔開風雨至。花開風雨不相妨。為甚不來花下醉。
今年休作明年計。明日已非今日事。春風欲勸坐中人。一片落紅當眼墜。

鵲橋仙喜雨

紆千生處。幾時飛去。欲去被天留住。野人得飽更無求。滿意看。一犁春雨。
田家作苦。濁醪釀黍。準備歲時歌舞。不妨分我一豚蹄。更試聽。清秋社鼓。

梁

會

字貢父。燕人。以薦起。歷官湖南宣慰司副使。改淮西宣慰司副使。兩使安南。授吏部尚書。改授淮安路總管。累遷昭文館大學士。資德大夫。

木蘭花慢西湖送春

問花花不語。為誰落。為誰開。算春色三分。半隨流水。半入塵埃。人生能幾
歡笑。但相逢。尊酒莫相推。千古幕天席地。一春翠繞珠圍。彩雲回首暗
高臺。烟樹渺吟懷。拚一醉留春。留春不住。醉裏春歸。西樓半簾斜日。怪銜
春。燕子却飛來。一枕青樓好夢。又教風雨驚回。

陳

孚

字剛中。臨海人。至元中官翰林待制。兼國史院編修。繼出為台州路總管府治中。有集。

太常引端陽日當母誕不得歸

綵絲堂上簇蘭翹。記生母。在今朝。無地捧金蕉。奈烟水龍沙路遙。碧天
迢遞。白雲何處。風急雨瀟瀟。萬里夢魂銷。待飛逐。錢唐夜潮。

又

短衣孤劍客乾坤。奈無策。報親恩。三載隔晨昏。更疎雨。寒燈斷魂。赤城
霞外。西風鶴髮。猶想倚柴門。蒲醕謾盈尊。倩誰寫。青衫淚痕。

汪宗臣

字公輔。號紫巖。婺源人。與方虛谷交善。有集四卷。

蝶戀花 清明前兩日聞燕

年去年來來去早。怪底不來。庭院春光老。知向誰家翻別調。家家望斷飛
踪杳。千里瀟湘烟渺渺。不記雕梁。舊日恩多少。逼近清明纔一到。故巢
猶在朱檐曉。

姚雲文

字聖瑞。高安人。宋咸淳進士。入元。授承直郎。撫建兩路儒學提舉。有江村遺稿。

摸魚兒 艮岳

渺人間。蓬瀛何許。一朝飛入梁苑。輞川梯洞層崖出。猶帶鬼愁龍怨。窮遊
宴。談笑裏。金風吹折桃花扇。翠華天遠。悵莎沼螢粘。錦屏烟合。草露泫蒼
蘚。東華夢。好在牙檣瑠瑯。畫圖歷歷會見。落紅萬點孤臣淚。斜日牛羊
春晚。摩雙眼。看塵世。鰲宮又報鯨波淺。吟鞭拍斷。便乞與媧皇。化成精衛。
填不盡遺憾。

紫萸香慢 九日

近重陽。偏多風雨。絕憐此日。暄明。問秋香濃未。待攜客。出西城。正自羈懷

多感。怕荒臺高處。更不勝情。向樽前又憶。漉酒插花人。只坐上。已無老。兵
淒清。淺醉還醒。愁不肯。與詩平。記長楸走馬。雕弓控柳。前事休評。紫萸
一枝傳賜。夢誰到。漢家陵。儘烏紗。便隨風去。要天知道。華髮如此。星星歌
罷涕零。

玲瓏玉半闌堂賦春雪

開歲春遲。早贏得。一白瀟瀟。風窗浙籟。夢驚錦帳春嬌。是處貂裘透暖。任
尊前回舞。紅倦柔腰。今朝。虧陶家。茶鼎寂寥。料得東皇戲劇。怕蛾兒街
柳。先鬪元宵。宇宙低迷。倩誰分。淺亞深凹。休嗟空花無據。便真箇。瓊雕玉
琢。總是虛飄。且沉醉。趁樓頭。零片未消。

齊天樂

柳花引過橫塘路。縈回曲蹊通圃。插槿編籬。挨梅砌石。次第海棠成塢。吟
筇獨拄。待尋訪斜橋。水邊窺戶。已約青山。雲深不礙客來處。繁華閱人
無數。問舊日平原。君還知否。啼鳥窗幽。晝陰人寂。慵困不如飛絮。匆匆燕
語。似迎得春來。且留春住。惜取名花。一枝堪寄與。

詹

正

一作玉。字可大。別號天游。郢人。官翰林學士。

霓裳中序第一 至元間監醮長春宮見羽士文室古鏡狀似秋葉背有金刻宣和御寶四字有感因賦

一規古蟾魄。瞥過宣和幾。春色。知那箇。柳鬆花怯。會搓玉團香。塗雲抹月。
龍章鳳刻。是如何。兒女消得。便孤了。翠鸞何限。人更在天北。磨滅。古今
離別。幸相從。薊門仙客。蕭然林下秋葉。對雲淡星疎。眉青影白。佳人已傾

國。謾贏得。癡銅舊畫。興亡事。道人知否。見了也華髮。

三姝媚 古衛舟子謂曾載錢唐宮人

一篷兒別苦。是誰家。花天月地兒女。紫曲藏嬌。慣錦窠金翠。玉璫鐘呂。綺席傳宣。笑聲裏。龍樓三鼓。歌扇題詩。舞袖籠香。幾會塵土。因甚留春不住。怎知道人間。匆匆今古。金屋銀屏。被西風吹換。蓼汀蘋渚。如此江山。應悔却。西湖歌舞。載取斷雲何處。江南烟雨。

齊天樂 贈童孺天兵後歸杭

相逢喚醒京華夢。吳塵暗斑吟髮。倚擔評花。認旗沽酒。歷歷行歌奇跡。吹香弄碧。有坡柳風情。逋梅月色。畫鼓紅船。滿湖春水斷橋客。當時何限俊侶。甚花天月地。人被雲隔。却載蒼烟。更招白鷺。一醉修江又別。今回記得。再折柳穿魚。賞花催雪。如此湖山。忍教人更說。

清平樂

醉紅宿翠。髻鞦烏雲墜。管是夜來渾不睡。那更今朝早起。東風滿搦腰肢。階前小立多時。却恨一番新雨。想應濕透鞋兒。

吳

澄

字幼清。崇安人。仕至翰林學士。進封臨川郡公。謚文正。學者稱草廬先生。有詞一卷。

渡江雲 揭浩齋送春和韻

名園花正好。嬌紅帶白。百態競春妝。笑痕添酒暈。豐臉凝脂。誰與試鉛霜。詩朋酒伴。趁此日。流轉風光。儘夜遊。不妨秉燭。未覺是疎狂。茫茫一年一度。爛熳離披。似長江去浪。但要教。啼鶯語燕。不怨盧郎。問春春道何會。

去。任蜂蝶。飛過東牆。君看取。年年潘令河陽。

彭元遜 字異吾。廬陵人。

漢宮春 元夕

十日春風。又一番調弄。怕暖愁陰。夜來風雨。搖得楊柳黃深。薰篝未斷。夢舊寒。殘醉同衾。便是鬪燈見月。看花對酒。驚心。攜手滿身花影。香霏冉冉。露濕羅襟。笙歌行人歸去。回首沉沉。人間此夜。誤春光。一刻千金。明日問紅巾青鳥。蒼苔自拾遺簪。

玉女迎春慢柳

纔入新年。逢人日。拂拂淡烟無雨。葉底妖禽自語。小啄幽香還吐。東風辛苦。便怕有。踏青人誤。清明寒食。消得渡江。黃翠千縷。看臨小帖宜春。填輕暈濕。碧花生霧。爲說釵頭裊裊。繫著輕盈不住。問郎留否。似昨夜。教成鸚鵡。走馬章臺。憶得畫眉歸去。

子夜歌 和劉尚友韻

視春衫。篋中半在。浥浥酒痕花露。恨桃李。隨風吹盡。夢裏故人如霧。臨穎美人。秦川公子。却共何人語。對誰家。花草池臺。回首故園咫尺。未成歸去。昨宵聽。危絃急管。酒醒不知何處。漂泊情多。衰遲感易。無限堪憐許。似尊前眼底。紅顏消幾寒暑。年少風流。未諳春事。追與東風賦。待他年。君老巴山。共君聽雨。

解佩環

江空不渡。恨蘼蕪杜若。零落無數。遠道荒寒。婉婉流年。望望美人。遲暮。風
烟雨雪。陰晴晚。更何須。春風千樹。盡孤城。落木蕭蕭。日夜江聲流去。日
宴山深。聞笛恐他年。流落與子同賦。事闕心違。交淡媒勞。蔓草沾衣多露。
汀洲窈窕。餘醒寐。遺珮浮沉。漣浦。有白鷗。淡月微波。寄語逍遙容與。

羅志仁 號壺秋。涪川人。

霓裳中序第一 四聖觀

來鳩又去燕。看罷江湖收畫扇。謾湖曲。雕欄倦倚。正船過西陵。快篙如箭。
凌波不見。但陌花。遺曲淒怨。孤山路。晚蒲病柳。淡綠鎖深院。離恨。五雲
宮殿。記舊日。曾遊翠輦。青紅如寫。便面。悵下鵝池荒。放鶴人遠。粉牆隨岸
轉。漏壁瓦。殘陽一線。蓬萊夢。人間那信。坐看海濤淺。

風流子 泛湖

歌咽翠眉低。湖船客。尊酒謾重攜。正斷續齋鐘。高峯南北。飄零野褐。太乙
東西。淒涼處。翠連松九里。口馬濺障泥。葛嶺樓臺。夢隨烟散。吳山宮闕。恨
與雲齊。靈峯飛來久。飛不去。有落日。斷猿啼。無限風荷廢港。露柳荒畦。
歎岳公英骨。麒麟舊塚。坡仙吟魄。鶯燕長堤。欲弔梅花無句。素壁慵題。

金人捧露盤 錢唐懷古

濕苔青。妖血碧。壞垣紅。怕精靈。來往相逢。荒烟瓦礫。寶釵零亂。隱鸞龍。吳
峯越巘。翠鬢鎖。若爲誰容。浮屠換。朝陽殿。僧磬改。景陽鐘。興亡事。淚老
金銅。驪山廢盡。更無宮女說玄宗。海濤落月。魚聲起。滿眼秋風。

虞美人 淨慈尼

君王會惜如花面。往事多恩怨。霓裳和淚換袈裟。又送鸞輿北去聽琵琶。當年未削青螺髻。知是歸期未。天花交室萬緣空。結綺臨春何處淚痕中。

韋居安 號梅澗。

摸魚兒

繞苕城。水平波渺。雙湖遙睇無際。就中惟有漁灣好。占得西關佳致。楊柳外。羨汎宅浮家。當日玄真子。溪山信美。歎陳迹猶存。前賢已往。誰會景中意。蕭閑甚。築屋三間近水。汀洲香汎蘭芷。清風明月知多少。肯滯軟紅塵裏。垂釣餌。趁春水生時。賸有桃花鱖。煩襟淨洗。待辦取輕蓑。來分半席。相對弄清泚。

卷二十一十八 元詞五十四首

李琳 號梅谿。長沙人。

六么令 京中清明

淡烟疎雨。香徑渺啼鳩。新晴畫簾閑卷。燕外寒尤力。依約天涯芳草。染得春風碧。人間陳迹。斜陽今古。幾縷遊絲趁飛蝶。誰向尊前起舞。又覺春如客。翠袖折取。萼紅笑與簪華髮。回首青山一點。簷外寒雲疊。梨花著雨。柳花飛絮。夢繞欄干滿園雪。

木蘭花慢 汴京

藥珠仙馭遠。橫羽葆。簇蜺旌。甚鸞月流輝。鳳雲布彩。翠繞蓬瀛。舞衣怯。環珮冷。問梨園。幾度沸歌聲。夢裏芝田入駿。禁中花漏三更。繁華一瞬化飛塵。輦路劫灰平。悵碧滅烟銷。紅凋露粉。寂寞秋城。與亡事。空陳迹。只青山。淡淡夕陽晴。未向沙鷗說得。柳風吹上旗亭。

趙

文

字儀可。號青山。廬陵人。東湖書院山長。

入聲甘州和孔瞻懷信國公韻因念周亦躬

是去年。春草又萋萋。塵生縷金衣。悵朱顏爲土。白楊堪柱。燕子誰依。謾說漫漫六合。無地著相思。遼鶴歸來後。城亦全非。更有延平一劍。向風雷半夜。何處尋伊。怪天天何物。堪作玉彈棋。到今年。無腸堪斷。向清明。獨自掩荆扉。何況又。禽聲杜宇。花事酴醾。

瑞鶴仙 劉氏園柳

綠楊深似雨。西湖上。舊日愁絲恨縷。風流似張緒。羨春風依舊。年年眉嫵。宮腰楚楚。倚畫欄。會鬪妙舞。想如今。似我零落天涯。却悔相妒。痛絕長秋別後。楊白花飛。舊腔誰譜。年光暗度。淒涼孰訴。記菩提寺路。段家橋水。何時重到夢處。况柔條老去。爭奈繫春不住。

塞翁吟

坐對梅花笑。還記初度年時。名利事。總成非。謾老矣何爲。吳山夜月。閩山霧。回首鬢影如絲。懶更問。斗牛箕。強憑醉成詩。閑思。嗟漂泊。浮雲飛絮。

會跌蕩。春風柘枝。便萬里。金臺築就。已長分。采藥龐公。誓墓羲之。百年政
爾。一笑樽前。兒女牽衣。

宋 遠 號梅洞。徐川人。

意難忘。同滕玉霄。周秋陽。劉向友。蕭高峯。邂逅古洪。題樟鎮華光閣。誌別分韻得重字。

雞犬雲中。笑種桃道士。虛費春風。山城看過鴈。春水夢爲龍。雲上下。燕西
東。久別各相逢。向夜深。江聲浦樹。燈影漁篷。舊遊新恨重重。便十分談
笑。一樣飄蓬。玄經摧意氣。丹鼎賺英雄。年易老。世無窮。春事苦匆匆。更與
誰。題詩藥市。沽酒新豐。

周 景 字秋陽。南陽人。

水龍吟前題得細字

人生能幾相逢。百年四海爲兄弟。舊時青眼。今番白髮。年華隕涕。春更無
情。拋人先去。楊花無蒂。况江程漸短。別期漸緊。須重把。蘭舟繫。幸自清
江如砥。指黃壚。流鶯聲細。滄波如許。平蕪何處。明朝迢遞。何預興亡。不如
休去。牆陰挑薺。且相期共看。蓬萊清淺。更三千歲。

劉將孫 字向友。廬陵人。辰翁子。

憶舊遊前題得論字

正落花時節。憔悴東風。綠滿愁痕。悄客夢驚呼伴侶。斷鴻有約。回泊歸雲。
江空共道惆悵。夜雨隔篷聞。儘世外縱橫。人間恩怨。細酌重論。歎他鄉
異縣。渺舊雨新知。歷落情真。匆匆那忍別。料當君思我。我亦思君。人生自

非麋鹿。無計久同羣。此去重銷魂。黃昏細雨人閉門。

蕭列 號高峯。涂川人。

八聲甘州前題得文字

可憐生。飄零到茶蘼。依然舊銷魂。殘春幾許。風風雨雨。客裏又黃昏。無奈一江烟霧。腥浪捲河豚。身世忽如葉。那自清渾。莫厭悲歌笑語。奈天涯有夢。白髮無根。怕相思別後。無字寫回文。更月明洲渚。杜鵑聲裏。立向臨分。三生石。情緣千里。風月柴門。

司馬昂父 字九泉。

最高樓

花信緊。二十四番愁。風雨五更頭。侵階苔蘚迴羅襪。逗衣梅潤試香篝。綠窗閑。人夢覺。鳥聲幽。按秦箏。學弄相思調。寫幽情。恨殺知音少。向何處。說風流。一絲楊柳千絲恨。三分春色二分休。落花時。流水裏。兩悠悠。

應法孫

霓裳中序第一和周草窗韻

愁雲翠。萬疊露柳殘蟬空抱葉。簾卷流蘇寶結。乍庭戶嫩涼。闌干微月。玉纖勝雪。委素紈。塵鎖香篋。思前事。鶯期燕約。寂寞向誰說。悲切。漏籤聲咽。漸寒炮。蘭缸未滅。良宵長是問別。恨酒凝紅綃。粉澹瑤玦。鏡盟鸞影缺。吹怨笛。西風數闋。無言久。和衣成夢。睡損縷金蝶。

王學文 字竹澗。眉山入。

摸魚兒送汪水雲之湘

記當年。舞衫零亂。淋鈴忍按新闕。杜鵑枝上東風晚。點點淚痕凝血。芳信歇。念初試琵琶。會識關山月。悲絃易絕。奈笑罷鬢生。曲終愁在。誰解寸腸結。浮雲事。又作南柯夢徹。一簪聊寄華髮。乾坤桑海無窮事。才歷昆明初劫。誰共說。都付與。焦桐寫入梅花疊。黃花送別。休更問湘魂。獨醒何在。沉醉浩歌發。

綺寮怨

忽忽東風又老。冷雲吹晚陰。疎簾下。茶鼎孤烟。斷橋外。梅豆千林。江南庾郎憔悴。睡未醒。病酒愁怎禁。倚闌干。一扇涼風。看平地落花如雪深。千古曲囊中古琴。平泉金谷。不堪舊事重尋。當日登臨。都化作。夢銷沉。元龍丘墳無恙。誰喚起。共論心。哀歌怨吟。問何似啼鳥。枝上音。

柳梢青友人至

客裏淒涼。桐花滿地。杜宇深山。幸自君來。誰教君去。剪剪輕寒。愁懷無語相看。謾寫入。徽絃自彈。小院黃昏。前村風雨。莫倚闌干。

彭芳遠

滿江紅聞笛

愁滿關山。又吹得。蘆花雪深。西樓外。天低水湧。龍挾泓吟。回首人間無此曲。數峯江上落餘音。似斷雲。飛絮兩悠悠。何處尋。江南路。晴又陰。聲韻改。淚盈襟。自中郎去處。羽泛商沉。牛背斜陽添別恨。鸞膠秋月續琴心。待

醉騎黃鶴度蒼寒。霜滿林。

危復之

撫州人。元帥郭昂薦爲儒學官。不就。至元中。累徵不應。隱紫霞山中卒。私謚貞白先生。

永遇樂

早葉初鶯。晚風孤蝶。幽思何限。檐角縈雲。階痕積雨。一夜苔生徧。玉窗閑掩。瑤琴慵理。寂寞水沉烟斷。悄無言。春歸無覓。卷簾見雙飛燕。風亭泉石。烟林薇蕨。夢繞舊時曾見。江上閑鷗。心盟猶在。分得眠沙畔。引觴浮月。飛談卷霧。莫管愁深歡淺。起來倚闌干。拾得殘紅一片。

顏子俞

號吟竹。太和人。

清平樂 留王靜得

留君少住。且待晴時去。水鶴夜深雲外語。明日棠梨花雨。尊前不盡餘情。都上鳴絃細聲。二十四番風後。綠陰芳草長亭。

劉景翔

號溪山。安成人。

如夢令

獨立荷汀烟暮。一霎錦雲香雨。似爲我無情。驚起鴛鴦飛去。飛去飛去。却在綠楊深處。

吳元可

字山庭。吉安人。

鳳凰臺上憶吹簫

更不成愁。何曾是醉。豆花雨後輕陰。似此心情自可。多了閑吟。秋在西樓西畔。秋較淺。不似情深。夜來月。爲誰瘦小。塵鏡羞臨。彈箏舊家伴侶。記

鴈啼秋水。下指成音。聽未穩。當時自誤。又况如今。那是柔腸易斷。人間事。獨此難禁。雕籠近。數聲別似春禽。

采桑子

江南二月春深淺。芳草青時。燕子來遲。剪剪輕寒不滿衣。清宵欲寐還無寐。顧影顰眉。整帶心思。一樣東風兩樣吹。

劉 鉉 字鼎玉。

烏夜啼 石榴

垂楊影裏殘紅。甚匆匆。只有榴花全不。怨東風。暮雨急。曉霞濕。綠玲瓏。比似茜裙初染。一般同。

蕭允之 號竹屋。

蝶戀花 舟行懷舊

十幅歸帆風力滿。記得來時。買酒朱橋畔。遠樹平蕪空目斷。亂山惟見斜陽半。誰把新聲翻玉筦。吹過滄浪。多少傷春怨。已是客懷如絮亂。畫樓人更回頭看。

虞美人

朱樓會記阿嬌時。滿座春風轉。紅潮生面酒微醺。一曲清歌留住半。牕雲。大都咫尺無消息。望斷青鸞翼。夜長香短燭花紅。多少思量只在雨聲中。

點絳脣

花徑相逢。眼期心諾情如昨。怕人疑著。佯弄鞦韆索。知有而今。何似當初莫。愁難託。雨鈴風鐸。夢斷燈花落。

瑣窗寒

細雨收塵。輕陰弄日。柳絲掠道。桃邊杏處。猶記玉驄會到。對東風。回首舊游。香消艷歇無音耗。悵佳人。有約難來。綠遍滿庭芳草。愁抱。沉吟久。問翠珥金鈿。爲何人好。回文細字。塵暗當年織。倚闌干。斜陽又西。歡期易失。春易老。待何時。再覓珍叢。共把清尊倒。

黃子行 號蓬壺

西湖月自度商調

湖光冷浸玻璃。蕩一餉薰風。小舟如葉。藕花十丈。雲梳霧洗。翠嬌紅怯。壺觴圍坐處。正酒醪吹波。潮暈頰。尙記得。玉臂生涼。不放汗香輕浹。殢人小摘牆榴。爲碎搯猩紅。細認裙褶。舊遊如夢。新愁似織。淚珠盈睫。秋娘風味在。怎得對銀缸。生笑靨。消瘦沈約詩腰。彷彿堪捻。

又探梅

初弦月挂林梢。又一度西園。探梅消息。粉牆朱戶。苔枝露蕊。淡勻輕飾。玉兒應有恨。爲悵望東昏。相記憶。便解珮。飛入雲階。長伴此花傾國。還嗟瘦損幽人。記立馬攀條。倚欄橫笛。少年風味。拈花弄蕊。愛香憐色。揚州何遜在。試點染吟箋。留醉墨。謾贏得。疎影寒牕。夜深孤寂。

津鼓匆匆。猶記得。故人相送。春江上。鳥啼花影。馬嘶香鞞。情逐陽關金縷斷。淚和楊柳春絲重。算別來。幾度月明時。相思夢。山萬疊。秋眉聳。春一點。歸心動。問風儔。月侶。有誰遊從。百里家山。明日到。一尊芳酒。今宵共。任樓頭。吹盡五更風。梅花弄。

花心動落梅

誰倚青樓。把謫仙。長笛數聲吹裂。一片乍零。千點還飛。正是雨晴時節。水晶簾外。東風起。卷不盡。滿庭春雪。畫欄小。斜鋪亂點。翠苔成纈。嫋嫋餘香未歇。空悵望。音塵兩眉愁切。翠袖淚乾。粉額妝寒。此恨有誰同說。江南春信無痕跡。餘情在。冷烟殘月。夢魂遠。蘭燈伴人易滅。

小重山

一點斜陽紅欲滴。白鷗飛不盡。楚天碧。漁歌聲斷。晚風急。攬蘆花。飛雪滿林濕。孤館百憂集。家山千里遠。夢難覓。江湖風月好收拾。故溪雲。深處著蓑笠。

彭履道

蘭陵王

章臺路。西出重城幾步。秦樓曉。花氣分明。一霎空濛。洗高樹。行人半倚戶。飛去。黃鸝自語。秋千小。不繫柳條。惟有輕陰約飛絮。鈿車暗相遇。早拂拭紅巾。初放鸚鵡。聞歌猶是淋鈴處。喚鳴箏掩面。倚壚呼酒。東風重記舊眉嫵。報伊共歌舞。西去。屢回顧。漸客舍荒涼。嘶馬先駐。玉關萬里知何處。

許。但倦擁荒澤。瓜洲難渡。將軍垂老望故國。夜夢苦。

李裕翁

摸魚兒

訝江南。許多風景。繁華只在晴晝。些兒淡沲冲融意。到處拈花著柳。疎雨後。更艷艷。綿綿。潑眼濃如酒。飛浮宇宙。但借日浮香。隨風著物。巧筆畫難就。惆悵處。會記蘇堤攜手。十年驚覺回首。蒼埃霽景成陰晦。湖水湖烟依舊。凝望久。問燕燕鶯鶯。識此年華否。長門別有。脈脈斷腸人。柔情蕩漾。長是爲伊瘦。

段弘章

號懶融。吉州人。

洞仙歌

茶蘼

一庭晴雪。了東風孤注。睡起濃香占牕戶。對翠蛟盤雨。白鳳迎風。知誰見。愁與飛紅流處。想飛瓊弄玉。共駕蒼烟。欲向人間挽春住。清淚滿檀心。如此江山。都付與。斜陽杜宇。是會約。梅花帶春來。又自趁梨花。送春歸去。

劉天迪

字雲閑。西昌人。

齊天樂

嚴縣尹席上和李觀我韻

瑞麟香軟。飛瑤席。吟仙笑陪歡宴。桐影吹香。梅陰弄碧。一味晚涼堪薦。停杯緩勸。記羅帕求詩。琵琶遮面。十載揚州。夢回前事楚雲遠。人生總是逆旅。但相逢一笑。如此何限。采石宮袍。沉香醉筆。何似輕衫小扇。流年暗換。甚新雨情懷。故園心眼。明日西江。斜陽帆影轉。

一萼紅夜聞南婦哭北夫

擁孤衾。正朔風淒緊。氈帳夜驚寒。春夢無憑。秋期又誤。迢遞烟水雲山。斷腸處。黃茅瘴雨。恨驄馬。憔悴只空還。採翠盟孤。紅啼怨切。暗老朱顏。堪歎揚州十載。甚倡條冶葉。不省春殘。蔡琰悲笳。昭君怨曲。何預當日悲歡。謾贏得。西鄰倦客。空惆悵。今古上眉端。夢破梅花。角聲又報更闌。

虞美人

子規解勸春歸去。春亦無心住。江南風景正堪憐。到得而今不去待何年。無端往事縈心曲。兩鬢先驚綠。薔薇花發望春歸。謝了薔薇又見棟花飛。

周伯陽

字霽海。

摸魚兒

又匆匆。月鞭露鏡。梅花江上歸路。海圖破碎來時線。何似彩衣低舞。風雪暮。正望斷。青山一髮雲橫處。浩歌獨舉。便想見迎門。牽衣兒女。總是舊眉嫵。陽關曲。揮灑紫薇花露。妙音清遠。高駐。經寒楊柳休輕折。搖動一溪霜霧。邯鄲步。笑布襪。青鞋。去住知何許。汀鷗沙鷺。若問我重來。明年有約。今日是前度。

尹公遠

號琴泉。

尉遲盃

題盧古溪響碧琴所

冰絃語。在竹樹。院落深深處。當年野草閑花。何許浮雲飛絮。征鴻止止。縱

汗漫遊人遠。回顧遲瓊樓。五色簾開。喚醒玄鶴飛舞。何事夢斷湖山。尙九里松聲。八月潮怒。三二十年餘。臺池淚。應不爲。花奴羯鼓。想天上。羣仙老矣。甚比似。人間更愁苦。倩畫欄。留住西風。莫教吹入雲去。古溪琴操所音。故云。

會允元 字舜卿。號鷗江。太和人。

月下笛次韻

吹老楊花。浮萍點。一溪春色。閑尋舊迹。認溪頭。浣沙磧。柔條折盡成輕別。向空外。瑤簪一擲。算無情更苦。鶯巢暗葉。啼破幽寂。凝立闌干側。記露飲東園。聯鑣西陌。容銷鬢減。相逢應是難識。東風吹得愁如海。謾點染。空堦自碧。獨歸晚。解說心中事。月下短笛。

謁金門

山銜日。淚灑西風獨立。一葉扁舟流水急。轉頭無處覓。去則而今已去。憶則如何不憶。明日到家應記得。寄書回鴈翼。

點絳脣

一夜東風。枕邊吹散愁多少。數聲啼鳥。夢轉紗窗曉。來是春初。去是春將老。長亭道。一般芳草。只有歸時好。

水龍吟春夢

日高深院無人。楊花撲帳春雲暖。回文未就。停鍼不語。繡牀倚遍。翠被籠香。綠鬟墮膩。傷春成倦。儘雲山烟水。柔情一縷。又暗逐。金鞍遠。鸞珮相逢甚處。似當年。劉郎仙苑。凭肩後約。畫眉新巧。從來未慣。枕落釵聲。簾開

燕語。風流雲散。甚依稀難記。人間天上。有緣重見。

齊天樂 次趙方谷韻

碧梧枝上占秋信。微聞雨聲還愜。虹影分晴。雲光透晚。殘日依依團箑。闌干一霎。又長笛歸舟。亂鴉荒堞。兩鬢西風。有人心事到紅葉。嬌蓮相對欲語。奈蓮莖有刺。愁不成折。天上歡期。人間巧意。今夜明河如雪。新寬帶結。想寶篆頻溫。翠奩低揭。霧濕雲鬟。淺妝深拜月。

李天驥

字口飛。廬陵人。

摸魚兒 燈花

又何須。向明還滅。寒花點綴孤影。玉龍度海吹魚浪。烟淡寶釵橫鬢。斜又整。是蟲滴。驪珠兩兩相交頸。夜長人靜。恁玉果低拋。金錢暗卜。此意有誰領。歡娛事。料想憑伊先應。怕綃新淚猶凝。銀篋未忍輕挑去。只恐暗風吹燼。重記省。怕莫是。明朝有箇青鸞信。怎知無定。算只解窺人。人孤影隻。成瘦又成病。

劉應幾

號定叟。安成人。

憶舊遊 聞鴈

記銅駝載酒。翠陌吹簫。會聽相呼。不盡離離意。攬柔腸如剪。立馬踟躕。人生似此蒼鬢。堪得幾聲疎。想怨入秋深。愁隨天遠。滿目平蕪。音書未會寄。正人在燕臺。忘却回車。奈菰蒲舊地。山空木落。霜老泉枯。月明仙掌何處。轉首失棲烏。待說與雲間。瀟湘近日風捲湖。

周孚先 號梅心。西昌人。

木蘭花慢

訪梅江路遠。喜春在。劍川湄。正鴈磧雲深。魚村笛晚。茸帽斜欹。舊遊不堪回首。更文園多病。減腰圍。惟有秋娘聲價。風流仍似前時。依稀壁粉舊會題。烟草半淒迷。歎單父臺荒。黃公壚寂。難覓佳期。誰家歌樓催雪。遣夜來風雨緊些兒。醉後唾壺敲缺。龍光搖動晴漪。

蝶戀花

舟艤津亭何處樹。曉起瓏璵。回首迷烟樹。江上離人來又去。飄零只似風前絮。倦倚蓬牕誰共語。野草閑花。一一傷離緒。明日重來須記取。綠楊門巷深深處。

尹濟翁 字潤民。吉州人。

一萼紅 和玉霄感舊

玉搔頭。是何人敲折。應爲節奏謳。斐几朱絃。剪燈雪藕。幾回數盡更籌。草草又一番春夢。夢覺了。風雨楚江秋。却恨閑身。不如鴻鴈。飛過妝樓。又是水枯山瘦。歎迴腸難貯。萬斛新愁。懶復能歌。那堪對酒。物華冉冉都休。江上柳。千絲萬縷。惱亂人。更忍凝眸。猶怕月來弄影。莫上簾鉤。

王從叔 號山樵。廬陵人。

秋蕊香 用清真韻

薄薄羅衣乍暖。紅入酒痕潮面。絮花舞倦帶嬌眼。晚夜平堤水淺。故人

信斷風箏線。誤歸燕。夢魂不怕山路遠。無奈碁聲隔院。

蕭漢傑 號陰所。吉水人。

賣花聲 春雨

濕逗晚香殘。春淺春寒。灑牕填戶著幽欄。慘慘悽悽仍滴滴。做出多般。和霰撒珠盤。枕上更闌。芭蕉怨曲帶愁彈。綠遍堦前苔一片。曉起誰看。

彭泰翁 字會心。安福人。

拜星月慢 祠壁宮姬控絃可念

霧滑觚稜。塵侵團扇。恨滿哀彈倦理。控雨籠雲。共閑情孤倚。斂蛾黛。怕似流鶯歷歷。惹得玉銷瓊碎。可惜闌干。但苔花沉穗。算天音。不入人間耳。何人謾裏損青衫淚。不是舊譜都忘。厭新腔嬌脆。多生不得丹青意。重來又花鎖重門閉。到夜永。笙鶴歸時。月明天似水。

趙功可 號晚山。廬陵人。

曲游春

千樹籠芳草。正蒲風微過。梅雨新霽。客裏幽窗。算無春可到。和愁都閉。萬種人生計。應不似。午天閑睡。起來時。踏碎松陰。蕭蕭欲動疑水。借問歸舟歸未。望柳色烟光。何處明媚。抖擻人間。除離情別恨。乾坤餘幾。一笑晴鳧起。酒醒後。闌干獨倚。時見雙燕飛來。斜陽滿地。

戴山隱

滿江紅 聞笛

醉倚江樓。長空外。行雲遙駐。甚淒涼。孤吹。含商引羽。薄夜冷侵沙浦。鴈老龍吟。徹寒潭雨。鷺涼颿。一陣捲潮來。驚飛去。重欲聽。知何處。誰爲我。胡牀據。謾尋尋。覓覓。凝情如許。舊日山陽。猶有恨。向生長往。今誰賦。恐憑欄。人有愛梅心。空愁貯。

姜个翁

霓裳中序第一 春晚旅寓

園林罷組織。樹樹東風。翠雲滴。草滿地間行迹。聽得聲聲。曉鶯如覓。愁紅半濕。煞恹恹。牆根堪惜。可念我。飄零如此。一地送岑寂。龜石。當年第一。也似老。人間風日。餘葩選甚顏色。羞煞江南。斷腸詞筆。留春渾未得。翻此三入。啼鵲夜泣。清江晚。綠楊歸思。隔岸數峯出。

卷二十一 九 元詞五十一首

虞

集

字伯生。號邵菴。宋相允文五世孫。家崇仁。以薦授大都路儒學教授。累官翰林直學士。兼國子祭酒。天曆中。除奎章閣侍書學士。卒贈江西行省中書省參知政事。封仁壽郡公。諡文靖。有道

國集。

蘇武慢 和馮尊師

放棹滄浪。落霞殘照。聊倚岸迴山轉。乘鴈雙鳧。斷蘆漂葦。身在畫圖秋晚。雨送灘聲。風搖燭影。深夜尙披吟卷。算離情何必。天涯咫尺。路遙人遠。空自笑。洛下書生。襄陽耆舊。夢底幾時會見。老矣浮丘。賦詩明月。千仞碧

天長劍。雪霽瓊樓。春生瑤席。容我故山高宴。待雞鳴日出。羅浮飛度。海波清淺。

又

憶昔東坡。夜游赤壁。孤鶴掠舟西過。英雄消盡。身世茫然。月小水寒星大。何似漁翁。不知今古。醉傍蓼花。夢相逢。羽服。翩翩未必。此時非我。誰解道。歲晚江空。風帆目力。橫槩賦詩江左。清露衣裳。晚風洲渚。多少短歌長些。玉宇高寒。故人何處。渺渺予懷無那。歎乘桴浮海。飄然未知誰可。

風入松寄柯敬仲

畫堂紅袖倚清酣。華髮不勝簪。幾回晚直金鑾殿。東風軟。花裏停驂。書詔許傳宮燭。輕羅初試朝衫。御溝冰泮水。撥藍。飛燕語呢喃。重重簾幕寒猶在。憑誰寄。銀字泥槭。報道先生歸也。杏花春雨江南。

鮮于樞

字伯機。漁陽人。官至太常典簿。有困學齋集。

念奴嬌八詠樓

長溪西注。似延平雙劍。千年初合。溪上千峯明紫翠。放出羣龍頭角。瀟灑雲林。微茫烟草。極目春洲闊。城高樓迥。恍然身在寥廓。我來陰雨兼旬。灘聲怒起。日日東風惡。須待青天明月夜。一試巖維佳作。風景不殊。溪山信美。處處堪行樂。休文何事。年年多病如削。

宋

裴

字顯夫。宛平人。泰定中進士。累官翰林直學士。贈國子祭酒。輕車都尉。范陽郡侯。諡文清。所著

有燕石集詞一卷。

浣溪沙 崑山州城西小寺

落日吳江駐畫橈。招提佳處暫逍遙。海風吹面酒全消。曲沼芙蓉秋
的。小山叢桂晚蕭蕭。幾時容我夜吹簫。顯夫聽雨賀新涼詞。夢斷羅裙天如漆。一寸鄉心
淒楚。點點是寂寥情緒。明日孤舟成獨往。更難堪長夜瀟湘浦。亦有佳致。惜全首不稱也。

劉 詵

號桂翁。廬陵人。諡文敏。有桂隱集附詞。

謁金門

春睡倦。自揀花枝行遍。昨日新紅今日變。細揆將袖染。翠扇迎風撲面。
飛去晴絲還轉。簾外楊花簾裏燕。相逢如未見。

曹伯啓

字士開。陽山人。被薦拜西臺御史。歷集賢學士。引年歸。天曆中。召為淮東廉訪使。陝西諸道行
御史臺中丞。不起。贈行中書左丞。上護軍。進封魯郡公。諡文貞。有漢泉漫稿詞一卷。

南鄉子 四川道中作

蜀道古來難。數日驅馳興已闌。石棧天梯三百尺。危欄。應被傍人畫裏看。
雨握不會乾。俯瞰飛流過石灘。到晚纔知身是我。平安。孤館青燈夜更
寒。

許有壬

字可用。湯陰人。延祐二年進士。累官集賢大學士。改樞密副使。拜中書左丞。卒。諡文忠。有圭塘
小稿詞一卷。

摸魚子和明初韻

買陂塘。旋栽楊柳。歸來此是先務。他鄉故里都休較。舊雨不如今雨。鴻在
渚。笑爾尙南飛。吾已安孤嶼。黃花解語。道人老宜秋。身安耐酒。此正有真

趣。鑿坡路。大手深慚燕許。超騰又悖鍾呂。但求閑澹如元亮。不恨詩無奇句。傾綠醕。底須按。樂天池上霓裳譜。休論往古。有三日重陽。約君同醉。老子築西圃。

太常引池荷

幽人早起赴池亭。初日照娉婷。風葢露珠傾。又勝似前時雨聲。水沉香裏。錦雲深處。雙檜插天青。一葉釣舟輕。似野渡無人自橫。

又

四隄楊柳接松筠。香破水芝新。羅襪不生塵。笑畫裏凌波未真。紅衣縹緲。清風蕭瑟。半醉岸烏巾。不是葛天民。也做得江湖散人。

沁園春臨清舟中次韓伯高見贈韻寄可行

草木無情。不問寒暄。開時便開。只黃花多事。偏憐隱逸。白頭何補。且避賢才。老友相逢。清談絕倒。休校劉郎去後栽。尊中物。勝他年千里。謾寄寒梅。神仙合住蓬萊。奈老去。思兒忍不回。任景莊槐老。誰爲癡夢。杜家酒美。且浣幽懷。渭北江東。暮雲春樹。何日扁舟更此來。公知否。便連朝觴詠。能幾徘徊。

許有孚 字可行。官湖廣儒學副提舉。歷中憲大夫。同僉太常禮儀院事。

摸魚子

買陂塘。旋栽楊柳。不妨三月農務。溪翁走報新痕漲。昨夜西山雷雨。將沒渚。有複徑。雙洲繚繞通孤嶼。黃鸝對語。正春色暄妍。物華明媚。好在浴沂

趣。天涯路。芳草茫茫如許。蠻箋難寫心呂。碧雲冉冉春波綠。都是相思情句。花共醕。似梅與。山礬臭味會同譜。堤陰樹古。要亂絮漫空。柔條蘸水。慎勿折樊圃。

馬熙字明初。

摸魚子

買陂塘。旋栽楊柳。夢中還理家務。十年不到衡山麓。辜負楚雲湘雨。蘋映渚。渺杜若。江蘼香接烟霞嶼。口心相語。為蠅驥東西。雲龍上下。誤却釣游趣。平生志。欲識平輿二許。煌煌岳降申呂。菲詞聊為先生壽。博得月章星句。毋我醕。只小草。幽蘭心醉離騷譜。松存徑古。待游遍西園。荷鋤歸去。吾亦愛吾圃。

太常引和池荷韻

園中風物水中亭。消得雨娉婷。濁酒卷荷傾。早洗盡箏聲笛聲。四隄晴柳。一天花氣。付與晚山青。飛絮挾雲輕。任膝上。瑤琴自橫。

許楨有壬子。有壬與楚人馬熙。及弟有孚倡和。楨與焉。共為主塘款乃集一卷。

摸魚子

買陂塘。旋栽楊柳。求田專理農務。扁舟來往烟波裏。青箬綠蓑風雨。時泛渚。把遠岫。遙岑收拾來孤嶼。霜花笑語。道鳳閣鸞臺。黃塵烏帽。爭似醉鄉趣。洄溪上。道士而今誰許。非熊夢斷姜呂。水聲山色相縈繞。湧出筆端新句。斟桂醕。聽萬籟。笙竽一派仙家譜。休論往古。向種菊籬邊。觀魚軒外。

晚節有秋圃。

太常引

池亭荷淨納涼時。四面柳依稀。棹得酒船回。看風裏紗巾半欹。殘霞照水。夕陽明樹。天付畫中詩。應不負歸期。更誰看桃花面皮。

薩都刺

字天錫。鴈門人。登泰定進士官京口錄事。終河北廉訪司經歷。

滿江紅金陵懷古

六代豪華。春去也。更無消息。空悵望。山川形勝。已非疇昔。王謝堂前雙燕子。烏衣巷口曾相識。聽夜深。寂寞打孤城。春潮急。思往事。愁如織。懷故國。空陳迹。但荒烟衰草。亂鴉斜日。玉樹歌殘秋露冷。胭脂井壞寒蟬泣。到如今。只有蔣山青。秦淮碧。

小闌干

去年人在鳳凰池。銀燭夜彈絲。沉水香消。梨雲夢暖。深院繡簾垂。今年冷落江南夜。心事有誰知。楊柳風柔。海棠月澹。獨自倚欄時。

百字令登石頭城

石頭城上。望天低吳楚。眼空無物。指點六朝形勝地。惟有青山如壁。蔽日旌旗。連雲檣艣。白骨紛如雪。一江南北。消磨多少豪傑。寂寞避暑離宮。東風輦路。芳草年年發。落日無人松徑裏。鬼火高低明滅。歌舞尊前。繁華鏡裏。暗換青青髮。傷心千古。秦淮一片明月。

木蘭花慢彭城懷古

古徐州形勝。消磨盡。幾英雄。想鐵甲重瞳。烏騅汗血。玉帳連空。楚歌八千
兵散。料夢魂。應不到江東。空有黃河如帶。亂山迴合雲龍。漢家陵闕起
秋風。禾黍滿關中。更戲馬臺荒。畫眉人遠。燕子樓空。人生百年寄耳。且開
懷。一飲盡千鍾。回首荒城斜日。倚欄目送飛鴻。

張

翥

字仲舉。晉寧人。至正初。以薦爲國子助教。累官河南行省平章政事。兼翰林學士。有蛻巖樂府
二卷。

瑞龍吟 癸丑歲冬訪游弘道樂安山中席賓米仁則用清真詞韻賦別和以見情

鰲溪路。瀟灑翠壁丹崖。古藤高樹。林間猿鳥欣然。故人隱在。溪山勝處。
久延竚。渾似種桃源裏。白雲窗戶。燈前素瑟清樽。開懷正好。連牀夜語。
應是山靈留客。雪飛風起。長松掀舞。誰道倦途相逢。傾蓋如故。陽春一曲。
總是關心句。何妨共。磯頭把釣。梅邊徐步。只恐匆匆去。故園夢裏。長牽別
緒。寂寞閑鍼縷。還念我。飄零江湖烟雨。斷腸歲晚。客衣誰絮。

多麗 西湖汎舟夕歸施成大席上以晚山青爲起句各賦一詞

晚山青。一川雲樹冥冥。正參差。烟凝紫翠。斜陽畫出南屏。館娃歸。吳臺遊
鹿。銅仙去。漢苑飛螢。懷古情多。憑高望極。且將尊酒慰飄零。自湖上。愛梅
仙遠。鶴夢幾時醒。空留得。六橋疎柳。孤嶼危亭。待蘇堤。歌聲散盡。更須
攜妓西泠。藕花深。雨涼翡翠。菰蒲軟。風弄蜻蜓。澄碧生秋。鬧紅駐景。採菱
新唱最堪聽。一片水天無際。漁火兩三星。多情月。爲人留照。未過前汀。

摸魚兒 送黃任伯歸豐城時任伯放其妾還家故及

正匆匆。楚鄉秋晚。孤鴻飛過南浦。同來桃葉。堪惆悵。一舸載春先去。愁絕處。問那曲闌干。會聽人低語。今宵最苦。向楓樹溪橋。蘆花野館。翦燭臥聽雨。吳霜鬢。破帽西風怎護。絲絲多是離緒。舊情頓冷。新愁重。總付墜鞭詞譜。君記取。待雪夜相思。乘興柴岡路。唱予和汝。要款段隨車。輕盈喚酒。重爲國香賦。

又春日西湖泛舟

漲西湖。半篙新雨。麴塵波外風軟。蘭舟同上。鴛鴦浦。天氣嫩寒輕暖。簾半捲。度一縷。歌雲不礙桃花扇。鶯嬌燕婉。任狂客無腸。王孫有恨。莫放酒杯淺。垂楊岸。何處紅亭翠館。如今遊興全懶。山容水態依然好。惟有綺羅雲散。君不見。歌舞地。青蕪滿目成秋苑。斜陽又晚。正落絮飛花。將春欲去。目送水天遠。

又黃季景湖亭蓮花中雙頭一枝邀予同賞而爲人折去季景惘然請賦

問西湖。舊家兒女。香魂還又連理。多情欲賦。雙蕖怨。閑却滿奩秋意。嬌旖旎。愛照影。紅妝一樣新梳洗。王孫正擬。喚翠袖輕歌。玉箏低按。涼夜爲花醉。鴛鴦浦。淒斷凌波夢裏。空憐心苦。絲脆。吳娃小艇應偷採。一道綠萍猶碎。君試記。還怕是。西風吹作行雲起。闌干謾倚。待載酒重來。尋芳已晚。餘恨渺烟水。

又題熊伯宣藏梅花卷子

記西湖。水邊曾見。查牙老樹如此。冰痕冷沁。苔枝雪。的歷數花纔試。天也

似。愛玉質。清高不入閑紅紫。孤山處士。謾賦得招魂。烟荒水暗。寂寞抱香死。春風筆。休憶深宮舊事。添人多恨。多思。黑池雪嶺。三生夢。喚起縞衣仙子。仍獨自。伴瘦影。黃昏和月窺窗紙。聲聲字字。寫不盡江南。閑愁萬斛。訴與綠衣使。

又元夕吳門姚子章席上同柯敬仲賦敬仲以虞學士書風入松于羅帕作軸故末句及之楚芳吳蘭

一妓名

記蘭臺。舊時風景。西樓燈火如畫。嚴城月色依然好。無復綺羅遊冶。歡意謝。向客裏。相逢還有思陶寫。金樽翠尊。把錦字新聲。紅牙小拍。分付倦司馬。繁華夢。喚起燕嬌鶯姘。肯教孤負元夜。楚芳玉潤吳蘭媚。一曲夕陽西下。沉醉罷。君試問。人生誰是無情者。先生歸也。但留意江南。杏花春雨。和淚在羅帕。

疎影王元章墨梅圖

山陰賦客。怪幾番睡起。窗影生白。縹緲仙姝。飛下瑤臺。淡埽東風顏色。微霜却護。朦朧月。更漠漠。暝烟低隔。恨翠禽啼處。驚殘一夜。夢雲無迹。惟。有龍煤解染。數枝入畫裏。如印溪碧。老樹枯苔。玉暈冰圍。滿幅寒香狼藉。墨池雪嶺。春長好。悄不管。小樓橫笛。怕有人。誤認寒花。欲點曉來妝額。

解連環留別臨川諸友

夜來風色。歎青燈素被。早寒欺客。想寂寞。人在簾櫳。望塞鴈欲來。又催刀尺。秋滿關河。更誰倚。夕陽橫笛。記題花賦月。此地與君。幾度遊歷。江頭

楚楓漸赤。對愁樽飲淚。難問消息。趁一舸。千里東歸。渺天未亂山。水邊孤驛。晚晚年華。悵回首。雨南雲北。算今古。此情此恨。甚時盡得。

綺羅香 用中舟次滬上

燕子梁深。秋千院冷。半濕垂楊烟縷。怯試春衫。長恨踏青期阻。梅子後。餘潤留寒。藕花外。嫩涼銷暑。漸驚他。秋老梧桐。蕭蕭金井斷蛩暮。薰篝須待被暖。催雪新詞未穩。重尋笙譜。水閣雲窗。總是慣會經處。會信有。客裏關河。又怎禁。夜深風雨。一聲聲。滴在疎篷。做成情味苦。

喜遷鶯 瓊花

東風吹盡。但一片綠陰。空留春恨。后土祠荒。飛瓊謫久。還喜玉容堪認。二十四橋夜月。二十四番花信。便載酒。怕芳菲易老。陰晴難穩。嬌困羞起晚。竚立畫欄。淨洗閑脂粉。沉水濃薰。蜂黃淡染。自有絕塵香韻。也知世間無對。肯許浮花相近。鳳簫遠。待數枝折與。玉峯人問。

水龍吟 廣陵送客次鄭蘭玉賦蓼花韻

芙蓉老去妝殘。露華滴盡珠盤淚。水天瀟灑。秋容冷淡。憑誰點綴。瘦葦黃邊。疎蘋白外。滿汀烟穗。把餘妍分與。西風染就。猶堪愛。紅芳媚。幾度臨流送遠。向花前。偏驚客意。船窗雨後。數枝低入。香零粉碎。不見當年。秦淮花月。竹西歌吹。但此時此處。叢叢滿眼。伴離人醉。

又 蠟梅

玉人梳貌堪憐。曉妝一洗鉛華盡。此花應是。菊分顏色。梅分風韻。萼點駝

酥。口攢金磬。心凝檀粉。甚女貞染就。仙衣絕勝。蜂兒重。鵝兒嫩。說與玉龍莫品。怕宮波一般流恨。故人堪寄。折枝代取。江南春信。沉水全薰。藥絲密綴。額黃深暈。乍燕姬未識。是花是蠟。笑俚人問。

摘紅英

鶯聲寂。鳩聲急。柳烟一片梨雲濕。驚人困。教人恨。待到平明。海棠應盡。青無力。紅無跡。殘香賸粉那禁得。天難準。晴難穩。晚風又起。倚欄爭忍。

齊天樂臨川夜飲滄陽李輔之寓所

紅霜一樹淒涼葉。驚烏夜深啼落。客裏相逢。尊前細數。幾度雨飄風泊。微吟緩酌。漸月影斜欹。畫欄東角。只怕梅花。無人看管瘦如削。江湖容易歲晚。想多情念我。歸信會約。塵土狂蹤。山林舊隱。夢寄草堂猿鶴。離懷最惡。是酒醒香殘。燭寒花薄。一段銷凝。覺來無處著。

木蘭花慢次韻陳見心文學孤山問梅

愛西湖千樹。會幾度。爲攜樽。向柳外停橈。苔邊待鶴。酒熱詩溫。瀛洲舊時月色。悵荒涼。惟有數枝存。天上梨花成夢。江南桃葉移根。如今憔悴客愁村。難返暗香魂。甚歲晚春遲。角寒笛曉。雪暗雲昏。登臨不堪寄目。但青山隱隱。月紛紛。再約與君同醉。從他啄木敲門。

真琛簾壽韓伯清提舉時在平江

銀蟾半露嬋娟影。西風早。次第中秋天氣。涼透小簾櫳。乍夜長遲睡。見說靈巖山色好。甚也不濃。如歸意歸未。趁西泠載酒。南園尋桂。還是客裏

生朝。把金尊綠酒。與誰同醉。烟雨隔垂虹。望美人秋水。桃葉妝樓團扇曲。但小草。鸞箋相寄。傳示。送白蘋一翦。碧雲千里。

東風第一枝憶梅

老樹渾苔。橫枝未葉。青春肯誤芳約。背陰未返冰魂。陽稍已含紅萼。佳人寒怯。誰驚起。曉來梳掠。是月斜。花外么禽。霜冷竹間幽鶴。雲淡淡。粉痕漸薄。風細細。凍香又落。叩門喜伴金樽。倚欄怕聽畫角。依稀夢裏。記半面。淺窺朱箔。甚時得。重寫鸞箋。去訪舊遊東閣。

陌上花使歸闕所歲暮有懷

關山夢裏。歸來還又。歲華催晚。馬影雞聲。諳盡倦郵荒館。綠箋密記多情事。一看一回腸斷。待殷勤寄與。舊遊鶯燕。水流雲散。滿羅衫。是酒香痕凝處。唾碧啼紅相半。只恐梅花。瘦倚夜寒誰暖。不成便沒相逢日。重整釵鸞箠。鴈。但何郎。縱有春風詞筆。病懷渾懶。

定風波商角調 西江客舍酒後聞梅花吹香滿窗醒而賦此

恨行雲。特地高寒。牢籠好夢不定。晚晚年華。淒涼客况。泥洒渾成病。畫欄深。碧窗靜。一樹瑤花可憐影。低映。怕明月照見。青禽相並。素衾正冷。又寒香。枕上薰愁醒。甚銀牀霜凍。山童未起。誰汲牆陰井。玉笙殘。錦書迥。應是多情道薄倖。爭肯。等閑孤負。西湖春興。

八聲甘州扶日西湖泛舟午後遇雨

向芙蓉。湖上駐蘭舟。淒涼勝遊稀。但西泠橋外。北山堤畔。殘柳依依。追憶

鶯花舊夢。回首冷烟霏。惟有盟鷗好。時傍人飛。聽取紅顏象板。儘歌回彩扇。舞換仙衣。正白蘋風急。吹雨暗斜暉。空惆悵。離懷未展。更酒邊。忍又送將歸。江南客。此生心事。只在漁磯。

滿江紅 錢舜舉桃花折枝

前度劉郎。重來訪。玄都燕麥。回首地。暗香銷盡。暮雲低碧。啼鳥猶知人悵望。東風不管花狼藉。又淒淒。紅雨夕陽中。空相憶。繁華夢。渾無迹。丹青筆。還留得。恍一枝長見。故園春色。塵世事多吾欲避。武陵路遠誰能覓。但有山。可隱便須歸。栽桃客。

風入松 廣陵元夜病中有感

東風巷陌暮寒驕。燈火鬧河橋。勝游憶徧錢唐夜。青鸞遠。信斷難招。蕙草情隨雪盡。梨花夢與雲銷。客懷先自病無聊。綠酒負金蕉。下帷獨擁香篝睡。春城外。玉漏聲遙。可惜滿街明月。更無人爲吹簫。

踏莎行 江上送客

芳草平沙。斜陽遠樹。無情桃葉江頭渡。醉來扶上木蘭舟。將愁不去。將人去。薄劣東風。天斜落絮。明朝重覓吹笙路。碧雲紅雨小樓空。春光已到。銷魂處。

露華 玉簪

瀛洲種玉。總付與花神。月底深斲。琢就瑤笄。光映鬢雲斜亸。幾度借取搔頭。別試漢宮妝束。風露冷。幽香半襟。淡埭欄曲。亭亭雪艷愁獨。愛粉心

冰簟。鬢撚金粟。石上那回磨斷。爭忍輕觸。一自楚客歸來。珠履舊遊誰續。秋夢起。殘妝半簪墜綠。

謁金門 寒食臨川平塘道中

溪水漫。岸口小橋衝斷。沽酒人家門巷短。柳陰旗一半。細雨鳴鳩相喚。曲港落花流滿。兩兩睡紅鸚鵡暖。惱人春不管。

唐多令

花下鈿篋篋。尊前白雪謳。記懷中朱李會投。鏡約釵盟心已許。詩寫在小紅樓。忍淚上雲兜。斷魂隨綵舟。等閑間惹得離愁。欲寄長河魚信去。流不到。白蘋洲。

袁

易

字通用。吳郡人。有靜春詞一卷。

臺城路和師言送春

落紅填徑東風惡。貪飛燕雛歸晚。聽雨樓低。留春地窄。誰念閑情消滅。天涯流覽。正鷗渚波寬。柳汀雲黯。賴有遙峯。數尖遮斷送愁眼。年年春草又綠。看花人自老。遺恨天遠。鴈柱凝塵。鮫綃暗墨。青鬢吳霜輕點。風流漸懶。但詩惱東陽。病添中散。院落無人。繡簾和絮捲。

燭影搖紅

日日春陰。瑞香亭畔寒成陣。鳳鞞頻誤踏青期。寂寞牆陰冷。翠被堆牀未整。睡初酣。風篁喚醒。幾多心緒。鵲語難憑。燈花無準。得酒澆愁。舊愁不去添新病。吳綾題滿斷腸詞。歌罷何人聽。寶篆香消晝永。裊餘烟。蕭蕭鬢

影出門長嘯。白鷺雙飛。清江千頃。

沈禧 字廷錫。吳興人。有竹窗詞一卷。

踏莎行

雜組香絨。錯綜紋理。倚牀脈脈如春醉。沉吟暗想玉京人。雕鞍何處鳴珂里。無限離愁。誰知就裏。滔滔比似西江水。無情日夜向東流。一絨好寄相思淚。

洪希文 字汝執。莆田人。有續軒渠集詞一卷。

浣溪沙

文室蕭條似病禪。打窗風雨罷吟箋。歸心一點落燈前。猶有十三樓上酒。可無三百杖頭錢。一年心老一年年。

楊立齋

鷓鴣天 聽楊玉娥唱故人所撰曲有感

烟柳風花錦簇筵。霜芽露葉玉裝船。誰知皓齒纖腰會。只在輕衫短帽邊。啼粉靨。咽冰絃。舊遊一去更無傳。詞人彩筆佳人口。再喚春風到眼前。

卷三十一 元詞五十八首

張埜 字埜夫。邯鄲人。有古山樂府二卷。

水龍吟 游絲

落花天氣初晴。隨風幾縷來何處。飄飄冉冉。悠悠颺颺。欲留還去。雪繭新

抽。青蟲暗墜。簷蛛輕度。看垂虹百尺。縈迴不下。似欲繫春光住。憑仗何人收取。付天孫。雲綃機杼。浮踪浪跡。忍教長伴。章臺飛絮。惹起閑愁。織成離恨。萬端千緒。望天涯盡日。柔情不斷。又閉庭暮。

又皇慶癸丑重九登南高峯寄柳湯佐同知

重陽何處登臨。玉驄慣識南山路。秋空絕頂。白雲雙屨。浙浦寒潮。蘇堤畫舸。吳宮烟樹。不一尊瓊露。數聲金縷。將此景。成虛負。試覓舊題詩句。早爛斑。雨苔無數。瓊泉寶瑟。不堪重記。泛觴流羽。笑撚黃花。閑尋紅葉。故人何處。倚危欄北望。燕雲掩靄。又征鴻暮。

石州慢

紅雨西園。香雪東風。還又春暮。當時雙漿悠悠。送客綠波南浦。陽關一闋。至今隱隱餘音。眼前渾是分攜處。此恨有誰知。倚欄無語。凝竚。天涯幾許。離情化作。暮雲千縷。過盡征鴻。依舊歸期無據。京塵染袂。故人應念飄零。豈知翻被功名誤。無處著羈愁。滿春城烟雨。

念奴嬌賦白蓮用仲殊韻

水風清暑。記平湖十里。寒生紈素。羅襪塵輕雲冉冉。髣髴凌波仙女。雪艷明秋。瓊肌沁露。香滿西陵浦。蘭舟一葉。月明會到深處。誰念玉珮飄零。翠房淒澹。幾度相思苦。異地相看渾是夢。忍把荷觴深注。碧藕多絲。霜莖有刺。脈脈愁烟雨。江雲撩亂。倚欄終日凝竚。

奪錦標七夕

涼月橫舟。銀潢浸練。萬里秋容如拭。冉冉鸞驂鶴馭。橋倚高寒。鵲飛空碧。問歡情幾許。早收拾。新愁重織。恨人間。會少離多。萬古千秋今夕。誰念文園病客。夜色沉沉。獨抱一天岑寂。忍記穿鍼亭榭。金鴨香寒。玉徽塵積。凭新涼半枕。又依稀。行雲消息。聽窗前。淚雨浪浪。夢裏簷聲猶滴。

吳鎮 字仲圭。嘉興人。

漁父詞題摩溪沈彥實處士畫冊

紅葉村西日影餘。黃蘆灘畔月痕初。輕撥棹。且歸與。挂起漁竿不釣魚。

倪瓚 字元鎮。無錫人。有清閼閣遺稿詞一卷。

人月圓

傷心莫問前朝事。重上越王臺。鷓鴣啼處。東風草綠。殘照花開。悵然孤嘯。青山故國。喬木蒼苔。當時明月。依依素影。何處飛來。

又

驚迴一枕當年夢。漁唱起南津。畫屏雲嶂。池塘春草。無限銷魂。舊家應在。梧桐覆井。楊柳藏門。閑身空老。孤篷聽雨。燈火江村。

柳梢青贈伎小孺英

樓上玉笙吹徹。白露冷飛瑤珮。黛淺含顰。香殘栖夢。子規啼月。揚州往事荒涼。有多少。愁縈思結。燕語空津。鷗盟寒渚。畫欄飄雪。

江城子感舊

窗前翠影濕芭蕉。雨瀟瀟。思無聊。夢入鄉園。山水碧迢迢。依舊當年行樂

地香徑杳。綠苔饒。沉香火底坐吹簫。憶嬌嬈。想風標。同步芙蓉。花畔赤欄橋。漁唱一聲驚夢斷。無處覓。不堪招。

小桃紅

一江秋水淡寒烟。水影明如練。眼底離愁。數行鴈雪晴天。綠蘋紅蓼參差見。吳歌蕩漿。一聲哀怨。驚起白鷗眠。

顧德輝

一名阿瑛。字仲瑛。崑山人。舉茂才。署會稽教諭。力辭不就。後以子恩封武略將軍。錢塘縣男。晚稱金粟道人。有玉山草堂集。

蝶戀花 陳浩然招游觀音山宴張氏樓徐姬楚蘭佐酒以琵琶度曲鄰雲臺爲之心醉口占

春江暖漲桃花水。畫舫珠簾。載酒東風裏。四面青山青似洗。白雲不斷山中起。過眼韶華渾有幾。玉手佳人。笑把琵琶理。枉殺雲臺標外史。斷腸只合江州死。

青玉案

春寒恻恻春陰薄。整半月春蕭索。晴日朝來升屋角。樹頭幽鳥。對調新語。語罷雙飛却。紅入花腮青入萼。盡不爽花期約。可恨狂風空自惡。曉來一陣。晚來一陣。難道都吹落。

清平樂 和石民瞻題桐花道人卷

鳳簫聲度。十二瑤臺暮。開遍瓊花千萬樹。纔入謝家詩句。仙人酌我流霞。夢中知在誰家。酒醒休扶上馬。爲君一洗琵琶。

陶宗儀

字九成。台州人。流寓松江。有南村集。

念奴嬌九日有感次韻

黃花白髮。又匆匆佳節。感今懷昔。雨覆雲翻無限態。故國寒烟榛棘。杜老漂零。沈郎瘦損。此意天應識。劃然長嘯。不知身是孤客。呼酒謾撥清愁。玉奴頻勸。兩臉添春色。眼底生平空四海。倦拂紅塵風幘。戲馬臺荒。登龍人老。往事休追惜。山林無恙也。須容我高屐。

南浦

如此好溪山。羨雲屏。九疊波影涵素。暖翠隔紅塵。空明裏著我扁舟容與。高歌鼓枻。鷗邊長是尋盟去。頭白江南看不了。何況幾番風雨。畫圖依約天開。蕩清暉。別有越中真趣。孤嘯拓篷窗。幽情遠都在酒瓢茶具。水萍搖晚。月明一笛潮生浦。欲問漁郎無恙否。回首武陵何許。

汪斌 字以質。績溪人。有雲坡集。

蝶戀花送春

芳草天涯猶未歇。暗綠稀紅。柳絮纒飄雪。有意送春還惜別。杜鵑爭奈催歸切。繡閣無人簾半揭。苦憶邊城。十載音書絕。惟有東風無異說。年年來趁梅花月。

邵亨貞 字復孺。號清溪。華亭人。有蛾術詞選四卷。

浣溪沙

西子湖頭三月天。半篙新漲柳如烟。十年不上斷橋船。百媚燕姬紅錦瑟。五花宛馬紫絲鞭。年年春色暗相牽。

後庭花

銅壺更漏殘。紅妝春夢闌。江上花無語。天涯人未還。倚樓閑。月明千里。隔江何處山。

又

刺船鸚鵡洲。題詩黃鶴樓。金谷銅駝夢。湘雲楚水愁。少年遊。好懷依舊。故人還在不。

凭欄人題曹雲西贈伎小畫

誰寫江南一段秋。妝點錢塘蘇小樓。樓中多少愁。楚山無盡頭。

掃花遊春晚次南金韻

柳花巷陌。悄不見銅駝。采香芳侶。畫樓在否。幾東風怨笛。凭欄日暮。一片閑情。尙繞斜陽錦樹。黯無語。記花外馬嘶。曾送人去。風景長暗度。奈好夢微茫。豔懷清苦。後期已誤。翦燭花未卜。故人來處。水驛相逢。待說當年恨賦。寄愁與鳳城東。舊時行旅。

祝英臺近和雲西老人秋懷韻

普天雲。深夜雨。幽興到何許。風拍疎簾。燈影逗窗戶。自從暝宿河橋。露聽江笛。久不記。舊遊湘楚。正無緒。可奈滿目清商。蕭蕭五陵樹。斜掩屏山。腸斷庾郎賦。幾回思繞蘋花。夢尋蘭棹。怕驚起。故溪鷗鷺。

沁園春美人眉

巧鬪鸞環。纖凝嫵媚。明妝未收。似江亭曉望。遙山拂翠。宮簾暮捲。新月橫

鈎。掃黛嫌濃。塗鉛訝淺。能畫張郎不自由。傷春倦。爲皺多無力。翻做嬌羞。填來不滿橫秋。料著得人間多少秋。記魚箋緘啓。背人偷斂。鴈鈿交併。運指輕柔。有喜先占。長顰難效。柳葉輕黃。今在不。雙尖鎖。試臨鸞一展。依舊風流。

又目

漆點填眶。鳳梢侵鬢。天然俊生。記隔花瞥見。疎星炯炯。倚欄凝注。止水盈盈。端正窺簾。曹騰竝枕。睥睨檀郎長是青。端相久。待嫣然一笑。密意將成。困酣曾被鶯驚。強臨鏡。揆抄猶未醒。憶帳中親見。似嫌羅密。尊前相顧。翻怕燈明。醉後看承。歌闌鬪弄。幾度孜孜頻送情。難忘處。是鮫綃搵透。別淚雙零。

蘭陵王歲晚憶王彥強作

暮天碧。長是登臨望極。松江上。雲冷鴈稀。立盡斜陽耿相憶。凭欄起歎息。人隔吳王故國。年華晚。烟水正深。難折梅花寄寒驛。東風舊遊歷。記草暗書簾。苔滿吟屐。無情征旆催離席。嗟月墮寒影。夜移清漏。依稀曾向夢裏識。恍疑見顏色。空惜鬢毛白。恨莫趁金鞍。猶誤塵跡。何時弭棹蘇臺側。共漉酒紗帽。放歌瑤瑟。來時雙燕定到否。舊巷陌。

摸魚子吳門九日次魏彥文韻

鴈來時。晚寒初勁。青燈搖動窗戶。商聲暗起。鄰牆樹。觸景亂愁還聚。秋又暮。奈台造。淒涼無處無笳鼓。狂吟醉舞。記滿帽簪花。分籌藉草。騎馬忘歸。

路。懷人遠。有恨憑誰寄語。虛名長是相誤。天涯節序渾非舊。留得滿城風雨。心萬縷。謾自喜。孤高不惹沾泥絮。羈懷倦訴。好分付兒曹。耘鉏三徑。早晚賦歸去。

又乙巳口山九日

記年時。滿城風雨。姑蘇臺下重九。客樓已辦登臨屐。曾爲好山回首。延佇久。望翠壁。嶙峋閑却題詩手。相逢野叟。強笑折黃花。亂簪烏帽。來與共尊酒。流光去。肯爲閑人宿留。驚心節序依舊。西風只管吹蓬鬢。病骨尙堪馳驟。官渡口。便擬喚。扁舟往問江潭柳。明年健否。縱世故無情。未應遲暮。姑負此時候。

齊天樂 甲戌清明雨中

離歌一曲江南暮。依稀灞橋回首。立馬東風。送人南浦。認得當年楊柳。梨花過後。悄不見鄰牆。弄梅纖手。綺陌東頭。箇人還似舊時否。相如近來病久。縱腰圍暗減。猶未全瘦。宿酒昏燈。重門夜雨。寒食清明依舊。新愁謾有。第一是傷心。粉銷紅溜。待約明朝。問舟官渡口。

沈景高 烏程人。

沁園春 和劉龍洲指甲

新脫魚鱗。平分鵝管。愛勒眉彎。記搯恨香蕉。愁悰細說。劃情嫩竹。怨曲新翻。纔貼梅鈿。旋挑鉛粉。繡領重交猶道寒。嬌無奈。笑輕拈杏帶。淺揭湘斑。宮棋也學偷彈。時縮就。同心羞自看。解傳杯頻賭。藏鬪羅袖。歸鞭重數。

刻印闌干。暗解綃囊。倦調瑤瑟。銀蕊鶯兒。繡閣間。凝情處。把瓜犀謾剝。消遣春閑。俞焯云。景高舊家子也。余見此詞。纖麗可愛。因定交焉。

羅 慶

水調歌頭遊武夷

雨晴山潑翠。溪淨水拖藍。閑來共陪杖屨。邂逅已成三。齒齒清泉白石。步步碧桃翠竹。是處輒幽探。行到釣臺下。怪樹蔭空潭。踏芳洲。尋別館。履巉巖。壺天日月長在。雲氣滿東南。沽得一尊濁酒。喚取山花谿鳥。聽我醉中談。異日再過此。端為解征驂。

唐桂芳

字仲寔。新安人。以薦授建寧路崇安縣教諭。遷南雄路儒學正。學者稱白雲先生。所著有武夷稿。

水調歌頭前題次和

武夷最佳處。晴氣碧於藍。遠瞻崖壑溪曲。六六與三三。莫問塵生滄海。休歎鶴歸華表。好景且容探。鐵笛破龍睡。黑雨滿深潭。笑神仙。留蛻骨。閱空巖。幾人蹭蹬不遇。太史滯周南。最好擅場老子。筆底文章如許。何必事清談。暫憩桃花下。白馬稅飛驂。

凌雲翰

字彥翀。錢唐人。至正己亥登鄉試榜。授紹興路蘭亭書院山長。不赴。退居吳興梅林村。號避俗翁。有柘軒集詞一卷。

蝶戀花

過雨春波浮鴨綠。草閣三間。人住清溪曲。舊種小桃多映竹。亂紅遮斷松

邊屋。有客抱琴穿翠麓。隔水呼舟。應是憐幽獨。歷歷武陵如在目。幾時同借仙源宿。

王行 字止仲。長洲人。有半軒集詞一卷。

如夢令題雪景便面

滿眼落花飛絮。回首瓊林玉樹。驢背是何人。得了灞橋詩句。歸去歸去。春到故園深處。

虞美人顧氏隱居

黃花翠竹臨溪處。正是幽人住。不嫌拄杖破蒼苔。便道有時陰雨也須來。隔簾塵土紛紛起。久厭襄陽市。若能招我作西鄰。從此一溪春水兩家分。

又鄒氏隱居

白雲紅樹秋山下。一片江南畫。門前流水帶晴沙。更是繞籬寒菊正開花。如何眼底逢佳處。偏許幽人住。也須來此結茅茨。莫待有人相寄草堂資。

楊樵雲 徐川人。

滿庭芳影

只道空烟。又疑流水。依依却是行雲。了然相對。又是夢紛紛。半面春風圖畫。黃金在。難鑄昭君。溪橋斷。梅花晴雪。端的白三分。真真難喚醒。三年抽藕。織得榴裙。甚徘徊窺鏡。交翼鸞文。一片飛花來去。并刀快。剪取晴紋。

無情處。分明著眼。強半滯春醺。

水龍吟夢

多情不在分明。繡窗日日花陰午。依依雲絮。溶溶香雪。覩他尋路。一滴東風。怎生消得。翠苞紅相。被疎鐘敲斷。流鶯喚起。但長記。弓彎舞。定是相思入骨。到如今。月痕同醉。教人枉了。若還真箇。匆匆如此。全未惺鬆。纈紋生眼。胡牀猶據。算從前總是。無憑待說。與如何寄。

小樓連苑梅

一枝斜墮牆腰。向人顛裊如相媚。是誰剪取。斷雲零玉。輕輕妝綴。不是幽人。如何能到。水邊沙際。又匆匆過了。春風半面。儘長把。重門閉。只管相思成夢。道無情。又關鄉意。蒼苔半畝。如今已是。鹿胎田地。甚欲追陪。却嫌花下。翠環解語。待何時。月轉幽房醉了。不教歸去。

周晴川

程雪樓云。予於近世諸家樂府。惟清真犂然當于心。晴川殊有宗風。雨坐空山。試閱一解。便如輕衫駿騎。上下五陵。花發鶯啼。垂楊拂面時也。

十六字令

眠。月影穿窗白玉錢。無人弄。移過枕函邊。按十六字令。卽蒼梧謠也。張安國集中二首。蔡

伸道集中一首。其首俱以一字句斷。今本訛眠字爲明。遂作二字句斷。非也。是詞見天機餘錦。係周晴川作。今相沿刻周美成。然片玉集無此。其不係美成明矣。

張半湖

掃花游

柳絲曳綠。正荳雨初晴。水天清夏。石榴綻出。看猩紅萬點。倚亭欹榭。瑣闥深中。料想酒闌歌罷。日將下。是那處藕花。香勝沉麝。窗外風竹打。似曼玉敲金。送聲瀟灑。共觀古畫。喚石鼎烹茶。細商幽話。寶鴨烟消。天外新蟾低挂。涼無價。又丁東。數聲簷馬。

蕭東父

齊天樂

扇鸞收影。驚秋晚。梧桐又鳴疎雨。翠箔涼多。繡囊香減。陡覺簟冰如許。溫存誰與。更禁得荒苔露蛩相訴。恨結愁縈。風刀難剪。幾千縷。閑思前事易遠。悵舊歡無據。月墮湘浦。軟玉分裊。膩雲侵枕。猶憶吹蘭低語。如今最苦。甚怕見燈昏。夢游間阻。怨殺嬌癡。綠窗還噓否。

黃水村

解連環春夢

鳳樓倚倦。正海棠睡足。錦香衾軟。似不似。霧閣雲牕。擁絕妙輕盈。霎時會見。屏裏吳山。又依約。獸環半掩。乍教人覩了。疑假疑真。一種淒怨。游絲落花滿院。料當時錯怪。杏梁歸燕。謾記得。栩栩多情。似蝴蝶飛來。撲翻輕扇。偷眼簾帷。早不見。畫眉人面。但凝思。紅生半臉。枕痕一線。

傅按察

鴨頭綠錢塘懷古

靜中看。記昔日淮山隱隱。宛若虎踞龍盤。下樊襄。指揮湘漢。鞭雲騎。圍繞江干。勢不成三。時當混一。過唐之數。不為難。陳橋驛。孤兒寡婦。久假當還。挂征帆。龍舟催發。紫宸初卷朝班。禁庭空。土花暈碧。輦路悄。呵喝聲乾。縱餘得。西湖風景。花柳亦凋殘。去國三千。游仙一夢。依然天淡夕陽間。昨宵也。一輪明月。還照臨安。

無名氏

天淨沙見老學叢談

枯藤老樹昏鴉。小橋流水平沙。古道淒風瘦馬。夕陽西下。斷腸人在天涯。

又

平沙細草斑斑。曲溪流水潺潺。塞上清秋早寒。一聲新鴈。黃雲紅葉青山。

又

西風塞上。口箛。月明馬上。琵琶。那抵昭君怨多。李陵臺下。淡烟衰草黃沙。

張

雨

字伯雨。號真居。杭州人。宋崇國公九成之裔。蚤游方外。居茅山。自號句曲外叟。

燕山亭楊梅

鶴頂珠圓。蝟肌粟聚。寶葉揉藍初洗。親剪翠柯。遠贈筠籠。脈脈紅泉流齒。骨換丹砂。笑尙帶。儒酸風味。誰記。曾問譜西泠。綠陰青子。君家幾度樽前。摘天上繁星。伴人同醉。纖手素盤。歷亂殷紅。浮沉半壺脂水。珍果同時。惟醉寫。來禽青李。爭似。為越女。吳姬染指。

滿江紅玉簪次班彥功韻

玉導纖長。頓化作。雲英香莢。風弄影。綠鬟撩亂。搔頭斜插。璞小還思釵燕
並。叢幽略比蕉心狹。看柔鬢。點綴半開時。微烘蠟。冰筋瘦。瓊林滑。芳徑
底。誰偷搯。怕夜涼。消得錦圍紅匝。鵝管不禁仙露重。蜜脾勝借清香發。待
使君。絕妙好詞成。須彈壓。

雪獅兒賦梅次仇山村韻

含香弄粉。便勾引。游騎尋芳。城南城北。別有西村。斷港冰澌微綠。孤山路
熟。伴老鶴。晚先尋宿。怕凍損。三花兩蕊。寒泉幽谷。幾番花影濯足。記歸
來醉臥。雪深平屋。春夢無憑。鬢底鬧蛾爭撲。不如圖畫。相對展。官奴風竹。
燒黃燭。一作獨。自聽瓶笙調曲。

蝶戀花新柳

誰道鵝兒黃似酒。對酒新鵝。得似垂絲柳。鉛粉泥金初染就。年年春雪消
時候。一縷柔情能斷否。雨重烟輕。無力縈窗牖。試看溪南陰十畝。落花
都聚紅雲帚。

早春怨擬白石

眇得春來。春寒春困。陡頓無聊。半剔殘缸。片時春夢。過了元宵。空山暮
暮朝朝。到此際。無魂可銷。却倚東風。水如衣帶。草似裙腰。

朝中措早春書易玄九曲新居壁

草堂移住古城隈。堂後水平階。要結柴桑鄰里。不須鷗鷺驚猜。行廚竹
裏園官菜。把野老山杯。說與定巢新燕。杏花開了重來。

太常引題李仁仲畫舫

莫將西子比西湖。千古一陶朱。生怕在樓居。也用著、風帆短蒲。銀瓶索酒。并刀斫鱸。船背錦模糊。堤上早傳呼。是那箇、烟波釣徒。

滕賓 字玉霄。睢陽人。官江西儒學提舉。後棄家。入天台為道士。

鵲橋仙

斜陽一抹。青山數點。萬里澄江如練。蕭風吹落櫓聲遙。又喚起、寒雲片片。殘鴉古渡。瘦驢村店。漸覺樓頭人遠。桃花流水小橋東。是那箇、柴門半掩。

齊天樂華光閣誌別分韻得與字

片帆呼度西山曲。匆匆載將春去。路入翠寒。浪翻紅暖。一枕欹眠。烟雨酒朋詩侶。儘醉舞狂歌。氣吞吳楚。一樣風流。依然猶是晉風度。人生如此良遇。問碧翁何意。萍蓬教聚。句落瑤臺。香霏珠唾。驚倒世間兒女。渭川雲樹。悵後夜相思。玉蟾明處。怕有新詩。鴈來頻寄與。

劉燕哥 伎女。

太常引饒劉參議歸山東

故人別我出陽關。無計鎖雕鞍。今古別離難。兀誰畫、蛾眉遠山。一樽別酒。一聲杜宇。寂寞又春殘。明月小樓間。第一夜、相思淚彈。

陳鳳儀 成都樂伎。

一絡索送別

蜀江春色濃如霧。擁雙旌歸去。海棠也似別君難。一點點。啼紅雨。此去馬蹄何處。向沙堤新路。禁林賜宴賞花時。還憶著。西樓否。

卷三十一 補人 宋詞六十九首

蘇舜欽

字子美。桐山人。易簡之孫。初補太廟齋郎。尋第進士。以范仲淹薦。召試集賢校理監。進奏院。坐祠會除名。後起爲湖州長史。罷居蘇州卒。有滄浪集。

水調歌頭 滄浪亭

瀟灑太湖岸。淡泞洞庭山。魚龍隱處烟霧。深鎖渺瀰間。方念陶朱張翰。忽有扁舟急漿。撇浪載鱸還。落日暴風雨。歸路繞汀灣。丈夫志。當景盛。恥疎閒。壯年何事。憔悴華髮改朱顏。擬借寒潭垂釣。又恐鷗猜鷺忌。不肯傍青綸。刺棹穿蘆荻。無語看波瀾。

韓維

字持國。雍丘人。累官太子少傅。轉太師。紹聖中。坐元祐黨。安置均州。徽宗初。追復舊官。有南陽集。

踏莎行 次韻范景仁寄子華

歸鴈低空。游蜂趁暖。憑高日向西雲斷。具茨山外夕陽多。展江亭下春波滿。雙桂情深。千花明煥。良辰誰是同游伴。辛夷花謝早梅開。應須次第調絃管。雙桂樓千花。

胡搗練令

夜來風橫雨飛狂。滿地閒花衰草。燕子漸歸春悄。簾幙垂清曉。天將佳

景與閒人。美酒寧嫌華皓。留取舊時歡笑。莫共秋光老。

韋

驥

字子駿。錢唐人。皇祐五年進士。累官尚書主客郎中。夔州路提點刑獄。

減字木蘭花

人生可意。祇說功名貪富貴。遇景開懷。且盡生前有限盃。
鵝聲殘無覓處。莫自因循。一片花飛減却春。韶華幾許。鵝

菩薩蠻和舒信道木心寺會

瓊盃且盡清歌送。人生離合真如夢。瞬息又春歸。回頭光景非。
香噴金獸暖。歡意愁更短。白髮不須量。從教千丈長。

劉

燾

字無言。劉誼次子。元祐中進士。為蘇軾黃庭堅所知。有見南山集。

花心動梅

偏憶江梅。有塵表。丰儀。世外標格。低傍小橋。斜出疎籬。似向隴頭會識。暗
香孤韻。冰霜裏。初不怕。春寒要勒。問桃李。盈門。怎生向前爭得。省共蕭
娘去摘。玉纖映瓊枝。照人一色。淡粉暈酥。多少飛來。到得壽陽宮額。再三
留待東君管。都將那。別花不惜。但只恐。高樓又二三弄笛。

歐陽澈

字德明。崇仁人。高宗即位南京。伏闕上封事。極詆用事大臣。遂見殺。所著有飄然集六卷。

玉樓春

年時醉倚溫溫玉。妒月精神疑可掬。香絲篆裊一簾秋。嫩豔十分浮蟻綠。
興來笑把朱絃促。切切含情聲斷續。曲中依約斷人腸。除却梨園無此

曲。

小重山

紅葉傷心月午樓。襲人風細細。遠烟浮。憎騰醉眼不禁秋。追舊事。拍塞一懷愁。心緒兩悠悠。東陽消瘦損。甚風流。擬憑仙枕夢中遊。無眠久。通夕數更籌。

胡舜陟

字汝名。績溪人。大觀中進士。為監察御史。建炎中。以集英殿修撰。知廬州。遷壽廬等州鎮撫使。

漁家傲

幾日北風江海立。千車萬馬濤聲急。短棹峭寒欺酒力。飛雨息。瓊花細細穿窗隙。今我綠蓑青箬笠。浮家泛宅烟波逸。渚鷺沙鷗都舊識。行未得。高歌與爾相尋覓。

胡仔

字元在。新安人。舜陟子。寓居吳興。號苕溪漁隱。宣和間仕建安主簿。有叢話百卷。

滿江紅

泛宅浮家。何處好。苕溪清境。占雲山萬疊。烟波千頃。茶竈筆牀渾不用。雪蓑月笛偏相稱。爭不教。二紀賦歸來。甘幽屏。紅塵事。誰能省。青霞志。方高引。任家風。舴艫生涯。答答。三尺鱸魚真好鱠。一瓢春酒宜閒飲。問此時。懷抱向誰論。惟箕穎。

水龍吟

以李長吉美人梳頭歌填

夢寒鮪帳春風曉。檀枕半填香髻。轆轤初轉。欄杆鳴玉。咿啞驚起。眠鴨凝烟。舞鸞翻鏡。影開秋水。解低頭試整。牙牀對立。香絲亂。雲拖地。纖手犀梳落處。膩無聲。重盤鴉翠。蘭膏勻漬。冷光欲溜。鸞釵易墜。年少偏嬌。鬢多

無力。惱人風味。甚含情不語。下堦漫自折花枝戲。

倪 偁 字文舉。吳興人。紹興八年進士。官太常寺主簿。有綺川詞一卷。

臨江仙

結束征鞍臨驛路。長林積雪消初。天回春色到平蕪。不堪盃酒罷。便與故人疎。一曲陽關歌未闕。僕夫催上脩途。非君思我更誰歟。西風吹過雁。應有寄來書。

王十朋 字龜齡。樂清人。由大學廷對擢第一。除著作郎。遷大宗正丞。累遷國子司業。陞侍講。歷四都守。

點絳脣

除侍御史。以龍圖閣學士致仕。謚忠文。有梅溪集。

野態芳姿。枝頭占得春長久。怕鈎衣袖。不放攀花手。試問東風。花似當時否。還依舊。謫仙去後。風月今誰有。

洪 邁 字景盧。號野處。

踏莎行

院落深沉。池塘寂靜。簾鈎捲上梨花影。寶箏拈得雁難尋。篆香消盡山空冷。釵鳳斜欹。鬢蟬不整。殘紅立褪慵看鏡。杜鵑啼月一聲聲。等閒又是三春盡。

姚述堯 錢唐人。有簾臺公餘詞一卷。

臨江仙

呈桐川使君丁郎中仲京
佳節喜逢長久日。翩翩鳧鳥朋來。霜清天宇絕塵埃。遙憐巴嶺月。擬上曲

江臺。懷縣從容留客宴。追歡正好傳盃。使君歸騎莫相催。更拚明日醉。未放菊花開。

湯思退

字進之。處州人。紹興中。由縣令試博學宏詞科。除祕書省正字。累官端明殿學士。僉書樞密院事。後責居永州。

菩薩蠻 水月寺

畫船橫絕湖波練。更上雕鞍窮翠巘。霜橘半垂黃。征衣盡日香。鐘聲雲外聽。金界青松映。何處是華山。峯巒杳靄間。

魏杞

字南夫。壽春人。一云開封人。累官右僕射。兼樞密使。以使金不辱命。驟登相位。乾道丁亥。以災異同葉願策免。卒諡文節。

虞美人梅

冰膚玉面孤山裔。肯到人間世。天然不與百花同。却恨無情輕付與東風。麗譙三弄江梅曉。立馬溪橋小。只應明月最相思。曾見幽香一點未開時。

牟

獻

字獻甫。吳興人。大理少卿。有陵陽先生集。

木蘭花慢 餞公孫倅

山城如斗大。君肯爲。兩年留。問讀易堂前。修然松菊。留得君不。天邊乍傳消息。趁東風。歸待翠雲裘。留取去思無限。江籬香滿汀洲。不妨無蟹有監州。臭味喜相投。怪底事朝來。驪歌催唱。喚起離愁。羨君戲綵脫却。一身輕。無事也無憂。昨夜夢隨杖履。道林岳麓同游。

漁家傲

病枕逢逢驚曉鼓。那堪送客江頭路。莫唱驪駒催客去。風又雨。花飛一片愁千縷。折柳淒然無剩語。加餐更把箠衣護。泥滑籃輿須穩度。雲飛處。親闈安問應旁午。

王自中

字道甫。平陽人。淳熙中登進士第。光宗朝起知邵州興化軍。

酹江月題釣臺

扁舟夜泛。向子陵臺下。偃帆收櫓。水闊風搖舟不定。依約月華新吐。細酌清泉。痛澆塵臆。喚起先生語。當年綸釣。為誰高臥烟渚。還念古往今來。功名可共。能幾人光武。一旦星文驚四海。從此故人何許。到底軒裳。不如蓑笠。久矣心相與。天低雲淡。浩然吾欲高舉。

丘 密

字宗卿。江陰軍人。隆興元年進士。累官資政殿學士。拜同知樞密院事。卒謚文定。有詞一卷。

洞仙歌辛卯元夕

江城梅柳。慣得春先處。催趁風光上歌舞。見九衢車馬。流水如龍。喧笑語。羅綺香塵載路。歡娛多暇日。樽俎風流。重見承平舊官府。有多少。佳麗事。墮珥遺簪。芳徑裏。瑟瑟珠璣翠羽。好惜取。韶華醉連宵。更莫待收燈。酒闌人去。

又賦金林檎

豐肌膩體。淡雅仍矜貴。不與羣芳競姝麗。向瓊林珠殿。獨占春風。仙仗裏。曾奉三宮燕喜。低徊如有恨。失意含羞。樂事繁華竟誰記。應憐我。今老

去無句酬伊。吟未就。不覺東風又起。鎮獨自。黃昏怯輕寒。這情緒。年年共。花憔悴。

沁園春 景明告行頗動懷歸之念偶得帥卿詞因次其韻前閱奉送以自見云

雨趁輕寒。風作秋聲。燕歸雁來。動天涯羈思。登山臨水。驚心節物。極目烟埃。客裏逢君。纔同一笑。何遽言歸如此哉。別離久。算不應與盡。却棹船迴。主人下榻高齋。更檢點。笙歌頻宴開。便流連不到。迎春見柳。也須小駐。度臘觀梅。樓上盈盈。閨中脈脈。應念胡麻好種栽。從教去。正危欄望斷。小倚徘徊。

撲蝴蝶 蜀中作

鳴鳩乳燕。春在梨花院。重門鎮掩。沉沉簾不捲。紗窗紅日三竿。睡鴨餘香一綫。佳眠悄無人喚。謾消遣。行雲無定。楚雨難憑。夢魂斷。清明漸近。天涯人正遠。儘教閒了。鞦韆。覩著海棠開徧。難禁舊愁新怨。

夜行船 越中作

水滿平湖香滿路。繞重城。藕花無數。小艇紅妝。疎簾青蓋。烟柳畫船斜渡。恣樂追涼忘日暮。簫鼓月明人去。猶有清歌。迢遞聲在芰荷深處。

西江月

明日又還重九。黃昏小雨疎風。菊英萸糝一尊同。付與今宵好夢。寒意梧桐葉上。客愁畫角聲中。小樓何日却從容。千里此情應共。

錦帳春 己未孟冬樂淨見梅英作

卷二十一補人 宋詞六十九首

四五七

翠竹如屏。淺山如畫。小池面。危橋一跨。著樓亭臨水。宛然郊野。竹籬茅舍。好是天寒。倍添妍雅。正雪意。垂垂欲下。更朦朧月影。弄晴初夜。梅花動也。

姜特立

字邦傑。麗水人。以恩補郎。淳熙中。遷閣門舍人。充春坊官。幸於太子即位。以春坊舊人。特恩無忌。為留正所論奪職。寧宗朝拜慶遠軍節度使。有梅山續稿詞一卷。

蝶戀花送妓

飄粉吹香。三月暮。病酒情懷。愁緒渾無數。有箇人人來又去。歸期有恨難留住。明日尊前無覓處。咿軋籃輿。只向雙溪路。我輩情鍾君漫與。為雲為雨應難據。

蔡

栴

字堅老。號雲壑。

鷓鴣天

病酒厭厭與睡宜。珠簾羅幙捲銀泥。風來綠樹花含笑。恨入西樓月斂眉。驚瘦盡。怨歸遲。休將桐葉更題詩。不知橋下無情水。流到天涯是幾時。

張履信

字思順。號遊初。

柳稍青

雨歇桃繁。風微柳靜。日淡湖灣。寒食清明。雖然過了。未覺春閒。行雲掩映春山。真水墨。山陰道間。燕語侵愁。花飛撩恨。人在江南。

謁金門

春睡起。小閣明窗兒底。簾外雨聲花積水。薄寒猶在裏。欲起還慵未起。

好是孤眠滋味。一曲廣陵應忘記。起來調綠綺。

王 嶠 字季夷。號貴英。

祝英臺近

柳烟濃。花露重。合是醉時候。樓倚花梢。長記小垂手。誰教釵燕輕分。鏡鸞慵舞。是孤負。幾番晴晝。自別後。聞道花底花前。多是兩眉皺。又說新來。比似舊時瘦。須知兩意長存。相逢終有。莫謾被。春光傷憊。

夜行船

曲水瀟裙。三月二。馬如龍。鈿車如水。風颺游絲。日烘晴晝。人共海棠俱醉。客裏光陰難可意。掃芳塵。舊游誰記。午夢醒來。不覺小窗人靜。春在賣花聲裏。

韓 翥 字子耕。號蕭閑。

高陽臺除夕

頻聽銀籤。重燃絳蠟。年華袞袞驚心。錢舊迎新。能消幾刻光陰。老來可慣通宵飲。待不眠。還怕寒侵。掩清尊。多謝梅花。伴我微吟。鄰娃已試春妝了。更蜂枝簇翠。燕股橫金。勾引東風。也知芳意難禁。朱顏那有年年好。逞豔游。贏得如今。恁登臨。殘雪樓臺。遲日園林。

姚 鑪 字希聲。號雪蓬。

謁金門

吟院靜。遲日自行花影。熏透水沉雲滿鼎。晚妝窺露井。飛絮游絲無定。

誤了鶯鶯相等。欲喚海棠教睡醒。奈何春不肯。

羅椅 字子遠。號懶谷。

柳梢青

萼綠華身。小桃花扇。安石榴裙。子野聞歌。周郎顧曲。會惱夫君。悠悠羈旅愁人。似零落。青天斷雲。何處銷魂。初三夜月。第四橋春。

楊伯崑 字彥瞻。號泳齋。

踏沙行雪中疎寮借閣帖更以薇露送之

梅觀初花。蕙庭殘葉。當時慣聽山陰雪。東風吹夢到清都。今年雪比前年別。重釀宮醪。雙鈎官帖。伴翁一笑成三絕。夜深何用對青藜。窗前一葉蓬萊月。

周晉 字明叔。號嘯齋。

清平樂

圖書一室。香暖垂簾密。花滿翠壺熏研席。睡覺滿窗晴日。手寒不了殘碁。篝香細勘唐碑。無酒無詩情緒。欲梅欲雪天時。

楊纘 字繼翁。號守齋。

八六子 牡丹次白雲韻

怨殘紅。夜來無賴。雨催春去匆匆。但暗水新流。芳恨蝶淒。蜂慘千林。嫩綠迷空。那知國色還逢。柔弱華清。扶倦輕盈。洛浦臨風。細認得。凝妝點脂勻粉。露蟬聳翠。藜金團玉成叢。幾許愁隨笑解。一聲歌轉春融。眼朦朧。凭

欄半醒醉中。

一枝春除夕

竹爆驚春。競喧填。夜起千門簫鼓。流蘇帳暖。翠鼎緩騰香霧。停盃未舉。奈剛要送年新句。應自有。歌字清圓。未誇上林鶯語。從他歲窮日暮。縱閑愁怎減。劉郎風度。屠蘇辦了。迤邐柳欺梅妒。宮壺未曉。早嬌馬。繡車盈路。還又把。月夜花朝。自今細數。

被花惱自度腔

疎疎宿雨釀寒輕。簾幙靜垂清曉。寶鴨微溫。瑞烟少。簷聲不動。春禽對語。夢怯頻驚覺。欹珀枕。倚銀牀。半窗花影明東照。惆悵夜來風。生怕嬌香混瑤草。披衣便起。小徑回廊。處處都行到。正千紅萬紫競芳妍。又還似。年時被花惱。驀忽地。省得而今雙鬢老。

翁子孟寅

字賓陽。號五峯。

齊天樂元夕

紅香十里銅駝夢。如今舊遊重省。節序飄零。歡娛老大。慵立燈光蟾影。傷心對景。怕回首東風。雨晴難准。曲巷幽坊。管絃一片笑相近。飛棚浮動翠葆。看金釵半溜。春爐紅粉。鳳輦鰲山。雲收霧斂。迤邐銅壺漏迴。霜風漸緊。展一幅青綃。淨懸孤鏡。帶醉扶歸。曉醒春夢穩。

燭影搖紅

樓倚春城。瑣窗會共巢春燕。人生好夢逐春風。不似楊花健。舊事如天漸

遠。奈晴絲牽愁未斷。鏡塵埋恨。帶粉棲香。曲屏寒淺。環佩空歸。故園羞見桃花面。輕烟淺照下闌干。獨自疎簾捲。一信狂風又晚。海棠花隨風滿院。亂鴉啼後。杜宇啼時。一聲聲怨。

阮郎歸

月高樓外柳花明。單衣怯露零。小橋燈影落殘星。寒烟蘸水萍。歌袖窄。舞環輕。梨花夢滿城。落紅啼鳥兩無情。春愁添曉醒。

趙汝茛

字參晦。號霞山。

江城梅花引

對花時節不會歡。見花殘。任花殘。小約簾櫳一面受春寒。題破玉榭雙喜鵲。香燼冷。繞雲屏。渾是山。待眠未眠。事萬千。也問天。也恨天。髻兒半偏。繡裙兒。寬了還寬。自取紅氈重坐暖金船。惟有月知君去處。今夜月。照秦樓。第幾間。

夢江南

簾不捲。細雨熟櫻桃。數點霽霞天又曉。一痕涼月酒初消。風急絮花高。閒游處。磨盡少年豪。昨夢醉來騎白鹿。滿湖春水段家橋。濯髮聽吹簫。

戀繡衾

柳絲空有萬千條。繫不住。溪頭畫橈。想今宵。也對新月。過輕寒。何處小橋。玉簫臺榭春多少。溜啼痕。盈臉未消。怪別來。燕支慵傅。被東風。偷在杏梢。

漢宮春

著破荷衣。笑西風吹我。又落西湖。湖間舊時飲者。今與誰俱。山山映帶。似攜來。畫卷重舒。三十里芙蓉步障。依然紅翠相扶。一目清無留處。任屋浮天上。身集空虛。殘烟夕陽過雁。點點疎疎。故人老大。好襟懷。消減全無。漫贏得。秋聲兩耳。冷泉亭下騎驢。

如夢令

小砑紅綾箋紙。一字一行春淚。封了更親題。題了又還折起。歸未歸未。好箇瘦人天氣。

馮去非

字可遷。號深居。

喜遷鶯

涼生遙渚。正綠芰擎霜。黃花招雨。鴈外漁燈。蜚邊蟹舍。絳葉□秋來路。世事不離雙鬢。遠夢偏欺孤旅。送望眼。但憑舷微笑。書空無語。慵看清鏡裏。十載征塵。長把朱顏污。借筋青油。揮毫紫塞。舊事不堪重舉。問闊故山猿鶴。冷落同盟鷗鷺。倦遊也。便檣雲拖月。浩歌歸去。

許棐

字忱父。海鹽人。有梅屋稿及獻醜集。嘉熙間自為序。

鷓鴣天

翠鳳金鸞繡欲成。沉香亭下款新晴。綠隨楊柳陰邊去。紅踏桃花片上行。鶯意緒。蝶心情。一時分付小銀箏。歸來欲醉花柔困。月濾窗紗約半更。

琴調相思引

組繡盈箱錦滿機。倩人縫作護花衣。恐花飛去無復上芳枝。已恨遠山迷望眼。不須更畫遠山眉。正無聊賴。雨外一鳩啼。

後庭花

一春不識西湖面。翠羞紅倦。雨窗紅淚搖湘管。意長箋短。知心惟有雕梁燕。自來相伴。東風不管琵琶怨。落花吹徧。

夜行船

一轡東風留不住。離歌斷日斜春暮。多事啼鶯。妒情飛燕。一路送人歸去。文君自被琴心悞。却惆悵落花飛絮。錦字機寒。玉爐烟冷。門外亂山無數。

喜遷鶯

鳩雨細。燕風斜。春悄謝娘家。一重簾外即天涯。何必暮雲遮。釧金寒。釵玉冷。薄醉欲成還醒。一春梳洗不簪花。孤負幾年華。

陸

歲

字景思。號雲西。

瑞鶴仙梅

濕雲黏鴈影。望征路。愁迷離緒難整。千金買光景。但疎鐘催曉。亂鴉啼暝。花惊暗省。許多情。相逢夢境。便行雲。都不歸來也。合寄將音信。孤迥。盟鸞心在。跨鶴程高。後期無準。情絲待翦。翻惹得。舊時恨。怕天教何處。參差雙燕。還染殘朱剩粉。對菱花。與說相思。看誰瘦損。

蕭泰來

字則陽。號小山。

霜天曉角梅

千霜萬雪。受盡寒磨折。賴是生來瘦硬。渾不怕。角吹徹。清絕影也別。知心惟有月。元沒春風情性。如何共。海棠說。

趙希邁

字瑞行。號西里。

八聲甘州竹西懷古

寒雲飛萬里。一番秋。一番攪離懷。向隋堤躍馬。前時柳色。今度蓬萊。錦纜殘香在否。枉被白鷗猜。千古揚州夢。一覺庭槐。歌吹竹西難問。拚菊邊醉著。吟寄天涯。任紅樓踪跡。茅舍染蒼苔。幾傷心。橋東片月。趁夜潮。流恨入秦淮。潮回處。引西風恨。又渡江來。

趙崇璠

字漢宗。號白雲。

蝶戀花

一剪微寒禁翠袂。花下重開。舊燕添新壘。風旋落紅香匝地。海棠枝上鶯飛起。薄霧籠春天欲醉。碧草澄波。的的情如水。料想紅樓挑錦字。輕雲淡月人憔悴。

趙希彭

字清中。號十洲。

霜天曉角桂

姮娥戲劇。手種長生粒。寶榦婆娑。幾千古。飄芳吹滿虛碧。韻色檀露滴。人間秋第一。金粟如來境界。誰移在小亭側。

秋蕊香

髻穩冠宜翡翠。壓鬢綵絲金縷。遠山碧淺蘸秋水。香煖榴裙襯地。寧寧
二八餘年紀。惱春意。玉雲凝重步塵細。獨立花陰寶砌。

王藻 字身甫。號瓦全。

霜天曉角梅

疎明瘦直。不受東皇識。留取伴春應肯。萬紅裏。怎著得。夜色何處笛。曉
寒無奈力。若在壽陽宮殿。一點點。有人惜。

趙與峩 字慶御。號崑崙。

謁金門

歸去去。風急蘭舟不住。夢裏海棠花下語。醒來無覓處。薄倖心情似絮。
長是輕分輕聚。待得來時春幾許。綠陰三月暮。

樓槃 字考甫。號曲淵。

霜天曉角梅

月淡風輕。黃昏未是清。吟到十分清處。也不管。二二三更。曉鐘天未明。曉
霜人未行。只有城頭殘角。說得盡。我平生。

又

剪雪裁冰。有人嫌太清。又有人嫌太瘦。都不是。我知音。孤
山人姓林。一自西湖別後。辜負我。到如今。誰是我知音。孤

鍾過 字改之。號梅心。

步蟾宮

東風又送酴醿信。早吹得。愁成潘鬢。花開猶是十年前。人不似。十年前俊。水邊珠翠香成陣。也消得。燕窺鶯認。歸來沉醉月朦朧。覺花氣。滿襟猶潤。

黃 蘭 字元易。號東浦。

柳梢青

病酒心情。喚愁無限。可奈流鶯。又是一年。花驚寒食。柳認清明。天涯翠巘層層。是。多少。長亭短亭。倦倚東風。只憑好夢。飛到銀屏。

陳 策 字次賈。號南墅。

摸魚兒 仲宣樓賦

倚危樓。醉春懷古。輕寒纔轉花信。江城望極。多愁思。前事惱人方寸。湖海興。算合付。元龍舉白。澆談吻。憑高試問。問舊日王郎。依劉有地。何事賦幽憤。沙頭路。休記家山遠近。賓鴻一去無信。滄波渺渺。空歸夢。門外北風淒緊。烏帽整。便做得。功名難。綠星星鬢。敲吟未穩。又白鷺飛來。垂楊自舞。誰與寄離恨。

李振祖 號中山。

浪淘沙

春在畫橋西。畫舫輕移。粉香何處度漣漪。認得一船楊柳外。簾影垂垂。誰倚碧欄低。酒暈雙眉。鴛鴦並浴燕交飛。一片閒情春水隔。斜日人歸。

卷三十一 補人 宋詞六十八首

汪元量

字大有。號水雲。錢塘人。以善琴事謝后王昭儀。宋亡。隨二宮留燕。後為黃冠師南歸。有湖山類藁。多紀國亡北徙事。

滿江紅 吳江秋夜

一箇蘭舟。雙桂漿。順流東去。但滿目。銀光萬頃。淒其風露。漁火已歸鴻雁
沒。櫂歌更在鴛鴦浦。漸夜深。蘆葉冷颼颼。臨平路。吹鐵笛。鳴金鼓。絲玉
鱸。傾香醕。且浩歌痛飲。藕花深處。秋水長天迷遠望。曉風殘月空凝竚。問
人間。今夕是何年。清如許。

琴調相思引 越上賞花

曉拂菱花巧畫眉。猩羅新翦作春衣。恐春歸去。無處看花枝。已恨東風
成去客。更教飛燕舞些時。惜花人醉。頭上插花歸。

長相思 越上寄雪江

吳山深。越山深。空谷佳人金玉音。有誰知此心。夜沉沉。漏沉沉。閒却梅
花一曲琴。月高松竹林。

好事近 浙江樓聞笛

獨倚浙江樓。滿耳怨笳哀笛。猶有梨園聲在。念那人天北。海棠顚顚怯
春寒。風雨怎禁得。回首華清池畔。渺露蕪烟荻。

鶯啼序 重過金陵

金陵故都最好。有朱樓迢遞。嗟倦客。又此憑高。檻外已少佳致。更落盡梨
花。飛盡楊花。春也成憔悴。問青山。三國英雄。六朝奇偉。麥甸葵丘。荒臺
敗壘。鹿豕銜枯薺。正潮打孤城。寂寞斜陽影裏。聽樓頭。哀笳怨角。未把酒
愁心先醉。漸夜深。月滿秦淮。烟籠寒水。悽悽慘慘。冷冷清清。燈火渡頭
市。慨商女。不知興廢。隔江猶唱庭花。餘音亶亶。傷心千古。淚痕如洗。烏衣
巷口青蕪路。認依稀。王謝舊鄰里。臨春結綺。可憐紅粉成灰。蕭索白楊風
起。因思疇昔。鐵索千尋。謾沉江底。揮羽扇。障西塵。便好角巾私第。清談
到底成何事。回首新亭。風景今如此。楚囚對泣。何時已。歎人間。今古真兒
戲。東風歲歲還來。吹入鍾山。幾重蒼翠。

六州歌頭 江都

綠蕪城上。懷古恨依依。淮山碎。江波逝。昔人非。今人悲。惆悵隨天子。錦帆
裏。環珠履。叢香綺。展旌旗。盪漣漪。擊鼓搥金。擁瓊璈。玉吹恣意游嬉。斜日
暉暉亂鶯啼。銷魂此際。君臣醉。貌貅弊。事如飛。山河墜。烟塵起。風淒淒。
風霏霏。草木皆垂淚。家國棄。竟忘歸。笙歌地。歡娛地。盡荒畦。惟有當時皓
月。依然挂。楊柳青枝。聽堤邊漁叟。一笛醉中吹。興廢誰知。

水龍吟 淮河舟中夜聞官人琴聲

鼓鼙驚破霓裳。海棠亭北。多風雨。歌闌酒罷。玉啼金泣。此行良苦。駝背模
糊。馬頭匝匝。朝朝暮暮。自都門燕別。龍艘錦纜。空載得。春歸去。日斷東
南半壁。悵長淮。已非吾土。受降城下。草如霜白。淒涼酸楚。粉陣紅圍。夜深

人靜。誰賓誰主。對漁燈一點。羈愁一擲。譜琴中語。

望江南 幽州九日

官舍悄。坐到月西斜。永夜角聲悲自語。客心愁破正思家。南北各天涯。腸斷裂。搔首一長嗟。綺席象牀寒玉枕。美人何處醉黃花。和淚撚琵琶。

唐多令 吳江中秋

莎草被長洲。吳江拍岸流。憶故家西北高樓。十載客窗憔悴損。搔短鬢。獨悲秋。人在塞邊頭。斷鴻書寄不。記當年一片閒愁。舞罷羽衣塵滿面。誰伴我。廣寒遊。

施

岳

字仲山。號梅川。

水龍吟

翠鰲湧出滄溟。影橫棧壁迷烟墅。樓臺對起。闌干重凭。山川自古。梁苑平蕪。汴堤疎柳。幾番晴雨。看天低四遠。江空萬里。登臨處。分吳楚。兩岸花飛絮舞。度春風。滿城簫鼓。英雄暗老。昏潮曉汐。歸帆過櫓。淮水東流。塞雲北渡。夕陽西去。正淒涼望極。中原路杳。月來南浦。

解語花

雲容泣雪。暮色添寒。樓臺共臨眺。翠叢深窅。無人處。數蕊弄春猶小。幽姿謾好。遙相望。含情一笑。花解語。因甚無言。心事應難表。莫待牆陰暗老。趁琴邊月夜。笛裏霜曉。護香須早。東風度。咫尺畫欄瓊沼。歸來夢繞。歌雲墜。依然驚覺。想恁時小几。銀屏冷未了。

畫舸西泠路。占柳陰花影。芳意如織。小楫衝波。度麴塵扇底。粉香簾隙。岸
轉斜陽隔。又過盡。別船簫笛。傍斷橋。翠繞紅圍。相對半篙晴色。頃刻。千
山暮碧。向沽酒樓前。猶繫金勒。乘月歸來。正梨花夜編。海棠烟冪。院宇明
寒食。醉乍醒。一庭春寂。任滿身。露濕東風。欲眠未得。

張

樞

字斗南。號寄閒。

瑞鶴仙

捲簾人睡起。放燕子歸來。商量春事。風光又能幾。減芳菲。都在賣花聲裏。
吟邊眼底。披嫩綠。移紅換紫。甚等閒。半委東風。半委小溪流水。還是苔
痕湔雨。竹影留雲。待晴猶未。蘭舟靜艤。西湖上。多少歌吹。粉蝶兒守定落
花不去。濕重尋香。兩翅。怎知人。一點新愁。寸心萬里。

風入松

春寒懶下碧雲樓。花事等閒休。紅綿濕透鞦韆索。記伴仙。曾寄嬌柔。重疊
黃金約臂。玲瓏碧玉搔頭。熏爐誰熨。煖衣篝。消遣酒醒愁。舊巢未著新
來燕。任珠簾。不上瓊鉤。何處東風院宇。數聲揭調甘州。

南歌子

柳戶朝雲濕。花窗午篆清。東風未放十分晴。留戀海棠顏色。過清明。壘
潤棲新燕。籠深鎖舊鶯。琵琶可是不堪聽。無奈愁人把做。斷腸聲。

壘中天 月夕登繪幅堂與篋房各賦一解

鴈橫迴碧。漸烟收極浦。漁唱吹晚。臨水樓臺乘醉倚。雲引吟情閒遠。露脚飛涼。山眉鎖暝。玉宇冰奩滿。平波不動。桂華低印清淺。應是瓊斧修成。鉛霜搗就。舞霓裳曲徧。窈窕西窗誰弄影。紅冷芙蓉深苑。賦雪詞工。留雲歌斷。偏惹文簫怨。人歸鶴唳。翠簾十二空捲。

李

演

字廣翁。號秋堂。

摸魚兒 太湖

又西風。四橋疎柳。驚蟬相對秋語。瓊荷萬笠花雲重。嫋嫋紅衣如舞。鴻北去。渺岸芷。汀芳幾點斜陽字。吳亭舊樹。又繫我扁舟。漁鄉釣里。秋色淡歸鷺。長干路。蔓草疎烟斷野。商歌如寫羈旅。丹溪翠岫登臨事。苔屐尙黏蒼土。鷗且住。怕月冷。吟魂婉冉空江暮。明燈暗浦。更短笛銜風。長雲弄晚。天際畫秋句。

聲聲慢 問梅孤山

輕羈繡谷。柔展烟堤。六年遺賞新續。小舫重來。惟有寒沙鷗熟。徘徊舊情易冷。但溶溶。翠波如縠。愁望遠。甚雲消月老。暮山自綠。嘖笑人生悲樂。且聽我樽前。漁歌樵曲。舊閣塵封。長得樹陰如屋。淒涼五橋歸路。載寒秀。一枝疎玉。翠袖薄。晚無言。空倚修竹。

醉桃源 題小扇

雙鴛初放步雲輕。香簾蒸未晴。杏鎔暗淚結紅冰。留春蝴蝶情。寒薄薄。日陰陰。錦鳩花底鳴。春懷一似草無憑。東風吹又生。

南鄉子夜飲燕子樓

芳水戲桃英。小滴燕支浸綠雲。待覓瓊觚藏綵信。流春不似題紅。易得沉心。天上許飛瓊。吹下蓉笙染玉塵。可惜素鸞留不得。更深。誤翦燈花斷了心。

八六子次箕房韻

乍鷗邊。一番腴綠。流紅又怨蘋花。看晚吹約晴歸路。夕陽分落漁家。輕雲半遮。紫情芳草無涯。還報舞香一曲。玉飄幾許春華。正細柳青烟舊時芳陌。小桃朱戶。去年人面。誰知此日重來繫馬。東風淡墨。欹鴉黯窗紗。人歸綠陰自斜。

祝英臺近次箕房韻

采芳蘋。紫去艣。歸步翠微雨。柳色如波。紫恨滿烟浦。東君若若是多情。未應花老。心已在。綠成陰處。困無語。柔被寒損梨雲。閒修牡丹譜。妒粉爭香。雙燕爲誰舞。年年紅紫如塵。五橋流水。知送了。幾番愁去。

丁宥字基重。號宏菴。

水龍吟

鴈風吹裂雲痕。小樓一線斜陽影。殘蟬抱柳。寒蛩入戶。淒音忍聽。愁不禁秋。夢還驚客。青燈孤枕。未更深。早是梧桐法露。那更度。蘭宵永。空歎銀蟾金井。醉鄉醒。溫柔鄉冷。征塵倦撲。閒花漫舞。何心管領。葱指冰絃。蕙懷春錦。楚梅風韻。悵芙蓉城杏。藍雲依黯。鎖巫峯暝。

史介翁 字吉父。號梅屋。

菩薩蠻

柳絲輕颺黃金縷。織成一片紗窗雨。鬪合做春愁。困慵熏玉篝。暮寒羅袖薄。社雨催花落。先自為詩忙。薔薇一陣香。

周端臣 字彥良。號葵窗。

木蘭花慢 送人之官九華

靄芳陰未解。乍天氣。過元宵。訝客袖猶寒。吟窗易曉。春色無聊。梅梢尚留。顧藉。帶東風未肯雪輕飄。知道詩翁欲去。遞香要送蘭橈。清標會上叢宵。千里阻。九華遙。料今朝別後。別時有夢。應夢今朝。河橋柳愁未醒。贈行人。又恐越魂銷。留取歸來繫馬。翠長千縷柔條。

何光大 字謙履。號牛湖。

謁金門

天似水。池上藕花風起。隔岸垂楊青到地。亂螢飛又止。露濕玉欄閒倚。人靜自生涼意。泛碧沉朱供晚醉。月斜纔去睡。

趙潛 字元晉。號冰壺。

臨江仙 西湖春泛

堤曲朱牆近遠。山明碧瓦高低。好風二十四花期。嬌鸞穿柳去。文鷁挾波飛。簫鼓晴雷殷殷。笑歌香霧霏霏。閒情不受酒禁持。斷橋無立處。斜日欲歸時。

劉 瀾 字養源。號江村。

齊天樂 吳興郡宴遇舊人

玉釵分向金華後。回頭路迷仙苑。落翠驚風。流紅逐水。誰信人間重見。花深半面。尙歌得新詞。柳家三變。綠葉陰陰。可憐不是那時看。劉郎今度更老。雅懷都不到。書帶題扇。花信風高。苕溪月冷。明日雲帆天遠。塵緣較短。怪一夢輕回。酒闌歌散。別鶴驚心。感時花淚濺。

張龍榮 字成子。號梅深。

摸魚兒

又吳塵暗。斑吟袖。西湖深處能浣。晴雲片片。平波影。飛趁棹歌聲遠。回首喚。彷彿記。春風共載斜陽岸。輕攜分短。悵柳密藏橋。烟濃斷徑。隔水語音換。思量徧。前度高陽酒伴。離悰悲事何限。雙峯塔露。書空穎。情共暮鴉盤轉。歸思懶。悄不似。留眠水國蓮花畔。燈簾暈滿。正蠹帙重緝。沉煤半冷。風雨閉宵館。

王億之 字景陽。號松間。

高陽臺

雙槳敲冰。低篷護冷。扁舟曉渡西泠。回首吳山。微茫遙帶重城。堤邊幾樹垂楊柳。早嫩黃。搖動春情。問孤鴻。何處飛來。共喚飄零。輕帆初落沙洲暝。漸潮痕雨漬。面色風皺。旅思羈愁。偏能老大行人。姮娥不管征途苦。甚夜深。儘照孤衾。想玉樓。猶凭闌干。爲我銷凝。

余桂英 字子發。號野雲。

小桃紅

芳草連天暮。斜日明汀渚。懊恨東風恍如春夢。匆匆又去。早知人酒病更詩愁。鎖輕隨飛絮。寶鏡空留恨。箏雁渾無據。門外當時薄情流水。如今何處。正相思望斷碧山雲。又鶯啼晚雨。

胡仲弓 字希聖。號葦杭。

謁金門

蛾黛淺。只為晚寒妝嬾。潤逼鏡鸞紅霧滿。額花留半面。漸次梅花開徧。花外行人已遠。欲寄一枝嫌夢短。濕雲和恨翦。

尚希尹 字莘老。號畏齋。

浪淘沙

結客去登樓。誰繫蘭舟。半篙清漲雨初收。把酒留春春不住。柳暗江頭。老去怕聞愁。莫莫休休。晚來風惡下簾鉤。試問落花隨水去。還解西流。

柴望 字仲山。號秋堂。

念奴嬌

春來多困。正晷移簾影。銀屏深閉。喚夢幽禽烟柳外。驚斷巫山十二。宿酒初醒。新愁半解。惱得成憔悴。鬢鬆雲鬢。不忺鸞鏡梳洗。門外滿地香風。殘梅零落。玉糝蒼苔碎。乍暖乍寒渾莫擬。欲試羅衣猶未。鬪草雕欄。賣花深院。做踏青天氣。晴鳩鳴處。一池昨夜春水。

朱藻 號野逸。

探桑子

障泥油壁人歸後。滿院花陰。樓影沉沉。中有傷春一片心。閒穿綠樹尋梅子。斜日籠明。團扇風輕。一徑楊花不避人。

黃

鑄

字晦顏。號乙山。

秋蕊香令

花外數聲風定。烟際一痕月淨。水晶屏小。敲翠枕。院靜鳴蛩相應。香銷斜掩青銅鏡。背燈影。寒砧夜半和鴈陣。秋在劉郎綠鬢。

王同祖

字與之。號花洲。

阮郎歸

一簾疎雨細于塵。春寒愁殺人。桐花庭院近清明。新烟浮舊城。尋蝶夢。怯鶯聲。柳絲如妾情。丙丁帖子畫教成。妝臺求晚晴。

王茂孫

字景周。號梅山。

高陽臺 春夢

遲日烘晴。輕烟縷晝。鎖窗雕戶慵開。人獨春閒。金猊暖透蘭煤。山屏煖倚珊瑚畔。任翠陰、移過瑤階。悄無聲。綵翅翩翩。何處飛來。片時千里江南路。被東風誤引。還近陽臺。膩雨嬌雲。多情恰喜徘徊。無端枝上啼鳩喚。便等閒、孤枕驚回。惡情懷。一院楊花。一徑蒼苔。

點絳脣 蓮房

折斷烟痕。翠蓬初離鴛鴦浦。玉纖相妒。翻被專房悞。
乍脫青衣。猶著輕羅護。多情處。芳心一縷。都為相思苦。

張桂 字惟月。號竹山。

菩薩蠻

東風忽驟無人見。玉塘烟浪浮花片。步濕下香堦。苔黏金鳳鞋。
翠鬟愁不整。臨水閒窺影。摘得野薔薇。游蜂相趁歸。

浣溪沙

雨壓楊花路半乾。蜂遺花粉在闌干。牡丹開盡正春寒。
懶品么絃金鴈並。瘦驚雙釧玉魚寬。新愁不放翠眉閒。

張林 字去非。號樗岳。

柳梢青燈花

白玉枝頭。忽看蓓蕾。金粟珠垂。半顆安榴。一枝穠杏。五色薔薇。
何須羯鼓聲催。銀缸裏。春工四時。却笑燈蛾。學他蜂蝶。照影頻飛。

朱昇孫 字令則。號萬山。

真珠簾

春雲做冷春知未。春愁在。碎雨敲花聲裏。海燕已尋蹤。到畫溪沙際。院落
鞦韆楊柳外。待天氣。十分新霽。春市。又青帘巷陌。紅芳歌吹。須信處處
東風。又何妨對此。籠香覓醉。曲盡索餘情。奈夜航催離。夢滿冰衾身似寄。
算幾度。吳鄉烟水。無寐。試明朝說與。西園桃李。

吳大有 字有大。號松壑。

點絳脣送李琴泉

江上旗亭。送君還是逢君處。酒闌呼渡。雲壓沙鷗暮。漠漠蕭蕭。香凍梨
花雨。添愁緒。斷腸柔櫓。相逐寒潮去。

趙崇霄 字有得。號蓮舉。

東風第一枝

妒雪梅颺。迷烟柳醒。游絲輕颺新霽。捲簾看燕初歸。步履爲花早起。春來
猶淺。便做出十分春意。喜鳳釵。纔卸珠幡。早換巧梳描翠。看數點。催花
雨膩。更一陣。遞香風細。小鶯吹暖。調聲嫩蝶。試晴舞翅。清歡易失。怕輕負。
年芳流水。好趁閒。共整吟鞵。日日訪桃尋李。

范晞文 字景文。號藥莊。

意難忘

清淚如鉛。歎咸陽送遠。露冷銅仙。嵩花紛墮雪。津柳暗生烟。寒日後。暮江
邊。草色更芊芊。四十年。留春意緒。不似今年。山陰欲棹歸船。暫停杯雨
外。舞劍燈前。重逢應未卜。此別轉堪憐。憑急管。倩繁絃。思苦調難傳。望故
鄉。都將往事。付與啼鵑。

鄭斗煥 字丙文。號松窗。

新荷葉

乳鴨池塘。晴波漾綠鱗鱗。宿藕根香。夏來生意還新。跌錢小鈿。花貼翠。相

間萍星。一番雨過。一番暗展圓清。魚戲龜遊。看來猶未勝情。因憶年時。垂釣會約輕盈。玉人何處。關情是。半捲芳心。簾風一棹。鴛鴦催起歌聲。

曹良史 字之才。號梅南。

江城子

夜香燒了夜寒生。掩銀屏。理銀箏。一曲春風。都是斷腸聲。杜宇欲啼楊柳外。愁似海。思如雲。背燈暗卸乳鵝裙。酒初醒。夢初醒。蘭炷熏篝。誰為煖羅衾。二十四簾人悄悄。花影碎。月痕深。

趙與仁 字元父。號學舟。

柳梢青落桂

露冷仙梯。霓裳散舞。記曲人歸。月度層霄。雨連深夜。誰管花飛。地苔衣。似一片斜陽未移。生怕清香。又隨涼信。吹過東籬。金鋪滿

琴調相思引

冰箔紗簾小院清。暗塵不動地花平。昨宵風雨。涼到木犀屏。香月照妝秋粉薄。水雲飛。珮藕絲輕。好天良夜。閒理玉靴笙。

西江月

夜半河痕依約。雨餘天氣溟濛。起行微月徧池東。水影浮花。花影動簾櫳。量減難追醉白。恨長莫盡啼紅。鴈聲能到畫樓中。也要玉人。知道有秋

風。

王

奕

字伯敬。號斗山。玉山人。宋亡。又自號至元逸民。有集十二卷。梅丘雜詠七卷。皆散失。僅存東行

賀新郎 僕過魯自葛水買舟至維揚又自維揚買舟至孔林登泰山復還淮楚盡江山所歷之妙真所

謂茲行冠平生者也

有客過東魯。自葛水。泛舟西下。帆開三楚。萬里湖光磨水鏡。五老落星烟渚。又飛過。二姑門戶。彭澤柳青新舊色。望九華。依約池陽路。風雨廟。烏江羽。蛾眉牛渚皆如故。問緣何。魯港汀洲。江聲無語。采石書生勳業在。公子錦袍何處。流恨下。秦淮商女。多景樓頭吟北固。笑平山。堂裏誰爲主。且爛飲。瓊花露。

又

醉醒瓊花露。買扁舟。召伯津頭。向秦郵去。流水孤村鴉萬點。回首少游斜樹。又著訪。山陽酒侶。細剔留城碑藓看。上歌臺。一嘯江東主。望鳧繹。過鄒魯。孔林百拜瞻坐墓。歷曲阜。少皞之墟。大庭之庫。竟涉汶河登泰岱。夜半清光玄圃。迤邐門。東平歸路。□塚黃花吟笑罷。下新州。醉白樓頭賦。復淮楚。尋故步。

醉江月和辛稼軒金陵賞心亭

英雄老矣。對江山。莫遣淚珠成斛。一筵西風休掩面。白浪黃塵眯目。鳳去臺空。鷺飛洲冷。幾度斜陽木。欲書往事。南山應恨無竹。寧是商女當年。後來腔調。拍手銅鞮曲。偃蹇老松雖拗面。猶逞一杯殘局。烏巷垂楊。鵲橋野草。今爲誰家綠。賞心何處。浩歌歸臥梅屋。

臨江仙和元遺山題揚州平山堂

二十四橋明月好。暮年方到揚州。鶴飛仙去總成休。襄陽風笛急。何事付悠悠。
幾闋平山堂上酒。夕陽還照邊樓。不堪風景重回頭。淮南新棗熟。應不說防秋。

湯彌昌 字師言。瑞安州判官。有碧山類稿。

虞美人題水村圖卷趙文敏爲錢德鈞圖

翰林妙寫溪村趣。荷屋知何處。溪翁想像住溪灣。一笑如今家在畫圖間。
西風門掩蘆花溼。聊與漁樵伍。人間不信有張翰。翦取吳淞空向卷中看。

祝英臺近前題

染秋雲。圖澤國。野趣入游戲。能事何須。五日畫一水。重重楊柳陂塘。茅茨村落。蘆鄉外。西風漁計。
晚烟霽。有客乘扁舟。延緣度疎葦。欲訪幽居。宛在碧溪尾。浩然日送飛鴻。醉歌欵乃。溪光裏。亂山橫翠。

趙必瑑 官參軍僉書。

宴清都舟中思家用美成韻

遠遠漁村鼓。斜陽外。賓鴻二三兩飛度。茅簷春小。白雲隱几。青山當戶。騷人底事飄蓬。渾忘却。耕徒釣侶。何時尋。斗酒江鱸。悠悠千古重賦。風流種柳淵明。折腰五斗。身爲名苦。有秫田二頃。菊松三徑。不如歸去。山靈休勒俗駕。容我臥。草堂深處。問故園。怨鶴啼猿。今無恙否。

陳紀 咸淳進士。

賀新郎 聽琵琶

趁拍哀絃促。聽泠泠。絃間細語。手間推覆。鶯語間關花底滑。急雨斜穿梧竹。又澗底。松風簌簌。鐵撥鯤絃春夜永。對金釵。鍾乳人如玉。敲象板。翦銀燭。六么聲斷涼州續。悵梅花。歲晚天寒。佳人空谷。有限絃聲無限意。淪落天涯幽獨。頓喚起。閒愁千斛。賀老定場無處問。到如今。只鼓昭君曲。呼羯鼓。瀉醪醑。

楊澤民

有和清真詞一卷。

滿庭芳

春過園林。雨餘池沼。嫩荷點點輕圓。晝長人靜。芳樹欲生烟。一徑幽通邃竹。松風漱。石齒濺濺。平生志。功名未就。先覓五湖船。不如歸去好。良田二頃。茅舍三椽。任高歌月下。痛飲花前。果解忘情寄意。又何在。琴撫無絃。烟波客。扁舟過我。相伴白鷗眠。

陳先

好事近 石亭探梅

尋徧石亭春。點點暮山明滅。竹外小溪深碧倚。一枝寒月。淡雲疎雨苦無情。得折便須折。醉帽風鬟歸去。有餘香愁絕。

東從周

合肥人。

小重山 題依綠軒

楊柳絲絲兩岸風。前村溪路遠。小橋通。人家依約水西東。舟一葉。移過葦花叢。清景迥涵空。好山青未了。暮雲重。是誰驚起幾征鴻。天然趣。都在畫圖中。

李震 廬陵人。

賀新涼題高尚書夜山圖

樓據吳山背。倚高寒。塵飛不到。越山相對。老月騰輝羣動息。獨坐清分沆瀣。更滿聽。潮聲澎湃。醉裏詩成神鬼泣。景蒼涼。又在新詩外。渾忘却。功名債。憑誰妙筆能圖繪。羨中郎。前身摩詰。宛然心會。拈出清宵無限意。半幅溪藤光怪。方信有人間仙界。雲淡天低奇絕處。笑僧殊。未識丹青在。留此軸。誇千載。

李銓

點絳脣牡丹

十二紅闌。帝城穀雨初晴後。粉拖香逗。易惹春衫袖。把酒題詩。遐想歡如舊。花知否。故人消瘦。長憶同攜手。

陳從古 字洮湖。

蝶戀花芍藥

日借輕黃珠綴露。困倚東風。無限嬌春處。看盡嫣紅渾謾與。淡妝偏稱泥金縷。不共鉛黃爭勝負。殿後開時。故欲尋春去。去似朝霞無定所。那堪更著催花雨。

鄭子玉

八聲甘州慢草

漸鶯聲近也。探年芳。河畔柁輕輪。旋東風染綠。綿綿平野。無際烟春。最苦夕陽天外。愁損倚欄人。無奈瀟湘杳。留滯王孫。冷落池塘殘夢。是送君歸後。南浦銷魂。賴東君能容。醉臥展香裯。儘教更。行人遠也。相伴連水復連雲。關山道。算無今古。客恨長新。

章麗真 宋宮人。

長相思 送汪冰雲歸吳

吳山秋。越山秋。吳越兩山相對愁。長江不盡流。風颼颼。雨颼颼。萬里歸

人空白頭。南冠泣楚囚。

袁正真 宋宮人。

長相思 前題

南高峯。北高峯。南北高峯雲淡濃。湖山圖畫中。采芙蓉。賞芙蓉。小小紅

船西復東。相思無路通。

卷二十二 補人 金元詞六十七首

耶律楚材

字晉卿。遼東丹王後。入元累官中書省。贈太師。封廣寧王。諡文正。有湛然居士集。

鷓鴣天 題七真洞

花界傾頽事已遷。浩歌遙望意茫然。江山王氣空千劫。桃李春風又一年。

橫翠嶂。架寒烟。野花平碧。怨啼鶯。不知何限人間夢。併觸沉思到酒邊。

李俊民

字用章。澤州人。承安五年進士第一。應奉翰林文字。罷歸不出。金亡。元世祖欲官之。不可。卒。賜諡莊靖先生。有莊靖集。詞附。

洞仙歌謝楊誠之寄梅

隴頭瀟灑。辜負尋芳眼。浪蕊浮花問名懶。縱看看驛使。帶得春來。祇恐怕。綠葉成陰子滿。暗香無恙否。月落參橫。惆悵羅浮夢魂短。賴故人情重。不減西湖花一月。分我黃昏一半。更選甚。南枝與北枝。是一種春風待爭寒暖。

摸魚兒送姪謙甫出山

這光景。能銷幾度。大都數十寒暑。結廬人在山深處。萬壑千崑風雨。朝復暮。甚不管。堂堂背我青春去。高情自許。似野鶴孤雲。江鷗遠水。此興有誰阻。功名事。休歎儒冠多誤。韓顛彭蹶無數。一溪隔斷桃源路。只有人家雞黍。歌且舞。更不住。醉中時出烟霞語。暫來樵斧。貪看雨爭棋。人間不道。俯仰成今古。

謁金門探梅

誰便道。昨夜雪中開了。次第不將消息報。探芳人草草。宜在嫩寒清曉。興比孤山更好。籬落逢花須醉倒。惜花人易老。

滿江紅和張文玘

宿酒纔醒。聽喚起。一聲春曉。無限恨。滿城風絮。一川烟草。年少拋人容易

去。萬紅千紫都開了。試但教。頭上插花枝。花應笑。狂言在人絕倒。狂藥盡。愁難掃。待叮嚀。囑付。再來青鳥。團扇不堪題往事。斷絃惟恨知音少。但時時。頻把鏡來看。人將老。

點絳脣重陽菊間小酌同申元帥

秋樹風高。可憐憔悴門前柳。白衣去後。閒却持杯手。一笑相逢。落帽年時友。君知否。南山如舊。人比黃花瘦。

馮子振

字海粟。攸州人。仕爲承事郎。集賢院待制。自號瀛洲客。

鷓鴣天贈歌兒珠簾秀

十二闌干映遠眸。醉香空斷楚天秋。鰕鬚影薄微微見。龜背紋輕細細浮。香霧斂。翠雲收。海霞爲帶玉爲鈎。夜來捲盡西山雨。不著人間半點愁。

鷓鴣曲和白无咎韻

巍峩峯頂移家住。日暮見上下樵父。爛柯時樹老無花。葉葉枝枝風雨。故人會喚我歸來。却道不如休去。指門前萬疊青山。是不費青蚨買處。

黑漆弩正宮

錢塘初夏

錢塘江上親會住。司馬標不是村父。縷金衣唱徹流年。幾陣紗窗梅雨。夢回時不見犀梳。燕子又銜春去。便人間月缺花殘。是小小香魂斷處。

又溪山小景

長繩短繫虛名住。傾濁酒口勸鄰父。草亭前矮樹當門。畫出輕烟疎雨。看燕南陌上紅塵。馬耳北風吹去。一年年月夜花朝。自占取溪山好處。

白无咎

折桂令

傲裘塵土壓征鞍。鞭絲倦裊蘆花。弓劍蕭蕭。一徑入烟霞。動羈懷。西風木葉。秋水蒹葭。千點萬點。老樹昏鴉。三行兩行。寫長空。啞啞鴈落平沙。曲岸西邊。近水灣。漁網綸竿釣槎。斷橋東壁。傍溪山。竹籬茅舍。人家。滿山滿谷。紅葉黃花。正是淒涼時候。離人又在天涯。

許

謙

字益之。金華人。受業金履祥之門。累薦不起。至元二年卒。賜諡文懿。學者稱白雲先生。有白雲集。

蝶戀花 正月十一日

楊柳池塘春信早。簾卷東風。猶帶餘寒峭。暖透搏山紅霧繞。洞簫扶起歌聲杳。初試花冠金鳳小。鬢亂釵橫。長怯傍人笑。銀燭未殘樽未倒。雞聲漏永頻催曉。

張可久

字伯遠。號小山。慶元人。以路吏轉首領。有小山樂府二卷。

風入松 九日

哀箏一抹十三絃。飛雁隔秋烟。攜壺莫道登臨晚。雙雙燕。為我留連。仙客玲瓏玉樹。佳人窄索金蓮。琅琅新雨洗湖天。小景六橋邊。西風潑眼山如畫。有黃花。休恨無錢。細看茱萸一笑。詩翁健似當年。

人月圓 春日次韻

羅衣還怯東風瘦。不似少年游。匆匆塵世。看看鏡裏。白了人頭。片時春

夢十年往事。一點閒愁。海棠開後。梨花暮雨。燕子空樓。

又客吳江

三高祠下天如鏡。山色浸空濛。尊羹張翰。漁舟范蠡。茶竈龜蒙。故
人何在。前程莫問。心事誰同。黃花庭院。青燈夜雨。白髮秋風。

又吳門懷古

山藏金虎雲藏寺。池上老梅枝。洞庭歸興。香柑紅樹。鱸膾銀絲。白家亭
館。吳宮花草。可似當時。最憐人處。啼烏夜月。猶怨西施。

喬吉字夢符。太原人。有猩猩道人樂府一卷。

天淨沙

一從鞍馬西東。幾番衾枕朦朧。薄倖雖來夢中。爭如無夢。那時真箇相逢。
何繼高字左昌。至正八年進士。知嵩明州。

探桑子

醉歸那忍旋分手。竹屋燈明。石鼎茶聲。坐久聽來酒力輕。粉箋染就芙蓉
滑。小句初成。轉自淒清。寒逼春衫欲二更。

陳深字子微。吳郡人。與趙孟頫錢舜舉同時。

虞美人題玉環玩書圖

玉搔斜壓烏雲墮。敲枕看書臥。開元天子惜娉婷。一笑嫣然。何事便傾城。
馬嵬風雨歸時路。香骨銷黃土。多情誰寫畫圖中。江水江花。千古恨無窮。

趙 雍 字仲穆。文敏之子。官待制。

玉珥墜金環

乳燕交飛。曉鶯輕轉。花深處。畫堂簾幕。捲東風。晴雪飄香絮。猶記當時院宇。悄寒輕。梨花暮雨。繡衾同夢。鴛枕雙欹。綠窗低語。春已闌珊。落紅飄滿西園路。強拈針線。解春愁。只是無情緒。無奈年華暗度。黛眉顰。愁腸萬縷。章臺人遠。芳草和烟。萋萋南浦。

攤破浣溪沙

春草萋萋綠漸濃。梨花落盡晚來風。試問相逢何處好。小樓東。朱箔影移無限恨。玉簫聲轉曲將終。獨倚闌干誰是伴。月明中。

水調歌頭

春色去何急。春去尙微寒。滿地落花芳草。漸覺綠陰圓。馬足車輪情味。暑往寒來歲月。擾擾十餘年。贏得朱顏老。孤負好林泉。寶妝鞍。金作韉。玉爲鞭。須臾得志。紛華滿眼縱相漫。功名自來無意。富貴浮雲何濟。於我亦徒然。萬事付一笑。莫放酒盃乾。

江城子

仙肌香潤玉生寒。悄無言。思綿綿。無限柔情。分付與春山。青鳥能傳雲外信。憑說與。帶圍寬。花梢新月幾時圓。再團圓。是何年。可是當初。真箇兩無緣。極目故人天際遠。多少恨。凭闌干。

浣溪沙

楊柳樓臺鎖翠烟。楊花簾幕撲香綿。佳人何處隔江山。芳草已生千里恨。玉笙吹徹五更寒。夜深和淚倚闌干。

憶秦娥

春寂寂。重門半掩梨花白。芳心如醉。暗思當日。金釵欲墮烏雲側。佳人望斷天涯客。今年又過清明寒食。

人月圓

人生能幾渾如夢。夢裏奈愁何。別時猶記。眸盈秋水。淚濕春羅。綠楊臺榭。梨花院宇。重想經過。水遙山遠。魚沉雁杳。分外情多。

燭影搖紅

新綠成陰。落紅如雨。春光晚。當年誰與種。相思空羨雙飛燕。寂寞幽窗孤館。念同遊。芳郊秀苑。香塵隨馬。細草承輪。都成腸斷。別久情深。幾時重約。閒庭院。高樓終日卷朱簾。極目愁無限。莫恨藍橋路遠。有心時。終須再見。休教長怨。鏡裏孤鸞。篋中團扇。

王

璉

字國器。吳興人。趙文敏壻。

菩薩蠻題黃子久溪山雨意圖

青山不趁江流去。數點翠收林際雨。漁屋遠模糊。江村半有無。一峯飛醉墨。秋與天爭碧。淨洗綺羅塵。一巢棲亂雲。

踏莎行休髮

寶鑑凝膏。溫泉流膩。瓊纖一把青絲墜。冰膚淺漬麝煤春。花香石髓和雲

洗。玉女峯前。咸池月底。臨風細把犀梳理。陽臺行雨乍歸來。羅巾猶帶瀟湘水。

又破窗風雨為性初徵君賦

潤逼疎櫺。寒便芳秋。梨花寂寞重門閉。檢書剪燭話巴山。秋池回首人千里。記得彭城。逍遙堂裏。對牀夢破簷聲碎。林鳩呼我出華胥。恍然枕石聽流水。

歐陽玄

字原功。瀏陽人。從張貫之學。延祐元年。以尚書與貢。明年賜進士。累官翰林學士承旨。進階光祿大夫。追封楚國公。謚曰文。有圭齋集。

漁家傲

五月都城猶衣袂。端陽蒲酒新開臘。月傍西山青一搯。荷花夾。西湖近歲過茗雪。血色金羅輕汗掇。宮中盡扇傳油法。雪腕綵絲紅玉甲。添香鴨。涼糕時候秋生榻。

又

八月都城新過雁。西風偏解驚游宦。十載辭家衣線綻。清宵半。家家擣練砧聲亂。等待中秋明月翫。客中只作家中看。秋草牆頭螢火暗。疎鐘斷。鄰雞喚起情何限。

又

十月都城家百蓄。霜菘雪韭冰蘆菹。暖炕煤爐香豆熟。燔獐鹿。高昌家賽羊頭福。貂袖豹祛銀鼠襖。美人來往氈車續。花戶油窗通曉旭。回寒燠。

梅花一夜開金屋。

孟昉 字天偉。本西域人。寓北平。至正中。為翰林待制。官至江南行臺監察御史。

天淨沙

上樓迎得春歸。暗黃著柳依依。弄野輕寒似水。錦牀鴛被。夢回初日遲遲。

又

依微香雨青氛。金塘閒水生蘋。數點殘芳墮粉。綠莎輕襯。月明空照黃昏。

舒頔 字道原。績溪人。元台州學正。世亂居華陽山中。自號華陽逸者。有華陽真素先生文集。附詞。

太常引

山色共承宣。君秩滿。我遲延。幾度醉花前。會怪殺。春山杜鵑。菱花再照。

鸞膠再續。應笑雪盈顛。深夜語。嬋娟。也會是。都門少年。

風入松

紗廚過雨晚涼生。枕簟不勝情。冰肌玉骨元無汗。香風迥。深院語流鶯。翠

幌光搖絳蠟。畫堂暖瀉銀蛩。玉箏牙板按新聲。雲髻寶釵橫。銀絲膾細

江鱠脆。揚州月。照我醉吹笙。舊事十年猶記。壯懷此日堪驚。

舒遜 字士謙。號可庵。績溪人。真素先生之弟。

感皇恩

疎雨滴清秋。洗殘流火。爽動涼飈。透簾幙。寒蛩吟徹。誰道小窗蕭索。青燈

相伴我。情依約。螢照更殘。烏啼月落。悲壯山城數聲角。漫漫長夜。扣角

長歌方覺。人生能有幾。須行樂。

劉忠之

太常引送郭復齋

少年南北快飛騰。身到處。有佳聲。甞社化纔行。又出使。餘杭故城。春風滿路。堤邊楊柳。難繫去留情。何處望雙旌。泛千里。孤舟月明。

何可視 字思明。嘉興人。值元末世亂。不仕。自號爛柯樵者。

蝶戀花送春

金井啼鴉深院曉。颺盡東風。柳絮吹難了。燕子多情相識早。杏梁依舊雙雙到。一縷沉烟簾幕悄。滿眼飛花。祇攬人懷抱。十二玉樓春樹杪。天涯不斷青青草。

玉樓春

鄰雞喔喔晨窗白。檐樹深沉初辨色。鴛鴦瓦上露溶溶。翡翠簾邊風瑟瑟。小樓一半屏山隔。不減銀缸通照夕。還鄉好夢却忘愁。夢破那堪仍在客。

袁華 字子英。崑山人。

水調歌頭宴顧仲瑛金粟影亭賦桂

山橫眉黛淺。雲擁髻鬟愁。天香笑攜滿袖。曾向廣寒游。素腕光搖寶釧。金縷聲停象板。歌罷不勝秋。十指露春筍。佯整玉搔頭。記錢塘。朝載酒。夜藏鈎。青衫斷腸司馬。消滅舊風流。三百六橋春色。二十四番花信。重會在蘇州。水調按新曲。明月照高樓。

于立 字彥成。南康人。學道會稽山中。與顧仲瑛友善。

水調歌頭前題

微紅暈雙臉。濃黛寫新愁。好似霓裳仙侶。會向月中游。憶得影娥池上。金粟盈盈滿樹。風露九天秋。折取一枝去。簪向玉人頭。夜如年。天似水。月如鉤。只恐芳時暗換。脈脈背人流。莫唱竹西古調。喚醒三生杜牧。遺夢繞揚州。醉跨青鸞去。雙闕對瓊樓。

陸仁 字良貴。河南人。

水調歌頭前題

露冷廣寒夜。喚醒玉真愁。銀橋憶得飛度。會侍上皇游。一曲霓裳按罷。兩袖天香歸後。人去已千秋。笑倚金粟樹。斜插玉搔頭。憶錢塘。今夜月。也如鉤。題詩欲寄紅葉。又怕水西流。誰把琵琶彈恨。愁絕多情司馬。不是在江州。醉飲玉山裏。有霧繞飛樓。

張遜

水調歌頭前題

玉樹後庭曲。千載有餘愁。碧月夜涼人靜。會賦采華游。玉露細搖金縷。香霧輕籠翠葆。折下一天秋。張緒總能老。還自鎖眉頭。把鸞箋。裁繡句。寫銀鈎。回文巧成錦字。長恨與江流。漠漠梁間燕子。款款花邊蝴蝶。夢覺却并州。獨感舊時貌。還復照西樓。

石民瞻 京口人。

清平樂題桐花道人吳國良卷

吳郎丰度。邂逅春城暮。暖日晴雲花滿樹。恰似故人詩句。坐中翔鳳飛霞。來尋弄玉仙家。說與江州司馬。淚痕只為琵琶。

鄭 韶 字九成。吳興人。

清平樂次前韻

湘雲微度。六曲朱欄暮。簾外香飄梅子樹。知有王孫索句。誰將瓊瑋吹霞。柳花飛過東家。說與門前去馬。斷腸休為琵琶。

柯九思 字敬仲。號丹丘。天台人。

柳梢青詠梅

懊恨春初。飄零月下。輕離輕隔。重醞梨雲。年舒椒眼。羞人會識。已堪索笑巡檐。早準備憐憐惜惜。莫是溪橋。攬先開却。試馳金勒。

王 逢 字原吉。江陰人。至正中。作河清頌。臺臣薦之。稱疾不起。有梧溪集七卷。

如夢令菰村賦贈

簷聳數株松子。村繞一灣菰米。鷗外迴聞雞。望望雲山烟水。多此多此。酒進玉盤雙鯉。

何景福 字介夫。淳安人。別號鐵牛翁。至正末。遭亂不仕。有介夫文集四卷。詞附。

虞美人別魯道源

三年奔走荒山道。喜說苕溪好。苕溪秋水漫悠悠。載將離恨上杭州。干戈未已身如寄。安樂知何處。青溪溪上釣魚磯。縱使無魚還有蟹螯肥。

錢抱素 字素菴。南金之兄。

臺城路次邵復孺韻

碧雲深處遙天暮。經年雁書沉影。雨散梅魂。風醒草夢。還見春回鄉井。花
明柳暝。念賈閣香空。謝池詩冷。流水斜陽。舊游那是舊風景。懷思橫御
雅趣。故人吟嘯裏。得意酬領。譜綴臺城。緘傳禱水。肯把俊游重省。憑高倚
迥。縱老興猶濃。不堪馳騁。隔斷相思。浦潮波萬頃。

春草碧

客窗閒理清商譜。彈到斷腸聲。傷今古。自憐素髮無多。猶記紋疏夜深語。
空剩舊時踪。迷南浦。梨花燕子清明。誰家院宇。沒箇好情懷。杯慵舉。天
涯行李蕭蕭。還是新愁老羈旅。那更落花深。紅似雨。

瑣窗寒 題玉山草堂

書帶生香。忘憂弄色。四窗虛悄。茅茨淨覆。棟宇洗空。文藻捲珠簾。雨痕暮
收。綺羅靜隔紅塵島。對紙屏素榻。拂潭烟樹。掃簷風篠。深窈。西園曉。似
日照爐峯。數聲啼鳥。瑤蓮倚蓋。曉水靚妝。孤裊浣花溪。尚餘舊春。穠芳賸
馥吟未了。望東林。小徑斜通。夢約香山老。

吳 瓘 字瑩之。又號竹莊人。

柳梢青

牆角孤根。株身纖小。嬌羞無力。蟹眼微紅。粉容未露。不禁春色。待東君
汨沒芳姿。漸迤邐。檀心半坼。緩步迴廊。黃昏淡月。那時相得。

錢應庚 字南金。

八聲甘州倚和邵復孺

折蘭難寄遠。渺汀蒲。烟柳思依依。甚檐花聽斷。騷章歌罷。此意誰知。滿眼孤村流水。腸斷去年時。過了重陽日。重問歸期。同是天涯羈旅。嘆湘靈鼓瑟。笑我全非。九江風雨外。客有澹忘歸。正木杪。寒情愁予。又吳潮。吹上竹枝詞。西窗夜。待剪燈深坐。却話相思。

隔浦蓮近拍水檻對雨

緋榴開滿露井。竹映琅玕瑩。幔捲方池雨。微微落飛檐影。荷蓋擎萬柄。明妝靚。浪破魚吹鏡。翠禽並。梅風乍起。桃笙微帶新潤。瀟湘舊夢。喚我綠蓑歸興。憑徧闌干。暗自省。人靜。夕陽移下清景。

春草碧 次韻酬復孺

折衝尊俎談兵略。還記五湖船。烟波約。東鄰有客歸來。應訝山翁瘦如鶴。問訊舊玄都。今非昨。當年錦里依稀。青山似削。天地一蓬廬。從栖泊。西園長記前遊。乘興重來看蘭藥。白首友于情。同憂樂。

臺城路寒食後雨軒獨坐次復孺韻

一庭芳草閒春晝。疎疎弄簾花影。鼓子風暄。苔痕雨潤。還聽鳴蛙喧井。沉吟坐暝。正綺席杯空。蕙爐烟冷。老去無情。好春不減舊芳景。天涯誰念倦旅。閉門風雨意。獨自難禁。南浦歌長。西堂夢遠。往事不堪追省。滄浪望迥。記那日歸舟。此懷猶騁。莫倚危樓。亂紅愁萬頃。

王蒙 璉之子。字叔明。別號黃鶴山樵。

憶秦娥

花如雪。東風夜掃蘇堤月。蘇堤月。香銷南國。幾回圓缺。
錢塘江上潮聲歇。江邊楊柳誰攀折。誰攀折。西陵渡口。古今離別。

陸祖先

菩薩蠻題趙松雪水村圖

當年圖畫知何處。如今身向滄洲住。吾亦愛吾廬。芸窗幾卷書。
青山天際小。日送飛鴻杳。試問釣魚船。蘆花淺水邊。

王燧 吳人。

臺城路題楚江秋曉

黃陵廟下瀟湘浦。依稀少年羈旅。夢澤風生。渚宮花落。收盡峽雲巫雨。長
天帶水。正日出三竿。客船猶艤。回望蒼蒼。秋光都在白蘋渚。流年暗驚
易度。向畫中空見。舊遊如許。鼓瑟人遙。紉蘭事往。誰折芳馨寄與。銷魂凝
竚。待收拾閒情。寫成新句。心與鷓鴣飛。空江烟浪裏。

張昞 嘉興人。

踏莎行破窗風雨爲性初徵君賦

簷宿吳雲。風經楚袂。門深不似春宵閉。碧疏吹霽濕燈花。客鄉無夢尋珂
里。剪韭吟邊。聽潮浪裏。江懸漏杳歸心碎。相思鳩外綠蓑寒。一簾蕉響
秋如水。

金 網 嘉興人。

踏莎行前題用韻

草帶殘編。荷衣斷袂。破窗風雨深深閉。江南倦客正思家。堠花搖夢來鄉里。翠竹簷前。碧蕉叢裏。秋聲鬪合愁心碎。不教潘鬢總成霜。也應有淚如鉛水。

王容溪

如夢令

林下一溪春水。林上數峯嵐翠。中有隱居人。茅屋數間而已。無事無事。石上坐看雲起。

夢 庵

齊天樂題燕文貴楚江秋曉卷

曉風吹醒篷窗夢。驚心斷魂潮尾。深鬢蕭蕭。秋烟黯黯。殘月漸看西墜。披衣乍起。對萬頃蒼茫。半空飛露。曙色纔分。巫山隱隱掃晴翠。行舟此際競發。歎還吳適楚。盡趨名利。投老襟懷。思鄉情緒。慵賦天涯羈旅。鷗汀雁渚。記彷彿當年。暗經行處。今日披圖。舊遊如夢裏。

無名氏

憶秦娥

花蹊側。秦樓夜訪金釵客。金釵客。江梅風韻。海棠顏色。尊前醉倒君休惜。河橋去後空相憶。空相憶。山長水遠。幾時見得。

管道昇 字仲姬。趙子昂室。

漁父詞

遙想山堂數樹梅。凌寒玉蕊發南枝。山月照。曉風吹。只為清香苦欲歸。

卷三十四補詞 宋詞五十七首

謝 絳

訴衷情宮怨

銀缸夜永影長孤。香草續殘爐。倚屏默默無語。粉淚不成珠。雙粲枕。百嬌壺。憶當初。君恩莫似。秋葉無情。欲向人疎。

晏幾道

更漏子

檻花稀。池草徧。冷落吹笙庭院。人去日。燕西飛。燕歸人未歸。數書期。尋夢意。彈指一年春事。新悵望。舊悲涼。不堪紅日長。

又

柳絲長。桃葉小。深院斷無人到。紅日淡。綠烟晴。流鶯三兩聲。雪香濃。檀暈少。枕上臥枝花好。春思重。曉妝遲。尋思殘夢時。

兩同心

楚鄉春晚。似入仙源。拾翠處。閒隨流水。踏青路。暗惹香塵。心心在柳外青帘。花下朱門。對景且醉芳尊。莫話銷魂。好意思。會同明月。惡滋味。最是

黃昏。相思處。一紙紅箋。無限啼痕。

張先

卜算子

夢短寒夜長。坐待清霜曉。臨鏡無人爲整妝。但自學孤鸞照。樓臺紅樹杪。風月依前好。江水東流郎在西。問尺素何由到。

燕歸梁

去歲中秋玩桂輪。河漢淨無雲。今年江上共瑤尊。都不是。去年人。水晶宮殿。琉璃臺閣。紅翠兩行分。點脣微破秀眉顰。清影外。見歌塵。

怨王孫

花暮春去。都門東路。嘶馬將行。江南江北。十里五里郵亭。幾程程。高城漸遠重凝睇。烟容細。晚碧空無際。不知今夜。何處冷落衾幃。欲眠時。

晁補之

洞仙歌

江陵種橘。尙比封侯貴。何況江濤轉千里。帶天香。含洞乳。宜入春盤。紅荔子。馳驛風流僅比。齒疎潘令老。怯咀冰霜。十顆金苞謾分遺。觴前須細認。別有餘甘。從今去。枉却栽桃種李。想相如。酒渴對文君。迥不是人間等閒風味。

又

溫江異果。惟有泥山貴。驛送江南數千里。半含霜。輕噴霧。會怯吳姬。親贈

我綠橘黃柑怎比。雙親雲水外。游子空懷。惆悵無人可歸遺。報周郎。須念我。物少情多。春酒醉。獨勝甜桃醋李。况燈火。樓臺近元宵。似不減年時。袖中香味。

賀鑄

思越人

重過閭門萬事非。同來何事不同歸。梧桐半死清霜後。頭白鴛鴦失伴飛。原上草露初晞。舊栖新壘兩依依。空牀臥聽南窗雨。誰復挑燈夜補衣。

好女兒

車馬匆匆。會國門東。信人間。自古銷魂處。指紅塵北道。碧波南浦。黃葉西風。埃館娟娟新月。從今夜。與誰同。想深閨。獨守空牀思。但頻占鏡鵲。悔分釵燕。長望書鴻。

浣溪沙

鸚鵡無言理翠衿。杏花零落畫陰陰。畫橋流水一篙深。芳徑與誰同鬪草。繡牀終日罷拈針。小箋香管寫春心。

又

烟柳春梢蘸暈黃。井欄風綽小桃香。覺時簾幙又斜陽。望處定無千里目。斷來能有幾回腸。少年禁取恁淒涼。

又

秋水斜陽繞綠陰。平山隱隱隔橫林。幾家村落幾聲砧。記得西樓凝醉

眼。昔年風物似而今。只爲人與共登臨。

山花子 彈箏

錦鞦朱絃瑟瑟微。玉纖新擬鳳雙飛。縹緲燭烟花幕暗。就更衣。約略整
鬟釵影動。遲回顧步珮聲微。宛是春風蝴蝶舞。帶香歸。

惜雙雙

皎鏡平湖三十里。碧玉山圍四際。蓮蕩香風裏。綵鴛鴦覺雙飛起。明月
多情隨舵尾。偏照空牀翠被。回首笙歌地。醉更衣處長相記。

厭金盃

風軟香遲。花深漏短。可憐宵。畫堂春半。碧紗窗影。卷帳蠟燈紅。鴛枕畔。密
寫烏絲一段。採蘋溪晚。拾翠沙空。儘愁倚。夢雲飛觀。木蘭艇子。幾日渡
江來。心目斷。桃葉青山隔岸。

下水船

芳草青門路。還拂京塵東去。回想當年。離聲送君南浦。愁幾許。樽酒留連
薄暮。簾捲津樓烟雨。凭欄語。草草蘅臯賦。分首驚鴻不駐。燈火紅橋。難
尋弄波微步。謾凝佇。莫怨無情流水。明日扁舟何處。

踏莎行 荷花

楊柳回塘。鴛鴦別浦。綠萍漲斷蘭舟路。斷無蜂蝶慕幽香。紅衣脫盡芳心
苦。返照迎潮。行雲帶雨。依依似與騷人語。當年不肯嫁東風。無端却被
秋風誤。

定風波桃

牆上天桃。款款紅。巧垂飛絮入簾櫳。自是芳心貪結子。翻使惜花人恨五更風。露萼鮮濃。妝臉靚。相映隔年情事此門中。粉面不知何處在。無奈。武陵流水卷春空。

鶴冲天

萼萼鼓動。花外沉殘漏。華月萬枝燈。還清晝。廣陌衣香度。飛蓋影。相先後。個處頻回首。錦坊西去。期約武陵溪口。當時早恨歡難偶。可堪流浪遠。分攜久。小畹蘭英。在輕付與。何人手。不似長亭柳。舞風眠雨。伴我一春銷瘦。

清平樂

陰晴未定。薄日烘雲影。臨水朱門花一徑。渡口鳥啼人靜。厭厭幾許春情。可憐老去蘭成。看取鑷殘雙鬢。不隨芳草重生。

木蘭花

銀簧雁柱香檀撥。鏤板三聲催細抹。舞腰輕怯絳裙長。羞按築球花十八。東城柳岸匆匆發。畫舫一篙烟水闊。可憐單枕欲眠時。還見尊前前夜月。

新念別詠梅花

湖上蘭舟暮發。揚州夢斷燈明滅。想見瓊花開似雪。帽簷香。玉纖纖。會爲折。漁管吹還咽。問何意煎人愁絕。江北江南新念別。掩芳樽。與誰同。今

夜月。

南柯子別思

斗酒才供淚。扁舟只載愁。畫橋青柳小朱樓。猶記出城車馬。爲遲留。有恨花空委。無情水自流。河陽新鬢儘禁秋。蕭散楚雲巫雨。此生休。

舒 亶

一落索長春花

葉底枝頭紅小。天然窈窕。後園桃李謾成蹊。能占得。春多少。不管雪消霜曉。朱顏長好。年年若許醉花間。待拚了。花間老。

王 詵

行香子蓼花

金井先秋。梧葉飄黃。幾回驚覺夢初長。月微烟淡。疎雨池塘。漸蓼花明。菱花冷。藕花香。幽人已慣。枕單衾冷。任商飈催換年光。問誰相伴。終日清狂。有竹間風。樽中酒。水邊牀。

周紫芝

卜算子和王彥猷

霜葉下孤篷。船在垂楊岸。早是淒涼惜別時。更惜年華換。別酒解留人。拚醉君休管。醉裏朱絃莫謾彈。愁入參差雁。

晁端禮

鷓鴣天茶蘼

紅紫飄零綠滿城。春風於此獨留情。誰將十幅吳綾被。撲向熏籠一夜明。
風不定。雨初晴。曉來苔上拾殘英。速教貯向鴛鴦枕。猶有餘香入夢清。
万俟雅言

尉遲杯慢李花

碎雲薄。向碧玉。枝上綴萬萼。如將汞粉勻開。疑使柏麝熏却。雪魄未應。若
况天賦標豔。仍綽約。當暄風暖日佳處。戲蝶游蜂黏著。重重繡帟珠箔。
障穠豔霏霏。異香漠漠。見說徐妃。當年嫁了。信任玉鈿零落。無言自啼露
蕭索。夜深待。月上闌干角。廣寒宮。要與姮娥。素妝一夜相學。

呂渭老

燕歸梁

樓外東風杜宇聲。雙枕細眉顰。女郎番馬小山屏。金籠冷夢魂驚。起來
重綰雙羅髻。無箇事。淚盈盈。楊花蝴蝶亂分身。飛不定。暮雲晴。

木蘭花慢

石榴花謝了。正荷葉。蓋平池。試瑪瑙杯深。琅玕簟冷。臨水簾帷。知他故人
甚處。晚霞明。斷浦柳枝垂。唯有松風水月。向人長似當時。依依望斷水
窮。雲起處。是天涯。奈燕子樓高。江南夢斷。虛費相思。新愁暗生。舊恨更流
螢。弄月入紗衣。除却幽花軟草。此情未許人知。

豆葉黃

輕羅團扇掩微羞。酒滿玻璃花滿頭。小板齊聲唱石州。月如鉤。一寸橫波

入鬢流。

趙鼎

賀聖朝

斷霞收盡黃昏雨。滴梧桐。疎樹。簾櫳不捲。夜沉沉。鎖一庭風露。天涯人
遠。深期夢悄。苦長宵。難度。知他窗外。促織兒。有許多言語。

李彌遜

念奴嬌 坐上次王伯開韻

風簾弄影。正閒堂永晝。香銷人寂。軋軋鄰機芳思亂。愁入回文新織。燕蹴
巢泥。鶯喧庭柳。好夢無蹤跡。那堪春事。背人何計留得。誰似愛酒南鄰。
岸巾坦腹。醉踏西山碧。綵筆陽春傳雁足。催我飛觴浮白。老去情懷。憑君
試看。鬢上秋霜色。故園千里。月華空照相憶。

水調歌頭 次向伯恭薊林見寄

不見隱君子。一月比三秋。驚濤如許。夢魂無路絕橫流。安得如雲長翮。命
駕不須千里。上下逐君遊。此計杳難就。注目倚江樓。西風裏。多少恨。寄
歌頭。飛奴接翼。爲我三度下南州。三得伯恭佳詞正是天寒日暮。獨酌一江殘
雪。風獵碧莎裘。和子浩然句。一醉散千憂。

花心動 七夕

水館風亭。晚香濃。一番芰荷經雨。簟枕乍閒。襟裾初試。散盡滿軒衽暑。斷
雲却送輕雷去。疎林外。玉鈎微吐。夜未闌。秋生敗葉。暗催庭樹。天上佳

期久阻。星河畔。仙車縹緲雲路。舊恨未平。幽歡難駐。灑落半天風露。綺羅人散。金猊冷。醉魂到。華胥深處。洞房悄。南樓畫角自語。

蝶戀花 福州橫山閣

百疊青山江一縷。十里人家。路繞南臺去。榕葉滿川飛白鷺。疎簾半捲黃昏雨。樓閣崢嶸天尺五。荷芰風清。習習消袞暑。老子人間無著處。一樽來作橫山主。

天仙子 次富季中韻

飛蓋追春春約佇。繁杏枝頭紅未雨。小樓翠幕不禁風。芳草路。無塵處。明月滿庭人欲去。一醉隣翁須記取。見說新妝桃葉女。明年却對此花時。留不住。花前語。總向似花人付與。

朱 翌

朝中措 五月菊

玉臺金盞對炎光。全似去年香。有意莊嚴端午。不應忘却重陽。菖蒲九葉。金英滿把。同泛瑤觴。舊日東籬陶令。北窗正臥羲皇。

張元幹

臨江仙 茶蘼

鶯喚屏山驚睡覺。嬌羞須索。郎扶茶蘼斗帳冷。熏爐翠穿珠落。索香淨玉流蘇。長記枕痕消醉色。日高猶倦。妝梳一枝春瘦。想如初。夢迷芳草路。望斷素鱗書。

劉子翬

滿庭芳 桂花

秋入微陰。涼生平遠。小山愁絕天南。似聞還斷。飛策徧千岩。葉底輕黃纂纂。惱人是。微裂方絨。脩然勝。清真冷淡。無豔寄塵凡。澄潭敲兩岸。波光搖動。碧影相參。任西風十里。吹度松杉。我自寒灰槁木。凝神處。不覺熏酣。歸來晚。飛花無迹。明月滿空涵。

張 掄

西江月 瑞香花

剪就碧雲鬪蕊。刻成紫玉芳心。淺春不怕峭寒侵。煖徹熏籠瑞錦。花裏清芬獨步。尊前勝韻難禁。飛香直到玉杯深。消得厭厭夜飲。

朱敦儒

桂枝香 南都病起

春寒未定。是欲近清明。雨斜風橫。深閉朱門盡日。柳搖金井。年光自趁飛花緊。奈幽人。雪添雙鬢。謝山攜妓。黃壚貰酒。舊愁慵整。念壯節。漂零未穩。負九江風笛。五湖烟艇。起舞悲歌淚眼。自看清影。新鶯又向愁時聽。把人間。如夢深省。舊溪鶴在。尋雲弄水。是事休問。

醉落魄 泊舟津頭有感

海山翠疊。夕陽殿雨雲堆雪。鷓鴣聲裏蠻花發。我共扁舟。江上雨萍葉。東風落酒愁難說。誰教春夢分吳越。碧城芳草應消歇。曾識劉郎。唯有半

彎月。

卜算子

碧瓦小紅樓。芳草江南岸。雨後紗窗幾陣寒。零落梨花晚。看到水如雲。送盡鴉成點。南北東西處處愁。獨倚闌干徧。

候 寘

四犯令

月破輕雲天淡注。夜悄花無語。莫聽陽關牽離緒。拚酩酊。花深處。明日江郊芳草路。春逐行人去。不似酴醾開獨步。能著意。留春住。

漁家傲

過盡百花芳草滿。柳絲舞困闌干暖。柳外鞦韆裙影亂。人逐伴。舊家心性如今懶。斗帳寶香凝不散。黃昏院落鶯聲晚。紅葉不來音信斷。疎酒盞。東陽瘦損無人管。

又小舟發臨安

本是瀟湘漁艇客。錢唐江上鋪帆席。兩處烟波天一色。雲羃羃。吳山不似湘山碧。休費精神勞夢役。鷗鳧難上銅駝陌。擾擾紅塵人似織。山頭石。潮生月落今如昔。

辛棄疾

金縷曲

柳暗凌波路。送春歸。猛風暴雨。一番新綠。千里瀟湘葡萄漲。人解扁舟欲

去。又檣燕留人相語。艇子飛來生塵步。唾花寒。唱我新翻句。波似箭。鳴柔櫓。黃陵祠下山無數。聽湘娥。泠泠曲罷。爲誰情苦。行到東吳春已暮。江闊潮平穩渡。望金雀。觚稜細舞。前度劉郎今重到。問玄都。千樹花存否。愁爲倩。么絲訴。

鷓鴣天

陌上柔桑破嫩芽。東鄰蠶種已生些。平岡細草鳴黃犢。斜日寒林點暮鴉。山遠近。路橫斜。青旗沽酒有人家。城中桃李愁風雨。春在溪頭薺菜花。

又

山上飛泉萬斛珠。懸崖千丈落毚毚。已通樵徑行還礙。似有人聲聽却無。閒略約。遠浮屠。溪南修竹有茅廬。莫嫌杖履頻來往。此地偏宜著老夫。

西江月夜行

明月別枝驚鵲。清風半夜鳴蟬。稻花香裏說豐年。聽取蛙聲一片。七八箇星天外。兩三點雨山前。舊時茅店社林邊。路轉溪頭忽見。

河傳

春水千里。孤舟浪起。夢攜西子。覺來村巷夕陽斜。幾家短牆紅杏花。晚雲做造些兒雨。折花去。岸上誰家女。太狂顛。那邊柳綿。被風吹上天。

酒泉子

流水無情。潮到空城頭盡白。離歌一曲怨殘陽。斷人腸。東風官柳舞雕牆。三十六宮花濺淚。春聲何處說興亡。燕雙雙。

片帆何太急。望一點。須臾去天咫尺。舟人好看客。似三峽風濤。嵯峨劍戟。溪南溪北。正遐想。幽人泉石。看漁樵指點。危樓却羨。舞筵歌席。歎息山林鐘鼎。意倦情遷。本無欣戚。轉頭陳迹。飛鳥外。晚烟碧。問誰憐舊日。南樓老子。最愛月明吹笛。到而今。撲面黃塵。欲歸未得。

洞仙歌

飛流萬壑。共千巖爭秀。孤負平生弄泉手。歎輕衫衰帽。幾許紅塵。還自喜。濯髮滄浪依舊。人生行樂耳。身後虛名。何似生前一盃酒。便此地結吾廬。待學淵明。更手種門前五柳。且歸去。父老約重來。問如此青山。定重來否。

卷三十五補詞

宋詞五十五首

程垓

玉漏遲

一春渾不見。那堪又是。花飛時節。忍對危欄。數曲暮雲千疊。門外星星柳眼。看誰似。當時風月。愁萬結。憑誰爲我。慙懃低說。不是慣却春心。奈新燕傳情。舊鶯饒舌。冷篆餘香。莫放等閒消歇。縱使繁紅褪盡。猶有。酴醿堪折。魂夢切。不奈飛來蝴蝶。

鳳棲梧

有客錢塘江上住。十日齋居。九日愁風雨。斷送一春彈指去。荷花又繞南山渡。湖上幽尋君已許。消息不來。望得行雲暮。芳草夢魂應記取。不成忘却池塘句。

謁金門

濃睡醒。驚對一簾秋影。梧葉乍零風不定。半窗疎雨影。愁與年光不盡。人老星星雙鬢。只擬上樓尋遠信。雁遙烟水暝。

韓元吉

浪淘沙芍藥

鶉鴝怨花殘。誰道春闌。多情紅藥待君看。濃淡曉妝新意態。獨占西園。風葉萬枝繁。猶記平山。五雲樓映玉成盤。二十四橋明月下。誰凭朱欄。

京鏗

滿江紅中秋前同一使者賞月

乘興西來。問誰是。平生相識。算惟有。瑤臺明月。照人如昔。萬里清涼銀世界。放教千丈冰輪出。便招邀。我輩上層樓。橫孤笛。陰晴事。人難必。歡樂處。天常惜。幸星稀河澹。雲收風息。更著兩賢陪勝賞。此身如與塵寰隔。笑謫仙。對影足成三。空孤寂。

劉克莊

摸魚兒海棠

甚春來。冷烟淒雨。朝朝遲了芳信。驀然乍暖晴三日。又覺萬株嬌困。天怎

忍。潘令老。不成也。沒看花分。才情減盡。悵玉局飛仙。石湖絕筆。辜負這春韻。傾城色。懊惱佳人薄命。牆頭岑寂。誰問東風日暮。無聊賴。吹得胭脂成粉。君細認。花共酒。古來二事天尤吝。年光去迅。謾綠葉成陰。青苔滿地。做取異時恨。

卜算子 海棠爲風雨所敗

片片蝶衣輕。點點猩紅小。道是天工不惜花。百種千般巧。朝見樹頭繁。暮見枝頭少。道是天工果惜花。雨洗風吹了。

長相思 錢別

風瀟瀟。雨瀟瀟。相送津亭折柳條。春愁不自聊。烟迢迢。水迢迢。準擬江邊駐畫橈。舟人頻報潮。

吳 琚

浪淘沙

雲葉弄輕陰。屋角鳩鳴。青梅著子欲生仁。冷落江天寒食雨。花事關情。池館晝盈盈。人耐寒輕。一川芳草只銷凝。時有入簾新燕子。明日清明。

趙彥端

祝英臺

獸金寒。簾玉潤。梅雪印苔絮。春意如人。易散苦難聚。幾多絲竹深情。池塘幽夢。猶倚賴。與君同住。舊游處。誰喚別浦仙帆。風前問征路。烟雨連江。吹恨正無數。莫教紫燕歸來。紅雲開後。空悵望。玉人輕去。

月中桂送杜仲微赴闕

露醕無情。送長歌未終。已醉離別。何如暮雨。釀一襟涼潤。來留佳客。好山
侵坐碧。勝昨夜。疎星淡月。君欲翩然去。人間底許。負嶠問帆席。詩債病
非疇昔。賴親朋對影。且慰良夕。風流雨散。定幾回腸斷。能禁頭白。爲君煩
素手。薦碧藕。輕絲細雪。去去江南路。猶應水雲秋共色。

滿庭芳道中憶錢唐舊游

雲暖萍漪。雨香蘭徑。西湖二月初時。兩山十里。錦繡照金羈。柳外闌干相
望。弄東風。倚徧斜暉。朋游好。亂紅堆裏。一飲百篇詩。三年江上夢。青衫
風日。白紵塵泥。聽幾聲黃鳥。粵對閩溪。長是春朝多病。今年更。添得相思。
須歸去。倦游滋味。猶有個人知。

管鑑

洞仙歌訪鄭德與郎中留飲

悠然堂上。山色渾如畫。堂下梅花未多謝。向小亭留客處。晴雪初飛。香四
面。不比茅檐低亞。綠窗簾晝捲。吹到眉心。點綴新妝稱閑雅。緩歌喉舞
態。雲遏風迴。須信道。欲買青春無價。任匆匆。歸去酒醒時。鎮夢繞瓊梢。月
寒清夜。

玉連環泊英州鍾石鋪

江上青山無數。綠陰深處。夕陽猶在繫扁舟。爲佳景。留人住。已辦一蓑
歸去。江南烟雨。有情鷗鷺。莫驚飛。便相約。長爲侶。

劉 儼

江神子

東風吹夢落巫山。整雲鬢。却霜紈。雪貌冰膚。會共控雙鸞。吹罷玉簫香霧濕。殘月墜。亂峯寒。解瑤回首憶前歡。見無緣。恨無端。惟悴蕭郎。贏得帶圍寬。紅葉不傳天上信。空流水。到人間。

蝶戀花

小立東風誰共語。碧盡行雲。依約蘭皋暮。誰問離懷知幾許。一溪流水和烟雨。媚蕩楊花無著處。纔伴春來。忙底隨春去。只恐游蜂黏得住。斜陽芳草江頭路。

姜 夔

清波引梅

冷雲迷浦。倩誰喚。玉妃起舞。歲華如許。野梅弄眉嫵。展齒印蒼蘚。漸為尋花來去。自隨秋鴈南來。望江國。渺何處。新詩謾與。好風景。長是暗度。故人知否。抱幽恨難語。何時共漁艇。莫負滄浪夜雨。况有清夜啼猿。怨人良苦。

陸 游

烏夜啼

紈扇嬋娟素月。紗巾縹緲輕烟。高槐葉長陰初合。清潤雨餘天。弄筆斜行小草。鉤簾淺醉閒眠。更無一點塵埃到。枕上聽新蟬。

劉過

醉太平

情高意真。眉長鬢青。小樓明月調箏。寫春風數聲。思君憶君。魂牽夢縈。翠銷香暖雲屏。更那堪酒醒。

張輯

祝英臺近

竹間棋。池上字。風日共清美。誰道春深。湘綠漲沙嘴。更添楊柳無情。恨烟
鬢雨。却不把。扁舟偷繫。去千里。明日知幾重山。後朝幾重水。對酒相思
爭似且留醉。奈何琴劍匆匆。而今心事。在月夜。杜鵑聲裏。

謝懋

驀山溪

厭厭睡起。無限春情緒。柳色借輕烟。尙瘦怯。東風倦舞。海棠紅皺。不奈晚
來寒。簾半捲。日西沉。寂寞聞庭戶。飛雲無據。化作溟濛雨。愁裏見春來。
又只恐。愁催春去。惜花人老。芳草夢淒迷。題欲徧。鎖窗紗。總是傷春句。

浪淘沙

黃道雨初乾。霽靄空蟠。東風楊柳碧毵毵。燕子不歸花有恨。小院春寒。
倦客亦何堪。塵滿征衫。明朝野水幾重山。歸夢已隨芳草綠。先到江南。

黃機

虞美人

十年不作湖湘客。亭埃催行色。淺山荒草記當時。篠竹籬邊羸馬向人嘶。書生萬字平戎策。苦淚風前滴。莫辭衫袖障征塵。自古英雄之楚又之秦。

馬莊父

天仙子 水仙花

白玉爲臺金作盞。香是江梅名閬苑。年時把酒對君歌。歌不斷。盃無算。花月當樓人意滿。翹戴一枝蟬影亂。樂事且隨人意換。西樓回首月明中。花已綻。人何遠。可惜國香天不管。

李 泳

清平樂

亂雲將雨。飛過鴛鴦浦。人在小樓空翠處。分得一襟離緒。片帆隱隱歸舟。天邊雪捲雲游。今夜夢魂何處。青山不隔人愁。

戴復古

木蘭花慢

鶯啼啼不盡。任燕語。語難通。奈一點芳心。十年不斷。惱亂春風。重來故人。不見。但依然。楊柳小橋東。記得同題粉壁。而今壁已無蹤。蘭皋空漲綠。溶溶。流恨落花紅。念著破征衫。當時送別。燈下裁縫。相思謾令自苦。歎雲烟。過眼總成空。落日楚天無際。凭欄目送飛鴻。

盧祖臯

卷三十五補詞

宋詞五十五首

小闌干桂花

露華深釀古香醲。一樹出雲叢。窗間試與。閑培秋事。聊寄幽悰。鈎簾靜對西風。晚塵外。小房櫺。輕陰淡日。淺寒清月。想見山中。

吳 潛

南柯子

池水凝新碧。欄花駐老紅。有人獨倚畫橋東。手把一枝楊柳。繫春風。鵲伴游絲墜。蜂黏落蕊空。鞦韆庭院小簾櫳。多少閒情閒緒。雨聲中。

海棠春郊行

天涯芳草迷征路。還又是。匆匆春去。烏兔裏光陰。鶯燕邊情緒。雲梢霧末。溪橋野渡。盡是春愁落處。把酒勸斜陽。小向花間駐。

汪 莘

行香子臘八日與洪仲簡溪行其夜雪作

野店殘冬。綠酒春濃。念如今。此意誰同。溪光不盡。山翠無窮。有幾枝梅。幾竿竹。幾株松。籃輿乘興。薄暮疎鐘。望孤村。斜日匆匆。夜窗雪陣。曉枕雲峯。便擁漁蓑。頂漁笠。作漁翁。

又雪後閒眺

策杖溪邊。倚杖峯前。望瓊林。玉樹森然。誰家殘雪。何處孤烟。向一溪橋。一茅店。一漁船。別般天地。新樣山川。喚家僮。訪鶴尋猿。山深寺遠。雪冷鐘殘。喜竹間燈。梅間屋。石間泉。

李昂英

摸魚兒

做茅堂。茂林環翠。苔磯低蘸烟浦。青蓑混入漁家社。斜日斷橋船聚。真樂處。坐芳草。瓦樽滿酒頻頻注。臯禽自舞。慣松徑穿雲。梅村踏雪。朗笑自來去。乘車墜。爭似修筇穩步。前塵回首俱誤。安閑得在中年好。抱甕尙堪蔬圃。高眼覷。算不識。人間寵辱除巢許。風篁解語。應共笑羣狙。無端喜怒。三四計朝暮。

瑞鶴仙甲辰除夕

玉城春不夜。映月壁。寒流燭蘂光射。鰲山海雲駕。擁遨頭。簫鼓錦旗紅亞。東風近也。趁樂歲。良辰多暇。想陽和早徧南州。暖得柳嬌桃冶。堪畫。紗籠夾道。露重花珠。塵吹蘭麝。歌朋舞社。玉梅轉。鬧蛾耍。且靈占先探。芋郎戲巧。又卜紫姑燈下。聽歡聲。猶自未歸。鈿車寶馬。

趙以夫

憶舊游慢荷花

望江蘂影裏。冉冉斜陽。十里沙平。喚起江湖夢。向沙鷗住處。細說前盟。水鄉六月無暑。寒玉散青冰。笑老去。心情也。將醉眼。鎖爲花青。亭亭步明鏡。似月浸華清。人在秋庭。照夜銀河落。想粉香濕露。恩澤初承。十洲縹緲。何許。風引綵舟行。尙憶得。西施餘情。裊裊烟水汀。

黃昇

清平樂宮詞

珠簾寂寂。愁背銀缸泣。記得少年初選入。三十六宮第一。當時掌上承恩。而今冷落長門。又是羊車過也。月明花落黃昏。

吳文英

天香蠟梅

蟬葉黏霜。蠅苞綴凍。生香遠帶風峭。嶺上寒多。溪頭月冷。枝北枝南開小。玉奴有姊。先占立。牆陰春蚤。初試宮黃淡泊。偷分壽陽纖巧。銀燭淚珠未曉。酒鍾慳。貯愁多少。記得短亭歸馬。暮衙蜂鬧。豈惹釵頭恨。裏。但悵望天涯歲華老。遠信難封。吳雲雁杳。

古香慢自度隘夷則商犯無射宮賦滄浪看桂

怨蛾墜柳。離佩搖蕙。霜訊南園。謾掩橋扉。倚竹袖寒日暮。還問月中游。夢飛過。金風翠羽。把殘雪剩水萬頃。暗熏冷麝。淒苦。漸浩渺。凌山高處。秋澹無光。殘照誰主。露粟侵肌。夜約羽林輕誤。翦碎惜秋心。更腸斷。珠塵蘚路。怕重陽。又催近。滿城風雨。

水龍吟惠山泉

豔陽不到青山。淡烟冷翠成秋苑。吳娃點黛。江妃擁髻。空濛遮斷。樹密藏溪。草深迷市。峭雲一片。二十年舊夢。輕鷗素約。霜絲亂。朱顏變。龍吻春霏玉濺。煮銀瓶。羊腸車轉。臨泉照影。清寒沁骨。客塵都浣。鳩漸重來。夜深華表。露零鶴怨。把閒愁換與。樓前晚色。棹滄波遠。

西平樂 過西湖先賢堂

岸壓郵亭。路欹華表。堤樹舊色依依。紅索新晴。翠陰寒食。天涯客又重歸。
歎廢綠平烟帶苑。幽渚塵香蕩晚。當時燕又飛來。無言對立斜暉。追念吟
風賞月。十載事。夢惹綠楊絲。畫船爲市。妖妝艷水。日落雲沉。人換春移。
誰更與。苔根埽石。菊井招魂。謾省隨車載酒。立馬臨花。猶認嫣紅傍路枝。
歌斷讌闌。紫華露草。零落山丘。過此西湖。恨擬西州。羊曇淚落沾衣。

柳梢青與龜翁登研意觀雪懷癸卯歲臘朝斷橋並馬之遊

斷夢遊輪。孤山路杳。越樹陰新。流水凝酥。征衫沾淚。都是啼痕。玉屏風
冷愁人。醉爛熳梅花翠雲。傍夜船回。惜春門掩。一鏡香塵。

桃源憶故人

越山青斷西陵浦。一岸密陰疎雨。潮帶舊愁生暮。會折垂楊處。桃根桃
葉當時渡。嗚咽風前柔櫓。燕子不留春住。空寄離檣語。

齊天樂與馮深居登禹陵

三千年事殘鴉外。無言倦憑秋樹。逝水移川。高陵變谷。那識當時神禹。幽
雲怪雨。恨萍濕空梁。夜深飛去。雁起青天。數行書似舊藏處。寂寥西窗
坐久。故人慳會遇。同翦燈語。敗蘚殘碑。零圭斷壁。重拂人間塵土。霜紅罷
舞。謾山色青青。霧朝烟暮。岸鎖春船。畫橋翻賽鼓。

又毗陵陪兩別駕宴丁園

竹深不放斜陽入。橫波澹墨林沼。斷莽平烟。殘荷剩水。宜得秋深纔好。荒

亭旋埽。正著酒寒輕。弄花春小。障錦西風。半園歌袖半吟草。獨游清興
易懶。景饒人未勝。樂事長少。柳下停車。尊前岸幘。同撫雲根一笑。秋香未
老。漸風雨西城。暗欹客帽。背日移舟。亂鴉溪樹繞。

醉落魄題藕花洲尼扇

春溫紅玉。纖衣學翦嬌鴉綠。夜香燒短銀屏燭。偷擲金錢。重把寸心卜。
翠深不礙鴛鴦宿。採菱誰記當時曲。青山南畔紅雲北。一葉波心。明滅淡
妝束。

蝶戀花題華山女道士扇

北斗秋橫雲髻影。鶯羽衣輕。腰減青絲剩。一曲游仙聞玉磬。月華深處人
初定。十二闌干和笑凭。風露生寒。人在蓮花頂。睡重不知殘酒醒。層城
幾度啼鴉暝。

望江南

三月暮。花落更情濃。人去鞦韆閒挂月。馬停楊柳倦嘶風。堤畔畫船空。
厭厭醉。長日小簾櫳。宿燕夜歸銀燭外。啼鶯聲在綠陰中。無處覓殘紅。

金縷曲陪履齋先生滄浪看梅

喬木生雲氣。訪中興。英雄陳迹。暗追前事。戰艦東風。怪借便。夢斷神州故
里。旋小築吳宮闌地。華表月明歸夜鶴。歎當時。花竹今如此。枝上露。濺清
淚。遨頭小簇行春隊。步蒼苔。尋幽別塢。看梅開未。重唱梅邊新度曲。催
發寒梢凍蕊。此心與。東君同意。後不如今。今非昔。兩無言。相對滄浪水。懷

此恨。寄殘醉。

陳允平

瑞鶴仙

燕歸簾半捲。正漏約瓊籤。笙調玉管。蛾眉畫來淺。甚春衫懶試。夜燈慵翦。香溫夢暖。訴芳心。芭蕉未展。渺雙波。望極空江。二十四橋凭徧。蔥蒨銀屏綵鳳。霧帳金蟬。舊家坊院。烟花弄晚。芳草恨。斷魂遠。對東風無語。綠陰深處。時見飛紅數片。算多情。尙有黃鸝。向人睨眈。

周密

三姝媚 送聖與還越

淺寒梅未綻。正潮過西陵。短亭逢鴈。秉燭相看。歎俊花零落。滿襟依黯。露草霜花。愁正在。廢宮蕪苑。明月河橋。笛外尊前。舊情消滅。莫訴離觴深淺。恨聚散匆匆。夢隨帆遠。玉鏡塵昏。怕賦情人老。後逢悽惋。一樣歸心。忍喚起。故園愁眼。立盡斜陽無語。空江歲晚。

法曲獻仙音 弔雪香亭梅

松雪飄寒。嶺雲吹凍。紅破數枝春淺。襯舞臺荒。浣妝池冷。淒涼市朝輕換。歎花與人凋謝。依依歲華晚。共淒黯。問東風。幾番吹夢。應慣識。當年翠屏金輦。一片古今愁。但廢綠。平烟空遠。無語銷魂。對斜陽。衰草淚滿。又西泠殘笛。低送數聲春怨。

探芳信 西泠春感

步晴晝。向水院維舟。津亭喚酒。歎劉郎重到。依依漫懷舊。東風空結丁香怨。花與人俱瘦。甚淒涼。暗草沿池。濕苔侵甃。橋外晚風驟。正香雪隨波。淺烟迷岫。廢苑塵梁。如今燕來否。翠雲零落空堤冷。往事休回首。最銷魂。一片斜陽戀柳。

王沂孫

長亭怨重過中庵故園

泛孤艇。東臯過訊。尙記當日。綠陰門掩。屐齒莓苔。酒痕羅袖。事何限。欲尋前跡。空惆悵。成秋苑。自約賞花人。別後總。風流雲散。水遠。怎知流水外。却是亂山尤遠。天涯夢短。想忘了。綺疏雕檻。望不盡。苒苒斜陽。撫喬木。年華將晚。但數點紅英。猶識西園悽惋。

慶宮春水仙

明玉擎金。纖羅飄帶。爲君起舞回雪。柔影參差。幽芳零亂。翠圍腰瘦一捻。歲華相誤。記前度。湘臯怨別。哀絃重聽。都是淒涼。未須彈徹。國香到此誰憐。烟冷沙昏。頓成愁絕。花惱難禁。酒消欲盡。門外冰澌初結。試招仙魄。怕今夜。瑤簪凍折。攜盤獨出。空想咸陽。故宮落月。

踏莎行題草窗詩卷

白石飛仙。紫霞悽調。斷歌人聽知音少。幾番幽夢欲回時。舊家池館生青草。風月交游。山川懷抱。憑誰說與春知道。空留離恨滿江南。相思一夜蘋花老。

摸魚子

玉簾寒。翠痕微斷。浮空清影零碎。碧芽也抱春洲怨。雙捲小絨芳字。還又似。繫羅帶。相思幾點青鈿綴。吳中蕉事。悵酪乳爭奇。鱸魚謾好。誰與共秋醉。江湖興。昨夜西風又起。年年輕誤歸計。如今不怕歸無準。却怕故人千里。何況是。正落月。垂虹怎賦登臨意。滄浪夢裏。縱一舸重遊。孤懷暗老。餘恨渺烟水。

卷二十六補詞

宋金元詞五十四首

張炎

壺中天 夜渡古黃河與沈堯道會子敬同賦

揚舸萬里。笑當年底事。中分南北。須信平生無夢到。却向而今遊歷。老柳官河。斜陽古道。風定波猶直。野人驚問。汎槎何處狂客。迎面落葉蕭蕭。水流沙共遠。都無行迹。衰草淒迷秋更綠。惟有閒鷗獨立。浪挾天浮。山邀雲去。銀浦橫空碧。扣舷歌斷。海蟾飛上孤白。

又養拙園夜飲

瘦筇訪隱。正繁陰閒鎖。一壺幽綠。喬木蒼寒圖畫古。窈窕行人韋曲。鶴響天高。水流花淨。笑語通華屋。虛堂松外。夜深涼氣吹燭。樂事楊柳樓心。瑤臺月下。有生香堪掬。誰理商聲簾外悄。蕭瑟懸璫鳴玉。一笑難逢。四愁休賦。任我雲邊宿。倚欄歌罷。露螢飛上秋竹。

疎影余于庚寅歲北歸與西湖諸友夜酌因有感于舊遊寄周草窗

柳黃未結。放嫩晴消盡。斷橋殘雪。隔水人家。渾是花陰。會醉好春時節。輕車幾度新堤曉。想如今。燕鶯猶說。縱艷遊。得似當年。早是舊情都別。重到翻疑夢醒。弄泉試照影。驚見華髮。却笑歸來。石老雲荒。身世飄然一葉。閉門約住青山色。自容與。吟窗清絕。怕夜寒。吹到梅花。休捲半簾明月。

紅情荷花

無邊香色。記涉江自採。錦亭雲密。剪剪紅衣。學舞波心。舊會識。一見依然。自語。流水遠。幾回空憶。動倒影。取次窺妝。玉潤露痕濕。聞立。翠屏側。愛向人弄芳。背酣斜日。料應太液。三十六宮土花碧。清興凌風更爽。正無數。滿汀如昔。泛片葉。烟波裏。臥橫紫笛。

風入松 賦稼村

老來學圃樂年華。茅屋短籬遮。兒孫戲逐田翁去。小橋橫。路轉三叉。細雨一犁春意。西風萬寶生涯。攜筇猶記渡晴沙。流水帶寒鴉。門前少得寬閒地。繞平疇。盡是桑麻。却笑牧童遙指。杏花深處人家。

滿庭芳 小春

晴皎霜花。曉鎔冰羽。開簾覺道寒輕。誤聞啼鳥。生意又園林。聞了淒涼賦。筆便而今。不聽秋聲。銷凝處。一枝借暖。終是未多情。陽和能幾許。尋芳探粉。也恁吹人。笑鄰娃癡小。料理護花鈴。却怕驚回睡蝶。恐和他。草夢都醒。還知否。能消幾日。風雪灞橋深。

聲聲慢送琴友季靜軒還杭

荷衣消翠。蕙帶餘香。燈前共語生平。苦竹黃蘆。都是夢裏遊情。西湖幾番
夜雨。怕如今。冷却鷗盟。倩寄遠。見故人說道。杜老飄零。難挽清風飛佩。
有相思都在。斷柳長汀。此別何如。一笑寫入瑤琴。天空水雲變色。任悵悵。
山鬼愁聽。興未已。更何妨。彈到廣陵。

水龍吟寄袁竹初

幾番問竹平安。雁書不盡相思字。籬根半樹。村深孤艇。闌干屢倚。遠草兼
雲。凍河膠雪。此時行李。望去程無數。并州回首。還又渡。桑乾水。笑我會
遊萬里。甚匆匆。便成歸計。江空歲晚。栖遲猶在。吳頭楚尾。疎柳輕寒。斷橋
浮月。依然憔悴。待相逢。說與相思。想亦在。相思裏。

湘月余載書往來山陰道中每以事奪不能盡興戊子冬晚與徐平野王中仙曳舟溪上天空水塞古

意蕭颯中仙有詞雅麗平野作晉雪圖亦清逸可觀余述此調

行行且止。把乾坤收入。篷窗深裏。星散白鷗三四點。數筆橫塘秋意。岸嘴
衝波。籬根受葉。野徑通村市。疎風迎面。濕衣原是空翠。堪歎敲雪門荒。
爭棋墅冷。苦竹鳴山鬼。縱使如今猶有晉。無復清遊如此。落日沙黃。遠天
雲淡。弄影蘆花外。幾時歸去。剪取一半烟水。

木蘭花慢舟中有懷澄江陸起潛皆山樓昔遊

水痕吹杏雨。正人在。隔江船。看燕集春蕪。魚棲暗竹。濕影浮烟。餘寒尙猶
戀柳。怕東風。未肯擘晴綿。愁重遲教醉醒。夢長催得輕圓。樓前笑語當

年情款密。思留連。記白月依弦。青天墮酒。袞袞山川。垂髫至今在否。倚飛臺。誰擲買花錢。不是尋春較晚。都緣聽得啼鶯。

張 槃

浣溪沙

習習輕風破海棠。鞦韆移影上迴廊。晝長蝴蝶爲誰忙。度柳早鶯分暖綠。過花小燕帶春香。滿庭芳草又斜陽。

湯 恢

倦尋芳

錫簫吹暖。蠟燭分烟。春思無限。風到棟花。二十四番吹徧。烟濕濃堆楊柳色。晝長閒墜梨花片。悄簾櫳。聽幽禽對語。分明如剪。記舊日。西湖行樂。載酒尋春。十里塵軟。背後腰肢。彷彿畫圖會見。宿粉殘香隨夢冷。落花流水。和天遠。但如今。病懨懨。海棠池館。

滿江紅

小院無人。正梅粉。一堦狼藉。疎雨過。溶溶天氣。早如寒食。啼鳥驚回芳草夢。峭風吹淺桃花色。漫玉爐。沉水熨春衫。花痕碧。綠縠水。紅香陌。紫桂棹。黃金勒。悵前歡。如夢。後遊何日。酒醒香銷人自瘦。天空海闊。春無極。又一林。新月照黃昏。梨花白。

祝英臺近

宿醒蘇。春夢醒。沉水冷金鴨。落盡桃花。無人掃紅雪。漸催煮酒園林。單衣

庭院春又到。斷腸時節。恨離別。長憶人立荼蘼。珠簾捲香月。幾度黃昏。瓊枝爲誰折。都將千里芳心。十年幽夢。分付與一聲啼鴉。

又中秋

月如冰。天似水。冷浸畫欄濕。桂樹風前。濃香半狼藉。此翁對此良宵。別無可恨。恨則恨。古人頭白。洞庭窄。誰道臨水樓臺。清光最先得。萬里乾坤。元無片雲隔。不妨彩筆銀箋。翠尊冰醞。自管領。一庭秋色。

翁元龍

水龍吟 雪霽登吳山見滄閣聞城中簫鼓聲

畫樓紅濕斜陽。素妝褪出山眉翠。街聲暮起。塵侵鏡戶。月來舞地。官柳招鶯。水萍飄雁。隔年春意。黯梨雲散作。人間好夢。瓊簫在。錦屏底。樂事輕隨流水。暗蘭消。作花心計。情絲萬軸。因春織就。愁羅恨綺。昵枕迷香。占簾看夜。舊游經醉。任孤山剩雪。殘梅漸嬾。跨東風騎。

風流子 聞桂花懷西湖

天闊玉屏空。輕陰弄。淡墨畫秋容。正涼桂半蟾。酒醒窗下。露催新雁。人在山中。又一片。好秋花占了。香換却西風。蕭女夜歸。帳栖青鳳。鏡娥妝冷。釵墜金蟲。西湖花深窈。閒庭砌會占。席地歌鐘。載取斷雲歸去。幾處房櫳。恨小簾燈暗。粟肌消瘦。熏爐烟滅。珠袖玲瓏。三十六宮清夢。還與誰同。

醉桃源 柳

千絲風雨萬絲晴。年年長短亭。閨黃看到綠成陰。春由他送迎。鶯思重。

燕愁輕。如人離別情。繞湖烟冷。罩波明。畫船移玉笙。

謁金門

鶯樹暖。弱絮欲成芳繭。流水惜花流不遠。小橋紅欲滿。原上草迷離苑。金勒晚風嘶斷。等得日長春又短。愁深山翠淺。

絳都春 秋晚海棠與黃菊盛開

花嬌半面。記蜜燭夜闌。同醉深院。衣袖粉香。猶未經年。如年遠。玉顏不趁秋容換。但換却。春遊同伴。夢回前度。郵亭倦客。又拈箋管。慵按。梁州舊曲。怕離柱斷絃。驚破金雁。霜被睡濃。不比花前。良宵短。秋娘羞占東籬畔。待說與。深宮幽怨。恨他情淡。陶郎舊緣較淺。

樓 扶

水龍吟 和清真梨花韻

素娥洗盡繁妝。夜深步月秋千地。輕腮暈玉。柔肌籠粉。緇塵斂避。霽雪留香。曉雲同夢。昭陽空閉。悵仙園路杳。曲欄人寂。疎雨濕。盈盈淚。未放遊蜂葉底。怕春歸。不禁狂吹。象牀困倚。冰魄微醒。鶯聲喚起。愁對黃昏。恨催寒食。滿襟離思。想千紅過盡。一枝獨冷。把梅花比。

莫 崙

卜算子

紅底過絲明。綠外飛綿小。不道東風上海棠。白地春歸了。月笛曲欄留。露舄芳池繞。爭得閒情似舊時。偏索檐花笑。

李萊老

惜紅衣寄弁陽翁

笛送西冷。帆過杜曲。晝陰芳綠。門巷清風。還尋故人書屋。蒼華髮冷。笑瘦影相看如竹。幽谷。烟樹繞鶯。訴經年愁獨。殘陽古木。書畫歸船。匆匆又南北。冀州鷗鷺。素熟舊盟續。甚日浩歌招隱。聽雨弁陽同宿。料重來時候。香蕩幾灣紅玉。

青玉案草窗詞卷

吟情老盡江南句。幾千萬垂絲縷。花冷絮飛寒食路。漁烟鷗雨。燕昏鶯曉。總入韶華譜。紅衣妝靚涼生渚。環碧斜陽舊時樹。拈葉分題觴詠處。荀香猶在。庾愁何許。雲冷西湖賦。

生查子

妾情歌柳枝。郎意憐桃葉。羅帶縮同心。誰信愁千結。樓上數殘更。馬上看新月。繡被怨春寒。怕學鴛鴦疊。

高陽臺落梅

門掩香殘。屏搖夢冷。珠鈿糝綴芳塵。臨水辜花。流來疑是行雲。薜梢空挂淒涼月。想鶴歸猶怨黃昏。黯銷凝。人老天涯。雁影沉沉。斷腸不在聽橫笛。在江臯解珮。翳玉飛瓊。烟濕荒村。背春無限愁深。迎風點點飄寒粉。悵秋娘。滿袖啼痕。更關情。青子懸枝。綠樹成陰。

杏花天

年時中酒風流病。正雨暗。薜蘿深徑。人家寒食。烟初禁。狼藉梨花雪影。西湖夢。紅沉翠冷。記舞板。歌裙廝趁。斜陽苦與黃昏近。生怕畫船歸盡。

李彭老

木蘭花慢

正千門繫柳。賜宮燭。散青烟。看香壓芳脣。塗妝暈色。試盡春妍。田田滿堦。榆莢弄輕陰。淺冷似秋天。隨處錫香杏暖。燕飛斜。鞦韆。朱絃幾換。華年扶醉向落紅前。記舊時遊冶。燈樓倚扇。水院移船。吟邊。夢雲飛遠。有題紅。都在薛濤箋。聽絕殘簫倦笛。夜堂明月窺簾。

高陽臺落梅

飄粉杯寬。盛香袖小。青青半掩苔痕。竹裏遮寒。誰念減盡芳雲。么鳳叫晚。吹晴雪。料水空。烟冷西泠。感凋零。殘縷遺鈿。迤邐成塵。東園會趁花前。約記按箏籌酒。戲挽飛瓊。環珮無聲。草暗臺榭春深。欲倩倩怨笛傳清譜。怕斷霞難返。吟魂轉銷凝。點點隨波。望極江亭。

生查子

羅襦隱繡茸。玉合銷紅豆。深院落梅鈿。寒峭收燈後。心事卜金錢。月上鵝黃柳。拜了夜香休。翠被聽春漏。

王易簡

齊天樂客長安賦

宮烟曉散春如霧。參差護晴窗戶。柳色初分。錫香未冷。正是清明百五。臨

流笑語。映十二闌干。翠頰紅妒。短帽輕鞍。倦遊會徧斷橋路。東風爲誰
媚嫵。歲華頻感慨。雙鬢何許。前度劉郎。三生杜牧。贏得征衫塵土。心期暗
數。總寂寞當年。酒籌花譜。付與春愁。小樓今夜雨。

慶春宮謝草窗惠詞卷

庭草春遲。汀蘋香老。數聲珮悄蒼玉。年晚江空。天寒日暮。壯懷聊寄幽獨。
倦遊多感。更西北。高樓送目。佳人不見。慷慨悲歌。夕陽喬木。紫霞洞窅
雲深。嫋嫋餘音。鳳簫誰續。桃花賦在。竹枝詞遠。此恨年年相觸。翠楸芳宇。
謾重省。當時顧曲。因君凝竚。依約吳山。半痕蛾綠。

葛長庚

好事近贈趙制機

行到竹林頭。探得梅花消息。冷蕊疎英如許。更無人知得。水枯雪老歲
年徂。俯仰自嗟惜。醉臥影裏。有何人相識。

完顏璫

漁父詞

楊柳風前白板扉。荷花雨裏綠蓑衣。紅稻美。錦鱗肥。漁笛閒拈月下吹。

又

釣得魚來臥看書。船頭穩置酒葫蘆。烟際柳。雨中蒲。乞與人間作畫圖。

段克己

水調歌頭癸卯八月十七日逆旅平陽夜聞笛聲有感而作

亂雲低薄暮。微雨洗清秋。涼蟾乍飛破鏡。倒影入南樓。水面金波盪盪。簾外玉繩低轉。河漢截天流。桂子墮無跡。爽氣襲征裘。廣寒宮。在何處。可神遊。一聲羌管。誰弄吹徹古梁州。月自與人無意。人被月明催老。今古共悠悠。壯志久寥落。不寐數更籌。

望月婆羅門引 癸卯元宵與諸君各賦詞以爲樂寂寞山村無可道者因述其昔年京華所見以望月

婆羅門引歌之酒酣擊節將有墮開元之淚者

暮雲收盡。柳梢華月轉銀盤。東風輕扇春寒。玉輦通宵遊幸。綵仗駕雙鸞。聞鳴絃脆管。鼎沸鰲山。漏聲未殘。人半醉。尙追歡。是處燈圍。花護雕鞍。繁華夢斷。醉幾度。春風雙鬢斑。回首處。不見長安。

蝶戀花 聞鶯有感

鶉鴝一聲春已曉。蝴蝶雙飛。暖日明花草。花底笙歌猶未了。流鶯又復催春老。早是殘紅枝上少。飛絮無情。更把人相惱。老檜獨含冰雪操。春來悄沒人知道。

段成己

滿江紅 新春用蓮菴韻

料峭東風。吹醉面。向人如舊。凝竚立。野禽聲裏。無言搔首。庭下梅花開盡也。春痕已到江邊柳。待人間。事了覓清歡。身名朽。菟裘計。何時有。休下約。牀頭酒。怕流年不覺。鬢邊還透。往事不堪重記省。舊愁未斷新愁又。把春光。分付少年場。從今後。

又偶觀春事闌珊謹用蓮菴登鸚雀樓韻以寫所懷

檢點花枝風雨外。雪堆瑤臺。春去也。朱絲絃斷。鸞膠難續。眼底光陰容可
惜。舊游回首尋無跡。對青山。一餉倚枯藤。灘聲急。人已老。身猶客。家在
邇。歸猶隔。縱語音如舊。形容非昔。芳草緜緜隨意綠。平波渺渺傷心碧。到
愁來。惟覺酒杯寬。人間窄。

元好問

邁陂塘泰和中大名民家小兒女有以私情不遂赴水者官為蹤跡之無見也其後踏藕者得一二屍水

中衣服仍可驗其事乃白是歲此陂荷花開無不並蒂者沁水梁國用時為錄事判官為李用章

內翰言如此

問蓮根。有絲多少。蓮心知為誰苦。雙花脈脈嬌相向。只是舊家兒女。天已
許。甚不教。白頭生死鴛鴦浦。夕陽無語。算謝客烟中。湘妃江上。未是斷腸
處。香奩夢。好在靈芝瑞露。中間俯仰今古。海枯石爛情緣在。幽恨不埋
黃土。相思樹。流年度。無端又被西風誤。蘭舟少住。怕載酒重來。紅衣半落。
狼藉臥風雨。

青玉案代贈欽叔所親樂府幃生

苧蘿坊裏青驄駐。愛鸚鵡垂簾語。一捻嬌春能幾許。寒梅欲動。小桃初放。
恰是關心處。西城流水東城雨。綠葉成陰慣相誤。只恐韶華容易去。一
聲金縷。一卮芳酒。且為花枝住。

劉因

風中柳飲山亭留宿

我本漁樵。不是白駒空谷。對西山。悠然自足。北窗疎竹。南窗叢菊。愛村居。數間茅屋。風烟草屨。滿意一川平綠。問前溪。今朝酒熟。幽泉歌曲。清泉琴筑。欲歸來。故人留宿。

仇 遠

生查子

釵頭綴玉蠶。耿耿東窗曉。京洛少年遊。猶恨歸來早。寒食正梨花。古道多芳草。今夜試青燈。依舊雙花小。

虞 集

南鄉一剪梅招熊少府

南阜小亭臺。薄有山花取次開。寄語多情熊少府。晴也須來。雨也須來。隨意且銜盃。莫惜春衣坐綠苔。若待明朝風雨過。人在天涯。春在天涯。

宋 娶

穆護砂燭淚

底事蘭心苦。便淒然。泣下如雨。倚金臺獨立。搵香無主。腸斷封家相妒。亂撲簌。驪珠愁有許。向午夜。銅盤傾注。便不似。紅冰綴頰。也濕透。仙人烟樹。羅綺筵前。海棠花下。涇涇常怕鳳脂枯。比洛陽年少。江州司馬。多少定誰如。照破別離心緒。學人生。有情酸楚。想洞房佳會。而今寥落。誰能暗收玉筯。算只有。金釵會巧補。輕濕盡。粉痕如故。愁思減。舞腰纖細。清血盡。媚

臉膚腴。又恐嬌羞絳紗籠却。綠窗伴我檢詩書。更休教鄰壁偷窺。幽蘭啼曉露。

薩都刺

水龍吟贈友

王郎錦帶吳鉤。醉騎赤鯉銀河去。絳袍弄月。銀壺吸酒。錦箋揮兔。禿鬢西風。短篷落月。東吳西楚。悵丹陽郭裏。相逢較晚。共剪燭。西窗雨。文采風流俊偉。碧紗巾。挂珊瑚樹。出門萬里。掀髯一笑。青山無數。揚子江頭。凍沙寒雨。暮天飛鷺。待明朝酒醒。金山過。瓜洲渡。

酹江月題清溪白雲圖

周郎幽趣。占清溪一曲。小橋橫渡。溪上紅塵飛不到。惟有白雲來去。出岫無心。凌江有態。水面魚吹絮。倚門遙望。鍾山一半留住。涵影淡蕩悠揚。朝朝暮暮。是幾番今古。指點昔人行樂地。半是鷺洲鷗渚。映水朱樓。踏歌畫舫。寂寞知何處。天涯倦客。幾時歸釣春雨。

又過淮陰

短衣瘦馬。望楚天空闊。碧雲林杪。野水孤城斜日裏。猶憶那回會到。古木鴉啼。紙灰風起。飛入淮陰廟。推牛醜酒。英雄千古誰弔。何處漂母荒墳。清明落日。腸斷王孫草。鳥盡弓藏成底事。百事不如歸好。半夜鐘聲。五更雞唱。南北行人老。道傍楊柳。青青春又來了。

倪瓚

凭欄人贈吳國良

客有吳郎吹洞簫。明月沉江春霧曉。湘靈不可招。水雲中。環珮搖。

顧 瑛

水調歌頭桂

金粟綴仙樹。玉露浣人愁。誰道買花載酒。不似少年游。最是宮黃一點。散下天香萬斛。來自廣寒秋。蝴蝶逐人去。雙立鳳釵頭。向樽前。風滿袖。月盈鉤。縹緲羽衣天上。遺響遏雲流。二十五聲秋點。三十六宮夜月。橫笛按伊州。同躡彩鸞背。飛過小紅樓。

陶宗儀

露華賦碧桃用南湖韻

武陵夜寂。記露影璇空。一笑曾識。素臉暈鉛。巧把黛螺輕繫。莫是歌渡烟江。浣却舊家顏色。還又訝。深宮紺袖。唾花猶濕。問他阿母消息。甚落窠梨雲。青鳥難覓。不比錦紅輕薄。容易狼藉。嫩綠護出溪頭。誰顧采香仙客。春晚也。頻溫玉笙是得。

唐桂芳

南鄉子送李仲先還集慶

社雨燕交飛。不解行人有別離。明月鳳凰臺上酒。堪思。天闊雲昏海樹低。風正一帆遲。簾卷芙蓉江上移。去去霜臺消息近。誰知。滿眼江山太白詩。

張雨

東風第一枝玉簪

清淚如鉛。綠房迎曉。寶階低擁雲葉。蜻蜓飛上搔頭。依前艷香未歇。西窗夜雨。怪簾底。參差涼月。正一叢。深倚琅玕。石上只愁磨折。問瑤草。應憐短髮。會醉墮。無聲膩滑。羞他金雀鈿蟬。高似水仙羅襪。芳心斷絕。誰與贈。湘臯瓊玦。試折花。擲作銀橋。看舞素鸞回雪。

卷二十七續補人

詞六十二首

青浦

王

昶纂

吳則禮

字子剛。富川人。以父御史中復蔭入仕。官至直祕閣。知饒川。晚居豫章。自號北湖居士。有北湖集五卷。詞附。

秦樓月送別

悵離闕。淮南三度梅花發。梅花發。片帆西去。落英如雪。新秦古塞人華髮。一樽別酒君聽說。君聽說。胡笳征雁。隴雲沙月。

虞美人送晁適道

夜寒閒倚西樓月。消盡江南雪。東風明日木蘭船。想見陽關聲徹雁連天。斜斜洲渚溶溶水。端負青春醉。平安小字幾時回。空有暗香疎影隴頭梅。

聲聲漫鳳林園詞

林塘朱夏。雨過斑斑。綠苔繞地初遍。葉底雛鶯。猶記日斜春晚。芙蓉靚妝

紅粉。傍高荷。閑倚歌扇。輕風起。縠紋灩灩。翠生波面。可是追涼月下。清坐久。微雲屢遮。星漢露濕。綸巾遙望。玉清臺殿。白頭共論勝事。要須償。五湖深願。南枝好。有南飛烏鵲。繞枝低轉。按萬樹詞律。載高觀國及趙長卿此調。俱九十九字。此作前半少一字。且平仄互異。當是又一體。

李

呂

字東老。邵武軍光澤人。有澹軒集七卷。詞一卷。

鷓鴣天寄情

臉上殘霞酒半消。晚妝勻罷却無聊。金泥帳小教誰共。銀字笙寒懶更調。人悄悄。漏迢迢。瑣窗虛度可憐宵。一從恨滿丁香結。幾度春深豆蔻梢。

調笑令

掩袖低迷情不禁。背人低語兩知心。烟蛾漸放愁邊散。細靨從教醉裡深。小梅破萼嬌難似。喜色著人吹不起。莫將羽扇掩明波。豔豔光風生眼尾。眼尾。寄深意。一點蘭膏紅破蕊。鈿窩淺淺雙痕媚。背面銀牀斜倚。燭花先報今宵喜。管定知人心裏。

又歌

賢川六疊小香檀。玉筍纖纖不耐寒。淺破朱脣促新調。紅絲短瑟未須彈。錦字兩行妝寶扇。扇中鸞影迷嬌面。蘭葉歌翻春事空。孤鳳雛鸞兩含怨。含怨。兩鬢淺。羽髻雲鬟低玉燕。綠沈香底金鵝扇。隱隱花枝輕顫。當筵不放紅雲轉。正是玉壺春滿。

八寶妝感懷

門掩黃昏。畫堂人寂。暮雨乍收殘暑。簾捲疎星。庭戶悄。隱隱巖城鐘鼓。空階烟暝半開。斜月朦朧。銀河澄淡。風淒楚。還是鳳樓人遠。桃源無路。惆悵夜久星繁。碧雲望斷。玉簫聲在何處。念誰伴。茜裙翠袖。共攜手。瑤臺歸去。對修竹。森森院宇。曲香暖凝沈炷。問對酒當歌。情懷記得劉郎否。

李

光

字泰發。上虞人。崇寧五年進士。官至參知政事。謚莊簡。有莊簡集十八卷。

臨江仙甲子中秋微雨聞施君家宴戲贈

畫棟朱樓。凌縹緲。全家都住層城。中秋風露助淒清。香凝燕寢。遮莫下簾旌。佳節喜逢今夕月。後房重按新聲。姮娥端解妬娉婷。微雲點綴。不十分明。

潘良貴

字義榮。一字子賤。金華人。政和五年進士。官至徽猷閣待制。提舉亳州。卒贈左朝奉大夫。有默

成集五卷。

滿庭芳中秋

夾水松篁。一天風露。覺來身在扁舟。桂花當午。雲捲素光流。起傍篷窗危坐。飄然竟欲到瀛洲。人世那知此夜。空際列瓊樓。休休。閒最好。十年歸夢。兩眼鄉愁。謾贏得。蕭蕭華髮盈頭。往事不須追諫。從今去。拂袖何求。樽餘酒。持杯顧影。起舞自相酬。

胡

銓

字邦衡。廬陵人。建炎二年進士甲科。紹興五年。以賢良方正薦。除樞密院編修。抗疏詆和議。累

謫吉陽軍。孝宗朝。歷權中書舍人。兼國子祭酒。以資政殿學士致仕。卒謚忠簡。有澹庵長短句

一卷。

醉落魄 辛未九月望和答慶符

百年強半。高秋猶在天南畔。幽懷已被黃花亂。更恨銀蟾故向愁人滿。招呼詩酒顛狂伴。羽觴到手判無算。浩歌箕踞巾聊岸。酒欲醒時。與在盧仝盃。

又和答陳景衡望湖樓見憶

千巖競秀。西湖好是春時候。誰知梅雪飄零久。藏白收香空袖和羹手。天涯萬里情難透。眉峯豈爲傷春皺。片愁未信花能繡。若說相思。只恐天應瘦。

玉樓春 贈李都監侍兒是夕歌六么

十年日斷鯨波闊。萬里相逢歌怨咽。髻鬟春霧翠微重。眉黛秋山煙雨抹。小槽旋滴真珠滑。斷送一生花十八。醉中扶上木腸兒。酒醒夢回空對月。

青玉案 乙酉重九葛守座上作

宜霜開盡秋光老。感節物愁多少。塵世難逢開口笑。滿林風雨。一江烟水。颯爽驚吹帽。玉堂金馬何須道。且鬥取樽前玉山倒。燕寢香消官事了。紫萸黃菊。皂羅紅袂。花與人俱好。

程大昌

字泰之。休寧人。紹興二十一年進士。孝宗朝官至權吏部尚書。龍圖閣直學士。謚文簡。有文簡公詞一卷。

南歌子

才出滄溟底。旋明紫岫腰。玉光漫漫湧層潮。上有乘流海客。臥吹簫。更上雲臺望。翻牽旅思遙。浮生何許著簞瓢。却向天涯起舞。影蕭蕭。

楊冠卿

字夢錫。江陵人。有客亭類藁十五卷。

如夢令

滿院落花春寂。風絮一簾斜日。翠鈿曉寒輕。獨倚秋千無力。無力。無力。破遠山愁碧。

生查子賦湘妃鼓瑟箋湘妃泛蓮葉上有片雲擊月

瀟湘日暮時。倚櫂蒹葭浦。不見獨醒人。愁對湘妃語。璧月送歸人。一葉蓮舟舉。瑤瑟奏清商。波底魚龍舞。

浣溪沙

洞口春深長薜蘿。幽棲地僻少經過。一溪新綠漲晴波。驚夢覺來啼鳥近。惜春歸去落花多。東風獨倚奈愁何。

又次韓戶傳

銀葉香銷暑簟清。枕鴛醉倚玉釵橫。起來紅日半窗明。多病情懷無可耐。惜花天氣惱餘醒。瑤琴誰弄曉鶯聲。

菩薩蠻

春日呈安國舍人

飛雲障碧江天暮。杏花簾幙黃昏雨。翠袖怯春寒。有人愁倚闌。天涯芳草路。目送征鴻去。人遠玉關長。尺書難寄將。

好事近代人書扇

晚起倦梳妝。斜鞦翠鬟雲鬢。手撚花枝輒笑。問青鸞音信。繡簾慵捲玉
鈎垂。鳳凰奏餘韻。燈火黃昏院落。報雕鞍人近。

又

細雨落簷花。簾捲金泥紅濕。樓外遠山橫翠。染修眉愁碧。舊遊春夢了
無痕。香塵暗瑤瑟。憑仗青鸞飛去。問新來消息。

謁金門 春暮有感

傷漂泊。負了花前期約。寒食清明都過却。愁懷無處着。晴日柳陰池閣。
風絮斜穿簾幙。簾外秋千閒綵索。斷腸人寂寞。

東坡引歲癸丑季秋二十六日夜。夢至一亭子。榜曰朝雲。見二少年云。久誦公樂章。願得從容笑話。因

舉似離筵舊作。稱贊久之。余謝不能。公子喞然不樂。命小吏呼姝麗十數輩至。圍一方臺而立。相與羣唱。聲甚淒楚。俄頃。歌者取金花青牋所書詞。展于臺上。熟視字畫。乃余作也。讀未竟。一歌者從旁攫取詞。置袖中。舉酒相勞。苦云。釵分金半股之句。朝夕誦之。胡爲余不及此耶。公子云。左驗如此。奚事多遜。抵掌一笑而寤。恍然不曉所謂。戲用其語。綴東坡引歌之。

綠波芳草路。別離記南浦。香雲剪贈音絲縷。釵分金半股。釵分金半股。
陽關一曲聲淒楚。惹起離筵愁緒。夢魂擬逐征鴻去。行雲無定據。行雲無
定據。

蝶戀花 次張俊臣韻

舞處曾看花滿面。獨倚東風。往事思量遍。綠怨紅愁春不管。天涯芳草人
腸斷。一紙雲牋魚雁遠。歸鳳求凰。誰識琴心怨。臂枕香消眉黛斂。也應

爲我寬金釧。

水調歌頭歸自羅浮。舟過于湖。吳張安國。至采石。弔李謫仙。悼今昔二賢豪之不復見也。月夜酌酒江

續。慨然而去。作長短句。

曳杖羅浮去。遼鶴正南翔。青鸞爲報消息。巖壑久相望。無奈漁溪欵乃。喚起蘋洲昨夢。風雨趁歸航。萬里家何許。天闊水雲長。歷五湖。轉湘楚。下三江。興亡千古餘恨。收拾付詩囊。重到燃犀磯渚。不見騎鯨仙子。客意轉淒涼。舉酒酌江月。襟袖淚淋浪。

曹冠 字宗臣。自號雙溪居士。有燕喜集詞一卷。

夏初臨。淳熙戊戌四月既望。游涵碧登生秋冲霄二亭。觴詠竟日。是日也。初夏懷台。園林茂密。瀑泉鏗

鏘。松韻笙簫。巒翠波光。上下相映。佳山句在。我思古人。對景興懷。視今猶昔。何異乎蘭亭之感慨

也。賦夏初臨一闋。以紀時日。

翠入煙嵐。綠鋪槐幄。薰風初扇微和。茂樾扶疎。絳榴花映庭柯。瀑泉飛下層坡。間新篁夾徑。青莎良辰佳景。登臨雋遊。清興何多。流觴高會。不減蘭亭。感懷書事。聊寄吟哦。升沉變化。任他造物如何。躡蹻登攀。蘿上冲霄。滿飲高歌。醉還醒。重宴畫樓。賞翫金波。

浣溪沙柳

翠帶千條蘸碧流。多情不解繫行舟。章臺惜別恨悠悠。濕雨傷春眉黛斂。倚風無力舞腰柔。絲絲煙縷織離愁。

宴桃源遊湖

西湖避暑棹扁舟。忘機狎白鷗。荷香十里供瀛洲。山光翠欲流。歌浩浩。思悠悠。詩成興未休。清風明月解相留。琴聲萬籟幽。

滿江紅

日煖煙輕。竹梢映。花陰凌亂。微風皺。池光弄碧。綠楊垂岸。艷杏牆頭紅粉媚。幽蘭砌下飄香暖。稱邀賓。排日去尋芳。頻歡宴。光景速。渾如箭。醉夢裏。春強半。且花前莫厭。玉杯頻勸。一枕遊仙方警悟。浮名自笑猶縈絆。醉揮毫。付與雪兒歌。嬌鶯轉。

喜遷鶯 上巳遊涵碧

艷陽時序。向被袂芳辰。登臨仙府。碧水澄虛。修篁聳翠。夾徑蕙蘭香吐。春晚巧鶯聲碎。風捲飛紅無數。凝望處。見桑村麥隴。竹溪煙浦。歡聚須信道。遊宦東西。易得成離阻。北海開尊。東山乘興。四樂偷閑贏取。棊戰新來常勝。詩瘦只因吟苦。心湛靜。笑白雲多事。等閑爲雨。

小重山

風颭池荷雨蓋翻。明珠千萬顆。碎仍圓。龜魚浮戲皺清漣。翠光映。垂柳窸瑤煙。幽興寓薰弦。俗塵飛不到。小壺天。身閑無事自超然。拚酌酹。一枕夢游仙。

卜算子 夢仙

午枕夢遊仙。身到蓬萊境。何事鶯聲轉綠楊。剛把人驚醒。乘興對琴尊。寄傲吟光景。繞舍清陰映遠岑。香篆槐堂靜。

臨江仙明遠樓

三洞煙霞多勝致。壺中別有登臨。白鷗飛處晚雲深。羣峯羅戶牖。空翠入衣襟。分得雙溪樓上景。四時佳趣供吟。浩歌鯨飲酒頻斟。鶯花休恨別。風月是知音。

韓

澆

字仲止。潁川人。元吉之子。有高節。從仕不久。卽歸。嘉定中卒。有澆泉詩餘一卷。

賀新郎

病起情懷惡。小簾櫺。楊花墜絮。木陰成幄。試問春光今幾許。甚都把年華忘却。更多少。從前盟約。擬待鶯遷尋好語。恍殘紅。零亂風迴薄。思往事。信如昨。清明寒食須行樂。算人生。何時富貴。自徒蕭索。試著春衫從酒伴。亂插繁英嫩萼。信莫被。功名擔閣。隨分溪山供笑傲。這一身。閑處誰能縛。琴劍外。盡杯酌。

浣溪沙夜飲潘舍人家有客攜家妓來歌

小雨初晴作社寒。月橋花院篆春殘。杏腮桃臉黛眉彎。歌拂燕梁牽客恨。醉臨鸞鏡怕人看。良宵春夢繞屏山。

臨江仙閨怨

脆管繁絃無覓處。小樓空掩遙山。柳絲直下曲闌干。海棠紅欲褪。玉釧怯春衫。帶酒不成芳信斷。社寒新燕呢喃。雕盤慵整寶香殘。綺疏明薄暮。簾外雨潺潺。

青玉案西湖路

蘇公堤上西湖路。柳外約青驄去。多少韶華驚暗度。南山游遍。北山歸後。總是題詩處。如今老矣傷春暮。澤畔行吟漫尋句。拓落情懷空有許。小園芳草。短籬修竹。點點飛花雨。

弄花雨

倚遍闌干弄花雨。卷珠簾。草迷芳樹。山崦裏。幾許煙來往。畫不就。人家院宇。社寒梁燕呢喃舞。小桃紅。海棠初吐。誰信道。午醉醒時情緒。閑整春衫自語。

風入松

小樓春映遠山橫。落遍高城。望中一片斜陽靜。更萋萋。芳草還生。疎雨冷煙寒食。落花飛絮清明。數聲絃管忍重聽。猶帶微醒。問春何事春將老。春不語。春恨難平。莫把風流時節。都歸閑淡心情。

好事近

一澗水南山。臘盡春生梅雪。行過小橋深處。帶疎鐘橫月。征衫閑着指東吳。休怕與人別。吟到翠圓枝上。是歸來時節。

阮郎歸 客舉有詞者因以其韻賦之

小樓秋霽碧闌干。中人初薄寒。霜風吹我到湖山。平林斜照殘。空闊裏。有無間。牽蘿翠袖閑。籃輿興盡却愁還。斷腸歌未闌。

祝英臺近

海棠開。春已半。桃李又如許。一朵梨花。院落闌干雨。不禁中酒情懷。愛閑

懊惱都忘却。舊題詩處。燕鶯語。溪岸點點飛絲。楊柳無重數。帶得愁來。莫恁空休去。斷腸芳草天涯。行雲荏苒。和好夢。有誰分付。

浣溪沙

錦瑟瑤琴續短絃。壁堂初過牡丹天。玉鉤斜壓小珠簾。睡鴨爐溫吟散後。雙鴛屏掩酒醒前。一番春事怨啼鵑。

烏夜啼 九月周國正席賦長短句

年年羞插菊花遊。華髮不禁秋。此日遨頭尋勝。消除萬斛清愁。濕雲涼雨南臺上。歌動玉溪流。俯仰人間今古。多情破帽颼颼。

謁金門 帶湖新月

雲外月。畫出一痕清絕。梅已飄零桃未發。帶湖煙水闊。汀渚尙留微雪。不恨酒融歌歇。老我多情膠漫結。半醒空自說。

桃源憶故人

杏花雨裏東風峭。不比尋常開了。枝上飛來多少。人與春將老。山城燈火笙簫杳。夢到十洲三島。睡覺綺窗清曉。綠遍池塘草。

浣溪沙 戲成寄李好謙

采筆新題字字香。雁來時候燕空梁。芙蓉無處着秋光。人遠山長言外意。曲傳書恨醉時粧。倩誰閑寄水雲鄉。

魏了翁

字華父。號鶴山。蒲江人。慶元五年進士。理宗朝。累官簽書樞密院事。改資政殿學士。福州安撫使。卒贈太師。謚文靖。有鶴山長短句二卷。

清平樂 次韻李提刑垂白笑詞併呈李參政

誰分天種。來上花鬢供。綠葉青雲姿雅重。那得愁心頻捧。他花自是無工。不關香淡香濃。才問為誰含笑。盈盈靴面欹風。

朝中措 和劉左史光祖人日遊南山追和去春詞韻

天公只解作豐年。不相冶遊天。小隊春旗不動。行庖晚突無煙。吟鬚撚斷。寒爐撥盡。雁字天邊。喚起主人失笑。寒灰依舊重然。
公所論聖忌日事。凡歷二十年。而所上疏亦半年餘才見施行。故云。

西江月 夢中作覺後渾能省記獨欠第五句因足成之曉起大雪

一段同雲似練。更無剩幅閑邊。玉娥不怕五更寒。剪就飛花片片。酒裏吟邊競爽。枝頭枝底爭妍。入春無物不芳鮮。只我依然顏面。

朝中措 次韻同官約叔兄及楊仲博約賞郡園牡丹併遣酒代勸

玳筵綺席繡芙蓉。客意樂融融。吟罷風頭擺翠。醉餘日脚沉紅。簡書絆我。賞心無託。笑口難逢。夢草閑眠暮雨。落花獨倚春風。

卜算子 李季允重約登鄂州南樓即席次韻

攜月上南樓。月已穿雲去。莫照峨眉最上峯。同在峯前住。東望極青齊。西顧窮商許。酒到憂邊總未知。猶認胡牀處。

八聲甘州 偶書

被西風。吹不斷新愁。吾歸欲安歸。望秦雲蒼澹。蜀山渺瀟。楚澤平漪。鴻雁依人正急。不奈稻梁稀。獨立蒼茫外。數遍羣飛。多少曹符氣勢。只數舟

燥葦一局枯棋。更元顏何事。花玉困重圍。算眼前。未知誰恃。恃蒼天。終古
限華夷。還須念。人謀如舊。天意難知。

王

邁

字實之。興化軍仙遊人。嘉定十年進士。通判漳州。淳祐中。知邵武軍。予祠。卒贈司農少卿。有隱
軒集十卷。詞附。

賀新郎丁未守邵武宴同官

此是河清宴。覺朝來。薰風滿入。生綃團扇。太守愁眉才一展。且喜街頭米
賤。且莫管。官租難辦。繞砌苔錢無限數。更蓮池。雨過珠零亂。儘買得。凌波
面。家山樂事真堪羨。記年時。荔支新熟。荷筩齊勸。底事來尋蕉鹿夢。羸
得乾忙似箭。笑富貴。都如郵傳。做了豐年還百姓。便尊鱸。歸興催張翰。看
卿等。上霄漢。

劉學箕

字習之。崇安人。有方是閑居士詞一卷。

賀新郎白牡丹京師妓李師師也畫者曲盡其妙

午睡鶯驚起。鬢雲偏。鬢鬆未整。鳳釵斜墜。宿酒殘妝無意緒。春恨春愁似
水。誰共說。厭厭情味。手展流蘇腰肢瘦。嘆黃金。兩鈿香消臂。心事遠。仗誰
寄。簾櫳漸是槐風細。對梧桐。清陰滿院。夏初天氣。回首春空梨花夢。屈
指從頭暗記。嘆薄倖。拋人容易。日斷孤鴻沈雙鯉。恨蕭郎。不寄相思字。幽
恨積。黛眉翠。

惜分飛柳絮

池上樓臺堤上路。盡日悠揚飛舞。欲下還重舉。又隨蝴蝶牆東去。繆徑

飄空無定處。來往綠窗朱戶。却被春風妬。送將蛛網留連住。

念奴嬌 次人韻

斷虹開霽。淨秋容點點。初收微雨。夕下生陰山影淡。縹緲烟雲吞吐。烏帽風偏。青鞵沙軟。誤入桃谿塢。多情鷗鷺。偶來忽又飛去。日暮修竹佳人。霧縠瓊珮。綽約疑仙侶。愧我禪心春盡絮。不逐東風飛舞。紅葉題詩。紫雲傳恨。密意渠能訴。此情疎隔。不關樓外煙樹。

菩薩蠻

莫濤掀浪溪流急。單衣未試春寒力。是處綠陰穠。春深楊柳風。人依溪岸住。酒美忘歸去。巢燕墮芹泥。幽禽花外啼。

醉落魄 用范石湖韻

江頭離席。晚潮雙櫓催行色。往來屬玉雙飛白。笑我多情。猶作未歸客。紅塵奔走何時息。歸心還似投林翼。角巾醉裏從欹側。獨立東風。天際露岑碧。

眼兒媚

十年不見柳腰肢。契闊幾何時。天遙地遠。秋悲春恨。只在雙眉。雁聲今夜樓西畔。情儘眇口期。杏花風景。梧桐夜月。都是相思。

桃源憶故人

莫霞散綺西溪浦。天上晴雲開絮。清絕梅花幾樹。惱亂春愁處。小橋流水人來去。沙岸浴鷗飛鷺。誰畫江南好處。著我閑巾屨。

烏夜啼夜泊揚子江

長亭急管生愁。楚天秋。落日寒鴉飛盡，水悠悠。
紅蓼岸。白蘋散。浴輕鷗。
人在碧雲深處，倚高樓。

衛宗武

字淇父。江南華亭人。淳祐間。歷官尚書郎。出知常州。罷歸。有秋聲集六卷。詞附。

摸魚兒咏小園晚春

小林巒。一年芳事。亂紅還又飛雨。生香冉冉花陰轉。雲擘滿空晴絮。遊燕處。看樂意。相關庭下胎仙舞。歌聲緩度。任圓玉敲寒。飛觴傳曉。未許放春去。
閒中趣。明月清風當戶。莘莘容屋陳俎。剪裁妙語頻賡唱。巧勝郢斤般斧。心自許。拚凋景頽齡。爲鶯儔燕侶。同盟會取。共花下小車。竹間三徑。長作老賓主。

趙璠老

字擘師。東平人。有拙庵詞一卷。

水調歌頭和平湖

梅仙了無語。拄笏看西山。山涵秋曉。水光磨蕩。有無間。自是靈襟空洞。更望風雲吞吐。浩渺白鷗閑。高誦遠遊賦。獨立桂香闌。
謾常談。如觀水。要觀瀾。物情長在。人生何用。苦求難。隨我一觴一詠。任彼非元非白。唯放酒杯寬。富貴儻來事。天道管知還。

陳

著。字子微。鄞縣人。寶祐四年進士。官著作郎。出知嘉興府。忤賈似道。改臨安通判。有本堂詞二卷。

霜天曉角丙寅十一月十七日江行作

江寒雁咽。短棹還催發。曾是玉堂仙吏。相別處。滿篷雪。此別那堪說。翅

風空淚血。惟有梅花依舊。香不斷。夜來月。

卷三二十八續補人 詞五十四首

袁去華

字宣卿。豫章人。有袁宣卿詞一卷。

水調歌頭

鳥影度疎木。天勢入平湖。滄波萬頃輕風。落日片帆孤。渡口千章雲木。蕙
蕙炊煙一縷。人在翠微居。客裏更愁絕。回首憶吾廬。功名事。今老矣。待
何如。拂衣歸去。誰道張翰爲尊鱸。且就竹深荷靜。坐看山高月小。劇飲與
誰俱。長嘯動林木。意氣欲凌虛。

念奴嬌九日

一番雨過。一番涼秋入。蒼崖青壁。晝日多陰。還又是。重九飄零江國。瘦水
鱗鱗。長煙裊裊。楓葉千林赤。南山入望。爲誰依舊佳色。隨分綠酒黃花。
聯鑣飛蓋。總龍山豪客。人世高歌狂笑外。擾擾于身何得。短髮蕭蕭。風吹
烏帽。醉裏從欹側。明年雖健。未知何處相憶。

滿庭芳

麥隴黃輕。桑疇綠暗。野橋新碧泱泱。怕春歸去。鶯語燕飛忙。風定閑花自
落。穿幽徑。拾蕊尋香。會來處。孤雲翠壁。依舊挂斜陽。客愁知幾許。唯思
徑醉。誰與持觴。料文君衣帶。爲我偷長。苦憶新晴晝永。閑相伴。刺繡明牕。
何時得。西風夜雨。枕簟共新涼。

蘭陵王柳下作

曉陰薄。隔屋呼晴噪鵲。長煙裊。輕素望中。林表初陽照城郭。秋容自寂寞。清淺溪痕旋落。橋虹外。晴嶂萬重。雲木千章映樓閣。天涯信飄泊。漫水繞郴山。尺素難託。文園多病寬衣索。最長笛聲斷。畫闌凭煖。黃昏前後况味惡。甚良宵閑却。遼邈。誤行樂。料恨寄徽弦。心倦梳掠。西風滿院垂簾幙。對千里明月。五更悲角。歸期秋盡尙未定。怎睡著。

瑞鶴仙

郊原初過雨。見敗葉零亂。風定猶舞。斜陽挂深樹。映濃愁淺黛。遙山眉嫵。來時舊路。尙巖花嬌黃半吐。到而今。唯有溪邊流水。見人如故。無語郵亭深靜。下馬還尋。舊會題處。無聊倦放。傷離恨。最愁苦。縱收香藏鏡。他年重到。人面桃花在否。念沈沈小閣。幽牕有時夢去。

八聲甘州

正陰陰。夏木聽黃鸝。百轉語惺鬆。乍鈎簾意適。臨池倒影。竹樹青葱。翠蓋紅妝窈窕。香引一簾風。向晚追涼處。月挂梧桐。何處樓頭吹笛。漸玉繩低側。河漢橫空。想調冰雪藕。清夜與誰同。貯離愁。難憑夢寄。縱遣書。何日有征鴻。房櫳靜。伴人孤寂。惟有鳴蛩。

傾杯近

邃館金鋪半掩。簾幙參差影。睡足槐陰轉午。鳥啼人寂靜。殘妝褪粉。鬆髻欹雲慵不整。儘無言。手揆裙帶。繞花徑。酒醒時。夢回處。舊事何堪省。共

載尋春。並坐調箏。何時更。心情盡日。一似楊花。飛去無定。未黃昏。又先愁夜永。

側犯

篆銷餘馥。燭堆殘蠟。房櫳曉。寒峭。看杏臉羞紅。尙嬌小。遊蜂靜院落。綠水搖池沼。閑繞。翠樹底。攢頭聽啼鳥。愁風怕雨。彈指春光了。音信杳。最堪恨。歸雁過多少。困倚孤眠。晝長人悄。睡足依然半牕殘照。

垂絲釣

江楓秋老。曉來紅葉如掃。暮雨生寒。正北風低草。賓鴻早。亂半川殘照。傷懷抱。記西園飲處。微雲弄月。梅花人面爭好。路長信杳。度日房櫳悄。還是黃昏到。歸夢少。縱夢歸。易覺。

安公子

弱柳絲千縷。嫩黃勻遍。鷓啼處。寒入羅衣。春尙淺。過一番風雨。問燕子。來時綠水橋邊路。會畫樓。見箇人人否。料靜掩雲牕。塵滿哀弦危柱。庾信愁如許。爲誰都著眉端聚。獨立東風。彈淚眼。寄煙波東去。念永晝。春閑人倦如何度。閑傍枕。百轉黃鸝語。喚覺來厭厭。殘照依然花塢。

一叢花

東風吹恨著眉心。金約瘦難任。西牕翦燭。渾如夢。最愁處。南陌分襟。香歇繡囊。塵生羅幌。憔悴到如今。小花幽院夜沈沈。涼月轉槐陰。拂牆樹動。開朱戶。又贏得。愁與更深。青翼不來。征鴻難倩。流怨入瑤琴。

謁金門

春索莫。樓上晚來風惡。午醉初醒羅袖薄。護寒添翠幙。愁裏花時過却。閑處淚珠偷落。憔悴只羞人問著。鏡中還自覺。

又

歸鳥急。照水斜陽紅濕。蓬底夜涼風露入。藕花香習習。點滴城頭漏泄。淒斷草間蟲泣。新恨舊愁眉上集。月斜還竚立。

又

清漢曲。天際落霞孤鶩。幽草牆陰秋更綠。倚簷三兩竹。繡被林香獨宿。夢繞綠牕華屋。何日明眸光射日。夜闌更秉燭。

浣溪沙

庭下叢萱翠欲流。梁間雙燕語相酬。日長簾底篆煙留。金勒去遙芳草歇。玉簫吹罷紫蘭秋。一年春事只供愁。

相思引

曉鑑燕脂拂紫綿。未忺梳掠髻雲偏。日高人靜沈水裊殘煙。春老菖蒲花未著。路長魚雁信難傳。無端風絮飛到繡牀邊。

玉樓春

垂鬟初學窺門戶。妙舞妍歌俱獨步。引成密約笑言間。認得真情離別處。潘郎兩鬢今如許。縱得相逢知認否。多時無雁寄書來。今夜倩風吹夢去。

東坡引

隴頭梅半吐。江南歲將暮。閑牕盡日將愁度。黃昏愁更苦。歸期望斷。雙魚尺素。念嘶騎。今到何處。殘燈背壁三更鼓。斜風吹細雨。

黎廷瑞

字祥仲。鄱陽人。咸淳七年進士。官肇慶府司法參軍。有芳洲集二卷。詞附。

清平樂

秋懷騷屑。臥聽蕭蕭葉。四壁寒蛩吟不歇。舊恨新愁都說。疎疎雨打栖鴉。月痕猶在牕紗。一夜西風能緊。明朝瘦也黃花。

浪淘沙

惜別
別易見時難。萬水千山。參商煙樹暮雲間。料想鳳凰城裏夢。夜夜歸鞍。楊柳小樓閒。倚遍闌干。東風翦翦雨珊珊。落盡桃花無可落。只管春寒。

浣溪沙

送別
一曲離愁淺黛顰。雲帆渺渺下煙津。山長水遠客愁新。柳絮低迷千里夢。桃花蕩漾一江春。小樓疎雨可憐人。

朝中措

送春
游絲千萬暖風柔。只繫得春愁。恨殺啼鶯勾引。孤他燕語攀留。縱然留住。香紅吹盡。春也堪羞。去去不堪回首。斜陽一點西樓。

眼兒媚

寓城思歸竹庵留行賦呈
暖雲挾雨洗香埃。剗地峭寒催。燕兒知否。鶯兒知否。廝勾春回。小樓日日重簾捲。應是把人猜。杏花如許。桃花如許。不見歸來。

曲屏深院赴幽期。心事夢雲知。佩環零亂何處。江上草離離。日平西。天似暮。月如眉。依稀還記。兩岸楊花。送上船時。

清平樂 用中春懷呈準軒

清明寒食。過了空相憶。千里音書無處覓。渺渺亂蕪搖碧。蒼天雨細風斜。小樓燕子誰家。只道春寒都盡。一分猶在桐花。

秦樓月 梅花

羅浮暮。青松林下相逢處。相逢處。綰衣素袂。沉吟無語。行雲飛入瑤臺路。夢回漂渺香風度。香風度。參橫月落。幾聲翠羽。

又

醒人眼。一枝玉雪疎籬晚。疎籬晚。精神曠逸。風姿凝遠。幽香零亂無人管。依依春恨天涯滿。天涯滿。霜城戍角。月樓羌管。

又

幽香歇。玉龍吹徹花如雪。花如雪。小橋流水。不勝愁絕。橫梢翦入生綃墨。翠陰青子盈盈結。盈盈結。淡煙微雨。江南三月。

李好古 履貫未詳。自署鄉貢免解進士。有碎錦詞一卷。

醉江月

平生英氣。歎年來都付。山林泉石。不作雲霄軒冕夢。祇擬綸竿蓑笠。見說湖陰。飛飛鷗鷺。半是君曾識。梅花時節。試來相與尋覓。休謾汨沒塵埃。

浮生能幾。鏡裏催華髮。趁取尊前強健在。莫負花朝傾碧。自遣長鬚。親題短句。去約蕭閑客。休教惆悵。梅花飛盡寒食。

張真人 號虛靖先生。有虛靖詞一卷。

江神子

彩雲樓閣瑞煙平。雨初晴。月朧明。夜靜天風。吹下步步虛聲。何處朝元歸去晚。雙鳳小。五雲輕。落花流水兩關情。恨無憑。夢難成。倚徧闌干。依舊楚風清。露滴松梢人靜也。開寶篆。誦黃庭。

松菊道人 履貫未詳。有巢令君阮戶部詞一卷。

感皇恩 閏上元

芝檢下中天。春寒猶淺。餘閏銀蟾許重看。滿城燈火。又遍高樓深院。寶鞍催繡轂。香風軟。惟悴慢翁。蕭條古縣。隨分良辰試開宴。且傾芳酒。共聽新聲弦管。夜闌人未散。更籌轉。

張伯淳 字師道。崇德人。宋末舉童子科。至元二十二年。以薦除杭州路教授。大德中。官至翰林侍講學

士。有養蒙先生詞一卷。

唐多令 寄吳閑閑

移住近瀛洲。天槎去莫留。數歸期已過中秋。上界羣仙官府是。雲不礙。水長流。酒令與詩籌。依然記舊游。倚斜陽分付羈愁。應與鰲峯人共語。還不減。去年否。

齊天樂 送馬德昌

人生南北如歧路。相逢自憐不早。傾蓋班荆。分燈並壁。吟卷筆牀茶竈。交情古道。怕催詔翩翩。好風吹到。聚久別離。砌菴那更碎懷抱。臨行誰勸駐馬。待將塵土事。妨我吟嘯。小住雖佳。還堪就否。催得雲帆縹緲。官梅正好。比前度孤山。賸開多少。兩處心旌。倚樓同晚照。

又次韻謝勸翁

班荆傾蓋當時事。回頭屢更寒暑。倦翼才還。蒼顏易得。零落江陵千樹。相逢冷署。且莫訝儒冠。解將人誤。計我生朝。采箋新調映紅炬。投閑誰道太早。人生行樂耳。何地非旅。綠暗吟眸。紅生醉臉。聊對簷花細雨。移尊共語。問何日扁舟。嫩荷香處。坐待蟾光。四更猶未吐。

朱晞顏

字景淵。長興人。有瓢泉吟稿五卷。詞附。

滿庭芳 和趙仲敬詠雪

翦水飛花。裁冰作絮。龍宮不管嚴寒。斜侵風帽。吟鬢忽衰殘。誰念梁園倦客。黃金盡。作賦才慳。飄流久。寒欺敝褐。猶是馬蹄間。兒時曾從獵。呼鷹野外。落雁雲端。猛呼酒霜鞵。濕遍紅鴛。倚馬酣歌秦妓。紫貂暖。不上裘船。今遲暮。翩翩孤劍。寂寞渡桑乾。

木蘭花慢 陳伯永竹院有魏鶴山題名

信吟筇到處。儘可款。箇人家。見碧甃橫陳。粉牆低亞。亂鎖烟霞。森森萬竿如束。倚虛欄。風影自交加。一點塵無几研。十分清到窗紗。堪嘉。玉立瘦穿沙。池色淨無瑕。向良夜移牀。靜臨書帖。閑試茶瓜。明月清風仍好。但秦

宮。梁苑遍栖鴉。零落殘香秀墨。春衣拂遍苔花。

念奴嬌

倦懷無據。凭危欄極目。寒江斜注。吳楚風烟遙入望。獨識登臨真趣。晚日帆檣。秋風鐘梵。倚遍樓東柱。興來攜手。與君更上高處。隱約一水中分。金鰲戴甲。力與蛟龍拒。擬訪臨臯清夜鶴。誰解坡仙神遇。斷壁懸秋。驚濤翹月。總是無聲句。勝游如掃。大江依舊東去。

賀新郎 歸雁送劉季和韻

雲影低平楚。看翩翩。離羣避暖。去尋孤戍。猶記登樓看瘦字。零落西風無數。把往事。書將空處。乍別榆關秋夢迥。向江南。睡足菰蒲雨。天欲暝。雪初絮。江空歲晏衡陽度。檻冥冥。稻梁謀拙。弋人何慕。行斷驚飛悲弔影。誰念嘹風最苦。筭只有。天涯羈旅。莫聽城笳迷去翮。被落花。飛絮相縈住。輸海燕。笑遲暮。

姚燧

字端甫。號故菴。河南人。姚樞之從子。初以薦入秦王府文學。官至翰林學士承旨。集賢大學士。謚曰文。有牧菴詩文集三十四卷。詞一卷。

摸魚子 賦玉簪錄呈趙太初兼與時中茂異

更休尋。玉山瑤草。蓬萊知在何處。司花嫌被春風妬。留待九秋清露。還解語。試問著。當時月夜乘鸞女。何年遺汝。甚不怕高寒。青冥萬里。鬢鬢亂風霧。人間世。無物有香如許。靈均遺恨千古。芙蓉杜若何堪佩。顛顛行吟。沉浦空自苦。悄教得。揚雄不信離騷賦。雲牕月戶。恨白髮詩翁。年來多病。

不識醉鄉路。

王

結

字儀伯。定興人。仁宗在潛邸時。以薦充宿衛。及即位。遷集賢直學士。元統中。官至中書左丞。諡文忠。有王文忠集五卷。詞一卷。

南鄉子 秋日旅懷

秋氣入簾櫳。矮榻虛軒睡思濃。夢覺黃梁初未熟。相逢。都在邯鄲逆旅中。擾擾政愁儂。雨霽西山翠幾重。更上層樓閒徙倚。晴空。目送冥飛萬里鴻。

木蘭花慢 送李公敏

渺平蕪千里。烟樹遠。澹斜暉。正秋色橫空。西風浩蕩。一雁南飛。長安兩年行客。更登山臨水。送將歸。可奈離懷慘慘。還令遠思依依。當年寥廓與君期。塵滿芰荷衣。把千古高情。傳將瑤瑟。付與湘妃。栽培海隅桃李。洗蠻烟。瘴雨布春暉。鸚鵡洲前夜月。醉來傾寫珠璣。

摸魚兒 秋日旅懷

快秋風。颯然來此。可能消盡殘暑。辭巢燕子呢喃語。喚起滿懷離苦。來又去。定笑我。兩年京洛長羈旅。此時愁緒。更門掩蒼苔。黃昏人靜。閒聽打窗雨。英雄事。漫說聞鷄起舞。幽懷感念今古。金張七葉貂蟬貴。寂寞子雲誰數。癡絕處。又剗地。欲摻朱墨趨官府。瑤琴獨撫。惟流水高山。遺音三嘆。獨冀賞心遇。

陳

櫟

字壽翁。號定宇。休寧人。宋亡後。隱居二十八年。至延祐甲寅。年六十三。復出應試。中浙江鄉試。

卷二十八續補人

詞五十四首

五六五

有定字集十七卷。詞附。

玉樓春和金滄州

新篁搖翠添波綠。裝點璫溪深一曲。青衫司馬緩來游。卜夜清歡孤繼燭。江心挑杖聊開束。更好著鞭馳駿足。樽前纔聽遏雲聲。劣可纖纖扶藥玉。

陸文圭

字子方。江陰人。宋咸淳初。以春秋中鄉選。延祐設科。再中鄉舉。以老疾不應徵召。入元後五十餘年。至泰定天歷間。應聘。設教容山。至正初始卒。有牆東類稿二十卷。詞附。

點絳脣

永夜無慟。更堪點滴聽簷溜。枕寒難就。堆亂牀衾繡。人面桃紅。還憶擎漿手。君知否。倚門獨守。又是清明後。

唐多令寄遠

明艷注秋波。輕鬆綰髻螺。怕逢人先斂雙蛾。怯雨羞雲情未穩。佳會少。遠離多。梁繞憶清歌。蘭舟肯更過。為他垂淚染香羅。欲倩鱗鴻將錦字。知別後。意如何。

水龍吟次韻寄藥房

燕芹香老春深。微風點動新篁翠。驚敲夢斷。忙呼小玉。故人來未。香縷篩簾。游絲墮几。暖薰花氣。問春隨鶯到。又催燕去。誰解得。東君意。澗水流紅影裏。小樓東。有人孤倚。殘桃著雨。鬢容撩亂。未堪妝洗。冉冉年光。悠悠時事。不如沉醉。更韋娘一曲。司空慣見。也應回睇。

細草黏冰。疎林補雪。衰翁未覺春暖。曝背低簷。燎衣破竈。誰識舞臺歌館。樂事如今懶。謝鄰伴。東招西喚。何消看試華燈。月光今夕圓滿。念昔繁華帝里。侍鳳輦。夜游。糊曉人散。牙鼓方催。韻簫正美。忽被西風吹斷。簌簌梅花落。忍聽得。一聲羌管。懷古傷情。淚痕濕。春衫短。

吳

存

字仲退。鄱陽人。官寧國路儒學教授。調鄱陽縣主簿。致仕卒。年八十二。有樂菴集一卷。

霜天曉角 峨眉亭次韻

龍梭四壁。風浪生尋尺。却上危亭孤嘯。天無際。水無極。百年緣底急。晚風牛背笛。回首故鄉千里。山一髮。暮江碧。

摸魚兒 揚州

笑風流。少年杜牧。如今雙鬢成雪。來尋荳蔻梢頭夢。二十四橋明月。人事別。把故國。興亡欲問無人說。淮雲萬疊。但雨外疎鐘。煙中斷角。到曉共鳴咽。蕪城外。幾樹西風落葉。消磨多少豪傑。平山堂上朝中措。千載妙音幾絕。歌一闋。怪水部。梅花怪我心如鏡。才情未竭。待跨鶴重來。纏腰半解。一奏玉笙徹。

木蘭花慢 春興

問東君。識我。應怪我。鬢將華。甚破帽。蹇驢。清明無酒。寒食無家。東風綠蕪千里。怕登樓。歸思渺天涯。煙外一雙燕子。雨中半樹梨花。日長孤館小窗紗。新火試團茶。想明月。灣頭。家家筍蕨。井井桑麻。年華不饒倦客。早青

梅如豆柳藏鴉。欲逐夢魂歸去。客窗一夜鳴蛙。

朝中措春歸

蜂脾蜜滿燕成窠。春事已無多。風景付渠啼鴉。客情還我煙莎。春來風雨。春歸風雨。春竟如何。輸與前溪醉叟。紅雲波上漁歌。

浣溪沙春閨送別

花滿離筵酒滿瓶。摘花未語淚先零。杯行教醉莫教醒。今夜醺醺連理枕。明朝柳絮短長亭。一般杜宇兩般聽。

木蘭花慢清明夜與芳洲話舊

又清明寒食。淡孤館。鬱無慘。正杜宇催春。桐花送冷。門巷蕭條。芳洲老仙來下。粲黃冠。翠篋瓊瑤。兩客清談未了。三更風雨瀟瀟。青雲妙士早相招。同泛瀨江湖。看眼閱青徐。氣橫燕趙。天路逍遙。明年此時何處。定軟紅。道上玉驄驕。萬里江南歸夢。青燈還憶今宵。

八聲甘州禊日禁酤

甚無情。一信棟花風。捲盡市帘青。對樓臺寂寂。管絃悄悄。煙雨冥冥。屋角提壺笑我。不上五峯亭。此日流觴節。宜醉宜醒。說無渠。僕知否。正門譏太白。巷詬劉伶。網絲沉玉罌。蘇暈入銀瓶。便山陰。蘭亭佳會。儘風流。千載事須停。西窗下。焚香晝永。一卷茶經。按元史。世祖二十一年。以盧世榮言。行古權酤法。米一

石。取鈔十貫。禁民私酤。此云禊日禁酤。當在至元乙酉二月也。

張仲仁 字仲父。

水調歌頭游澹巖賦此

石屋勢平曠。峭壁幾巉崑。妙哉天造地設。誰復謂神剌。疇昔涪翁題品。會說人寰稀有。豈特冠湘南。趁取腳輕健。相與上高寒。避秦者。君莫問。意其間。祖龍文密。至今草木尙愁顏。贏得功成丹鼎。久矣乘風而去。跨鶴與驂鸞。猶有白雲在。鎮日繞禪關。

又

澹氏人安在。縹緲九霄間。我來唯有石屋。周覽百尋寬。一曲中分夷險。兩牖空光平布。滿洞貯清寒。高致自堪仰。何必論金丹。周賢士。知此意。薄秦官。一牀一枕。依然猶伴白雲閑。門外俗塵如海。門裏道心如水。談笑足回瀾。此事無今古。不信叩嶠山。



中華民國柒拾捌年陸月廿日贈

中華民國二十五年三月初版



詞

綜

(全一册)

定價國幣一元五角

(外埠酌加運費匯費)

國學整理社

世界書局

上海大連灣路
世界書局

發行所

上海及各省

世界書局

詩

詞

精

選

蘇淵雷編

▼中國三千年來詩詞之精華。盡萃於斯。

首首是名家手筆——關關是代表作品

一唱
三嘆

自近代詩起
直至詩經止

精裝一冊

百讀
不厭

價洋一元八角

(寄費掛號一角五分半)

目 要

- 1. 新詩與譯詩
- 2. 近代詩
- 3. 元明清詩詞散曲
- 4. 唐五代兩宋詞
- 5. 唐詩
- 6. 魏晉南北朝隋詩
- 7. 樂府古詩
- 8. 楚辭
- 9. 詩經

世界書局發行

國家圖書館



000797839

仿古字版

詞綜

精裝一冊 一元五角

(寄費掛號一角三分)

朱彝尊選纂

汪森增纂

彝尊未冠。卽肆力古學。無書不覽。詩文並勝。詞尤清麗。是書由其手纂。而汪森增補之。採撫繁富。鑒別精審。迥出諸家詞選之上。本書所選。自唐而至於元。均係名家之作。得詞凡二千四百闕。蔚爲大觀。世之愛好詞者。此書當爲必讀之書。全書用仿古字排印。精雅醒目。

世界書局發行